

# Génesis

**1** IN die begin het

God die hemel en die aarde geskape.

<sup>2</sup> En die aarde was woest en leeg, en duisternis was op die wêreldvloed, en die Gees van God het gesweef op die waters.

<sup>3</sup> En God het gesê: Laat daar lig wees! En daar was lig.

<sup>4</sup> Toe sien God dat die lig goed was. En God het skeiding gemaak tussen die lig en die duisternis;

<sup>5</sup> en God het die lig dag genoem, en die duisternis het Hy nag genoem. En dit was aand en dit was môre, die eerste dag.

<sup>6</sup> En God het gesê: Laat daar 'n uitpansel wees tussen die waters, en laat dit skeiding maak tussen waters en waters.

<sup>7</sup> God het toe die uitpansel gemaak en die waters wat onder die uitpansel is, geskei van die waters wat bo die uitpansel is. En dit was so.

<sup>8</sup> En God het die uitpansel hemel genoem. En dit was aand en dit was môre, die tweede dag.

<sup>9</sup> En God het gesê: Laat die waters onder die hemel hulle op een plek versamel, sodat die droë grond sigbaar word. En dit was so.

<sup>10</sup> En God het die droë grond aarde genoem, en die versameling van die waters het Hy see genoem. Toe sien God dat dit goed was.

<sup>11</sup> En God het gesê: Laat die aarde voortbring grasspruitjies, plante wat saad gee en bome wat, volgens hulle soorte,

vrugte dra, waarin hulle saad is, op die aarde. En dit was so.

<sup>12</sup> Die aarde het voortgebring grasspruitjies, plante wat saad gee volgens hulle soorte en bome wat vrugte dra, waarin hulle saad is, volgens hulle soorte. Toe sien God dat dit goed was.

<sup>13</sup> En dit was aand en dit was môre, die derde dag.

<sup>14</sup> En God het gesê: Laat daar ligte wees aan die uitpansel van die hemel, om skeiding te maak tussen die dag en die nag; en laat hulle dien as tekens sowel vir vaste tye, asook vir dae sowel as jare.

<sup>15</sup> Laat hulle ook dien as ligte aan die uitpansel van die hemel om lig te gee op die aarde. En dit was so.

<sup>16</sup> God het toe die twee groot ligte gemaak: die groot lig om te heers oor die dag en die klein lig om te heers oor die nag; ook die sterre.

<sup>17</sup> En God het hulle aan die uitpansel van die hemel gestel om lig te gee op die aarde

<sup>18</sup> en om teheers oor die dag en oor die nag en om skeiding te maak tussen die lig en die duisternis. Toe sien God dat dit goed was.

<sup>19</sup> En dit was aand en dit was môre, die vierde dag.

<sup>20</sup> En God het gesê: Laat die waters wemel met 'n gewemel van lewende wesens, en laat die voëls oor die aarde vlieg langs die uitpansel van die hemel.

<sup>21</sup> En God het die groot seediere geskape en al die lewende wesens wat beweeg,

## Génesis 2

---

waar die waters van wemel, volgens hulle soorte; en al die gevleuelde voëls volgens hulle soorte. Toe sien God dat dit goed was.

<sup>22</sup> En God het hulle geseën en gesê: Wees vrugbaar en vermeerder en vul die waters in die see, en laat die voëls op die aarde vermeerder.

<sup>23</sup> En dit was aand en dit was môre, die vyfde dag.

<sup>24</sup> En God het gesê: Laat die aarde lewende wesens voortbring volgens hulle soorte: vee, kruipende diere en wilde diere van die aarde volgens hulle soorte. En dit was so.

<sup>25</sup> En God het die wilde diere van die aarde gemaak volgens hulle soorte en die vee volgens hulle soorte en al die diere wat op die grond kruip, volgens hulle soorte. Toe sien God dat dit goed was.

<sup>26</sup> En God het gesê: Laat Ons mense maak na ons beeld, na ons gelykenis, en laat hulle heers oor die visse van die see en die voëls van die hemel en die vee en oor die hele aarde en oor al die diere wat op die aarde kruip.

<sup>27</sup> En God het die mens geskape na sy beeld; na die beeld van God het Hy hom geskape; man en vrou het Hy hulle geskape.

<sup>28</sup> En God het hulle geseën, en God het vir hulle gesê: Wees vrugbaar en vermeerder en vul die aarde, onderwerp dit en heers oor die visse van die see en die voëls van die hemel en oor al die diere wat op die aarde kruip.

<sup>29</sup> Verder het God gesê: Ek gee nou aan julle al die plante wat saad gee, wat op die

hele aarde is, en al die bome waar boomvrugte aan is, wat saad dra. Dit sal julle voedsel wees.

<sup>30</sup> Maar aan al die diere van die aarde en al die voëls van die hemel en al die kruipende diere op die aarde, waarin 'n lewende siel is, gee Ek al die groen plante as voedsel. En dit was so.

<sup>31</sup> Toe sien God alles wat Hy gemaak het, en—dit was baie goed. En dit was aand en dit was môre, die sesde dag.

**2** SO is dan voltooi die hemel en die aarde met hulle ganse leërmag.

<sup>2</sup> En God het op die sewende dag sy werk voltooi wat Hy gemaak het, en op die sewende dag gerus van al sy werk wat Hy gemaak het.

<sup>3</sup> En God het die sewende dag geseën en dit geheilig, omdat Hy daarop gerus het van al sy werk wat God geskape het deur dit te maak.

<sup>4</sup> DIT is die geskiedenis van die hemel en die aarde toe hulle geskape is. Die dag toe die HERE God die aarde en die hemel gemaak het,

<sup>5</sup> was daar nog geen struik in die veld op die aarde nie, en geen plante van die veld het nog uitgespruit nie; want die HERE God het nog nie laat reën op die aarde nie, en daar was geen mens om die grond te bewerk nie.

<sup>6</sup> Maar 'n mis het opgetrek uit die aarde en die hele aardbodem bevogtig.

<sup>7</sup> En die HERE God het die mens geformeer uit die stof van die aarde en in sy neus die asem van die lewe geblaas. So het dan die mens 'n lewende siel geword.

## Génesis 3

---

<sup>8</sup> Ook het die HERE God 'n tuin geplant in Eden, in die Ooste, en daar aan die mens wat Hy geformeer het, 'n plek gegee.

<sup>9</sup> En die HERE God het allerhande bome uit die grond laat uitspruit, begeerlik om te sien en goed om van te eet; ook die boom van die lewe in die middel van die tuin, en die boom van die kennis van goed en kwaad.

<sup>10</sup> En daar het 'n rivier uit Eden uitgegaan om die tuin nat te maak; en daarvandaan is dit verdeel en het vier lope geword.

<sup>11</sup> Die naam van die eerste is die Pison. Dit is hy wat om die hele land Hávila loop waar die goud is.

<sup>12</sup> En die goud van dié land is goed. Daar is ook balsemgom en onikssteen.

<sup>13</sup> En die naam van die tweede rivier is die Gihon. Dit is hy wat om die hele land Kus loop.

<sup>14</sup> En die naam van die derde rivier is die Hiddékel. Dit is hy wat oos van Assur loop. En die vierde rivier is die Frat.

<sup>15</sup> Toe het die HERE God die mens geneem en hom in die tuin van Eden gestel om dit te bewerk en te bewaak.

<sup>16</sup> En die HERE God het aan die mens bevel gegee en gesê: Van al die bome van die tuin mag jy vry eet,

<sup>17</sup> maar van die boom van die kennis van goed en kwaad, daarvan mag jy nie eet nie; want die dag as jy daarvan eet, sal jy sekerlik sterwe.

<sup>18</sup> Ook het die HERE God gesê: Dit is nie goed dat die mens alleen is nie. Ek sal vir hom 'n hulp maak wat by hom pas.

<sup>19</sup> En die HERE God het uit die aarde

geformeer al die diere van die veld en al die voëls van die hemel en hulle na die mens gebring om te sien hoe hy hulle sou noem. En net soos die mens al die lewende wesens genoem het, so moes hulle naam wees.

<sup>20</sup> So het die mens dan name gegee aan al die vee en aan die voëls van die hemel en aan al die wilde diere van die veld, maar vir die mens het hy geen hulp gevind wat by hom pas nie.

<sup>21</sup> Toe het die HERE God 'n diepe slaap op die mens laat val; en terwyl hy slaap, het Hy een van sy ribbebene geneem en die plek daarvan met vlees toegemaak.

<sup>22</sup> En die HERE God bou die rib wat Hy van die mens geneem het, tot 'n vrou en bring haar na die mens.

<sup>23</sup> Toe sê die mens: Dit is nou eindelijk been van my gebeente en vlees van my vlees. Sy sal mannin genoem word, want sy is uit die man geneem.

<sup>24</sup> Daarom sal die man sy vader en moeder verlaat en sy vrou aankleef. En hulle sal een vlees wees.

<sup>25</sup> En hulle was altwee naak, die mens en sy vrou, maar hulle het hul nie geskaam nie.

**3** MAAR die slang was listiger as al die diere van die veld wat die HERE God gemaak het. En hy sê vir die vrou: Is dit ook so dat God gesê het: Julle mag nie eet van al die bome van die tuin nie?

<sup>2</sup> En die vrou antwoord die slang: Van die vrugte van die bome in die tuin mag ons eet,

<sup>3</sup> maar van die vrugte van die boom wat in

## Génesis 3

---

die middel van die tuin is, het God gesê: Julle mag daarvan nie eet nie en dit nie aanroer nie, anders sal julle sterwe.

<sup>4</sup> Toe sê die slang vir die vrou: Julle sal gewis nie sterwe nie;

<sup>5</sup> maar God weet dat as julle daarvan eet, julle oë sal oopgaan, sodat julle soos God sal wees deur goed en kwaad te ken.

<sup>6</sup> Toe sien die vrou dat die boom goed was om van te eet en dat hy 'n lus was vir die oë, ja, 'n boom wat 'n mens kan begeer om verstand te verkry; en sy neem van sy vrugte en eet en gee ook aan haar man by haar, en hy het geëet.

<sup>7</sup> Toe gaan altwee se oë oop, en hulle word gewaar dat hulle naak is; en hulle het vyeblare aanmekaargewerk en vir hulle skorte gemaak.

<sup>8</sup> En hulle het die stem van die HERE God gehoor terwyl Hy wandel in die tuin in die aandwindjie; en die mens en sy vrou het hulle verberg vir die aangesig van die HERE God tussen die bome van die tuin.

<sup>9</sup> Toe roep die HERE God na die mens en sê vir hom: Waar is jy?

<sup>10</sup> En hy antwoord: Ek het u geruis gehoor in die tuin en gevrees, want ek is naak; daarom het ek my verberg.

<sup>11</sup> En Hy sê: Wie het jou te kenne gegee dat jy naak is? Het jy geëet van die boom waarvan Ek jou beveel het om nie te eet nie?

<sup>12</sup> En die mens antwoord: Die vrou wat U gegee het om by my te wees, sy het my van die boom gegee, en ek het geëet.

<sup>13</sup> Daarop sê die HERE God aan die vrou: Wat het jy nou gedoen? En die vrou

antwoord: Die slang het my bedrieg, en ek het geëet.

<sup>14</sup> Toe sê die HERE God aan die slang: Omdat jy dit gedoen het, is jy vervloek onder al die vee en al die diere van die veld. Op jou buik moet jy seil, en stof moet jy eet al die dae van jou lewe.

<sup>15</sup> En Ek sal vyandskap stel tussen jou en die vrou, en tussen jou saad en haar saad. Hy sal jou die kop vermorsel, en jy sal hom in die hakskeen byt.

<sup>16</sup> Aan die vrou het Hy gesê: Ek sal grootliks vermeerder jou moeite en jou swangerskap; met smart sal jy kinders baar; en na jou man sal jou begeerte wees, en hy sal oor jou heers.

<sup>17</sup> En aan die mens het Hy gesê: Omdat jy geluister het na die stem van jou vrou en van die boom geëet het waarvan Ek jou beveel het om nie te eet nie—vervloek is die aarde om jou ontwil; met moeite sal jy daarvan eet al die dae van jou lewe.

<sup>18</sup> Ook sal dit vir jou dorings en distels voortbring; en jy sal die plante van die veld eet.

<sup>19</sup> In die sweet van jou aangesig sal jy brood eet totdat jy terugkeer na die aarde, want daaruit is jy geneem. Want stof is jy, en tot stof sal jy terugkeer.

<sup>20</sup> En die mens het sy vrou Eva genoem, omdat sy moeder geword het van alles wat lewe.

<sup>21</sup> En die HERE God het vir die mens en sy vrou rokke van vel gemaak en hulle dit aangetrek.

<sup>22</sup> Toe sê die HERE God: Nou het die mens geword soos een van Ons deur goed en

## Génesis 4

---

kwaad te ken. As hy nou maar nie sy hand uitsteek en ook van die boom van die lewe neem en eet en lewe in ewigheid nie!

<sup>23</sup> Toe stuur die HERE God hom weg uit die tuin van Eden om die grond te bewerk waaruit hy geneem is.

<sup>24</sup> So het Hy dan die mens weggedrywe en gérubs aan die oostekant van die tuin van Eden laat woon, met die swaard wat vlam en flikker, om die toegang tot die boom van die lewe te bewaak.

**4** EN die mens het sy vrou Eva beken, en sy het swanger geword en Kain gebaar en gesê: Ek het 'n man verkry met die hulp van die HERE.

<sup>2</sup> Daarna het sy ook sy broer Abel gebaar. En Abel het 'n skaapherder geword, en Kain 'n landbouer.

<sup>3</sup> En ná verloop van tyd het Kain van die vrugte van die land aan die HERE 'n offer gebring.

<sup>4</sup> En Abel het ook van die eersgeborenes van sy kleinvee gebring, naamlik van hulle vet. En die HERE het Abel en sy offer genadig aangesien,

<sup>5</sup> maar Kain en sy offer nie aangesien nie. Toe word Kain baie kwaad, en hy het sy hoof laat hang.

<sup>6</sup> En die HERE sê vir Kain: Waarom is jy kwaad, en waarom laat jy jou hoof hang?

<sup>7</sup> Is daar nie verheffing as jy goed doen nie? En as jy nie goed doen nie—die sonde lê en loer voor die deur, en sy begeerte is na jou; maar jy moet daaroor heers.

<sup>8</sup> En Kain het met sy broer Abel gepraat; en toe hulle in die veld was, het Kain teen sy broer Abel opgestaan en hom doodgeslaan.

<sup>9</sup> Toe sê die HERE vir Kain: Waar is jou broer Abel? En hy antwoord: Ek weet nie. Is ek my broer se wagter?

<sup>10</sup> En Hy sê: Wat het jy gedoen? Die stem van die bloed van jou broer roep na My van die aarde af.

<sup>11</sup> Daarom sal jy vervloek wees, ver van die grond wat sy mond oopgemaak het om die bloed van jou broer uit jou hand te ontvang.

<sup>12</sup> As jy die grond bewerk, sal dit sy vermoë aan jou nie meer gee nie; 'n swerwer en vlugteling sal jy wees op die aarde.

<sup>13</sup> Daarop sê Kain vir die HERE: My skuld is te groot om dit te dra.

<sup>14</sup> Kyk, U verdryf my nou uit die land uit, en ek moet my verberg vir u aangesig: 'n swerwer en vlugteling sal ek op die aarde wees, en elkeen wat my kry, sal my doodslaan.

<sup>15</sup> Maar die HERE sê vir hom: Daarom, as enigeen Kain doodslaan, sal dit sewevoudig gewreek word. En die HERE het 'n teken gegee aan Kain, sodat enigeen wat hom kry, hom nie sou doodslaan nie.

<sup>16</sup> Toe gaan Kain weg van die aangesig van die HERE, en hy het gewoon in die land Nod, aan die oostekant van Eden.

<sup>17</sup> En Kain het sy vrou beken, en sy het swanger geword en Henog gebaar. Daarna bou hy 'n stad en noem die stad na die naam van sy seun Henog.

<sup>18</sup> En vir Henog is Irad gebore; en Irad was die vader van Mehújael; en Mehújael was die vader van Metúsaël; en Metúsaël die vader van Lameg.

## Génesis 5

---

<sup>19</sup> En Lameg het vir hom twee vroue geneem. Die naam van die eerste was Ada, en die naam van die tweede Silla.

<sup>20</sup> En Ada het Jabal gebaar. Hy was die vader van die tentbewoners en die veeboere.

<sup>21</sup> Die naam van sy broer was Jubal. Hy was die vader van almal wat op sifers en fluite speel.

<sup>22</sup> En Silla het ook gebaar, naamlik Tubal-Kain, 'n smid wat allerhande koper- en ysterinstrumente gemaak het. En die suster van Tubal-Kain was Naéma.

<sup>23</sup> En Lameg het aan sy vroue gesê: Ada en Silla, hoor na my stem! Vroue van Lameg, luister na my woord! Voorwaar, ek slaan 'n man dood wat my wond en 'n seun wat my kwes.

<sup>24</sup> Want Kain sal sewe maal gewreek word, maar Lameg sewen-en-sewentig maal.

<sup>25</sup> En Adam het sy vrou weer beken, en sy het 'n seun gebaar en hom Set genoem. Want, het sy gesê, God het my 'n ander kind geskenk in die plek van Abel, omdat Kain hom doodgeslaan het.

<sup>26</sup> En ook vir Set is 'n seun gebore, wat hy Enos genoem het. Toe het hulle die Naam van die HERE begin aanroep.

**5** DIT is die stamboom van Adam. Die dag toe God Adam geskape het, het Hy hom gemaak na die gelykenis van God.

<sup>2</sup> Man en vrou het Hy hulle geskape en hulle geseën en hulle mens genoem, die dag toe hulle geskape is.

<sup>3</sup> Toe Adam honderd-en-dertig jaar oud was, het hy 'n seun verwek na sy gelykenis, na sy ewebeeld, en hom Set genoem.

<sup>4</sup> En die dae van Adam, ná die geboorte van Set, was agthonderd jaar. En hy het seuns en dogters gehad.

<sup>5</sup> So was dan al die dae van Adam wat hy geleef het, negenhonderd-en-dertig jaar, en hy het gesterwe.

<sup>6</sup> Toe Set honderd-en-vyf jaar oud was, het hy die vader van Enos geword.

<sup>7</sup> En Set het ná die geboorte van Enos nog agthonderd-en-sewe jaar gelewe. En hy het seuns en dogters gehad.

<sup>8</sup> So was dan al die dae van Set negenhonderd-en-twaalf jaar, en hy het gesterwe.

<sup>9</sup> Toe Enos negentig jaar oud was, het hy die vader van Kenan geword.

<sup>10</sup> En Enos het ná die geboorte van Kenan nog agthonderd-en-vyftien jaar gelewe. En hy het seuns en dogters gehad.

<sup>11</sup> So was dan al die dae van Enos negenhonderd-en-vyf jaar, en hy het gesterwe.

<sup>12</sup> Toe Kenan sewentig jaar oud was, het hy die vader van Mahalálel geword.

<sup>13</sup> En Kenan het ná die geboorte van Mahalálel nog agthonderd-en-veertig jaar gelewe. En hy het seuns en dogters gehad.

<sup>14</sup> So was dan al die dae van Kenan negenhonderd-en-tien jaar, en hy het gesterwe.

<sup>15</sup> Toe Mahalálel vyf-en-sestig jaar oud was, het hy die vader van Jered geword.

<sup>16</sup> En Mahalálel het ná die geboorte van Jered nog agthonderd-en-dertig jaar gelewe. En hy het seuns en dogters gehad.

<sup>17</sup> So was dan al die dae van Mahalálel agthonderd-vyf-en-negentig jaar, en hy het

## Génesis 6

---

gesterwe.

<sup>18</sup> Toe Jered honderd-twee-en-sestig jaar oud was, het hy die vader van Henog geword.

<sup>19</sup> En Jered het ná die geboorte van Henog nog agthonderd jaar gelewe. En hy het seuns en dogters gehad.

<sup>20</sup> So was dan al die dae van Jered negehonderd-twee-en-sestig jaar, en hy het gesterwe.

<sup>21</sup> Toe Henog vyf-en-sestig jaar oud was, het hy die vader van Metúsalag geword.

<sup>22</sup> En Henog het ná die geboorte van Metúsalag nog driehonderd jaar met God gewandel. En hy het seuns en dogters gehad.

<sup>23</sup> So was dan al die dae van Henog driehonderd-vyf-en-sestig jaar.

<sup>24</sup> En Henog het met God gewandel; en hy was daar nie meer nie, want God het hom weggeneem.

<sup>25</sup> Toe Metúsalag honderd-sewen-en-tagtig jaar oud was, het hy die vader van Lameg geword.

<sup>26</sup> En Metúsalag het ná die geboorte van Lameg nog sewehonderd-twee-en-tagtig jaar gelewe. En hy het seuns en dogters gehad.

<sup>27</sup> So was dan al die dae van Metúsalag negehonderd-negen-en-sestig jaar, en hy het gesterwe.

<sup>28</sup> Toe Lameg honderd-twee-en-tagtig jaar oud was, het hy 'n seun verwek

<sup>29</sup> en hom Noag genoem, want hy het gesê: Dit is hy wat ons sal troos oor ons werk en oor die moeitevolle arbeid van ons hande wat voortkom uit die aarde wat die HERE

vervloek het.

<sup>30</sup> En Lameg het ná die geboorte van Noag nog vyfhonderd-vyf-en-negentig jaar gelewe. En hy het seuns en dogters gehad.

<sup>31</sup> So was dan al die dae van Lameg sewehonderd-sewen-en-sewentig jaar, en hy het gesterwe.

<sup>32</sup> En Noag was vyfhonderd jaar oud, en Noag het die vader geword van Sem, Gam en Jafet.

**6** TOE die mense op die aarde begin vermeerder en daar vir hulle dogters gebore is,

<sup>2</sup> sien die seuns van God dat die dogters van die mense mooi was, en hulle het vir hulle as vroue geneem almal wat hulle verkies het.

<sup>3</sup> Toe sê die HERE: My Gees sal nie vir ewig in die mens heers nie, omdat hy ook vlees is; maar sy dae sal wees honderd-en-twintig jaar.

<sup>4</sup> In dié dae was die reuse op die aarde, en ook daarna, toe die seuns van God by die dogters van die mense ingegaan en dié vir hulle kinders gebaar het. Dit is die geweldiges uit die ou tyd, die manne van naam.

<sup>5</sup> Toe die HERE sien dat die boosheid van die mens op die aarde groot was en al die versinsels wat hy in sy hart bedink, altyddeur net sleg was,

<sup>6</sup> het dit die HERE berou dat Hy die mens op die aarde gemaak het, en daar was smart in sy hart.

<sup>7</sup> En die HERE sê: Ek sal die mens wat Ek geskape het, van die aarde verdelg, die mens sowel as die vee en die kruipende

## Génesis 7

---

diere en die voëls van die hemel; want dit berou My dat Ek hulle gemaak het.

<sup>8</sup> Maar Noag het genade gevind in die oë van die HERE.

<sup>9</sup> Dit is die geskiedenis van Noag. Noag was 'n regverdige, opregte man onder sy tydgenote. Noag het met God gewandel.

<sup>10</sup> En Noag het drie seuns gehad: Sem, Gam en Jafet.

<sup>11</sup> Maar die aarde was verdorwe voor die aangesig van God, en die aarde was vol geweld.

<sup>12</sup> Toe sien God die aarde aan, en—dit was verdorwe, want alle vlees het sy wandel op die aarde verderwe.

<sup>13</sup> En God sê vir Noag: Die einde van alle vlees het volgens my besluit gekom; want die aarde is deur hulle vervul met geweld. En kyk, Ek gaan hulle saam met die aarde verdelg.

<sup>14</sup> Maak vir jou 'n ark van goferhout. Met afdelings moet jy die ark maak en dit binne en buite met pik bstryk.

<sup>15</sup> Só moet jy dit maak: driehonderd el die lengte van die ark, vyftig el sy breedte en dertig el sy hoogte.

<sup>16</sup> 'n Opening moet jy aan die ark maak; en op die maat van 'n el moet jy dit aan die bokant afwerk en die deur van die ark aan die sykant insit. Jy moet dit met 'n onderste, tweede en derde verdieping maak.

<sup>17</sup> Want kyk, Ék bring 'n watervloed oor die aarde, om van onder die hemel te verdelg alle vlees waar 'n lewensgees in is. Alles wat op die aarde is, sal wegsterwe.

<sup>18</sup> Maar met jou sal Ek my verbond oprig;

jy moet in die ark gaan, jy en jou seuns en jou vrou en die vroue van jou seuns saam met jou.

<sup>19</sup> En van al wat lewe, van alle vlees, moet jy twee van elke soort in die ark laat ingaan om dit saam met jou in die lewe te hou: mannetjie en wyfie moet hulle wees.

<sup>20</sup> Van die voëls volgens hulle soorte en van die vee volgens hulle soorte, van al die kruipende diere van die aarde volgens hulle soorte, twee van elke soort, moet na jou kom om in die lewe te bly.

<sup>21</sup> En jy, neem vir jou van al die voedsel wat geëet word, en versamel dit by jou, dat dit vir jou en hulle as voedsel kan dien.

<sup>22</sup> En Noag het dit gedoen. Net soos God hom beveel het, so het hy gedoen.

**7** DAARNA het die HERE aan Noag gesê: Gaan in die ark, jy en jou hele huisgesin, want jou het Ek regverdig bevind voor my aangesig in hierdie geslag.

<sup>2</sup> Van al die rein diere moet jy vir jou telkens sewe paar neem, die mannetjie met sy wyfie; maar van die diere wat nie rein is nie, twee, die mannetjie met sy wyfie.

<sup>3</sup> Ook van die voëls van die hemel telkens sewe paar, die mannetjie met die wyfie, om die geslag in die lewe te hou op die hele aarde.

<sup>4</sup> Want oor nog sewe dae sal Ek laat reën op die aarde, veertig dae en veertig nagte, en al die lewende wesens wat Ek gemaak het, van die aarde verdelg.

<sup>5</sup> En Noag het gedoen net soos die HERE hom beveel het.

<sup>6</sup> En Noag was seshonderd jaar oud toe die watervloed oor die aarde gekom het.



## Génesis 8

---

<sup>7</sup> En Noag en sy seuns en sy vrou en die vroue van sy seuns saam met hom het in die ark gegaan vanweë die waters van die vloed.

<sup>8</sup> Van die rein diere en van die diere wat nie rein is nie, en van die voëls en van alles wat op die aarde kruip,

<sup>9</sup> het daar twee-twee na Noag in die ark gegaan, 'n mannetjie en 'n wyfie, soos God Noag beveel het.

<sup>10</sup> Ná die sewe dae kom toe die waters van die vloed op die aarde.

<sup>11</sup> In die seshonderdste jaar van die lewe van Noag, in die tweede maand, op die sewentiende dag van die maand, op dieselfde dag, is al die fonteine van die groot watervloed oopgebreek, en die sluise van die hemel is geopen;

<sup>12</sup> en die stortreën was op die aarde veertig dae en veertig nagte lank.

<sup>13</sup> Op daardie selfde dag het Noag en Sem en Gam en Jafet, die seuns van Noag, sowel as die vrou van Noag en die drie vroue van sy seuns saam met hulle in die ark gegaan.

<sup>14</sup> Hulle en al die wilde diere volgens hulle soorte en al die vee volgens hulle soorte en al die diere wat op die aarde kruip, volgens hulle soorte en al die voëls volgens hulle soorte, voëls van allerhande vere—

<sup>15</sup> van al die vlees waar 'n lewensgees in was, het twee-twee na Noag in die ark gegaan.

<sup>16</sup> En die wat ingaan, het gegaan as mannetjie en wyfie van alle vlees soos God hom beveel het. En die HERE het agter hom toegesluit.

<sup>17</sup> En die vloed was veertig dae lank op die

aarde: die waters het vermeerder en die ark opgehef, sodat dit opgerys het bo die aarde.

<sup>18</sup> En die waters het die oorhand gekry en grootliks vermeerder op die aarde, terwyl die ark op die waters drywe.

<sup>19</sup> En die waters het heeltemal die oorhand gekry op die aarde, sodat al die hoë berge onder die ganse hemel bedek was.

<sup>20</sup> Vyftien el bo hulle het die waters die oorhand gekry, sodat die berge bedek was.

<sup>21</sup> En alle vlees wat op die aarde beweeg, het weggesterwe: die voëls en die vee en die wilde diere en al die gedierte wat op die aarde wemel, en al die mense.

<sup>22</sup> Alles wat die asem van die lewensgees in sy neusgate gehad het, alles wat op die droë grond was, het doodgegaan.

<sup>23</sup> So is dan al die lewende wesens verdelg wat op die aarde was, die mens sowel as die vee en die kruipende diere en die voëls van die hemel; hulle is verdelg van die aarde af. En net Noag het oorgebly en wat by hom in die ark was.

<sup>24</sup> En die waters het die oorhand behou oor die aarde honderd-en-vyftig dae lank.

**8** EN God het gedink aan Noag en aan al die wilde diere en al die vee wat saam met hom in die ark was; en God het 'n wind oor die aarde laat waai, sodat die waters gesak het.

<sup>2</sup> Ook die fonteine van die watervloed en die sluise van die hemel het toegegaan, en die stortreën uit die hemel het opgehou.

<sup>3</sup> Toe het die waters geleidelik van die aarde teruggegaan, en die waters het afgeneem aan die end van

## Génesis 9

---

honderd-en-vyftig dae.

<sup>4</sup> En die ark het in die sewende maand, op die sewentiende dag van die maand, op die gebergte van Árarat gerus.

<sup>5</sup> En die waters het geleidelik afgeneem tot die tiende maand. In die tiende maand, op die eerste van die maand, het die toppe van die berge sigbaar geword.

<sup>6</sup> Toe het Noag aan die end van veertig dae die venster oopgemaak van die ark wat hy gebou het,

<sup>7</sup> en 'n kraai uitgestuur wat gedurig heen en weer gevlieg het totdat die waters weggedroog het van die aarde af.

<sup>8</sup> Daarop laat hy 'n duif van hom af wegvlieg om te sien of die waters oor die aarde verminder het.

<sup>9</sup> Maar die duif het geen rusplek vir die holte van sy voet gevind nie en na hom teruggekeer in die ark; want die waters was oor die hele aarde. So het hy dan sy hand uitgesteek en hom gegryp en in die ark by hom gebring.

<sup>10</sup> Daarna het hy weer sewe dae gewag. Toe stuur hy die duif weer uit die ark.

<sup>11</sup> En die duif het teen die aand na hom gekom, en daar was 'n groen olyfblad in sy bek! Toe merk Noag dat die waters oor die aarde verminder het.

<sup>12</sup> Daarna wag hy weer sewe dae en stuur die duif uit. Maar hy het nie weer na hom teruggekeer nie.

<sup>13</sup> In die seshonderd-en-eerste jaar, in die eerste maand, op die eerste van die maand, het die waters weggedroog van die aarde af. En Noag het die deksel van die ark weggeneem en uitgekyk, en die aarde was

droog—

<sup>14</sup> in die tweede maand, op die sewen-en-twintigste dag van die maand, was die aarde droog.

<sup>15</sup> En God het met Noag gespreek en gesê:

<sup>16</sup> Gaan uit die ark, jy en jou vrou en jou seuns en die vroue van jou seuns saam met jou.

<sup>17</sup> Laat saam met jou uitgaan al die diere wat by jou is, van alle vlees: die voëls en die vee en al die diere wat op die aarde kruip, dat hulle kan wemel op die aarde en vrugbaar wees en vermeerder op die aarde.

<sup>18</sup> Toe gaan Noag uit en sy seuns en sy vrou en die vroue van sy seuns saam met hom.

<sup>19</sup> Al die diere, alles wat kruip, en al die voëls, alles wat op die aarde beweeg, volgens hulle soorte, het uit die ark uitgegaan.

<sup>20</sup> En Noag het vir die HERE 'n altaar gebou en van al die rein diere en al die rein voëls geneem en brandoffers op die altaar gebring.

<sup>21</sup> En die HERE het die lieflike geur geruik, en die HERE het in sy hart gesê: Ek sal die aarde verder nie meer vervloek ter wille van die mens nie, want die versinsels van die mens se hart is sleg van sy jeug af. En Ek sal verder nie meer al die lewende wesens tref soos Ek gedoen het nie.

<sup>22</sup> Van nou af sal al die dae van die aarde, saaityd en oestyd, koue en hitte, somer en winter, dag en nag nie ophou nie.

**9** EN God het Noag en sy seuns geseën en aan hulle gesê: Wees vrugbaar en vermeerder en vul die aarde.

## Génesis 9

---

<sup>2</sup> Die vrees en die skrik vir julle sal wees oor al die diere van die aarde en al die voëls van die hemel: alles wat op die aarde beweeg, en al die visse van die see. Hulle is in julle hand oorgegee.

<sup>3</sup> Alles wat beweeg en lewe, sal julle voedsel wees. Net soos die groen plante, gee Ek dit alles aan julle.

<sup>4</sup> Net die vleis met sy siel, met sy bloed, mag julle nie eet nie.

<sup>5</sup> Maar wat julle eie bloed betref, dit sal Ek eis: van al die diere sal Ek dit eis. Ook van die mens, van die een teenoor die ander, sal Ek die siel van die mens eis.

<sup>6</sup> Hy wat die bloed van 'n mens vergiet, sy bloed sal deur die mens vergiet word; want God het die mens na sy beeld gemaak.

<sup>7</sup> Maar julle, wees vrugbaar en vermeerder; wemel op die aarde en vermeerder daarop.

<sup>8</sup> Verder het God met Noag en sy seuns by hom gespreek en gesê:

<sup>9</sup> Maar Ek, kyk, Ek rig my verbond met julle op en met julle nageslag ná julle,

<sup>10</sup> en met al die lewende wesens wat by julle is: die voëls, die vee en al die wilde diere van die aarde by julle—al wat uit die ark uitgegaan het, naamlik al die diere van die aarde.

<sup>11</sup> En Ek rig my verbond met julle op, dat alle vlees nie meer deur die waters van die vloed uitgeroei sal word nie, en dat daar geen vloed meer sal wees om die aarde te verwoes nie.

<sup>12</sup> En God het gesê: Dit is die teken van die verbond wat Ek sluit tussen My en julle en al die lewende wesens wat by julle is, vir ewige geslagte:

<sup>13</sup> my boog gee Ek in die wolke; dit sal 'n teken wees van die verbond tussen My en die aarde.

<sup>14</sup> As Ek dan wolke oor die aarde bring en hierdie boog verskyn in die wolke,

<sup>15</sup> dan sal Ek dink aan my verbond wat daar bestaan tussen My en julle en al die lewende wesens, in alle vlees. En die waters sal nie meer 'n vloed word om alle vlees te verdelg nie.

<sup>16</sup> As die boog dan in die wolke staan, sal Ek dit aansien om gedagtig te wees aan die ewige verbond tussen God en al die lewende wesens in alle vlees wat op die aarde is.

<sup>17</sup> En God het vir Noag gesê: Dit is die teken van die verbond wat Ek opgerig het tussen My en alle vlees wat op die aarde is.

<sup>18</sup> EN die seuns van Noag wat uit die ark uitgegaan het, was Sem en Gam en Jafet. En Gam was die vader van Kanaän.

<sup>19</sup> Hierdie drie was die seuns van Noag; en met hulle begin die uitbreiding van al die aardbewoners.

<sup>20</sup> En Noag het as landbouer 'n wingerd begin plant.

<sup>21</sup> Maar toe hy van die wyn gedrink het, het hy dronk geword en naak in sy tent gelê.

<sup>22</sup> En Gam, die vader van Kanaän, het sy vader se naaktheid gesien en dit aan sy twee broers daarbuite te kenne gegee.

<sup>23</sup> Toe neem Sem en Jafet die bo-kleed en hou dit op hulle skouers terwyl hulle agteruitloop, en hulle het die naaktheid van hulle vader bedek: hulle gesig was agtertoe gedraai, sodat hulle die naaktheid

## Génesis 10

van hulle vader nie gesien het nie.

<sup>24</sup> Toe Noag van sy wyn wakker word en merk wat sy jonger seun hom aangedoen het,

<sup>25</sup> sê hy: Vervloek is Kanaän! 'n Kneg van die knegte moet hy wees vir sy broers.

<sup>26</sup> Verder het hy gesê: Geseënd is die HERE, die God van Sem. Maar Kanaän moet sy dienskneg wees.

<sup>27</sup> Mag God aan Jafet ruimte verskaf, en mag hy woon in die tente van Sem! Maar Kanaän moet sy dienskneg wees.

<sup>28</sup> En Noag het ná die vloed driehonderd-en-vyftig jaar gelewe.

<sup>29</sup> So was dan al die dae van Noag negehonderd-en-vyftig jaar, en hy het gesterwe.

**10** EN dit is die stamboom van die seuns van Noag: Sem, Gam en Jafet—vir hulle is daar seuns gebore ná die vloed.

<sup>2</sup> Die seuns van Jafet was: Gomer en Magog en Madai en Jawan en Tubal en Meseg en Tiras.

<sup>3</sup> En die seuns van Gomer was: Áskenas en Rifat en Togárma.

<sup>4</sup> En die seuns van Jawan was: Elísa en Tarsis, die Kittiers en Dodaniete—

<sup>5</sup> uit hulle het verdeeld geraak die kuslande van die nasies, in hulle lande, elkeen na sy taal, volgens hulle geslagte, in hulle nasies.

<sup>6</sup> En die seuns van Gam was: Kus en Misraim en Put en Kanaän.

<sup>7</sup> En die seuns van Kus was: Seba en Háwila en Sabta en Raéma en Sábtega. En die seuns van Raéma: Skeba en Dedan.

<sup>8</sup> Kus was ook die vader van Nimrod. Hy het begin om 'n geweldenaar op aarde te wees.

<sup>9</sup> Hy was 'n geweldige jagter voor die aangesig van die HERE. Daarom sê hulle: Soos Nimrod, 'n geweldige jagter voor die aangesig van die HERE.

<sup>10</sup> En die begin van sy ryk was Babel en Ereg en Akkad en Kalne in die land Sínear.

<sup>11</sup> Uit hierdie land het hy getrek na Assur en gebou: Ninevé en Réhobot-Ir en Kalag <sup>12</sup> en Resen, tussen Ninevé en Kalag—dit is die groot stad.

<sup>13</sup> En Misraim was die vader van die Ludiete en Anamiete en Lehabiete en Naftuhiete

<sup>14</sup> en die Patrusiete en Kasluhiete—waaruit die Filistyne voortgekom het—en Kaftoriete.

<sup>15</sup> En Kanaän was die vader van Sidon, sy eersgeborene, en Het

<sup>16</sup> en die Jebusiete en Amoriete en Girgasiete

<sup>17</sup> en die Hewiete en Arkiete en Siniete

<sup>18</sup> en die Arwadiete en Semariete en Hamatiete. En daarna het die geslagte van die Kanaäniete hulle versprei.

<sup>19</sup> En die gebied van die Kanaäniete was van Sidon af in die rigting van Gerar tot by Gasa, in die rigting van Sodom en Gomorra en Adma en Sebóim tot by Lesa.

<sup>20</sup> Dit was die seuns van Gam volgens hulle geslagte, na hulle tale, in hulle lande, in hulle nasies.

<sup>21</sup> En ook vir Sem, die stamvader van al die seuns van Heber, die ouer broer van Jafet, is seuns gebore.

## Génesis 11

<sup>22</sup> Die seuns van Sem was: Elam en Assur en Arpagsad en Lud en Aram.

<sup>23</sup> En die seuns van Aram was: Us en Hul en Geter en Mas.

<sup>24</sup> En Arpagsad was die vader van Selag, en Selag van Heber.

<sup>25</sup> En vir Heber is twee seuns gebore; die naam van die een was Peleg, want in sy dae het die aardbewoners verdeeld geraak; en die naam van sy broer was Joktan.

<sup>26</sup> En Joktan was die vader van Almódad en Selef en Hasarmáwet en Jerag

<sup>27</sup> en Hadóram en Usal en Dikla

<sup>28</sup> en Obal en Abímael en Skeba

<sup>29</sup> en Ofir en Háwila en Jobab. Hulle almal was seuns van Joktan.

<sup>30</sup> En hulle woonplek was van Mesa af in die rigting van Sefar, die berg van die Ooste.

<sup>31</sup> Dit is die seuns van Sem volgens hulle geslagte, na hulle tale, in hulle lande, volgens hulle nasies.

<sup>32</sup> Dit is die geslagte van die seuns van Noag volgens hulle afstamming, in hulle nasies; en uit hulle het die nasies op die aarde hulle verdeel ná die vloed.

**11** EN die hele aarde het dieselfde taal gehad en een en dieselfde woorde.

<sup>2</sup> En toe hulle wegtrek na die ooste, vind hulle 'n laagte in die land Sínear; en daar het hulle gaan woon.

<sup>3</sup> Daarop sê hulle vir mekaar: Kom laat ons stene vorm en dit goed brand. Hulle gebruik toe die bakstene vir bousteen en die lymgrond vir klei.

<sup>4</sup> En hulle sê: Kom, laat ons vir ons 'n stad bou en 'n toring waarvan die spits tot aan

die hemel reik; en laat ons vir ons 'n naam maak, sodat ons nie oor die hele aarde verstrooid raak nie.

<sup>5</sup> Toe daal die HERE neer om die stad en die toring te besien waaraan die mensekinders gebou het.

<sup>6</sup> En die HERE sê: Daar is hulle nou een volk en het almal een taal! En dit is net die begin van hulle onderneming: nou sal niks vir hulle meer onmoontlik wees van wat hulle van plan is om te doen nie.

<sup>7</sup> Kom, laat Ons neerdaal en hulle taal daar verwar, sodat die een die taal van die ander nie kan verstaan nie.

<sup>8</sup> So het die HERE hulle dan daarvandaan oor die hele aarde verstrooi; en hulle het opgehou om die stad te bou.

<sup>9</sup> Daarom het hulle dit Babel genoem, want daar het die HERE die taal van die hele aarde verwar, en daarvandaan het die HERE hulle oor die hele aarde verstrooi.

<sup>10</sup> DIT is die stamboom van Sem: Toe Sem honderd jaar oud was, het hy die vader van Arpagsad geword, twee jaar ná die vloed.

<sup>11</sup> En Sem het ná die geboorte van Arpagsad nog vyfhonderd jaar gelewe. En hy het seuns en dogters gehad.

<sup>12</sup> Toe Arpagsad vyf-en-dertig jaar oud was, het hy die vader van Selag geword.

<sup>13</sup> En Arpagsad het ná die geboorte van Selag nog vierhonderd-en-drie jaar gelewe. En hy het seuns en dogters gehad.

<sup>14</sup> Toe Selag dertig jaar oud was, het hy die vader van Heber geword.

<sup>15</sup> En Selag het ná die geboorte van Heber nog vierhonderd-en-drie jaar gelewe. En hy het seuns en dogters gehad.

## Génesis 12

<sup>16</sup> Toe Heber vier-en-dertig jaar oud was, het hy die vader van Peleg geword.

<sup>17</sup> En Heber het ná die geboorte van Peleg nog vierhonderd-en-dertig jaar gelewe. En hy het seuns en dogters gehad.

<sup>18</sup> Toe Peleg dertig jaar oud was, het hy die vader van Rehu geword.

<sup>19</sup> En Peleg het ná die geboorte van Rehu nog tweehonderd-en-nege jaar gelewe. En hy het seuns en dogters gehad.

<sup>20</sup> Toe Rehu twee-en-dertig jaar oud was, het hy die vader van Serug geword.

<sup>21</sup> En Rehu het ná die geboorte van Serug nog tweehonderd-en-sewe jaar gelewe. En hy het seuns en dogters gehad.

<sup>22</sup> Toe Serug dertig jaar oud was, het hy die vader van Nahor geword.

<sup>23</sup> En Serug het ná die geboorte van Nahor tweehonderd jaar gelewe. En hy het seuns en dogters gehad.

<sup>24</sup> Toe Nahor negen-en-twintig jaar oud was, het hy die vader van Tera geword.

<sup>25</sup> En Nahor het ná die geboorte van Tera nog honderd-en-negentien jaar gelewe. En hy het seuns en dogters gehad.

<sup>26</sup> Toe Tera sewentig jaar oud was, het hy die vader geword van Abram, Nahor en Haran.

<sup>27</sup> En dit is die stamboom van Tera: Tera het die vader geword van Abram, Nahor en Haran, en Haran van Lot.

<sup>28</sup> En Haran het gesterwe terwyl sy vader Tera nog geleef het, in sy geboorteland, in Ur van die Chaldeërs.

<sup>29</sup> En Abram en Nahor het vir hulle vroue geneem. Die naam van Abram se vrou was Sarai, en die naam van Nahor se vrou was

Milka, die dogter van Haran, die vader van Milka en die vader van Jiska.

<sup>30</sup> En Sarai was onvrugbaar, sy het geen kind gehad nie.

<sup>31</sup> En Tera het sy seun Abram geneem en Lot, die seun van Haran, sy kleinseun, en Sarai, sy skoondogter, die vrou van sy seun Abram, en dié het saam met hulle uit Ur van die Chaldeërs getrek om na die land Kanaän te gaan. En hulle het tot by Haran gekom en daar gaan woon.

<sup>32</sup> En die dae van Tera was twee-honderd-en-vyf jaar, en Tera het in Haran gesterwe.

**12** EN die HERE het aan Abram gesê: Gaan jy uit jou land en uit jou familie en uit jou vader se huis, na die land wat Ek jou sal wys.

<sup>2</sup> En Ek sal jou 'n groot nasie maak en jou seën en jou naam so groot maak, dat jy 'n seën sal wees.

<sup>3</sup> En Ek sal seën diegene wat jou seën, en hom vervloek wat jou vervloek; en in jou sal al die geslagte van die aarde geseën word.

<sup>4</sup> Toe het Abram weggetrek soos die HERE hom gesê het, en Lot het saam met hom getrek. En Abram was vyf-en-sewentig jaar oud by sy vertrek uit Haran.

<sup>5</sup> En Abram het Sarai, sy vrou, en Lot, sy broerskind, geneem en al hulle besittings wat hulle bymekaargemaak en die slawe wat hulle in Haran verwerf het, en hulle het uitgetrek om na die land Kanaän te gaan en in die land Kanaän gekom.

<sup>6</sup> En Abram het deur die land getrek na die plek Sigem, tot by die terpentynboom

## Génesis 13

More. Die Kanaäniete was toe in die land.

<sup>7</sup> Daarop verskyn die HERE aan Abram en sê: Aan jou nageslag sal Ek hierdie land gee. Toe bou hy daar 'n altaar vir die HERE wat aan hom verskyn het.

<sup>8</sup> En daarvandaan het hy verder versit na die gebergte oos van Bet-el en sy tent opgeslaan tussen Bet-el aan die weste- en Ai aan die oostekant, en daar vir die HERE 'n altaar gebou en die Naam van die HERE aangeroep.

<sup>9</sup> Daarna het Abram al verder na die Suidland weggetrek.

<sup>10</sup> En daar was hongersnood in die land, sodat Abram na Egipte afgetrek het om daar as vreemdeling te vertoef; want die hongersnood was swaar in die land.

<sup>11</sup> En toe hy op die punt staan om Egipte in te trek, het hy met sy vrou Sarai gespreek: Kyk, ek weet dat jy 'n vrou is mooi van aansien.

<sup>12</sup> As die Egiptenaars jou nou sien, sal hulle sê: Dit is sy vrou—en hulle sal my doodmaak en jou laat lewe.

<sup>13</sup> Sê tog jy is my suster, dat dit met my goed kan gaan ter wille van jou en ek om jou ontwil in die lewe kan bly.

<sup>14</sup> Toe Abram dan in Egipte gekom het, sien die Egiptenaars dat die vrou baie mooi was.

<sup>15</sup> Ook het die vorste van Farao haar gesien en haar by Farao geprys. En die vrou is na die paleis van Farao geneem.

<sup>16</sup> En hy het goed gedoen aan Abram om haar ontwil, sodat hy kleinvee en beeste en esels, slawe en slavinne, eselinne en kamele in besit gekry het.

<sup>17</sup> Maar die HERE het Farao en sy huis met groot plaë besoek ter wille van Sarai, die vrou van Abram.

<sup>18</sup> Daarop laat Farao Abram roep en hy sê: Wat het jy my nou aangedoen? Waarom het jy my nie te kenne gegee dat sy jou vrou is nie?

<sup>19</sup> Waarom het jy gesê: Sy is my suster—sodat ek haar vir my as vrou geneem het? Daar is jou vrou dan nou; neem haar en gaan weg.

<sup>20</sup> En Farao het aan enkele manne aangaande hom bevel gegee, en hulle het hom weggebring met sy vrou en sy hele besitting.

**13** SO het Abram dan uit Egipte na die Suidland opgetrek, hy met sy vrou en sy hele besitting, en Lot saam met hom.

<sup>2</sup> En Abram was baie ryk aan vee, aan silwer en goud.

<sup>3</sup> En hy het van plek tot plek uit die Suidland getrek tot by Bet-el, na die plek waar sy tent in die begin gestaan het, tussen Bet-el en Ai,

<sup>4</sup> na die plek van die altaar wat hy vroeër daar gebou het. En Abram het daar die Naam van die HERE aangeroep.

<sup>5</sup> En Lot, wat saam met Abram getrek het, het ook kleinvee en beeste en tente gehad.

<sup>6</sup> En die land kon hulle nie dra om saam te woon nie, want hulle besittings was groot, sodat hulle nie saam kon woon nie.

<sup>7</sup> En daar het twis ontstaan tussen die veewagters van Abram en die veewagters van Lot. Ook het die Kanaäniete en Feresiete destyds in die land gewoon.

<sup>8</sup> Toe sê Abram vir Lot: Laat daar tog geen

## Génesis 14

twis wees tussen my en jou, en tussen my wagters en jou wagters nie; ons is mos broers.

<sup>9</sup> Lê die hele land nie voor jou oop nie? Skei jou tog van my af; gaan jy links, dan sal ek regs gaan, en gaan jy regs, dan sal ek links gaan.

<sup>10</sup> Toe slaan Lot sy oë op en sien dat die hele Jordaanstreek oral volop water het; voordat die HERE Sodom en Gomorra verwoes het, was dit in die rigting van Soar soos die tuin van die HERE, soos Egipteland.

<sup>11</sup> En Lot het vir hom die hele Jordaanstreek gekies, en Lot het na die ooste getrek. So het hulle dan die een van die ander geskei.

<sup>12</sup> Abram het bly woon in die land Kanaän, en Lot het gaan woon in die stede van die Jordaanstreek en sy tente tot by Sodom opgeslaan.

<sup>13</sup> En die manne van Sodom was sleg en groot sondaars voor die HERE.

<sup>14</sup> En die HERE sê vir Abram nadat Lot van hom geskei het: Slaan tog jou oë op en kyk van die plek waar jy staan, na die noorde en suide, na die ooste en weste;

<sup>15</sup> want die hele land wat jy sien, sal Ek aan jou gee en aan jou nageslag tot in ewigheid.

<sup>16</sup> En Ek sal jou nageslag maak soos die stof van die aarde, sodat as iemand die stof van die aarde kan tel, jou nageslag ook getel kan word.

<sup>17</sup> Maak jou klaar, trek die land deur in sy lengte en sy breedte, want Ek sal dit aan jou gee.

<sup>18</sup> Toe het Abram al verder tente opgeslaan

en gaan woon by die terpentynbome van Mamre wat by Hebron is; en hy het daar vir die HERE 'n altaar gebou.

**14** EN in die dae van Ámrafel, die koning van Sínear, Aríog, die koning van Ellásar, Kedor-Laómer, die koning van Elam, en Tídeal, die koning van die nasies,

<sup>2</sup> het hulle oorlog gevoer teen Bera, die koning van Sodom, en teen Birsá, die koning van Gomorra, Síneab, die koning van Adma, en Seméber, die koning van Sebóim, en teen die koning van Bela, dit is Soar.

<sup>3</sup> Hulle het almal hulle leërs verenig in die laagte Siddim, dit is die Soutsee.

<sup>4</sup> Twaalf jaar lank het hulle Kedor-Laómer toe al gedien, maar in die dertiende jaar het hulle opstandig geword.

<sup>5</sup> Toe kom Kedor-Laómer in die veertiende jaar, en die konings wat saam met hom was, en hulle verslaan die Refaïete in Ásterot-Karnaim en die Susiete in Ham en die Emiete in die vlakte van Kirjatáim

<sup>6</sup> en die Horiete op hulle gebergte Seir, tot by El-Paran wat aan die woestyn lê.

<sup>7</sup> Daarop het hulle omgedraai en by En-Mispat, dit is Kades, gekom en die hele land van die Amalekiete verower en ook die Amoriete wat in Háseson-Tamar woon.

<sup>8</sup> Toe trek die koning van Sodom uit en die koning van Gomorra en die koning van Adma en die koning van Sebóim en die koning van Bela, dit is Soar, en stel hulle in die laagte Siddim in slagorde teen hulle op,

<sup>9</sup> teen Kedor-Laómer, die koning van Elam, en Tídeal, die koning van die nasies, en



## Génesis 15

Ámrafel, die koning van Sínear, en Aríog, die koning van Ellásar: vier konings teen vyf.

<sup>10</sup> Maar die laagte Siddim was vol gate in die lymgrond; en toe die konings van Sodom en Gomorra wegvlug, het hulle daarin geval, en die wat oorgebly het, het na die gebergte gevlug.

<sup>11</sup> En hulle het al die goed van Sodom en Gomorra en al hulle voedsel geneem en weggetrek.

<sup>12</sup> Hulle het ook Lot, Abram se broerskind, en al sy goed geneem en weggetrek—want hy was in Sodom woonagtig.

<sup>13</sup> Toe kom daar een wat vrygeraak het, en vertel dit aan Abram, die Hebreër, wat woonagtig was by die terpentynbome van Mamre, die Amoriet, broer van Eskol en broer van Aner; en hulle was bondgenote van Abram.

<sup>14</sup> Toe Abram hoor dat sy broer as gevangene weggevoer is, het hy sy geoefende manne wat in sy huis gebore is, laat uittrek, driehonderd-en-agttien, en hulle tot by Dan agtervolg—

<sup>15</sup> hy het hulle in die nag van verskillende kante aangeval, hy en sy dienaars, en hulle verslaan en hulle agtervolg tot by Hoba wat noord van Damaskus lê.

<sup>16</sup> En hy het al die goed teruggebring, en ook sy broer Lot en sy goed teruggebring; en ook die vroue en die manskappe.

<sup>17</sup> Ná sy terugkoms van die oorwinning op Kedor-Laómer en die konings wat saam met hom was, het die koning van Sodom uitgetrek hom tegemoet na die laagte Sawe, dit is die Koningslaagte.

<sup>18</sup> En Melgisédek, die koning van Salem, wat 'n priester van God, die Allerhoogste, was, het brood en wyn gebring

<sup>19</sup> en hom geseën en gesê: Geseënd is Abram deur God, die Allerhoogste, die Skepper van hemel en aarde.

<sup>20</sup> En geseënd is God, die Allerhoogste, wat u vyande in u hand gegee het. Toe gee hy hom die tiende van alles.

<sup>21</sup> En die koning van Sodom sê vir Abram: Gee my die mense, maar neem die goed vir uself.

<sup>22</sup> Toe antwoord Abram die koning van Sodom: Ek hef my hand op tot die HERE, God, die Allerhoogste, die Skepper van hemel en aarde,

<sup>23</sup> dat ek geen draad en geen skoenriem, ja, dat ek niks sal neem van alles wat uwe is nie, sodat u nie kan sê nie: Ek het Abram ryk gemaak.

<sup>24</sup> Niks vir my nie! Net wat die dienaars geëet het en die deel van die manne wat saam met my getrek het, Aner, Eskol en Mamre, laat dié hulle deel neem.

**15** NÁ hierdie dinge het die woord van die HERE tot Abram gekom in 'n gesig en gesê: Vrees nie, Abram, Ek is vir jou 'n skild en jou loon is baie groot.

<sup>2</sup> Toe vra Abram: Here HERE, wat sal U my gee, aangesien ek sonder kinders heengaan en die erfgenaam van my huis die Damaskéner Eliëser is?

<sup>3</sup> Verder het Abram gesê: Aan my het U geen nageslag gegee nie; so sal dan die bediende van my huis my erfgenaam wees.

<sup>4</sup> Toe kom die woord van die HERE tot hom en sê: Hierdie een sal jou erfgenaam

## Génesis 16

nie wees nie, maar die een wat uit jou liggaam sal voortkom, hy sal jou erfgenaam wees.

<sup>5</sup> Daarop lei Hy hom uit na buite met die woorde: Kyk nou op na die hemel en tel die sterre as jy hulle kan tel. En Hy sê vir hom: So sal jou nageslag wees.

<sup>6</sup> En hy het in die HERE geglo; en Hy het hom dit tot geregtigheid gereken.

<sup>7</sup> Verder het Hy vir hom gesê: Ek is die HERE wat jou uitgelei het uit Ur van die Chaldeërs om jou hierdie land in besit te gee.

<sup>8</sup> En hy sê: Here HERE, waaraan sal ek weet dat ek dit in besit sal neem?

<sup>9</sup> En Hy antwoord hom: Neem vir My 'n driejaaroud vers en 'n driejaaroud bokooi en 'n driejaaroud ram en 'n tortelduif en 'n jong duif.

<sup>10</sup> En hy het dit alles vir Hom gebring en dit middeldeur gedeel en die helftes teenoor mekaar gelê; maar die voëls het hy nie verdeel nie.

<sup>11</sup> Toe kom daar roofvoëls op die dooie diere af, maar Abram het hulle weggejaag.

<sup>12</sup> En toe die son wou ondergaan, val daar 'n diepe slaap op Abram, en kyk, skrik en groot duisternis het hom oorval.

<sup>13</sup> Daarop sê Hy vir Abram: Weet vir seker dat jou nageslag vreemdelinge sal wees in die land wat aan hulle nie behoort nie; daar sal hulle diensbaar wees en verdruk word vierhonderd jaar lank.

<sup>14</sup> Maar Ek sal ook die nasie oordeel aan wie hulle diensbaar moet wees, en daarna sal hulle uittrek met baie goed.

<sup>15</sup> Maar jy sal na jou vaders gaan in vrede,

jy sal in goeie ouderdom begrawe word.

<sup>16</sup> En die vierde geslag sal hierheen terugkom, want die ongeregtigheid van die Amoriete is tot nog toe nie vol nie.

<sup>17</sup> En ná sononder, toe dit heeltemal donker was, gaan daar 'n rokende oond en vurige fakkel tussen dié stukke vleis deur.

<sup>18</sup> Op dié dag het die HERE met Abram 'n verbond gesluit en gesê: Aan jou nageslag gee Ek hierdie land, van die rivier van Egipte af tot by die groot rivier, die Eufraatrivier:

<sup>19</sup> die Keniete en Kenissiete en Kadmoniete

<sup>20</sup> en Hetiete en Feresiete en Refaïete

<sup>21</sup> en Amoriete en Kanaäniete en Girgasiete en Jebusiete.

**16** MAAR Sarai, die vrou van Abram, het vir hom geen kinders gebaar nie; en sy het 'n Egiptiese slavin gehad met die naam van Hagar.

<sup>2</sup> En Sarai het vir Abram gesê: Jy weet, die HERE het my nie toegelaat om moeder te word nie. Gaan tog in by my slavin; miskien sal ek uit haar gebou word. En Abram het na Sarai geluister.

<sup>3</sup> Toe neem Sarai, die vrou van Abram, Hagar, die Egiptiese, haar slavin—nadat Abram tien jaar in die land Kanaän gewoon het—en gee haar aan haar man Abram om sy vrou te wees.

<sup>4</sup> En hy het by Hagar ingegaan, en sy het swanger geword. Maar toe sy sien dat sy swanger was, het haar meesteres veragtelik in haar oë geword.

<sup>5</sup> En Sarai sê vir Abram: Die onreg my aangedoen, is op jou! Ek self het my slavin in jou skoot gegee, en nou dat sy sien dat

## Génesis 17

sy swanger is, het ek veragtelik in haar oë geword. Laat die HERE oordeel tussen my en jou.

<sup>6</sup> En Abram antwoord Sarai: Daar is jou slavin in jou hand—doen met haar soos dit goed is in jou oë. Toe het Sarai haar sleg behandel, en sy het van haar af weggevlug.

<sup>7</sup> En die Engel van die HERE het haar by 'n fontein in die woestyn gevind, by die fontein op pad na Sur,

<sup>8</sup> en gevra: Hagar, slavin van Sarai, waar kom jy vandaan, en waar gaan jy heen? En sy antwoord: Ek vlug van my meesteres Sarai af weg.

<sup>9</sup> Toe sê die Engel van die HERE vir haar: Gaan terug na jou meesteres en verneder jou onder haar hande.

<sup>10</sup> Verder sê die Engel van die HERE vir haar: Ek sal jou nageslag grootliks vermeerder, sodat dit vanweë die menigte nie getel kan word nie.

<sup>11</sup> Ook sê die Engel van die HERE vir haar: Kyk, jy is swanger en sal 'n seun baar, en jy moet hom Ismael noem, want die HERE het jou in jou ellende verhoor.

<sup>12</sup> En hý sal 'n wilde-esel van 'n mens wees: sy hand teen almal, en almal se hand teen hom! En hy sal teenoor al sy broers woon.

<sup>13</sup> Toe noem sy die Naam van die HERE wat met haar gespreek het: U is 'n God wat sien. Want sy het gesê: Het ek hier ook gesien na Hom wat my sien?

<sup>14</sup> Daarom noem hulle die put: Put van Lagai-Roï. Dit lê daar tussen Kades en Bered.

<sup>15</sup> En Hagar het vir Abram 'n seun gebaar;

en Abram het sy seun wat Hagar gebaar het, Ismael genoem.

<sup>16</sup> En Abram was ses-en-tagtig jaar oud toe Hagar Ismael vir Abram gebaar het.

**17** TOE Abram negen-en-negentig jaar oud was, het die HERE aan Abram verskyn en vir hom gesê: Ek is God, die Almagtige; wandel voor my aangesig, dan sal jy opreg wees.

<sup>2</sup> En Ek wil my verbond sluit tussen My en jou, en jou buitengewoon vermeerder.

<sup>3</sup> Toe val Abram op sy aangesig, en God het met hom gespreek en gesê:

<sup>4</sup> Wat My aangaan, kyk, my verbond is met jou, en jy sal die vader van 'n menigte van nasies word.

<sup>5</sup> Daarom sal hulle jou nie meer Abram noem nie, maar jou naam sal wees Abraham, want Ek maak jou 'n vader van 'n menigte van nasies.

<sup>6</sup> En Ek sal jou buitengewoon vrugbaar maak: Ek sal jou tot nasies maak, en konings sal uit jou voortkom.

<sup>7</sup> En Ek sal my verbond oprig tussen My en jou en jou nageslag ná jou in hulle geslagte as 'n ewige verbond, om vir jou 'n God te wees en vir jou nageslag ná jou.

<sup>8</sup> En Ek sal aan jou en jou nageslag ná jou die land van jou vreemdelingskap gee, die hele land Kanaän, as 'n ewige besitting; en Ek sal vir hulle 'n God wees.

<sup>9</sup> Verder het God aan Abraham gesê: Maar jý moet my verbond hou, jy en jou nageslag ná jou, van geslag tot geslag.

<sup>10</sup> Dit is my verbond wat julle moet hou tussen My en julle en jou nageslag ná jou: Al wat manlik onder julle is, moet besny

## Génesis 18

word—

<sup>11</sup> julle moet aan die vlees van julle voorhuid besny word, en dit sal 'n teken wees van die verbond tussen My en julle.

<sup>12</sup> 'n Seuntjie van agt dae dan moet onder julle besny word, al wat manlik is in julle geslagte. Die wat in jou huis gebore is, en die wat van enige vreemdeling met geld gekoop is, wat nie van jou geslag is nie—

<sup>13</sup> die wat in jou huis gebore en wat met jou geld gekoop is, moet sekerlik besny word. So moet dan my verbond in julle vlees wees as 'n ewige verbond.

<sup>14</sup> En wat manlik is en die voorhuid het, wat nie aan die vlees van sy voorhuid besny is nie—dié siel moet uit sy volksgenote uitgeroei word: hy het my verbond verbreek.

<sup>15</sup> Verder het God aan Abraham gesê: Sarai, jou vrou, moet jy nie Sarai noem nie, maar haar naam sal Sara wees.

<sup>16</sup> En Ek sal haar seën en jou uit haar ook 'n seun gee; ja, Ek sal haar seën, sodat sy tot nasies sal word; konings van volke sal uit haar voortkom.

<sup>17</sup> Toe val Abraham op sy aangesig, en hy lag en sê in sy hart: Kan daar vir een wat honderd jaar oud is, 'n kind gebore word? Of kan Sara, wat negentig jaar oud is, baar?

<sup>18</sup> En Abraham sê aan God: Ag, mag Ismael lewe voor u aangesig!

<sup>19</sup> Toe antwoord God: Voorwaar, jou vrou Sara sal vir jou 'n seun baar, en jy moet hom Isak noem; en Ek sal my verbond met hom oprig as 'n ewige verbond vir sy nageslag ná hom.

<sup>20</sup> Ook wat Ismael aangaan, het Ek jou

verhoor. Kyk, Ek seën hom en maak hom vrugbaar en vermeerder hom buitengewoon. Twaalf vorste sal hy verwek, en Ek sal hom 'n groot nasie maak.

<sup>21</sup> Maar my verbond sal Ek oprig met Isak wat Sara vir jou anderjaar op hierdie tyd sal baar.

<sup>22</sup> En nadat Hy klaar met hom gespreek het, het God van Abraham af opgevaar.

<sup>23</sup> Daarop neem Abraham sy seun Ismael en almal wat in sy huis gebore is, en almal wat met sy geld gekoop is, almal wat manlik was onder die mense in die huis van Abraham, en hy het die vlees van hulle voorhuid nog op daardie selfde dag besny, soos God met hom gespreek het.

<sup>24</sup> En Abraham was negen-en-negentig jaar oud toe hy aan die vlees van sy voorhuid besny is.

<sup>25</sup> En sy seun Ismael was dertien jaar oud toe hy aan die vlees van sy voorhuid besny is.

<sup>26</sup> Op daardie selfde dag is Abraham en sy seun Ismael besny

<sup>27</sup> en al die manne van sy huis—die wat in sy huis gebore en die wat van vreemdelinge met geld gekoop is, is saam met hom besny.

**18** DAARNA het die HERE aan hom verskyn by die terpentynbome van Mamre tewyl hy by die ingang van die tent sit op die warmste van die dag.

<sup>2</sup> Toe hy sy oë opslaan en kyk, staan daar drie manne voor hom. En toe hy hulle sien, loop hy hulle tegemoet van die ingang van die tent af en buig hom na die aarde toe.

<sup>3</sup> En hy sê: My heer, as ek nou genade in u

## Génesis 18

oë gevind het, gaan dan tog nie by u kneg verby nie.

<sup>4</sup> Laat hulle tog 'n bietjie water bring, en was u voete, en lê en rus onder die boom.

<sup>5</sup> En laat ek 'n stukkie brood gaan haal, en versterk u hart—daarna kan u verder gaan—want daarom het u by u kneg aangekom. En hulle antwoord: Doen soos u gesê het.

<sup>6</sup> Toe loop Abraham haastig in die tent na Sara en sê: Maak gou, knie drie mate meel, die beste, en maak roosterkoeke.

<sup>7</sup> Daarop loop Abraham na die beeste en vang 'n jong, mooi kalf en gee dit aan die dienaar, wat dit gou klaargemaak het.

<sup>8</sup> En hy neem dikmelk en soetmelk en die kalf wat hy klaargemaak het, en sit dit aan hulle voor, terwyl hy self by hulle onder die boom bly staan; en hulle het geëet.

<sup>9</sup> Toe sê hulle vir hom: Waar is Sara, u vrou? En hy antwoord: Daar in die tent.

<sup>10</sup> En Hy sê: Ek sal oor 'n jaar sekerlik weer na jou toe kom—dan sal jou vrou Sara 'n seun hê. En Sara het geluister by die ingang van die tent wat agter Hom was.

<sup>11</sup> Maar Abraham en Sara was oud, ver op hulle dae; dit het met Sara nie meer volgens die reël van die vroue gegaan nie.

<sup>12</sup> En Sara het by haarself gelag en gedink: Sal ek wellus hê nadat ek oud geword het en my heer oud is?

<sup>13</sup> Toe sê die HERE vir Abraham: Waarom het Sara daar gelag en gedink: Sou ek ook werklik baar nou dat ek oud geword het?

<sup>14</sup> Sou iets vir die HERE te wonderbaar wees? Hierdie tyd, oor 'n jaar, sal Ek na jou terugkom, en Sara sal 'n seun hê.

<sup>15</sup> Maar Sara het dit ontken en gesê: Ek het nie gelag nie—want sy was bang. Maar Hy sê: Nee, maar jy het gelag.

<sup>16</sup> Toe staan die manne daarvandaan op, en hulle het gekyk na die kant van Sodom; en Abraham het saam met hulle gegaan om hulle weg te bring.

<sup>17</sup> Daarop sê die HERE: Sal Ek vir Abraham verberg wat Ek gaan doen,

<sup>18</sup> terwyl Abraham tog sekerlik 'n groot en magtige nasie sal word en al die nasies van die aarde in hom geseën sal word?

<sup>19</sup> Want Ek het hom verkies, dat hy aan sy kinders en sy huis ná hom bevel sou gee dat hulle die weg van die HERE moet hou om geregtigheid en reg te doen; sodat die HERE oor Abraham kan bring wat Hy oor hom gespreek het.

<sup>20</sup> Verder het die HERE gesê: Die geroep oor Sodom en Gomorra is waarlik groot, en hulle sonde is waarlik baie swaar.

<sup>21</sup> Ek wil neerdaal en sien of hulle werklik gehandel het soos die geroep oor hulle is wat by My gekom het; en so nie, Ek wil dit weet.

<sup>22</sup> Toe het die manne daarvandaan weggedraai en na Sodom gegaan, maar Abraham het nog bly staan voor die aangesig van die HERE.

<sup>23</sup> En Abraham het nader gekom en gesê: Sal U ook die regverdige saam met die goddelose ombring?

<sup>24</sup> Miskien is daar vyftig regverdiges binne-in die stad; sal U hulle ook ombring en die plek nie spaar ter wille van die vyftig regverdiges wat daarin is nie?

<sup>25</sup> Laat dit ver van U wees om so iets te

## Génesis 19

doen: om die regverdige saam met die goddelose om te bring, sodat die regverdige gelyk is met die goddelose.

Laat dit ver van U wees! Sal die Regter van die ganse aarde geen reg doen nie?

<sup>26</sup> Toe sê die HERE: As Ek in Sodom vyftig regverdiges vind binne-in die stad, dan sal Ek die hele plek spaar om hulle ontwil.

<sup>27</sup> En Abraham antwoord en sê: Kyk tog, ek het dit gewaag om met die Here te spreek alhoewel ek stof en as is.

<sup>28</sup> Miskien sal daar aan die vyftig regverdiges vyf ontbreek; sal U ter wille van vyf die hele stad verwoes? En Hy antwoord: Ek sal dit nie verwoes as Ek daar vyf-en-veertig vind nie.

<sup>29</sup> En hy het nog verder met Hom gespreek en gesê: Miskien sal daar veertig gevind word. En Hy antwoord: Ek sal dit ter wille van die veertig nie doen nie.

<sup>30</sup> Verder sê hy: Laat die Here tog nie toornig wees nie, en mag ek nog iets sê. Miskien sal daar dertig gevind word. En Hy antwoord: Ek sal dit nie doen as Ek daar dertig vind nie.

<sup>31</sup> Toe sê hy: Kyk tog, ek het dit gewaag om met die Here te spreek. Miskien sal daar twintig gevind word. En Hy antwoord: Ek sal dit ter wille van die twintig nie verwoes nie.

<sup>32</sup> Toe sê hy: Laat die Here tog nie toornig wees nie, en laat my net hierdie keer mag spreek. Miskien sal daar tien gevind word. En Hy antwoord: Ek sal dit ter wille van die tien nie verwoes nie.

<sup>33</sup> En die HERE het weggegaan toe Hy opgehou het om met Abraham te spreek,

en Abraham het na sy woonplek teruggekeer.

**19** EN die twee engele het in die aand in Sodom aangekom, terwyl Lot in die poort van Sodom sit; en toe Lot hulle sien, het hy opgestaan om hulle tegemoet te gaan en hom gebuig met die aangesig na die aarde toe

<sup>2</sup> en gesê: Kyk tog, my here, draai tog uit na die huis van u dienaar en bly die nag oor en was u voete; dan kan u vroeg opstaan en u reis voortsit. Maar hulle antwoord: Nee, ons sal op die plein vernag.

<sup>3</sup> Maar hy het baie by hulle aangehou, sodat hulle na hom uitgedraai en in sy huis gekom het. En hy het vir hulle 'n maaltyd berei en ongesuurde koeke gebak, en hulle het geëet.

<sup>4</sup> Hulle het nog nie gaan slaap nie toe die manne van die stad, die manne van Sodom, die huis omsingel: jonk en oud, die hele bevolking, almal saam.

<sup>5</sup> En hulle het na Lot geroep en aan hom gesê: Waar is die manne wat vannag na jou gekom het? Bring hulle na ons toe uit, dat ons hulle kan beken.

<sup>6</sup> Daarop gaan Lot na hulle toe uit voor die ingang en sluit die deur agter hom toe

<sup>7</sup> en sê: My broers, moet tog nie kwaad doen nie.

<sup>8</sup> Kyk tog, ek het twee dogters wat geen man beken het nie; laat ek dié na julle uitbring, en doen met hulle soos dit goed is in julle oë. Net aan hierdie manne moet julle niks doen nie, want daarom het hulle onder die skaduwee van my dak ingekom.

<sup>9</sup> Toe antwoord hulle: Gee pad daar! En

## Génesis 19

---

hulle sê: Hierdie een het gekom om hier as vreemdeling te vertoef en wil tog gedurig die baas speel. Nou sal ons jou meer kwaad doen as aan hulle. En hulle het sterk op die man, op Lot, aangedring en nader gekom om die deur oop te breek.

<sup>10</sup> Maar die manne het hulle hand uitgesteek en Lot by hulle in die huis gebring en die deur toegesluit.

<sup>11</sup> Toe slaan hulle die manne wat by die ingang van die huis was, klein en groot, met blindheid, sodat hulle tevergeefs na die ingang gesoek het.

<sup>12</sup> Daarop sê die manne vir Lot: Wie het jy hier nog? 'n Skoonseun en jou seuns en jou dogters en almal wat jy het in die stad—bring hulle uit die plek uit;

<sup>13</sup> want ons gaan hierdie plek verwoes, omdat die geroep oor hulle groot is voor die aangesig van die HERE, en die HERE het ons gestuur om dit te verwoes.

<sup>14</sup> Toe gaan Lot uit en praat met sy skoonseuns wat met sy dogters sou trou, en sê: Maak julle klaar, gaan uit hierdie plek uit, want die HERE gaan die stad verwoes. Maar hy was in die oë van sy skoonseuns soos een wat gekskeer.

<sup>15</sup> En toe die dag begin breek, het die engele by Lot aangedring en gesê: Maak jou klaar, neem jou vrou en jou twee dogters wat by jou is, dat jy weens die ongeregtigheid van die stad nie omkom nie.

<sup>16</sup> Maar hy het nog getalm. Toe gryp die manne hom en sy vrou en sy twee dogters aan die hand, omdat die HERE hom wou verskoon; en hulle lei hom uit en bring

hom buitekant die stad.

<sup>17</sup> En toe hulle hulle na buite uitgelei het, sê Hy: Vlug vir jou lewe! Moenie omkyk nie, en moenie êrens in die Jordaanstreek bly staan nie. Vlug na die gebergte, dat jy nie omkom nie!

<sup>18</sup> Daarop antwoord Lot hulle: Ag nee, my Here!

<sup>19</sup> Kyk tog, u kneg het genade in u oë gevind, en U het u guns groot gemaak wat U aan my bewys het deur my in die lewe te behou. Maar ek is nie in staat om na die gebergte te vlug sonder dat die onheil my inhaal en ek sterwe nie.

<sup>20</sup> Kyk tog, hierdie stad is naby om daarheen te vlug, en dit is klein. Laat my tog daarheen vlug—is dit nie klein nie?—dat ek kan lewe!

<sup>21</sup> En Hy sê vir hom: Kyk, Ek neem jou ook in hierdie saak in guns aan, sodat Ek die stad waarvan jy gespreek het, nie sal omkeer nie.

<sup>22</sup> Vlug gou daarheen, want Ek kan niks doen voordat jy daar aankom nie. Daarom noem hulle die stad Soar.

<sup>23</sup> Die son het oor die aarde opgegaan toe Lot in Soar aankom.

<sup>24</sup> En die HERE het swawel en vuur oor Sodom en Gomorra laat reën van die HERE uit die hemel,

<sup>25</sup> en Hy het hierdie stede omgekeer en die hele Jordaanstreek, ook al die inwoners van die stede en wat op die grond groei.

<sup>26</sup> En sy vrou het agter hom omgekyk, en sy het 'n soutpilaar geword.

<sup>27</sup> En Abraham is vroeg in die môre na die plek waar hy voor die aangesig van die

## Génesis 20

HERE gestaan het.

<sup>28</sup> Toe hy uitkyk oor Sodom en Gomorra en oor die hele land van die Jordaanstreek, sien hy dat die rook van die land optrek soos die rook van 'n smeltoond.

<sup>29</sup> En onderwyl God die stede van die Jordaanstreek verwoes, het God aan Abraham gedink en Lot uitgelei uit die omkering toe Hy die stede omgekeer het waar Lot woonagtig was.

<sup>30</sup> En Lot het uit Soar opgetrek en saam met sy twee dogters gaan woon op die gebergte, want hy was bang om in Soar te bly; daarom het hy saam met sy twee dogters in 'n spelonk gaan woon.

<sup>31</sup> En die oudste het aan die jongste gesê: Ons vader is oud, en daar is geen man in die land om, na die reël van die ganse aarde, by ons in te gaan nie.

<sup>32</sup> Kom, laat ons aan ons vader wyn gee om te drink en met hom gemeenskap hou, sodat ons deur ons vader 'n geslag in die lewe kan hou.

<sup>33</sup> Hulle gee toe dié nag aan hulle vader wyn om te drink, en die oudste het gekom en met haar vader gemeenskap gehad sonder dat hy dit gewaar het toe sy gaan lê en toe sy opstaan.

<sup>34</sup> Die volgende dag sê die oudste aan die jongste: Kyk, ek het verlede nag met my vader gemeenskap gehad; laat ons hom vannag weer wyn gee om te drink; gaan dan in, hou met hom gemeenskap, dat ons deur ons vader 'n geslag in die lewe kan hou.

<sup>35</sup> Hulle gee toe dié nag weer aan hulle vader wyn om te drink, en die jongste het

opgestaan en met hom gemeenskap gehad sonder dat hy dit gewaar het toe sy gaan lê en toe sy opstaan.

<sup>36</sup> So het dan die twee dogters van Lot by hulle vader bevrug geword,

<sup>37</sup> en die oudste het 'n seun gebaar en hom Moab genoem. Hy is die vader van die hedendaagse Moabiete.

<sup>38</sup> En die jongste het ook 'n seun gebaar en hom Ben-Ammi genoem. Hy is die vader van die hedendaagse Ammoniete.

**20** EN Abraham het daarvandaan weggetrek na die Suidland en gaan woon tussen Kades en Sur en in Gerar as vreemdeling vertoef.

<sup>2</sup> En Abraham het van Sara, sy vrou, gesê: Sy is my suster. Toe laat Abiméleg, die koning van Gerar, Sara haal.

<sup>3</sup> Maar God het in die nag by Abiméleg gekom in 'n droom en vir hom gesê: Kyk, jy sal sterwe ter wille van die vrou wat jy laat haal het, want sy is 'n getroude vrou.

<sup>4</sup> Maar Abiméleg het nog nie naby haar gekom nie; daarom het hy gevra: Here, sal U ook 'n regverdige nasie ombring?

<sup>5</sup> Het hy my nie self gesê nie: Sy is my suster? En sy het self ook gesê: Hy is my broer. In die onskuld van my hart en in die reinheid van my hande het ek dit gedoen.

<sup>6</sup> Daarop antwoord God hom in die droom: Ek weet ook dat jy dit in die onskuld van jou hart gedoen het, en Ek self het jou daarvan teruggehou om nie teen My te sondig nie. Daarom het Ek jou nie toegelaat om haar aan te raak nie.

<sup>7</sup> Gee dan nou die man se vrou terug, want hy is 'n profeet; en hy sal vir jou bid, dat jy



## Génesis 21

kan lewe. Maar as jy haar nie teruggee nie, weet dan dat jy sekerlik sal sterwe, jy en almal wat aan jou behoort.

<sup>8</sup> Abiméleg is toe die môre vroeg op en het al sy dienaars geroep en die hele saak voor hulle ore vertel. Toe was die manne baie bang.

<sup>9</sup> En Abiméleg het Abraham laat roep en hom gevra: Wat het jy ons aangedoen? En wat het ek teen jou gesondig, dat jy oor my en my koninkryk 'n groot sonde gebring het? Dinge wat nie mag gebeur nie, het jy my aangedoen.

<sup>10</sup> Verder sê Abiméleg vir Abraham: Wat was jou bedoeling dat jy dit gedoen het?

<sup>11</sup> En Abraham antwoord: Ek het gedink daar is regtig geen vrees vir God in hierdie plek nie, sodat hulle my oor my vrou sal doodmaak.

<sup>12</sup> En sy is ook werklik my suster; sy is my vader se dogter, maar nie my moeder se dogter nie; en sy het my vrou geword.

<sup>13</sup> En toe God my uit die huis van my vader laat omswerf het, het ek aan haar gesê: Dit is die guns wat jy van jou kant aan my moet bewys—op elke plek waar ons kom, moet jy van my sê: Hy is my broer.

<sup>14</sup> Toe neem Abiméleg kleinvee en beeste, ook slawe en slavinne, en gee dit aan Abraham. Ook sy vrou Sara het hy aan hom teruggegee.

<sup>15</sup> En Abiméleg sê: Daar lê my land voor jou oop; woon waar dit goed is in jou oë.

<sup>16</sup> En vir Sara sê hy: Hier gee ek aan jou broer duisend sikkels silwer. Kyk, dit is vir jou 'n bedekking van die oë met betrekking

tot elkeen wat by jou is, sodat jy in elke opsig geregverdig is.

<sup>17</sup> Toe het Abraham tot God gebid, en God het Abiméleg gesond gemaak; ook sy vrou en sy slavinne, sodat hulle kon baar.

<sup>18</sup> Want die HERE het elke moederskoot van die huis van Abiméleg geheel en al toegesluit ter wille van Sara, die vrou van Abraham.

**21** EN die HERE het Sara besoek soos Hy beloof het; en die HERE het aan Sara gedoen soos Hy gespreek het:

<sup>2</sup> Sara het bevrug geword en vir Abraham in sy ouderdom 'n seun gebaar op die bepaalde tyd wat God genoem het.

<sup>3</sup> En Abraham het sy seun wat vir hom gebore is, wat Sara vir hom gebaar het, Isak genoem.

<sup>4</sup> En Abraham het sy seun Isak besny toe hy agt dae oud was, soos God hom beveel het.

<sup>5</sup> En Abraham was honderd jaar oud toe sy seun Isak vir hom gebore is.

<sup>6</sup> En Sara het gesê: 'n Gelag het God my berei: elkeen wat dit hoor, sal oor my lag.

<sup>7</sup> Verder sê sy: Wie kon ooit aan Abraham voorspel het: Sara soog kinders? Want ek het 'n seun gebaar in sy ouderdom.

<sup>8</sup> En die kind het opgegroeï en is gespeen. En Abraham het 'n groot maaltyd berei op die dag toe Isak gespeen is.

<sup>9</sup> Toe sien Sara hoe die seun van Hagar, die Egiptiese slavin, wat sy vir Abraham gebaar het, spot;

<sup>10</sup> en sy sê aan Abraham: Jaag hierdie slavin en haar seun weg, want die seun van hierdie slavin mag nie saam met my seun

## Génesis 21

---

Isak erwe nie.

<sup>11</sup> En die woord was baie verkeerd in die oë van Abraham vanweë sy seun.

<sup>12</sup> Maar God het aan Abraham gesê: Laat dit nie verkeerd wees in jou oë ter wille van die seun en van jou slavin nie. Luister na Sara in alles wat sy van jou verlang, want deur Isak sal daar vir jou 'n nageslag genoem word.

<sup>13</sup> Maar Ek sal ook die seun van die slavin tot 'n nasie maak, omdat hy jou kind is.

<sup>14</sup> Toe is Abraham die môre vroeg op, en hy het brood en 'n sak met water geneem en dit aan Hagar gegee deur dit op haar skouer te sit, en ook die kind, en haar weggestuur. Sy het toe weggegaan en rondgedwaal in die woestyn van Berséba.

<sup>15</sup> En toe die water in die sak op was, het sy die kind onder een van die bosse neergewerp

<sup>16</sup> en geloop en op 'n afstand gaan sit so ver as 'n boog kan skiet; want sy het gesê: Ek wil die dood van die kind nie aansien nie. En sy het op 'n afstand gaan sit en haar stem verhef en geweën.

<sup>17</sup> Toe hoor God die stem van die seun, en die Engel van God het na Hagar geroep uit die hemel en haar gevra: Wat is dit met jou, Hagar? Wees nie bevrees nie, want God het na die stem van die seun geluister op die plek waar hy is.

<sup>18</sup> Staan op, tel die seun op en hou hom vas met jou hand, want Ek sal hom 'n groot nasie maak.

<sup>19</sup> Daarop het God haar oë geopen, en sy sien 'n put! En sy het geloop en die sak vol water gemaak en die seun laat drink.

<sup>20</sup> En God was met die seun; en hy het opgegroeï en in die woestyn gewoon en 'n boogskutter geword:

<sup>21</sup> hy het in die woestyn Paran gewoon; en sy moeder het vir hom 'n vrou uit Egipteland geneem.

<sup>22</sup> IN dié tyd het Abiméleg en Pigol, sy leërowerste, met Abraham gespreek en gesê: God is met jou in alles wat jy doen.

<sup>23</sup> Sweer dan nou vir my hier by God dat jy met my en my kroos en my nageslag nie vals sal handel nie; dieselfde guns wat ek jou bewys het, moet jy aan my bewys en aan die land waarin jy as vreemdeling vertoef.

<sup>24</sup> En Abraham antwoord: Ek sweer.

<sup>25</sup> Maar Abraham het Abiméleg aangespreek oor 'n put wat die dienaars van Abiméleg met geweld geneem het.

<sup>26</sup> Daarop antwoord Abiméleg: Ek weet nie wie dit gedoen het nie, en jy het my dit ook nie meegedeel nie, en ek het daar ook niks van gehoor nie as net vandag.

<sup>27</sup> Toe neem Abraham kleinvee en beeste en gee dit aan Abiméleg; en hulle twee het 'n verbond gesluit;

<sup>28</sup> Abraham het naamlik die sewe ooilammers van die kleinvee eenkant uitgekeer.

<sup>29</sup> Toe sê Abiméleg vir Abraham: Wat beteken hierdie sewe ooilammers wat jy uitgekeer het?

<sup>30</sup> En hy antwoord: Die sewe ooilammers moet jy uit my hand aanneem, sodat dit vir my 'n getuienis kan wees dat ek hierdie put gegrawe het.

<sup>31</sup> Daarom noem hulle dié plek Berséba,

## Génesis 22

omdat hulle twee daar gesweer het.

<sup>32</sup> So het hulle dan 'n verbond gesluit in Berséba. Daarna het Abiméleg en Pigol, sy leërowerste, klaargemaak en na die land van die Filistyne teruggegaan.

<sup>33</sup> En hy het 'n tamarisk in Berséba geplant en daar die Naam van die HERE, die ewige God, aangeroep.

<sup>34</sup> En Abraham het baie dae as vreemdeling in die land van die Filistyne vertoef.

**22** NÁ hierdie dinge het God Abraham op die proef gestel en aan hom gesê: Abraham! En hy antwoord: Hier is ek!

<sup>2</sup> Toe sê Hy: Neem jou seun, jou enigste, wat jy liefhet, Isak, en gaan na die land Moría en offer hom daar as brandoffer op een van die berge wat Ek jou sal aanwys.

<sup>3</sup> Daarop het Abraham die môre vroeg klaargemaak en sy esel opgesaal en twee van sy dienaars en sy seun Isak saam met hom geneem; en hy het hout gekloof vir 'n brandoffer en opgestaan en na die plek gegaan wat God hom aangewys het.

<sup>4</sup> Op die derde dag toe slaan Abraham sy oë op en sien die plek van ver af.

<sup>5</sup> En Abraham sê aan sy dienaars: Bly julle hier met die esel; ek en die seun wil daarheen gaan om te aanbid en dan na julle terugkom.

<sup>6</sup> En Abraham het die hout vir die brandoffer geneem en dit op sy seun Isak gesit, en die vuur en die mes in sy hand geneem. So het hulle twee dan saam geloop.

<sup>7</sup> Toe spreek Isak met sy vader Abraham

en sê: My vader! En hy antwoord: Hier is ek, my seun! En hy sê: Hier is die vuur en die hout, maar waar is die lam vir 'n brandoffer?

<sup>8</sup> En Abraham antwoord: God sal vir Homself die lam vir 'n brandoffer voorsien, my seun. So het hulle twee dan saam geloop.

<sup>9</sup> Toe hulle kom op die plek wat God hom aangewys het, het Abraham daar die altaar gebou en die hout reggelê; daarna het hy sy seun Isak gebind en hom op die altaar bo-op die hout gesit.

<sup>10</sup> Toe steek Abraham sy hand uit en neem die mes om sy seun te slag.

<sup>11</sup> Maar die Engel van die HERE het na hom van die hemel af geroep en gesê: Abraham, Abraham! En hy antwoord: Hier is ek!

<sup>12</sup> En Hy sê: Moenie jou hand na die seun uitsteek nie, en doen hom niks nie; want nou weet Ek dat jy God vrees en jou seun, jou enigste, van My nie teruggehou het nie.

<sup>13</sup> En toe Abraham sy oë opslaan, sien hy meteens 'n ram wat agter in die bos met sy horings vasgeraak het. En Abraham het gegaan en die ram geneem en dit as brandoffer in die plek van sy seun geoffer.

<sup>14</sup> En Abraham het dié plek genoem: Die HERE sal voorsien! Sodat vandag nog gesê word: Op die berg van die HERE sal dit voorsien word.

<sup>15</sup> Toe roep die Engel van die HERE vir die tweede keer na Abraham van die hemel af

<sup>16</sup> en sê: Ek sweer by Myself, spreek die HERE, omdat jy dit gedoen het en jou seun, jou enigste, nie teruggehou het nie,

## Génesis 23

<sup>17</sup> dat Ek jou ryklik sal seën en jou nageslag grootliks sal vermeerder soos die sterre van die hemel en soos die sand wat aan die seestrand is; en jou nageslag sal die poort van sy vyande in besit neem.

<sup>18</sup> En in jou nageslag sal al die nasies van die aarde geseën word, omdat jy na my stem geluister het.

<sup>19</sup> En Abraham het na sy dienaars teruggekeer; en hulle het klaargemaak en saam na Berséba gegaan. En Abraham het in Berséba bly woon.

<sup>20</sup> Ná hierdie dinge het hulle aan Abraham berig gebring en gesê: Kyk, Milka het ook vir jou broer Nahor seuns gebaar:

<sup>21</sup> Us, sy eersgeborene, en Bus, sy broer, en Kémuel, die vader van Aram,

<sup>22</sup> ook Kesed en Haso en Pildas en Jidlaf en Bétuel.

<sup>23</sup> (En Bétuel was die vader van Rebekka.) Hierdie agt het Milka vir Nahor, die broer van Abraham, gebaar.

<sup>24</sup> En sy byvrou met die naam van Reüma, sy het ook Tebag en Gaham en Tahas en Máäga gebaar.

**23** EN die lewensdae van Sara was honderd-sewen-en-twintig jaar. Dit was die lewensjare van Sara.

<sup>2</sup> En Sara het gesterwe in Kirjat-Arba, dit is Hebron, in die land Kanaän; en Abraham het gekom om oor Sara te rouklaag en haar te beweën.

<sup>3</sup> Daarna het Abraham opgestaan, van sy dode af weg, en met die seuns van Het gesprek en gesê:

<sup>4</sup> Ek is 'n vreemdeling en bywoner onder julle. Gee my 'n graf as besitting by julle,

dat ek my dode van my af weg kan begrawe.

<sup>5</sup> Toe antwoord die seuns van Het vir Abraham en sê aan hom:

<sup>6</sup> Luister na ons, my heer! U is 'n vors van God onder ons. Begraaf u dode in die beste graf wat ons het; niemand van ons sal u sy graf weier om u dode te begrawe nie.

<sup>7</sup> Toe staan Abraham op en buig hom voor die volk van die land, voor die seuns van Het;

<sup>8</sup> en hy het met hulle gesprek en gesê: As julle dit goedvind dat ek my dode van my af weg begrawe, luister dan na my en doen vir my 'n goeie woord by Efron, die seun van Sohar,

<sup>9</sup> dat hy aan my gee die spelonk van Magpéla wat aan hom behoort, wat aan die end van sy stuk grond lê; laat hy dit vir die volle som aan my gee, dat ek 'n graf onder julle mag besit.

<sup>10</sup> En Efron het tussen die seuns van Het gesit. Toe antwoord Efron, die Hetiet, vir Abraham voor die ore van die seuns van Het, van almal wat in die poort van sy stad ingegaan het:

<sup>11</sup> Nee, my heer, luister na my. Die stuk grond gee ek aan u; ook die spelonk wat daarin is, dit gee ek aan u; voor die oë van die seuns van my volk gee ek dit aan u; begraaf u dode.

<sup>12</sup> Daarop het Abraham hom voor die volk van die land neergebuig

<sup>13</sup> en met Efron gesprek voor die ore van die volk van die land: Ja, as dit u is, ag, luister na my! Ek gee die geld vir die stuk grond; neem dit van my aan, dat ek my

## Génesis 24

dode daar kan begrawe.

<sup>14</sup> En Efron het Abraham geantwoord en aan hom gesê:

<sup>15</sup> My heer, luister na my. 'n Stuk land van vierhonderd sikkels silwer—wat is dit tussen my en u? Begraaf maar u dode.

<sup>16</sup> Toe luister Abraham na Efron, en Abraham het aan Efron die geld afgeweeg waarvan hy gespreek het voor die ore van die seuns van Het—vierhonderd sikkels silwer gangbaar by die koopman.

<sup>17</sup> So het dan die stuk grond van Efron wat in Magpéla teenoor Mamre lê, die stuk grond en die spelonk wat daarin is, en al die bome op die stuk grond wat op die ganse gebied daarvan rondom staan,

<sup>18</sup> die eiendom van Abraham geword voor die oë van die seuns van Het, voor almal wat in die poort van sy stad ingegaan het.

<sup>19</sup> Daarna het Abraham toe sy vrou Sara begrawe in die spelonk van die stuk grond van Magpéla, oostelik van Mamre, dit is Hebron, in die land Kanaän.

<sup>20</sup> So is dan die stuk grond en die spelonk wat daarin was, deur die seuns van Het aan Abraham afgestaan om dit as graf in eiendom te besit.

**24** EN Abraham was oud en ver op sy dae, en die HERE het Abraham in alles geseën.

<sup>2</sup> Toe sê Abraham aan sy dienaar, die oudste van sy huis wat die opsig gehad het oor al sy goed: Lê tog jou hand onder my heup,

<sup>3</sup> dat ek jou kan laat sweer by die HERE, die God van die hemel en die God van die aarde, dat jy vir my seun geen vrou sal

neem uit die dogters van die Kanaäniete onder wie ek woon nie;

<sup>4</sup> maar dat jy na my land en my familie sal gaan om vir my seun Isak 'n vrou te neem.

<sup>5</sup> Toe sê die dienaar vir hom: Miskien sal die vrou my nie wil volg na hierdie land nie. Moet ek u seun dan maar terugbring in die land waaruit u weggetrek het?

<sup>6</sup> En Abraham antwoord hom: Neem jou tog in ag dat jy my seun nie weer daarheen bring nie.

<sup>7</sup> Die HERE, die God van die hemel, wat my uit my vader se huis en uit my geboorteland weggeneem het, en wat met my gespreek en vir my gesweer het met die woorde: Aan jou nageslag sal Ek hierdie land gee—Hy sal sy engel voor jou uit stuur, en jy moet vir my seun daar 'n vrou gaan haal.

<sup>8</sup> Maar as die vrou jou nie wil volg nie, dan is jy ontslae van hierdie eed aan my. Jy moet net my seun nie weer daarheen bring nie.

<sup>9</sup> Toe lê die dienaar sy hand onder die heup van Abraham, sy heer, en hy het vir hom gesweer, met die oog op hierdie saak.

<sup>10</sup> En die dienaar het tien kamele van die kamele van sy heer geneem en weggegaan met allerhande kosbare goed van sy heer by hom: hy het klaargemaak en na Mesopotámië, na die stad van Nahor, getrek.

<sup>11</sup> En hy het die kamele laat neerkniel buitekant die stad by 'n put, teen die aand, teen die tyd dat die vroue uitgaan om water te skep,

<sup>12</sup> en gesê: HERE, God van Abraham, my

## Génesis 24

---

heer, laat ek haar tog vandag ontmoet, en bewys guns aan Abraham, my heer.

<sup>13</sup> Hier staan ek by die fontein, terwyl die dogters van die manne van die stad uitkom om water te skep.

<sup>14</sup> Laat dít nou tog gebeur: as die dogter aan wie ek sal sê: Hou tog jou kruik, dat ek kan drink, antwoord: Drink, en ek sal ook u kamele laat drink—dan is sy dit wat U bestem het vir u kneg Isak, en daaraan sal ek weet dat U guns aan my heer bewys het.

<sup>15</sup> Hy het nog nie klaar gespreek nie, of daar kom Rebekka uit wat vir Bétuel, die seun van Milka, die vrou van Nahor, Abraham se broer, gebore is, met haar kruik op haar skouer.

<sup>16</sup> En die dogter was baie mooi van aansien, 'n jongmeisie, en geen man het haar beken nie. En sy het afgedaal na die fontein en haar kruik volgemaak en weer opgekom.

<sup>17</sup> Toe loop die dienaar haar tegemoet en sê: Laat my tog 'n bietjie water uit jou kruik drink.

<sup>18</sup> En sy antwoord: Drink, my heer! Daarop laat sy gou haar kruik op haar hand afsak en laat hom drink.

<sup>19</sup> Nadat sy hom genoeg laat drink het, sê sy: Ek sal vir u kamele ook skep totdat hulle genoeg gedrink het.

<sup>20</sup> Dadelik het sy toe haar kruik in die drinkbak leeggemaak en weer na die put geloop om te skep en vir al sy kamele geskep.

<sup>21</sup> En die man het haar stilswyend betrag om te weet of die HERE sy weg voorspoedig gemaak het of nie.

<sup>22</sup> En toe die kamele genoeg gedrink het, neem die man 'n goue ring, 'n halfsikkel in gewig, en twee armbande vir haar hande, tien sikkels goud in gewig.

<sup>23</sup> En hy sê: Wie se dogter is jy? Vertel my tog. Is daar plek vir ons in die huis van jou vader om te vernag?

<sup>24</sup> Toe antwoord sy hom: Ek is die dogter van Bétuel, die seun van Milka wat sy vir Nahor gebaar het.

<sup>25</sup> Verder sê sy vir hom: Daar is ook strooi en voer in oorvloed by ons, ook plek om te vernag.

<sup>26</sup> Toe buig die man hom neer en aanbid die HERE

<sup>27</sup> met die woorde: Geloofd sy die HERE, die God van Abraham, my heer, wat sy goedertierenheid en sy trou aan my heer nie onttrek het nie. Wat my aangaan, die HERE het my op die weg gelei na die huis van die broers van my heer.

<sup>28</sup> Daarna het die dogter geloop en in die huis van haar moeder vertel wat daar gebeur het.

<sup>29</sup> En Rebekka het 'n broer gehad met die naam van Laban, en Laban het uitgeloop na die man buite by die fontein.

<sup>30</sup> Want toe hy die ring en die armbande aan die hande van sy suster sien en die woorde van sy suster Rebekka hoor, naamlik: So het die man met my gespreek—het hy na die man gegaan, terwyl hy nog daar staan by die kamele by die fontein,

<sup>31</sup> en gesê: Kom in, geseënde van die HERE! Waarom staan jy buitekant terwyl ek die huis reggemaak het en ook plek vir

## Génesis 24

---

die kamele?

<sup>32</sup> En die man het in die huis ingekom—die kamele is afgesaal en vir die kamele is strooi en voer gegee, en water om sy voete te was en die voete van die manne wat by hom was.

<sup>33</sup> Daarop het hulle ete voor hom neergesit; maar hy het gesê: Ek sal nie eet voordat ek my saak voorgedra het nie. En hy antwoord: Spreek maar.

<sup>34</sup> Toe sê hy: Ek is die dienaar van Abraham.

<sup>35</sup> En die HERE het my heer baie geseën, sodat hy groot geword het, en aan hom kleinvee en beeste, silwer en goud, slawe en slavinne en kamele en esels gegee.

<sup>36</sup> En Sara, die vrou van my heer, het vir my heer 'n seun gebaar nadat sy al oud was; en hy het aan hom alles oorgegee wat hy besit.

<sup>37</sup> En my heer het my laat sweer en gesê: Jy moet vir my seun geen vrou neem uit die dogters van die Kanaäniete in wie se land ek woon nie;

<sup>38</sup> maar jy moet gaan na die huis van my vader en na my geslag en vir my seun 'n vrou gaan haal.

<sup>39</sup> Toe het ek aan my heer gesê: Miskien sal die vrou my nie volg nie.

<sup>40</sup> Maar hy het my geantwoord: Die HERE voor wie se aangesig ek gewandel het, sal sy engel met jou saamstuur, en Hy sal jou weg voorspoedig maak, sodat jy vir my seun 'n vrou uit my geslag en uit die huis van my vader kan gaan haal.

<sup>41</sup> Dan sal jy ontslae wees van die eed aan my: as jy by my geslag kom en hulle haar

aan jou nie wil gee nie, dan is jy ontslae van die eed aan my.

<sup>42</sup> Ek het toe vandag by die fontein gekom en gesê: HERE, God van Abraham, my heer, as U dan my weg waar ek op gaan, voorspoedig wil maak—

<sup>43</sup> ek staan hier by die fontein—laat dít nou tog gebeur: die jongmeisie wat uitkom om te skep en aan wie ek sal sê: Laat my tog 'n bietjie water uit jou kruik drink—

<sup>44</sup> en wat my sal antwoord: Drink u self, en ook vir u kamele sal ek skep—sý is die vrou wat die HERE vir die seun van my heer bestem het.

<sup>45</sup> Ek het nog nie klaar in my hart gespreek nie of daar het Rebekka uitgekóm met haar kruik op die skouer en na die fontein afgedaal en geskep. Ek het toe vir haar gesê: Laat my tog drink!

<sup>46</sup> En sy het dadelik haar kruik van haar laat afsak en gesê: Drink, en ek sal u kamele ook laat drink. En ek het gedrink, en sy het ook die kamele laat drink.

<sup>47</sup> Toe vra ek haar en sê: Wie se dogter is jy? En sy antwoord: Die dogter van Bétuel, die seun van Nahor wat Milka vir hom gebaar het. Daarop het ek die ring aan haar neus gesit en die armbande aan haar hande,

<sup>48</sup> en ek het my in aanbidding neergebuig voor die HERE en die HERE geloof, die God van Abraham, my heer, wat my op die regte weg gelei het om die dogter van my heer se broer vir sy seun te gaan haal.

<sup>49</sup> As julle dan nou guns en trou aan my heer wil bewys, sê dit vir my; en so nie, sê dit vir my, dat ek regs of links kan gaan.

## Génesis 25

<sup>50</sup> Toe antwoord Laban en Bétuel en sê:

Van die HERE kom die saak; ons kan jou daar geen kwaad of goed van spreek nie.

<sup>51</sup> Daar staan Rebekka voor jou, neem haar en gaan heen, dat sy 'n vrou kan wees vir die seun van jou heer, soos die HERE gespreek het.

<sup>52</sup> Toe die dienaar van Abraham hulle woorde hoor, het hy hom voor die HERE neergebuig na die aarde toe.

<sup>53</sup> Daarna het die dienaar silwer- en goue goed en klere uitgehaal en dit aan Rebekka gegee; ook aan haar broer en haar moeder het hy kosbare geskenke gegee.

<sup>54</sup> En hulle het geëet en gedrink, hy en die manne wat by hom was, en die nag oorgebly. Toe hulle die môre vroeg opgestaan het, sê hy: Laat my trek na my heer!

<sup>55</sup> Maar haar broer en haar moeder sê: Laat die dogter 'n dag of tien by ons bly; daarna kan jy heengaan.

<sup>56</sup> Maar hy antwoord hulle: Moet my nie ophou nie aangesien die HERE my weg voorspoedig gemaak het; laat my trek, dat ek na my heer kan gaan.

<sup>57</sup> Toe sê hulle: Laat ons die dogter roep en haar self vra.

<sup>58</sup> En hulle het Rebekka geroep en haar gevra: Wil jy met hierdie man saamgaan? En sy antwoord: Ja.

<sup>59</sup> Daarop het hulle Rebekka, hulle suster, en haar oppasser laat trek saam met die dienaar van Abraham en sy manne.

<sup>60</sup> En hulle het Rebekka geseën en aan haar gesê: Ons suster, mag jy duisende van tienduisende word, en mag jou nageslag

die poort van sy vyande in besit neem!

<sup>61</sup> Toe het Rebekka en haar diensmeisies hulle klaargemaak en op die kamele weggery en die man gevolg. So het die dienaar dan Rebekka saamgeneem en weggetrek.

<sup>62</sup> En Isak het uit die rigting van die put Lagai-Roï gekom; want hy het gaan woon in die Suidland.

<sup>63</sup> En Isak het teen die aand uitgegaan om te peins in die veld. En toe hy sy oë opslaan, sien hy meteens kamele aankom.

<sup>64</sup> Rebekka het ook haar oë opgeslaan en Isak gesien. Toe het sy van die kameel afgegely

<sup>65</sup> en aan haar dienaar gesê: Watter man is dit wat ons tegemoetloop in die veld? En die dienaar antwoord: Dit is my heer. Toe neem sy die sluier en bedek haar.

<sup>66</sup> Daarop het die dienaar aan Isak alles vertel wat hy gedoen het.

<sup>67</sup> En Isak het haar in die tent van sy moeder Sara ingebring en Rebekka geneem, en sy het sy vrou geword; en hy het haar liefgehad. So is Isak dan getroos ná die dood van sy moeder.

**25** EN Abraham het weer 'n vrou geneem met die naam van Ketúra.

<sup>2</sup> En sy het vir hom Simran en Joksan en Medan en Mídian en Jisbak en Suag gebaar.

<sup>3</sup> En Joksan was die vader van Skeba en Dedan; en die kinders van Dedan was die Assuriëte, Letusiëte en Leümmiëte.

<sup>4</sup> En die seuns van Mídian was: Efa en Efer en Henog en Abída en Eldaä. Hulle almal was seuns van Ketúra.

<sup>5</sup> En Abraham het aan Isak alles gegee wat



## Génesis 25

---

hy besit het,

<sup>6</sup> maar aan die seuns van die byvroue van Abraham het Abraham geskenke gegee en hulle, nog by sy lewe, van sy seun Isak af oos laat wegtrek, na die Oosland.

<sup>7</sup> En dit is die dae van die lewensjare van Abraham wat hy geleef het: honderd-vyf-en-sewentig jaar.

<sup>8</sup> Abraham het die asem uitgeblaas en in goeie ouderdom gesterwe, oud en afgeleef. En hy is by sy volksgenote versamel.

<sup>9</sup> En sy seuns Isak en Ismael het hom begrawe in die spelonk van Magpéla, in die stuk grond van Efron, die seun van Sohar, die Hetiet, wat oos van Mamre lê,

<sup>10</sup> die stuk grond wat Abraham van die seuns van Het gekoop het. Daar is Abraham begrawe en sy vrou Sara.

<sup>11</sup> Ná die dood van Abraham het God sy seun Isak geseën; en Isak het gewoon by die put Lagai-Roï.

<sup>12</sup> En dit is die stamboom van Ismael, die seun van Abraham, wat Hagar, die Egiptiese, die slavin van Sara, vir Abraham gebaar het—

<sup>13</sup> dit is die name van die seuns van Ismael, hulle name volgens hulle afstamming: die eersgeborene van Ismael, Nébajot; dan Kedar en Adbeël en Mibsam

<sup>14</sup> en Misma en Duma en Massa,

<sup>15</sup> Hadad en Tema, Jetur, Nafis en Kedma.

<sup>16</sup> Dit is die seuns van Ismael, en dit hulle name, in hulle dorpe en laers, twaalf vorste volgens hulle volkstamme.

<sup>17</sup> En dit is die lewensjare van Ismael: honderd-sewen-en-dertig jaar; en hy het die asem uitgeblaas en gesterwe, en hy is

versamel by sy volksgenote.

<sup>18</sup> En hulle het gewoon van Háwila tot by Sur wat oos van Egipte lê in die rigting van Assur. Teenoor al sy broers het hy hom gevestig.

<sup>19</sup> EN dit is die geskiedenis van Isak, die seun van Abraham: Abraham was die vader van Isak.

<sup>20</sup> En Isak was veertig jaar oud toe hy Rebekka, die dogter van Bétuel, die Arameër uit Paddan-Aram, die suster van Laban, die Arameër, vir hom as vrou geneem het.

<sup>21</sup> En Isak het die HERE gesmeek met die oog op sy vrou, want sy was onvrugbaar; en die HERE het hom verhoor, sodat sy vrou Rebekka swanger geword het.

<sup>22</sup> En die kinders het teen mekaar gestoot binne-in haar. Toe sê sy: As dit so gaan, waarvoor leef ek dan? Daarop het sy gegaan om die HERE te raadpleeg.

<sup>23</sup> En die HERE het haar geantwoord: Twee nasies is in jou skoot, en twee volke sal van mekaar gaan uit jou liggaam; en die een volk sal sterker wees as die ander volk; en die oudste sal die jongste dien.

<sup>24</sup> En toe haar dae vervul is dat sy moesbaar, was daar 'n tweeling in haar skoot.

<sup>25</sup> En die eerste is gebore—rooi, geheel en al soos 'n mantel van hare. Daarom het hulle hom Esau genoem.

<sup>26</sup> En daarna is sy broer gebore, terwyl sy hand die hakskeen van Esau vashou. Daarom het hulle hom Jakob genoem. En Isak was sestig jaar oud by hulle geboorte.

<sup>27</sup> En die seuns het opgegroeï: Esau het 'n ervare jagter geword, 'n man van die veld;

## Génesis 26

maar Jakob was 'n vredeliewende man wat in tente gewoon het.

<sup>28</sup> En Isak het Esau liefgehad, want wildsvleis was na sy smaak; maar Rebekka het Jakob liefgehad.

<sup>29</sup> En Jakob het 'n kooksel klaargemaak, en Esau het moeg uit die veld gekom.

<sup>30</sup> Toe sê Esau vir Jakob: Laat my tog sluk van die rooigoed daar, want ek is moeg. Daarom het hulle hom Edom genoem.

<sup>31</sup> En Jakob antwoord: Verkoop eers jou eersgeboortereg aan my.

<sup>32</sup> En Esau sê: Kyk, ek gaan sterwe, en wat baat die eersgeboortereg my dan?

<sup>33</sup> Toe antwoord Jakob: Sweer eers vir my. En hy het vir hom gesweer en sy eersgeboortereg aan Jakob verkoop.

<sup>34</sup> En Jakob het aan Esau brood en die kooksel lensies gegee; en hy het geëet en gedrink en opgestaan en weggegaan. So het Esau dan sy eersgeboortereg verag.

**26** EN daar was hongersnood in die land, buiten die eerste hongersnood wat in die dae van Abraham gewees het. Daarom het Isak getrek na Abiméleg, die koning van die Filistyne, na Gerar.

<sup>2</sup> En die HERE het aan hom verskyn en gesê: Moenie aftrek na Egipte nie; woon in die land wat Ek jou sal aanwys.

<sup>3</sup> Vertoef as vreemdeling in hierdie land, en Ek sal met jou wees en jou seën; want aan jou en jou nageslag sal Ek al hierdie lande gee: Ek sal die eed bevestig wat Ek vir jou vader Abraham gesweer het.

<sup>4</sup> En Ek sal jou nageslag vermeerder soos die sterre van die hemel en aan jou

nageslag al hierdie lande gee, en in jou nageslag sal al die nasies van die aarde geseën word;

<sup>5</sup> omdat Abraham na my stem geluister en my ordening, my gebooie, my insettinge en my wette onderhou het.

<sup>6</sup> So het Isak dan in Gerar gebly.

<sup>7</sup> En toe die manne van die plek hom na sy vrou vra, antwoord hy: Sy is my suster. Want hy was bang om te sê: My vrou—anders sal die manne van die plek, so het hy gedink, my miskien doodmaak ter wille van Rebekka; want sy was mooi van aansien.

<sup>8</sup> En toe hy al 'n lang tyd daar was, kyk Abiméleg, die koning van die Filistyne, deur die venster uit en sien hoe Isak speel met Rebekka, sy vrou.

<sup>9</sup> En Abiméleg het Isak geroep en gesê: Kyk, sy is dan tog jou vrou! Hoe kon jy dan verklaar: Sy is my suster? En Isak antwoord hom: Ja, ek het gedink ek kan miskien om haar ontwil my lewe verloor!

<sup>10</sup> En Abiméleg sê: Wat het jy ons nou aangedoen? Hoe maklik kon een van die mense met jou vrou gemeenskap gehad en jy 'n skuld oor ons gebring het!

<sup>11</sup> Daarom gee Abiméleg bevel aan die hele volk en sê: Wie hierdie man of sy vrou aanraak, sal sekerlik gedood word.

<sup>12</sup> Isak het toe in dié land gesaai en daardie jaar honderdvoudig gewen, want die HERE het hom geseën.

<sup>13</sup> En die man het groot geword en altyddeur groter geword totdat hy baie groot was:

<sup>14</sup> hy het troppe kleinvee en beeste gehad

## Génesis 26

---

en baie bediendes, sodat die Filistyne hom beny het.

<sup>15</sup> En al die putte wat die dienaars van sy vader in die dae van sy vader Abraham gegrawe het, dié het die Filistyne toegestop en met grond opgevul.

<sup>16</sup> Toe sê Abiméleg vir Isak: Trek weg van ons, want jy het vir ons veels te magtig geword.

<sup>17</sup> Daarop het Isak vandaar weggetrek en laer opgeslaan in die dal by Gerar en daar bly woon.

<sup>18</sup> En Isak het die putte weer oopgegrawe wat hulle in die dae van sy vader Abraham gegrawe het, en wat die Filistyne ná die dood van Abraham toegestop het, en dit genoem na die name wat sy vader daaraan gegee het.

<sup>19</sup> En terwyl die dienaars van Isak in die dal grawe, vind hulle daar 'n put met lewendige water.

<sup>20</sup> En die herders van Gerar het getwis met die herders van Isak en gesê: Dit is óns water. Daarom het hy die put Esek genoem, omdat hulle met hom onenigheid gehad het.

<sup>21</sup> Daarop grawe hulle 'n ander put, en daaroor het hulle ook getwis. Daarom het hy dit Sitna genoem.

<sup>22</sup> Toe het hy vandaar versit en 'n ander put gegrawe, en daaroor is nie getwis nie. Daarom het hy dit Réhobot genoem en gesê: Ja, nou het die HERE vir ons ruimte gemaak en kan ons vrugbaar wees in die land.

<sup>23</sup> Daarna het hy vandaar opgetrek na Berséba.

<sup>24</sup> En die HERE het aan hom in dieselfde nag verskyn en gesê: Ek is die God van Abraham, jou vader. Moenie bang wees nie, want Ek is met jou; en Ek sal jou seën en jou nageslag vermeerder ter wille van Abraham, my kneg.

<sup>25</sup> Toe bou hy daar 'n altaar, en hy het die Naam van die HERE aangeroep en daar sy tent opgeslaan; en die dienaars van Isak het daar 'n put gegrawe.

<sup>26</sup> Daarop kom Abiméleg na hom van Gerar af, saam met Ahussat, sy vriend, en Pigol, sy leërowerste.

<sup>27</sup> En Isak het hulle gevra: Waarom het julle na my gekom, terwyl julle my haat en my van julle af weggestuur het?

<sup>28</sup> Toe antwoord hulle: Ons het duidelik gesien dat die HERE met jou is. Daarom het ons gedink: Laat daar tog 'n eed tussen ons wees, tussen ons en jou; en laat ons 'n verbond met jou sluit:

<sup>29</sup> jy moet ons geen kwaad doen nie, net soos ons jou nie aangeraak en aan jou niks as goed gedoen het nie en jou in vrede weggestuur het. Jy is nou eenmaal die geseënde van die HERE.

<sup>30</sup> Toe berei hy vir hulle 'n maaltyd, en hulle het geëet en gedrink.

<sup>31</sup> En hulle is die môre vroeg op en het vir mekaar 'n eed gesweer. Daarop het Isak hulle laat gaan, en hulle het in vrede van hom af weggetrek.

<sup>32</sup> Dieselfde dag kom toe die dienaars van Isak en vertel hom van die put wat hulle gegrawe het, en sê vir hom: Ons het water gekry.

<sup>33</sup> En hy het dit Seba genoem. Daarom is

## Génesis 27

die naam van die stad Berséba tot vandag toe.

<sup>34</sup> Toe Esau veertig jaar oud was, het hy Judit, die dogter van Beëri, die Hetiet, vir hom as vrou geneem, en Basmát, die dogter van Elon, die Hetiet.

<sup>35</sup> En hulle was vir Isak en Rebekka 'n bitter verdriet.

**27** TOE Isak oud geword het en sy oë swak was, sodat hy nie kon sien nie, het hy sy oudste seun Esau geroep en vir hom gesê: My seun! En hy het hom geantwoord: Hier is ek!

<sup>2</sup> Toe sê hy: Kyk tog, ek het oud geword, ek weet die dag van my dood nie.

<sup>3</sup> Neem dan nou tog jou wapens, jou pylkoker en jou boog, en gaan uit in die veld en jag vir my 'n stuk wild

<sup>4</sup> en maak vir my lekker ete klaar soos ek dit graag wil hê; en bring dit vir my om te eet; sodat my siel jou kan seën voordat ek sterwe.

<sup>5</sup> En Rebekka het geluister terwyl Isak met sy seun Esau spreek. En Esau het in die veld gegaan om 'n stuk wild te jag en dit te bring.

<sup>6</sup> Toe het Rebekka met haar seun Jakob gespreek: Kyk, ek het jou vader met jou broer Esau hoor spreek en sê:

<sup>7</sup> Bring vir my 'n stuk wild en maak vir my lekker ete, dat ek kan eet en jou kan seën voor die aangesig van die HERE voor my dood.

<sup>8</sup> My seun, luister dan nou na my, na wat ek jou beveel.

<sup>9</sup> Loop nou na die kleinvee en gaan haal vir my daar twee mooi bokkies, dat ek jou

vader daarvan 'n lekker ete kan maak soos hy dit graag wil hê.

<sup>10</sup> Dan moet jy dit na jou vader bring, dat hy kan eet; sodat hy jou kan seën voor sy dood.

<sup>11</sup> Toe sê Jakob vir sy moeder Rebekka: Kyk, my broer Esau is 'n harige man, en ek is 'n gladde man.

<sup>12</sup> Miskien sal my vader my betas, en ek sal in sy oë wees soos 'n spotter; so sou ek dan 'n vloek oor my bring en nie 'n seën nie.

<sup>13</sup> Maar sy moeder antwoord hom: Laat jou vloek op my wees, my seun! Luister net na my en gaan haal dit vir my.

<sup>14</sup> Toe het hy dit gaan haal en na sy moeder gebring. En sy moeder het daarvan 'n lekker ete gemaak soos sy vader dit graag wou hê.

<sup>15</sup> Ook neem Rebekka die beste klere van Esau, haar oudste seun, wat by haar in die huis was, en sy trek dit vir Jakob, haar jongste seun, aan;

<sup>16</sup> en die velle van die bokkies trek sy oor sy hande en oor die gladdigheid van sy nek,

<sup>17</sup> en sy gee die lekker ete en die brood wat sy gemaak het, in die hand van Jakob, haar seun.

<sup>18</sup> Toe kom hy by sy vader en sê: My vader! En hy antwoord: Hier is ek! Wie is jy, my seun?

<sup>19</sup> En Jakob sê aan sy vader: Ek is Esau, u eersgeborene. Ek het gedoen soos u my beveel het. Rig u tog op, sit en eet van my wildsvleis, dat u siel my kan seën.

<sup>20</sup> Daarop het Isak aan sy seun gesê: Hoe het jy dit so gou gekry, my seun? En hy

## Génesis 27

antwoord: Omdat die HERE u God dit my laat teëkom het.

<sup>21</sup> En Isak sê vir Jakob: Kom tog nader, dat ek jou kan betas, my seun, of jy waarlik my seun Esau is of nie.

<sup>22</sup> En Jakob het nader gekom na sy vader Isak, en hy het hom betas en gesê: Die stem is Jakob se stem, maar die hande is Esau se hande.

<sup>23</sup> Maar hy het hom nie geëien nie, omdat sy hande harig was soos sy broer Esau se hande; en hy het hom geseën.

<sup>24</sup> Hy het naamlik gevra: Is jy waarlik my seun Esau? En hy het geantwoord: Ja.

<sup>25</sup> Toe sê hy: Bring dit vir my nader, dat ek van die wildsvleis van my seun kan eet, sodat my siel jou kan seën. En hy het dit vir hom nader gebring, en hy het geëet. Hy het vir hom ook wyn gebring, en hy het gedrink.

<sup>26</sup> Daarop sê sy vader Isak vir hom: Kom tog nader en soen my, my seun!

<sup>27</sup> En hy het nader gekom en hom gesoen. Toe ruik hy die geur van sy klere, en hy seën hom en sê: Kyk, die geur van my seun is soos die geur van die veld wat die HERE geseën het.

<sup>28</sup> En mag God jou gee van die dou van die hemel en van die vet grond van die aarde en oorvloed van koring en mos.

<sup>29</sup> Volke sal jou dien, en nasies voor jou neerbuig. Wees 'n heerser oor jou broers, en die seuns van jou moeder moet hulle voor jou neerbuig. Vervloek is hulle wat jou vloek, en geseënd hulle wat jou seën.

<sup>30</sup> Maar toe Isak Jakob klaar geseën het en Jakob nog skaars van sy vader Isak af

weggegaan het, kom sy broer Esau van die jag af,

<sup>31</sup> en hý maak ook 'n lekker ete en bring dit na sy vader en sê aan sy vader: Laat my vader hom oprig en eet van die wildsvleis van sy seun, sodat u siel my kan seën.

<sup>32</sup> En sy vader Isak vra hom: Wie is jy? En hy antwoord: Ek is u seun Esau, u eersgeborene.

<sup>33</sup> Toe skrik Isak geweldig en sê: Wie is dit dan wat wild gejag en vir my gebring het? En ek het van alles geëet voordat jy gekom het, en hom geseën—ook sal hy geseënd bly!

<sup>34</sup> Toe Esau die woorde van sy vader hoor, skreeu hy met 'n baie groot en bitter geroep, en hy sê vir sy vader: Seën my ook, my vader!

<sup>35</sup> En hy antwoord: Jou broer het gekom met bedrog en jou seën weggeneem.

<sup>36</sup> Daarop sê hy: Sou hulle hom Jakob noem, omdat hy my nou twee keer onderkruip het? My eersgeboortereg het hy geneem, en daar het hy nou my seën geneem! Verder vra hy: Het u vir my geen seën oorgehou nie?

<sup>37</sup> Toe antwoord Isak en sê vir Esau: Kyk, ek het hom as heerser oor jou gestel en aan hom al sy broers as dienaars gegee; en ek het hom met koring en mos versorg. Wat kan ek dan nou vir jōu doen, my seun?

<sup>38</sup> Daarop het Esau aan sy vader gevra: Het u net een seën, my vader? Seën my ook, my vader! En Esau het sy stem verhef en geweën.

<sup>39</sup> Toe antwoord sy vader Isak en sê vir hom: Kyk, ver van die vet grond van die

## Génesis 28

aarde sal jou woonplek wees, en ver van die dou van die hemel daarbo.

<sup>40</sup> En van jou swaard sal jy lewe, en jou broer sal jy dien. Maar as jy jou kragte inspan, sal jy sy juk van jou nek afruk.

<sup>41</sup> En Esau was Jakob vyandig gesind vanweë die seën waarmee sy vader hom geseën het, en Esau het in sy hart gedink: Die dae van die rou oor my vader is naby; dan sal ek my broer Jakob doodmaak.

<sup>42</sup> Maar toe hulle aan Rebekka die woorde van Esau, haar oudste seun, vertel, stuur sy en laat Jakob, haar jongste seun, roep en sê vir hom: Kyk, jou broer Esau sal hom op jou wreek deur jou dood te maak.

<sup>43</sup> My seun, luister dan nou na my: maak jou klaar, vlug tog na Haran, na my broer Laban,

<sup>44</sup> en bly 'n rukkie by hom tot die woede van jou broer bedaar,

<sup>45</sup> tot die toorn van jou broer teen jou bedaar en hy vergeet het wat jy hom aangedoen het. Dan sal ek stuur en jou daar laat haal. Waarom moet ek julle altwee op een dag verloor?

<sup>46</sup> Verder sê Rebekka vir Isak: Ek is moeg vir my lewe vanweë die dogters van Het. As Jakob 'n vrou neem uit die dogters van Het, soos hulle is, uit die dogters van die land—waarvoor lewe ek dan?

**28** TOE het Isak Jakob geroep en hom geseën; en hy het hom bevel gegee met die woorde: Jy mag geen vrou neem uit die dogters van Kanaän nie.

<sup>2</sup> Maak jou klaar, gaan na Paddan-Aram, na die huis van Bétuel, jou moeder se vader, en gaan haal vir jou daar 'n vrou uit

die dogters van Laban, jou moeder se broer.

<sup>3</sup> En mag God, die Almagtige, jou seën en jou vrugbaar maak en jou vermeerder, sodat jy 'n menigte van volke kan word.

<sup>4</sup> En mag Hy jou gee die seën van Abraham, aan jou en jou nageslag saam met jou, dat jy die land van jou vreemdelingskap in besit kan neem wat God aan Abraham gegee het.

<sup>5</sup> So het Isak Jakob dan weggestuur, en hy het na Paddan-Aram gegaan, na Laban, die seun van Bétuel, die Arameër, die broer van Rebekka, die moeder van Jakob en Esau.

<sup>6</sup> Toe Esau sien dat Isak Jakob geseën en hom na Paddan-Aram weggestuur het om daar vir hom 'n vrou te gaan haal, terwyl hy hom geseën en hom bevel gegee het met die woorde: Jy mag geen vrou uit die dogters van Kanaän neem nie;

<sup>7</sup> en dat Jakob na sy vader en sy moeder geluister het om na Paddan-Aram te gaan;

<sup>8</sup> en toe Esau sien dat die dogters van Kanaän sleg was in die oë van sy vader Isak,

<sup>9</sup> het Esau na Ismael gegaan en Máhalat, die dogter van Ismael, die seun van Abraham, die suster van Nébajot, by sy vroue vir hom as vrou geneem.

<sup>10</sup> En Jakob het uit Berséba vertrek en na Haran gegaan.

<sup>11</sup> Daarop kom hy by 'n plek waar hy die nag oorgebly het, want die son was al onder. En hy neem een van die klippe van die plek en sit dit onder sy hoof, en hy gaan lê en slaap op dié plek.

<sup>12</sup> En hy het gedroom—daar is 'n leer op

## Génesis 29

die aarde opgerig waarvan die spits tot aan die hemel reik, terwyl die engele van God daarlangs opgeklim en daarlangs neergedaal het.

<sup>13</sup> En kyk, die HERE het bo-aan gestaan en gesê: Ek is die HERE, die God van jou vader Abraham en die God van Isak. Die land waar jy op lê en slaap, sal Ek aan jou en jou nageslag gee;

<sup>14</sup> en jou nageslag sal wees soos die stof van die aarde, en jy sal uitbrei na die weste en ooste, en na die noorde en suide; en in jou en jou nageslag sal al die geslagte van die aarde geseën word.

<sup>15</sup> En kyk, Ek is met jou, en Ek sal jou bewaar oral waar jy heengaan, en Ek sal jou terugbring in hierdie land; want Ek sal jou nie verlaat nie, totdat Ek gedoen het wat Ek jou gesê het.

<sup>16</sup> Daarop word Jakob uit sy slaap wakker en sê: Waarlik, die HERE is op hierdie plek, en ék het dit nie geweet nie.

<sup>17</sup> En hy het bevrees geword en gesê: Hoe vreeslik is hierdie plek! Dit is hier niks anders as 'n huis van God nie, en dit is hier die poort van die hemel.

<sup>18</sup> Toe staan Jakob die môre vroeg op en neem die klip wat hy onder sy hoof gesit het, en rig dit as 'n gedenksteen op; en hy het olie daaroor uitgegiet.

<sup>19</sup> En hy het die plek Bet-el genoem; maar die naam van die stad was tevore Lus.

<sup>20</sup> En Jakob het 'n gelofte gedoen en gesê: As God met my sal wees om my te bewaar op hierdie weg wat ek gaan, en aan my brood sal gee om te eet en klere om aan te trek,

<sup>21</sup> en ek behoue na die huis van my vader sal terugkom, dan sal die HERE my God wees.

<sup>22</sup> En hierdie klip wat ek as gedenksteen opgerig het, sal 'n huis van God wees, en van alles wat U my gee, sal ek aan U sekerlik die tiendes afstaan.

**29** TOE lig Jakob sy voete op en gaan na die land van die kinders van die Ooste.

<sup>2</sup> En meteens sien hy 'n put in die veld en drie troppe kleinvee wat daarby lê, want uit dié put het hulle die vee laat drink; en daar was 'n groot klip op die opening van die put.

<sup>3</sup> En as al die troppe daar bymekaarkom, rol hulle die klip weg van die opening van die put en laat die vee drink; daarna sit hulle die klip weer op die opening van die put op sy plek.

<sup>4</sup> Toe sê Jakob vir hulle: My broers, waar is julle vandaan? En hulle antwoord: Ons kom van Haran.

<sup>5</sup> En hy vra hulle: Ken julle vir Laban, die seun van Nahor? En hulle antwoord: Ons ken hom.

<sup>6</sup> Verder sê hy vir hulle: Gaan dit goed met hom? En hulle antwoord: Dit gaan goed; en daar kom sy dogter Ragel aan met die vee.

<sup>7</sup> En hy sê: Kyk, die dag is nog lank; dit is nie tyd om die vee bymekaar te maak nie. Laat die vee drink, en gaan heen, laat hulle wei.

<sup>8</sup> Toe antwoord hulle: Ons kan nie voordat al die troppe bymekaar is nie; dan rol hulle die klip weg van die opening van die put,

## Génesis 29

---

en ons laat die vee drink.

<sup>9</sup> Terwyl hy nog met hulle praat, kom Ragel met die kleinvee van haar vader aan, want sy het hulle opgepas.

<sup>10</sup> Toe Jakob Ragel sien, die dogter van Laban, sy moeder se broer, en die vee van Laban, sy moeder se broer, loop Jakob nader en rol die klip weg van die opening van die put, en hy laat die vee drink van Laban, sy moeder se broer.

<sup>11</sup> En Jakob het Ragel gesoen en sy stem verhef en geweene.

<sup>12</sup> En Jakob het Ragel vertel dat hy haar vader se broer en die seun van Rebekka was. Daarop het sy geloop en dit aan haar vader vertel.

<sup>13</sup> Toe Laban die tyding hoor van Jakob, die seun van sy suster, loop hy hom tegemoet en omhels hom en soen hom en bring hom in sy huis. En hy het aan Laban al hierdie dinge vertel.

<sup>14</sup> Toe sê Laban vir hom: Waarlik, jy is my been en my vlees. En hy het by hom 'n volle maand gebly.

<sup>15</sup> Daarop het Laban aan Jakob gevra: Sou jy my verniet dien, omdat jy my broer is? Sê my wat jou loon moet wees.

<sup>16</sup> En Laban het twee dogters gehad—die naam van die oudste was Lea, en die naam van die jongste Ragel.

<sup>17</sup> En Lea het dowwe oë gehad, maar Ragel was skoon van gestalte en mooi van aansien.

<sup>18</sup> En Jakob het Ragel liefgehad, daarom het hy gesê: Ek sal u sewe jaar dien vir Ragel, u jongste dogter.

<sup>19</sup> Toe antwoord Laban: Dit is beter dat ek

haar aan jou gee as dat ek haar aan 'n ander man gee. Bly by my.

<sup>20</sup> So het Jakob dan sewe jaar gedien vir Ragel; en hulle was in sy oë soos 'n paar dae, omdat hy haar liefgehad het.

<sup>21</sup> Toe sê Jakob vir Laban: Gee tog my vrou, want my dienstyd is om, dat ek by haar kan ingaan.

<sup>22</sup> Daarop het Laban al die manne van die plek versamel en 'n maaltyd berei.

<sup>23</sup> Maar in die aand het hy sy dogter Lea geneem en haar na hom gebring; en hy het by haar ingegaan.

<sup>24</sup> En Laban het aan haar sy slavin Silpa gegee, naamlik aan sy dogter Lea, as slavin.

<sup>25</sup> En die anderdagmôre—daar was dit Lea! Daarom het hy aan Laban gesê: Wat het u my nou aangedoen? Was ek nie vir Ragel by u in diens nie? Waarom het u my dan bedrieg?

<sup>26</sup> En Laban antwoord: Dit is hier by ons nie die gewoonte om die jongste voor die oudste weg te gee nie.

<sup>27</sup> Hou die volle bruilofsweek met haar; dan sal ons jou die ander een ook gee vir die diens wat jy nóg sewe jaar by my moet volbring.

<sup>28</sup> En Jakob het so gedoen: hy het die volle bruilofsweek met haar gehou. Toe gee hy sy dogter Ragel aan hom as vrou.

<sup>29</sup> En Laban het aan sy dogter Ragel sy slavin Bilha gegee as slavin vir haar.

<sup>30</sup> En hy het ook by Ragel ingegaan en Ragel ook meer liefgehad as Lea. En hy was by hom nóg sewe jaar in diens.

<sup>31</sup> En toe die HERE sien dat Lea die nie-geliefde was, het Hy haar skoot



## Génesis 30

geopen; maar Ragel was onvrugbaar.

<sup>32</sup> En Lea het bevrug geword en 'n seun gebaar en hom Ruben genoem; want sy het gesê: Gewis, die HERE het my ellende aangesien, want nou sal my man my liefhê.

<sup>33</sup> En sy het weer bevrug geword en 'n seun gebaar en gesê: Gewis, die HERE het gehoor dat ek die nie-geliefde is en my hierdie een ook gegee. En sy het hom Símeon genoem.

<sup>34</sup> En sy het weer bevrug geword en 'n seun gebaar en gesê: Nou eindelijk sal my man aan my geheg wees, omdat ek vir hom drie seuns gebaar het. Daarom het sy hom Levi genoem.

<sup>35</sup> En sy het weer bevrug geword en 'n seun gebaar en gesê: Dié keer sal ek die HERE loof. Daarom het sy hom Juda genoem. En sy het opgehou met baar.

**30** EN toe Ragel sien dat sy vir Jakob geen kinders baar nie, het Ragel jaloers geword op haar suster en aan Jakob gesê: Gee vir my kinders of anders sterf ek.

<sup>2</sup> Toe het Jakob kwaad geword vir Ragel en gevra: Is ek dan in die plek van God wat die vrug van die skoot aan jou onthou het?

<sup>3</sup> En sy antwoord: Daar is my slavin Bilha; gaan by haar in, dat sy op my knieë kan baar en ek ook uit haar gebou kan word.

<sup>4</sup> Daarop het sy aan hom haar slavin Bilha as vrou gegee, en Jakob het by haar ingegaan.

<sup>5</sup> En Bilha het swanger geword en vir Jakob 'n seun gebaar.

<sup>6</sup> Toe sê Ragel: God het aan my reg verskaf en my ook verhoor en my 'n seun gegee. Daarom het sy hom Dan genoem.

<sup>7</sup> En Bilha, die slavin van Ragel, het weer bevrug geword en vir Jakob 'n tweede seun gebaar.

<sup>8</sup> Toe sê Ragel: Ek het bomenslike worstelinge met my suster geworstel en ook oorwin. En sy het hom Náftali genoem.

<sup>9</sup> En toe Lea sien dat sy opgehou het met baar, neem sy haar slavin Silpa en gee haar aan Jakob as vrou.

<sup>10</sup> En Silpa, die slavin van Lea, het vir Jakob 'n seun gebaar.

<sup>11</sup> Toe sê Lea: Gelukkig! En sy het hom Gad genoem.

<sup>12</sup> Daarna het Silpa, die slavin van Lea, vir Jakob 'n tweede seun gebaar.

<sup>13</sup> Toe sê Lea: Ek, gelukkige! want die dogters sal my gelukkig prys. En sy het hom Aser genoem.

<sup>14</sup> En Ruben het in die dae van die koringoes gegaan en in die veld liefdesappels gevind en dié na sy moeder Lea gebring. Toe sê Ragel vir Lea: Gee my tog van jou seun se liefdesappels.

<sup>15</sup> Maar sy antwoord haar: Is dit nie genoeg dat jy my man geneem het nie, dat jy ook my seun se liefdesappels wil neem? En Ragel sê: Daarom mag hy vir jou seun se liefdesappels vannag by jou slaap.

<sup>16</sup> Toe Jakob dan die aand uit die veld kom, gaan Lea hom tegemoet met die woorde: Jy moet na my kom, want ek het jou eerlik gehuur vir my seun se liefdesappels. En hy het dié nag by haar geslaap.

<sup>17</sup> En God het Lea verhoor: sy het bevrug geword en vir Jakob 'n vyfde seun gebaar.

<sup>18</sup> Toe sê Lea: God het my loon gegee, omdat ek my slavin aan my man gegee het.

## Génesis 30

En sy het hom Íssaskar genoem.

<sup>19</sup> En Lea het weer bevrug geword en vir Jakob 'n sesde seun gebaar.

<sup>20</sup> Toe sê Lea: God het my 'n mooi geskenk gegee; nou sal my man eindelijk by my woon, want ek het vir hom ses seuns gebaar. En sy het hom Sébulon genoem.

<sup>21</sup> En daarna het sy 'n dogter gebaar en haar Dina genoem.

<sup>22</sup> En God het aan Ragel gedink, en God het haar verhoor en haar skoot geopen:

<sup>23</sup> sy het bevrug geword en 'n seun gebaar. Toe sê sy: God het my smaad weggeneem.

<sup>24</sup> En sy het hom Josef genoem en gesê: Mag die HERE vir my 'n ander seun daar byvoeg!

<sup>25</sup> En nadat Ragel Josef gebaar het, sê Jakob vir Laban: Laat my trek, dat ek na my woonplek en my land kan gaan.

<sup>26</sup> Gee my vroue en my kinders waarvoor ek u gedien het, dat ek kan gaan; want u weet self hoe ek u gedien het.

<sup>27</sup> Daarop antwoord Laban hom: As ek nou guns in jou oë gevind het—ek het waargeneem dat die HERE my om jou ontwil geseën het.

<sup>28</sup> Verder sê hy: Bepaal vir my jou loon, en ek sal dit gee.

<sup>29</sup> Toe antwoord hy hom: U weet self hoe ek u gedien het en wat u vee by my geword het.

<sup>30</sup> Want min was dit wat u vóór my koms gehad het, en dit het sterk vermeerder; en die HERE het u geseën op my voetspoor. Wanneer sal ek dan nou ook vir my huis werk?

<sup>31</sup> En hy vra: Wat moet ek jou gee? Toe

antwoord Jakob: U hoef my niks te gee nie. As u hierdie ding vir my wil doen, wil ek weer u kleinvee oppas, ja, versorg—

<sup>32</sup> ek sal vandag deur al u kleinvee deurgaen en daaruit al die gestippelde en bont vee uitkeer; al die vee onder die skaaplammers wat swart is, en die bontes en gestippeldes onder die bokke, dit moet my loon wees.

<sup>33</sup> En my regverdigheid sal later vir my getuig: as u kom om my loon na te gaan, sal alles wat nie gestippel of bont is onder die bokke, en wat nie swart is onder die skaaplammers nie, gesteelde goed by my wees.

<sup>34</sup> Toe antwoord Laban: Goed, laat dit wees volgens jou woord!

<sup>35</sup> En hy het dieselfde dag uitgekeer die gestreepte en bont bokke en al die gestippelde en bont bokkooie, almal wat wit aan hulle gehad het, en al-mal wat swart was onder die skaaplammers, en dié aan sy seuns afgegee.

<sup>36</sup> En hy het 'n afstand van drie dae bepaal tussen hom en Jakob; en Jakob het die orige kleinvee van Laban opgepas.

<sup>37</sup> Toe neem Jakob vir hom groen latte van populier-, amandel- en plataanhout, en hy skil daarin wit strepe, sodat die wit van die latte uitkom;

<sup>38</sup> en hy sit die latte wat hy geskil het, vlak voor die vee in die trogge, in die drinkbakke waar die vee kom drink het; en hulle het verhit geword as hulle kom drink.

<sup>39</sup> En die vee het verhit geword by die latte, en die vee het gelam gestreeptes, gestippeldes en bontes.

## Génesis 31

<sup>40</sup> Toe skei Jakob die lammers, en hy draai die koppe van die vee na die gestreeptes en almal wat swart was onder Laban se vee. En hy het vir hom afsonderlike troppe gemaak en dié nie onder Laban se vee gesit nie.

<sup>41</sup> En elke keer as die sterkste diere verhit word, sit Jakob die latte voor die oë van die vee in die trogge, sodat hulle verhit sou word by die latte.

<sup>42</sup> Maar as die vee swakkerig was, het hy dit nie ingesit nie; so was dan die swakkes vir Laban en die sterkes vir Jakob.

<sup>43</sup> En die man het buitengewoon uitgebrei en baie kleinvee en slavinne en slawe en kamele en esels gehad.

**31** TOE hoor hy die woorde van die seuns van Laban, dat hulle sê: Jakob het alles geneem wat ons vader s'n was; en uit wat ons vader s'n was, het hy al hierdie rykdom verwerf.

<sup>2</sup> Jakob het ook meteens aan die aangesig van Laban gesien dat hy nie meer vir hom was soos gister en eergister nie.

<sup>3</sup> En die HERE het aan Jakob gesê: Gaan terug na die land van jou vaders en na jou familie; en Ek sal met jou wees.

<sup>4</sup> Toe stuur Jakob en laat Ragel en Lea veld toe roep na sy kleinvee

<sup>5</sup> en sê vir hulle: Ek sien dat die aangesig van julle vader teenoor my nie meer is soos gister en eergister nie, maar die God van my vader was met my.

<sup>6</sup> En julle weet self dat ek met al my krag julle vader gedien het;

<sup>7</sup> maar julle vader het my bedrieg: hy het my loon tien maal verander. Maar God het

hom nie toegelaat om my skade aan te doen nie.

<sup>8</sup> As hy sê: Die gestippeldes sal jou loon wees, dan lam al die vee gestippeldes. En as hy sê: Die gestreeptes sal jou loon wees, dan lam al die vee gestreeptes.

<sup>9</sup> So het God dan die vee van julle vader weggeneem en aan my gegee.

<sup>10</sup> Eenkeer, in die tyd toe die kleinvee verhit was, het ek my oë opgeslaan en in 'n droom gesien dat die bokramme wat die kleinvee dek, gestreep, gestippeld en bont was.

<sup>11</sup> En die Engel van God sê vir my in die droom: Jakob! En ek antwoord: Hier is ek!

<sup>12</sup> En Hy sê: Slaan tog jou oë op en kyk: al die bokramme wat die kleinvee dek, is gestreep, gestippeld en bont, want Ek het alles gesien wat Laban jou aandoen.

<sup>13</sup> Ek is die God van Bet-el waar jy die gedenksteen gesalf het, waar jy aan My 'n gelofte gedoen het. Maak jou dan nou klaar, trek weg uit hierdie land en gaan terug na jou geboorteland.

<sup>14</sup> Toe antwoord Ragel en Lea en sê vir hom: Het ons nog deel of erfenis in die huis van ons vader?

<sup>15</sup> Word ons nie deur hom as vreemdelinge beskou nie? Want hy het ons verkoop en die geld wat deur ons verkry is, geheel en al deurgebring.

<sup>16</sup> Want al die rykdom wat God van ons vader weggeneem het, kom ons en ons kinders toe. Doen dan nou alles wat God jou gesê het.

<sup>17</sup> Toe maak Jakob hom klaar en laai sy kinders en sy vroue op die kamele,

## Génesis 31

---

<sup>18</sup> en hy voer al sy vee weg en al sy goed wat hy versamel het, die vee wat syne was, wat hy in Paddan-Aram versamel het, om te gaan na sy vader Isak in die land Kanaän.

<sup>19</sup> Onderwyl Laban gaan om sy kleinvee te skeer, het Ragel die huisgode van haar vader gesteel.

<sup>20</sup> En Jakob het Laban, die Arameër, mislei deur hom nie te vertel dat hy wou vlug nie.

<sup>21</sup> So het hy dan gevlug met alles wat hy gehad het: hy het hom klaargemaak en deur die Eufraat gegaan en sy aangesig gerig na die gebergte van Gílead.

<sup>22</sup> En op die derde dag kry Laban die tyding dat Jakob gevlug het.

<sup>23</sup> Daarop het hy sy broers saam met hom geneem en hom agternagejaag, 'n afstand van sewe dae, en hom ingehaal in die gebergte van Gílead.

<sup>24</sup> Maar God het na Laban, die Arameër, in die nag gekom in 'n droom en vir hom gesê: Pas nou op dat jy met Jakob geen goed of kwaad spreek nie.

<sup>25</sup> En Laban het Jakob ingehaal; Jakob het sy tent al opgeslaan gehad in die gebergte, en Laban met sy broers het dit opgeslaan in die gebergte van Gílead.

<sup>26</sup> Toe vra Laban vir Jakob: Wat het jy gedoen dat jy my mislei en my dogters soos krygsgevangenes weggevoer het?

<sup>27</sup> Waarom het jy stilletjies gevlug en my mislei en my dit nie vertel nie, dat ek jou met vrolikheid en liedere, met tamboeryn en siter kon wegbring het?

<sup>28</sup> Ook het jy my nie toegelaat om my seuns en dogters te soen nie. Nou het jy

dwaas gehandel.

<sup>29</sup> Dit is in my mag om julle skade aan te doen, maar die God van julle vader het verlede nag met my gespreek en gesê: Pas nou op om met Jakob geen goed of kwaad te spreek nie.

<sup>30</sup> Nou is jy dan eenmaal aan trek, omdat jy so erg verlang het na die huis van jou vader—maar waarom het jy my gode gesteel?

<sup>31</sup> Toe antwoord Jakob en sê vir Laban: Omdat ek bevrees was, want ek het gedink u sal miskien u dogters met geweld van my wegneem.

<sup>32</sup> Die een by wie u u gode vind—hy mag nie lewe nie! Ondersoek wat by my is, in teenwoordigheid van ons broers, en neem dit vir u. Maar Jakob het nie geweet dat Ragel dit gesteel het nie.

<sup>33</sup> Toe gaan Laban in die tent van Jakob en in die tent van Lea en in die tent van die twee slavinne, maar hy het niks gekry nie; en toe hy uit die tent van Lea uitgaan, kom hy in die tent van Ragel.

<sup>34</sup> Maar Ragel het die huisgode geneem en dit in die kameelsaal weggepak en daarop gaan sit. En Laban het die hele tent deurgevoel, maar niks gekry nie.

<sup>35</sup> Daarop sê sy vir haar vader: My heer moet nie baie kwaai kyk nie, omdat ek nie vir u kan opstaan nie; want dit gaan met my volgens die reël van die vroue. En hy het gesoek maar die huisgode nie gekry nie.

<sup>36</sup> Toe word Jakob kwaad, en hy het met Laban getwis; en Jakob het geantwoord en vir Laban gesê: Wat is my oortreding, wat

## Génesis 32

---

is my sonde, dat u my so vurig agternagesit het?

<sup>37</sup> Nou dat u al my goed deurgevoel het—wat het u van al u huisraad gevind? Sit dit hier neer voor my broers en u broers, en laat hulle oordeel tussen ons twee.

<sup>38</sup> Twintig jaar was ek nou by u. U skaap- en bokooie het geen misdrag gehad nie, en die ramme van u kleinvee het ek nie geëet nie.

<sup>39</sup> Wat die wilde diere verskeur het, het ek nie na u gebring nie: ek moes dit vergoed; van my hand het u dit geëis, of dit al bedags gesteel is of snags gesteel is.

<sup>40</sup> Ek was 'n man wat bedags deur die hitte verteer is en snags deur die koue, en my slaap het gevlug van my oë.

<sup>41</sup> Twintig jaar was ek nou in u huis; veertien jaar het ek u gedien vir u twee dogters en ses jaar vir u kleinvee; en u het my loon tien maal verander.

<sup>42</sup> As die God van my vader, die God van Abraham en die Vrees van Isak, nie aan my kant was nie—ja, dan sou u my met leë hande weggestuur het. God het my ellende en die moeilike arbeid van my hande aangesien en verlede nag geoordeel.

<sup>43</sup> Toe antwoord Laban en sê vir Jakob: Die dogters is my dogters, en die seuns is my seuns, en die kleinvee is my kleinvee, ja, alles wat jy sien, is myne; maar my dogters—wat sal ek hulle vandag kan aandoen of aan hulle seuns wat hulle gebaar het?

<sup>44</sup> Kom dan nou, laat ons 'n verbond sluit, ek en jy, dat dit 'n getuie tussen my en jou kan wees.

<sup>45</sup> Daarop het Jakob 'n klip geneem en dit as gedenksteen opgerig.

<sup>46</sup> En Jakob het aan sy broers gesê: Bring klippe bymekaar! En hulle het klippe gaan haal en 'n hoop gemaak en daar op die hoop geëet.

<sup>47</sup> En Laban het dit Jegar-Sahadúta genoem, maar Jakob het dit Gal-ed genoem.

<sup>48</sup> Toe sê Laban: Hierdie hoop is vandag 'n getuie tussen my en jou. Daarom het hulle dit Gal-ed genoem,

<sup>49</sup> en ook Mispa, omdat hy gesê het: Mag die HERE wag hou tussen my en jou as ons mekaar nie meer sien nie.

<sup>50</sup> As jy my dogters mishandel, en as jy vroue neem by my dogters, dan is geen mens by ons nie: kyk, God is getuie tussen my en jou.

<sup>51</sup> Verder sê Laban vir Jakob: Daar is dié hoop klippe, en daar is die gedenksteen wat ek tussen my en jou opgerig het—

<sup>52</sup> hierdie hoop klippe is getuie, en die gedenksteen is getuie dat ék na jou kant toe hierdie hoop nie sal verbytrek nie, en dat jý na my kant toe hierdie hoop en hierdie gedenksteen nie sal verbytrek met slegte bedoelinge nie.

<sup>53</sup> Die God van Abraham en die God van Nahor, die God van hulle vader, sal regter tussen ons wees. En Jakob het gesweer by die Vrees van sy vader Isak.

<sup>54</sup> Toe het Jakob 'n offer gebring op die gebergte en sy broers genooi om brood te eet. En hulle het brood geëet en die nag in die gebergte oorgebly.

<sup>55</sup> En Laban het die môre vroeg opgestaan

## Génesis 32

en sy seuns en sy dogters gesoen en hulle geseën. Daarna het Laban vertrek en teruggekeer na sy woonplek.

**32** JAKOB het ook verder gereis, en die engele van God het hom ontmoet.

<sup>2</sup> Toe hy hulle sien, sê Jakob: Dit is 'n leër van God! En hy het die plek Mahanáim genoem.

<sup>3</sup> En Jakob het boodskappers uitgestuur voor hom uit na sy broer Esau in die land Seïr, die landstreek van Edom,

<sup>4</sup> en aan hulle bevel gegee met die woorde: So moet julle aan my heer, aan Esau, sê: So sê Jakob, u dienaar—ek het as vreemdeling vertoef by Laban en daar gebly tot nou toe;

<sup>5</sup> en ek het beeste en esels, kleinvee en slawe en slavinne verwerf, en my heer dit laat weet, sodat ek guns mag vind in u oë.

<sup>6</sup> En die boodskappers het na Jakob teruggekom en gesê: Ons het by u broer Esau gekom, en hy trek u alreeds tegemoet en vierhonderd man saam met hom.

<sup>7</sup> Toe het Jakob baie bevrees en benoud geword, en hy het die mense wat by hom was, sowel as die kleinvee en beeste en kamele in twee laers verdeel;

<sup>8</sup> want hy het gedink: As Esau op die een laer afkom en dit verslaan, sal die laer wat oorbly, vryraak.

<sup>9</sup> En Jakob het gesê: o God van my vader Abraham en God van my vader Isak, o HERE, wat my beveel het: Gaan terug na jou land en na jou familie, en Ek sal aan jou goed doen—

<sup>10</sup> ek is te gering vir al die gunste en al die trou wat U aan u kneg bewys het; want ek

het met my staf oor hierdie Jordaan getrek en nou twee laers geword.

<sup>11</sup> Red my tog uit die hand van my broer, uit die hand van Esau, want ek is bang vir hom, dat hy sal kom en my doodslaan, die moeder saam met die kinders.

<sup>12</sup> U het tog self gesê: Ek sal sekerlik aan jou goed doen en jou nageslag maak soos die sand van die see wat vanweë die menigte nie getel kan word nie.

<sup>13</sup> En hy het die nag daar oorgebly en van wat in sy besit was, 'n geskenk geneem vir sy broer Esau:

<sup>14</sup> tweehonderd bokooie en twintig bokke, tweehonderd skaapooie en twintig ramme,

<sup>15</sup> dertig kameelkoeie wat in die melk was, met hulle kalfies, veertig koeie en tien bulle, twintig eselinne en tien jong esels;

<sup>16</sup> en hy het hulle aan sy dienaars afgegee, elke trop afsonderlik, en aan sy dienaars gesê: Trek voor my uit, en laat 'n plek oop tussen trop en trop.

<sup>17</sup> Daarop gee hy aan die eerste een bevel en sê: As my broer Esau jou teëkom en jou vra: Aan wie behoort jy, en waarheen gaan jy, en wie s'n is die goed daar voor jou?

<sup>18</sup> dan moet jy antwoord: U dienaar Jakob s'n. Dit is 'n geskenk wat hy aan my heer Esau stuur; en kyk, hy self kom ook agter ons aan.

<sup>19</sup> En hy het ook bevel gegee aan die tweede en aan die derde en aan almal wat agter die troppe geloop het, en gesê: Net so moet julle Esau antwoord as julle hom kry—

<sup>20</sup> julle moet sê: Kyk, ook u dienaar Jakob kom agter ons aan. Want hy het gedink:

## Génesis 33

Laat ek hom versoen met die geskenk wat voor my uit gaan, en daarna sy aangesig sien—miskien sal hy my in guns aanneem.

<sup>21</sup> So het die geskenk dan voor hom uit gegaan, maar hy self het dié nag in die laer gebly.

<sup>22</sup> En hy het dieselfde nag opgestaan en sy twee vroue en sy twee slavinne en sy elf kinders geneem en deur die drif van die Jabbok getrek:

<sup>23</sup> hy het hulle geneem en hulle deur die rivier laat trek, ook laat deurtrek wat aan hom behoort het.

<sup>24</sup> Maar Jakob het alleen agtergebly, en 'n Man het met hom geworstel tot dagbreek.

<sup>25</sup> En toe Hy sien dat Hy hom nie kon oorwin nie, slaan Hy hom op sy heupbeen, sodat die heupbeen van Jakob uit lit geraak het in die worsteling met Hom.

<sup>26</sup> Toe sê Hy: Laat My gaan, want die dag het gebreek. Maar hy antwoord: Ek sal U nie laat gaan nie tensy dat U my seën.

<sup>27</sup> En Hy vra hom: Hoe is jou naam? En hy antwoord: Jakob.

<sup>28</sup> Toe sê Hy: Jy sal nie meer Jakob genoem word nie, maar Israel; want jy het geworstel met God en met die mense en het oorwin.

<sup>29</sup> Daarop vra Jakob en sê: Maak tog u Naam bekend! En Hy antwoord: Waarom vra jy tog na my Naam? En Hy het hom daar geseën.

<sup>30</sup> Toe noem Jakob die plek Pniël; want, het hy gesê, ek het God gesien van aangesig tot aangesig, en tog is my lewe gered.

<sup>31</sup> En die son het vir hom opgegaan net toe hy Pniël verby was; en hy was mank aan sy

heup.

<sup>32</sup> Daarom eet die kinders van Israel die heupsening, wat aan die heupbeen is, tot vandag toe nie, omdat Hy Jakob op die heupbeen, aan die heupsening, geslaan het.

**33** EN Jakob het sy oë opgeslaan, en toe hy meteens Esau sien aankom en vierhonderd man saam met hom, het hy die kinders onder Lea en Ragel en onder die twee slavinne verdeel.

<sup>2</sup> En hy het die slavinne met hulle kinders eerste, en Lea met haar kinders daaragter, en Ragel en Josef laaste opgestel;

<sup>3</sup> maar hy self het voor hulle uit gegaan en hom sewe maal na die aarde gebuig, totdat hy by sy broer gekom het.

<sup>4</sup> Toe loop Esau hom tegemoet en omhels hom en val hom om die hals en soen hom; en hulle het geweene.

<sup>5</sup> Daarna het hy sy oë opgeslaan en die vroue en kinders gesien en gesê: Wie het jy daar by jou? En hy antwoord: Die kinders wat God uit genade aan u dienaar geskenk het.

<sup>6</sup> En die slavinne het nader gekom, hulle en hulle kinders, en hulle neergebuig.

<sup>7</sup> En Lea het ook nader gekom met haar kinders en hul neergebuig; en daarna het Josef nader gekom en Ragel en hul neergebuig.

<sup>8</sup> Daarop sê hy: Wat is jou bedoeling met daardie hele laer wat ek teëgekom het? En hy antwoord: Om guns te vind in die oë van my heer.

<sup>9</sup> Maar Esau sê: Ek het baie, my broer! Wat joue is, laat dit joue bly!

<sup>10</sup> Toe antwoord Jakob: Ag nee, as ek nou

## Génesis 34

guns in u oë gevind het, neem dan my geskenk uit my hand aan. Want juis daarom het ek u aangesig te sien gekry soos 'n mens die aangesig van God sien, en u het behae in my gehad.

<sup>11</sup> Neem tog my begroetingsgeskenk wat u aangebied is, want God het my genade bewys, en ek het volop. En hy het by hom aangehou, sodat hy dit aangeneem het.

<sup>12</sup> Daarop sê hy: Laat ons opbreek en verder trek, en ek sal langs jou trek.

<sup>13</sup> Maar hy antwoord hom: My heer weet dat die kinders swak is, en dat ek lammerooie en melkkoeie by my het; as 'n mens hulle net een dag ooreis, dan sterf al die kleinvee.

<sup>14</sup> My heer moet maar voor sy dienaar uit trek, en ék sal op my gemak trek na die gang van die vee wat voor my uit gaan, en na die gang van die kinders, tot ek by my heer in Seïr aankom.

<sup>15</sup> Toe sê Esau: Laat my tog van die manskappe wat by my is, by jou laat staan. En hy antwoord: Waarvoor dan? Laat my guns in die oë van my heer vind!

<sup>16</sup> So het Esau dan dié dag teruggegaan padlangs na Seïr toe.

<sup>17</sup> Maar Jakob het na Sukkot weggetrek en vir hom 'n huis gebou en takkrale vir sy vee gemaak. Daarom het hy die plek genoem Sukkot.

<sup>18</sup> En Jakob het behoue aangekom by die stad Sigem wat in die land Kanaän is, toe hy van Paddan-Aram gekom het—hy het sy laer voor die stad opgeslaan

<sup>19</sup> en die stuk grond gekoop waar hy sy tent opgeslaan het, van die seuns van

Hemor, die vader van Sigem, vir honderd geldstukke.

<sup>20</sup> Daar het hy ook 'n altaar opgerig en dit genoem: Die God van Israel is God.

**34** EN Dina, die dogter van Lea, wat sy vir Jakob gebaar het, het uitgegaan om die dogters van die land te leer ken.

<sup>2</sup> Toe Sigem, die seun van Hemor, die Hewiet, die vors van die land, haar sien, het hy haar gegryp en met haar gemeenskap gehad en haar onteer.

<sup>3</sup> En sy siel het verkleef geraak aan Dina, die dogter van Jakob; en hy het die dogter liefgehad en na die hart van die dogter gespreek.

<sup>4</sup> Sigem het ook met sy vader Hemor gespreek en gesê: Neem daardie dogter vir my as vrou.

<sup>5</sup> Toe Jakob dan hoor dat hy sy dogter Dina onteer het, was sy seuns by sy vee in die veld; en Jakob het geswyg totdat hulle gekom het.

<sup>6</sup> En Hemor, die vader van Sigem, het na Jakob uitgegaan om met hom te spreek.

<sup>7</sup> En die seuns van Jakob het uit die veld gekom toe hulle dit hoor; en die manne was gegrief en baie kwaad, omdat hy 'n skanddaad in Israel begaan het deur met die dogter van Jakob gemeenskap te hou: so iets mag nie gebeur het nie.

<sup>8</sup> Toe spreek Hemor met hulle en sê: Die siel van my seun Sigem is verlief op julle dogter: gee haar tog aan hom as vrou

<sup>9</sup> en verswaer julle met ons: gee aan ons julle dogters, en neem vir julle ons dogters.

<sup>10</sup> Bly maar by ons woon, en die land sal



## Génesis 34

---

voor julle oop lê; woon en trek rond daarin en verwerf vaste besittings daarin.

<sup>11</sup> En Sigem sê vir haar vader en haar broers: Laat my guns vind in julle oë, en wat julle van my eis, sal ek gee.

<sup>12</sup> Vra my 'n baie groot koopprys en geskenk, en ek sal dit gee soos julle aan my sê; gee my net die dogter as vrou.

<sup>13</sup> Toe antwoord die seuns van Jakob vir Sigem en Hemor, sy vader, met bedrog—hulle het so gespreek, omdat hy hulle suster Dina onteer het—

<sup>14</sup> en sê vir hulle: Ons kan dit nie doen om ons suster aan 'n man te gee wat die voorhuid het nie, want dit sou 'n skande vir ons wees.

<sup>15</sup> Net op hierdie voorwaarde kan ons inwillig: as julle word soos ons deurdat almal wat manlik is onder julle, besny word.

<sup>16</sup> Dan sal ons ons dogters aan julle gee, en ons sal julle dogters vir ons neem; en ons sal by julle woon en een volk word.

<sup>17</sup> Maar as julle nie na ons luister om besny te word nie, dan neem ons ons dogter en ons trek weg.

<sup>18</sup> En hulle woorde was goed in die oë van Hemor en in die oë van Sigem, die seun van Hemor.

<sup>19</sup> En die jongman het nie versuim om dit te doen nie, want hy het sin gehad in die dogter van Jakob, en hy was die mees geëerde in die hele huis van sy vader.

<sup>20</sup> Toe gaan Hemor en sy seun Sigem na die poort van hulle stad, en hulle spreek met die manne van hul stad en sê:

<sup>21</sup> Hierdie manne lewe in vrede met ons;

daarom, laat hulle in die land woon en daarin rondtrek: die land lê mos alkante toe wyd voor hulle. Ons kan hulle dogters vir ons as vroue neem, en ons sal ons dogters aan hulle gee.

<sup>22</sup> Maar net op hierdie voorwaarde sal die manne inwillig om by ons te woon, om een volk te word: as almal wat manlik is onder ons, besny word soos hulle besny is.

<sup>23</sup> Hulle vee en hulle besittings en al hulle diere—sal dit nie ons s'n wees nie? Laat ons net inwillig, sodat hulle by ons kan bly woon.

<sup>24</sup> En hulle het geluister na Hemor en na sy seun Sigem—almal wat uit sy stadspoort uitgegaan het; en almal wat manlik was, is besny, almal wat uit sy stadspoort uitgegaan het.

<sup>25</sup> Maar op die derde dag, toe hulle in die pyn was, neem die twee seuns van Jakob, Símeon en Levi, broers van Dina, elkeen sy swaard, en hulle oorval die sorgelose stad en slaan almal dood wat manlik was.

<sup>26</sup> Hulle slaan ook Hemor en sy seun Sigem dood met die skerpte van die swaard; daarna neem hulle Dina uit die huis van Sigem uit en vertrek.

<sup>27</sup> Die seuns van Jakob het op die gesneuweldes afgekom en die stad geplunder, omdat hulle hulle suster onteer het.

<sup>28</sup> Hulle kleinvee en hulle beeste en hulle esels—wat in die stad en in die veld was—het hulle weggeneem.

<sup>29</sup> En al hulle goed en al hulle kinders en hulle vroue het hulle as gevangenes weggevoer en as buit, en ook alles wat in

## Génesis 35

die huise was.

<sup>30</sup> Toe sê Jakob vir Simeon en Levi: Julle het my ontroer dat julle my gehaat gemaak het by die inwoners van die land, die Kanaäniete en Feresiete, terwyl ek 'n klein klompie is. As hulle hul teen my versamel, sal hulle my verslaan, en ek sal verdelg word, ek en my huis.

<sup>31</sup> Toe antwoord hulle: Hoe durf hy dan ons suster as 'n hoer behandel!

**35** DAARNA het God vir Jakob gesê: Maak jou klaar, trek op na Bet-el en woon daar; en bou daar 'n altaar vir die God wat aan jou verskyn het toe jy op die vlug was vir jou broer Esau.

<sup>2</sup> Toe sê Jakob aan sy huisgesin en aan almal wat by hom was: Verwyder die vreemde gode wat onder julle is, en reinig julle en trek ander klere aan;

<sup>3</sup> en laat ons klaarmaak en optrek na Bet-el; en ek sal daar 'n altaar bou vir die God wat my geantwoord het op die dag van my benoudheid en by my was op die weg wat ek gegaan het.

<sup>4</sup> Toe gee hulle aan Jakob al die vreemde gode wat in hulle besit was, en die ringe aan hulle ore, en Jakob het dit begrawe onder die terpentynboom wat by Sigem is.

<sup>5</sup> En toe hulle weggetrek het, kom daar 'n skrik van God op die stede rondom hulle, sodat hulle die seuns van Jakob nie agternagejaag het nie.

<sup>6</sup> So het Jakob dan in Lus aangekom wat in die land Kanaän is—dit is Bet-el—hy en al die mense wat by hom was,

<sup>7</sup> en hy het daar 'n altaar gebou en die plek El Bet-el genoem, omdat God daar aan

hom geopenbaar is toe hy vir sy broer gevlug het.

<sup>8</sup> En Debora, die oppasser van Rebekka, het gesterwe, en sy is begrawe onderkant Bet-el, onder die eikeboom. En hulle het dit genoem: Eik van geweën.

<sup>9</sup> Toe verskyn God weer aan Jakob, by sy terugkoms uit Paddan-Aram, en Hy seën hom;

<sup>10</sup> en God sê vir hom: Jou naam is Jakob; jy sal verder nie Jakob genoem word nie, maar Israel sal jou naam wees. En Hy het hom Israel genoem.

<sup>11</sup> Verder sê God vir hom: Ek is God, die Almagtige. Wees vrugbaar en vermeerder. 'n Nasie, ja, 'n menigte van nasies, sal van jou afstam, en konings sal uit jou lendene voortkom.

<sup>12</sup> En die land wat Ek aan Abraham en Isak gegee het, sal Ek aan jou gee; en aan jou nageslag ná jou sal Ek die land gee.

<sup>13</sup> Toe het God van hom af opgevaar op die plek waar Hy met hom gespreek het.

<sup>14</sup> En Jakob het 'n gedenksteen opgerig op die plek waar Hy met hom gespreek het, 'n gedenksteen van klip, en daarop 'n drankoffer uitgegiet en olie daarop gegooi.

<sup>15</sup> En Jakob het die plek waar God met hom gespreek het, Bet-el genoem.

<sup>16</sup> Daarna het hulle van Bet-el af weggetrek. En toe daar nog 'n kort ent pad was om by Efrat te kom, moes Ragel baar; en sy het dit swaar gehad by die bevalling.

<sup>17</sup> En terwyl sy dit swaar het by die bevalling, sê die vroedvrou vir haar: Wees nie bevrees nie, want dit is ook 'n seun vir u.

## Génesis 36

<sup>18</sup> En toe haar siel uitgaan—want sy het gesterwe—noem sy hom Ben-Oni. Maar sy vader het hom Benjamin genoem.

<sup>19</sup> So het Ragel dan gesterwe; en sy is begrawe op die pad na Efrat, dit is Betlehem.

<sup>20</sup> En Jakob het 'n gedenksteen op haar graf opgerig; dit is die gedenkteken van die graf van Ragel tot vandag toe.

<sup>21</sup> En Israel het weggetrek en sy tent opgeslaan aan die ander kant van Migdal-Eder.

<sup>22</sup> En terwyl Israel in dié land woon, het Ruben gegaan en met Bilha, sy vader se byvrou, gemeenskap gehad. En Israel het dit gehoor. En die seuns van Jakob was twaalf.

<sup>23</sup> Die seuns van Lea was: Ruben, die eersgeborene van Jakob, daarna Símeon en Levi en Juda en Íssaskar en Sébulon.

<sup>24</sup> Die seuns van Ragel: Josef en Benjamin.

<sup>25</sup> En die seuns van Bilha, die slavin van Ragel: Dan en Náftali.

<sup>26</sup> En die seuns van Silpa, die slavin van Lea: Gad en Aser. Dit is die seuns van Jakob wat vir hom in Paddan-Aram gebore is.

<sup>27</sup> En Jakob het by sy vader Isak gekom in Mamre, by Kirjat-Arba, dit is Hebron, waar Abraham as vreemdeling vertoef het, en ook Isak.

<sup>28</sup> En die dae van Isak was honderd-en-tagtig jaar.

<sup>29</sup> En Isak het die asem uitgeblaas en gesterwe, en hy is by sy volksgenote versamel, oud en afgeleef. En sy seuns Esau en Jakob het hom begrawe.

**36** EN dit is die geskiedenis van Esau, dit is Edom.

<sup>2</sup> Esau het sy vroue geneem uit die dogters van Kanaän: Ada, die dogter van Elon, die Hetiet, en Oholibáma, die dogter van Ana, die dogter van Síbeon, die Hewiet;

<sup>3</sup> en Basmat, die dogter van Ismael, die suster van Nébajot.

<sup>4</sup> En Ada het vir Esau gebaar Élifas, en Basmat het gebaar Réhuel.

<sup>5</sup> En Oholibáma het gebaar Jehus en Jáelam en Korag. Dit is die seuns van Esau wat vir hom gebore is in die land Kanaän.

<sup>6</sup> Toe neem Esau sy vroue en sy seuns en sy dogters en al die mense van sy huis, sy vee en al sy diere en al sy besittings wat hy in die land Kanaän verwerf het, en hy trek na 'n land, wég van sy broer Jakob af;

<sup>7</sup> want hulle besittings was te groot om saam te woon, en die land van hulle vreemdelingskap kon hulle nie dra vanweë hulle vee nie.

<sup>8</sup> En Esau het gaan woon in die gebergte Seir. Esau, dit is Edom.

<sup>9</sup> Dit is dan die geskiedenis van Esau, die vader van die Edomiete, in die gebergte Seir.

<sup>10</sup> Dit is die name van die seuns van Esau: Élifas, die seun van Ada, die vrou van Esau; Réhuel, die seun van Basmat, die vrou van Esau.

<sup>11</sup> En die seuns van Élifas was: Teman, Omar, Sefo en Gáetam en Kenas.

<sup>12</sup> En Timna was 'n byvrou van Élifas, die seun van Esau; en sy het vir Élifas gebaar Ámalek. Dit is die seuns van Ada, die vrou van Esau.

## Génesis 36

---

<sup>13</sup> En dit is die seuns van Réhuel: Nahat en Serag, Samma en Missa. Dit was die seuns van Basmat, die vrou van Esau.

<sup>14</sup> En dit was die seuns van Oholibáma, die dogter van Ana, die dogter van Síbeon, die vrou van Esau—sy het vir Esau gebaar Jehus en Jáelam en Korag.

<sup>15</sup> Dit is die stamhoofde onder die seuns van Esau. Die seuns van Élifas, die eersgeborene van Esau, was: die stamhoof Teman, die stamhoof Omar, die stamhoof Sefo, die stamhoof Kenas,

<sup>16</sup> die stamhoof Korag, die stamhoof Gáetam, die stamhoof Ámalek. Dit is die stamhoofde van Élifas in die land Edom; dit is die seuns van Ada.

<sup>17</sup> En dit is die seuns van Réhuel, die seun van Esau: die stamhoof Nahat, die stamhoof Serag, die stamhoof Samma, die stamhoof Missa. Dit is die stamhoofde van Réhuel in die land Edom. Dit is die seuns van Basmat, die vrou van Esau.

<sup>18</sup> En dit is die seuns van Oholibáma, die vrou van Esau: die stamhoof Jehus, die stamhoof Jáelam, die stamhoof Korag. Dit is die stamhoofde van Oholibáma, die dogter van Ana, die vrou van Esau.

<sup>19</sup> Dit is die seuns van Esau, en dit is hulle stamhoofde. Dit is Edom.

<sup>20</sup> Dit is die seuns van Seïr, die Horiet, die eerste inwoners van die land: Lotan en Sobal en Síbeon en Ana

<sup>21</sup> en Dison en Eser en Disan. Dit is die stamhoofde van die Horiete, die seuns van Seïr in die land Edom.

<sup>22</sup> En die seuns van Lotan was Hori en Hemam; en die suster van Lotan was

Timna.

<sup>23</sup> En dit is die seuns van Sobal: Alwan en Manáhat en Ebal, Sefo en Onam.

<sup>24</sup> En dit is die seuns van Síbeon: Aja en Ana. Dit is dié Ana wat die warm fontein in die woestyn gekry het toe hy die esels van sy vader Síbeon opgepas het.

<sup>25</sup> En dit is die seuns van Ana: Dison; en Oholibáma was die dogter van Ana.

<sup>26</sup> En dit is die seuns van Dison: Hemdan en Esban en Jitran en Keran.

<sup>27</sup> Dit is die seuns van Eser: Bilhan en Saäwan en Akan.

<sup>28</sup> Dit is die seuns van Disan: Us en Aran.

<sup>29</sup> Dit is die stamhoofde van die Horiete: die stamhoof Lotan, die stamhoof Sobal, die stamhoof Síbeon, die stamhoof Ana, <sup>30</sup> die stamhoof Dison, die stamhoof Eser, die stamhoof Disan. Dit is die stamhoofde van die Horiete volgens hulle stamme in die land Seïr.

<sup>31</sup> En dit is die konings wat geregeer het in die land Edom voordat daar 'n koning geregeer het oor die kinders van Israel:

<sup>32</sup> Bela, die seun van Beor, het geregeer in Edom; en die naam van sy stad was Dinhába.

<sup>33</sup> En ná die dood van Bela het Jobab, die seun van Serag, van Bosra, in sy plek geregeer.

<sup>34</sup> En ná die dood van Jobab het Husam, uit die land van die Temaniete, in sy plek geregeer.

<sup>35</sup> En ná die dood van Husam het Hadad, die seun van Bedad, wat die Midianiete verslaan het in die veld van Moab, in sy plek geregeer, en die naam van sy stad was

## Génesis 37

Awit.

<sup>36</sup> En ná die dood van Hadad het Samla van Másreka in sy plek geregeer.

<sup>37</sup> En ná die dood van Samla het Saul van Réhobot, aan die rivier, in sy plek geregeer.

<sup>38</sup> En ná die dood van Saul het Baäl-Hanan, die seun van Akbor, in sy plek geregeer.

<sup>39</sup> En ná die dood van Baäl-Hanan, die seun van Akbor, het Hadar in sy plek geregeer; en die naam van sy stad was Pahu; en die naam van sy vrou was Mehetábeël, die dogter van Matred, die dogter van Mésahab.

<sup>40</sup> Dit is die name van die stamhoofde van Esau, volgens hulle geslagte, volgens hulle woonplekke, met hulle name: die stamhoof Timna, die stamhoof Alwa, die stamhoof Jetet,

<sup>41</sup> die stamhoof Oholibáma, die stamhoof Ela, die stamhoof Pinon,

<sup>42</sup> die stamhoof Kenas, die stamhoof Teman, die stamhoof Mibsar,

<sup>43</sup> die stamhoof Mágdiël, die stamhoof Iram. Dit is die stamhoofde van Edom, volgens hulle verblyfplekke in die land van hulle besitting. Dit is Esau, die stamvader van die Edomiete.

**37** EN Jakob het gewoon in die land van die vreemdelingskap van sy vader, in die land Kanaän.

<sup>2</sup> Dit is die geskiedenis van Jakob. Josef het as seun van sewentien jaar die kleinvee opgepas saam met sy broers—hy was nog jonk—met die seuns van Bilha en die seuns van Silpa, die vroue van sy vader. En Josef het die slegte gerug oor hulle na hulle vader oorgebring.

<sup>3</sup> En Israel het Josef meer liefgehad as al sy seuns; want hy was vir hom 'n seun van die ouderdom; en hy het vir hom 'n lang rok met moue gemaak.

<sup>4</sup> Toe sy broers sien dat hulle vader hom meer as al sy broers liefhet, het hulle hom gehaat en kon nie vriendelik met hom praat nie.

<sup>5</sup> Ook het Josef 'n droom gehad wat hy aan sy broers vertel het. Daaroor het hulle hom nog meer gehaat.

<sup>6</sup> Hy het naamlik vir hulle gesê: Hoor tog hierdie droom wat ek gehad het.

<sup>7</sup> Kyk, ons was besig om gerwe te bind op die land toe meteens my gerf gaan staan en ook regop blý staan, terwyl julle gerwe daar rondom kom en hulle voor my gerf neerbuig.

<sup>8</sup> Toe sê sy broers aan hom: Wil jy miskien oor ons regeer? of wil jy miskien oor ons heers? En hulle het hom nog meer gehaat oor sy drome en oor sy woorde.

<sup>9</sup> Daarna het hy nog 'n ander droom gehad en dit aan sy broers vertel en gesê: Kyk, ek het nog 'n droom gehad—die son en die maan en elf sterre het hulle voor my neergebuig.

<sup>10</sup> Toe hy dit aan sy vader en sy broers vertel, het sy vader hom hard bestraf en aan hom gesê: Wat is dit vir 'n droom wat jy gehad het? Moet ons werklik kom, ek en jou moeder en jou broers, om ons voor jou na die aarde neer te buig?

<sup>11</sup> En sy broers was afgunstig op hom, maar sy vader het die saak in gedagte gehou.

<sup>12</sup> En sy broers het die kleinvee van hulle

## Génesis 37

vader by Sigem gaan oppas.

<sup>13</sup> Toe sê Israel vir Josef: Pas jou broers nie die vee op by Sigem nie? Kom, laat ek jou na hulle toe stuur. En hy antwoord hom: Hier is ek!

<sup>14</sup> Toe sê hy vir hom: Gaan tog verneem na die welstand van jou broers en die welstand van die vee, en bring vir my berig terug. So het hy hom dan uit die dal van Hebron weggestuur, en hy het by Sigem aangekom.

<sup>15</sup> Daarop kry 'n man hom terwyl hy in die veld ronddwaal, en die man vra hom: Wat soek jy?

<sup>16</sup> En hy antwoord: Ek soek my broers. Vertel my tog waar hulle die vee oppas.

<sup>17</sup> Toe sê die man: Hulle het hiervandaan weggetrek, want ek het hulle hoor sê: Laat ons na Dotan gaan. En Josef het agter sy broers aan gegaan en hulle in Dotan gevind.

<sup>18</sup> En hulle het hom van ver af gesien. Maar voordat hy naby hulle kom, het hulle listig raad gehou teen hom om hom dood te maak.

<sup>19</sup> En hulle het vir mekaar gesê: Daar kom daardie dromer aan!

<sup>20</sup> Kom dan nou, laat ons hom doodmaak en in een van die putte gooi en sê: 'n Wilde dier het hom opgeëet. Dan sal ons sien wat van sy drome word.

<sup>21</sup> Toe Ruben dit hoor, het hy hom uit hulle hand gered deur te sê: Laat ons hom nie doodslaan nie.

<sup>22</sup> Ruben het ook vir hulle gesê: Moenie bloed vergiet nie; gooi hom in hierdie put wat in die woestyn is, maar moenie die

hand aan hom slaan nie—sodat hy hom uit hulle hand kon red om hom na sy vader terug te bring.

<sup>23</sup> En toe Josef by sy broers kom, trek hulle Josef se rok uit, die rok met lang moue wat hy aangehad het,

<sup>24</sup> en hulle neem hom en gooi hom in die put. Maar die put was leeg; daar was geen water in nie.

<sup>25</sup> Daarna het hulle gaan sit om brood te eet; en toe hulle hul oë opslaan, sien hulle meteens 'n reisgeselskap Ismaeliete wat uit Gílead kom—hulle kamele gelaai met speserye en balsem en gom—op pad om dit na Egipte af te bring.

<sup>26</sup> Toe sê Juda aan sy broers: Watter voordeel is dit dat ons ons broer doodmaak en sy bloed verberg?

<sup>27</sup> Kom, laat ons hom aan die Ismaeliete verkoop, maar laat ons hand nie teen hom wees nie, want hy is ons broer, ons vlees. En sy broers het na hom geluister.

<sup>28</sup> En toe Midianitiese koopmans verbykom, het hulle Josef uit die put uit opgetrek en uitgehaal en Josef aan die Ismaeliete verkoop vir twintig sikkels silwer. En hulle het Josef na Egipte gebring.

<sup>29</sup> Toe Ruben by die put terugkom, was Josef nie in die put nie! Daarop skeur hy sy klere,

<sup>30</sup> en hy gaan na sy broers terug en sê: Die seun is nie daar nie! En ek, waar moet ek heen?

<sup>31</sup> Toe neem hulle Josef se rok, en hulle slag 'n bok en steek die rok in die bloed,

<sup>32</sup> en hulle stuur die lang rok weg en laat dit na hulle vader bring met die woorde:

## Génesis 38

Dit het ons gevind. Kyk tog goed of dit die rok van u seun is of nie.

<sup>33</sup> En hy het dit herken en gesê: Die rok van my seun! 'n Wilde dier het hom opgeëet. Verskeur, verskeur is Josef!

<sup>34</sup> Toe skeur Jakob sy klere en trek 'n roukleed om sy heupe, en hy het oor sy seun gerou, baie dae lank.

<sup>35</sup> En al sy seuns en al sy dogters het moeite gedoen om hom te troos, maar hy het geweier om hom te laat troos en gesê: Nee, treurende sal ek na my seun in die doderyk afdaal! So het sy vader hom dan beween.

<sup>36</sup> En die Midianiete het hom na Egipte verkoop aan Pótifar, 'n hofdienaar van Farao, die owerste van die lyfwag.

**38** IN dié tyd het Juda afgetrek, van sy broers af weg, en uitgedraai na 'n man van Adúllam met die naam van Hira.

<sup>2</sup> En Juda het daar die dogter van 'n Kanaänitiese man gesien met die naam van Sua; en hy het met haar getrou en by haar ingegaan.

<sup>3</sup> En sy het bevrug geword en 'n seun gebaar, en sy het hom Er genoem.

<sup>4</sup> Daarna het sy weer bevrug geword en 'n seun gebaar en hom Onan genoem.

<sup>5</sup> En sy het nog weer 'n seun gebaar en hom Sela genoem; en hy was in Kesib toe sy hom gebaar het.

<sup>6</sup> En Juda het vir Er, sy eersgeborene, 'n vrou geneem, en haar naam was Tamar.

<sup>7</sup> Maar Er, die eersgeborene van Juda, het die HERE mishag. Daarom het die HERE hom laat sterwe.

<sup>8</sup> Toe sê Juda vir Onan: Gaan in by die

vrou van jou broer en sluit die swaershuwelik met haar en verwek vir jou broer 'n nageslag.

<sup>9</sup> Maar Onan het geweet dat die nageslag nie syne sou wees nie; daarom het hy, elke keer as hy by die vrou van sy broer ingaan, dit op die grond verderwe om vir sy broer geen nageslag te gee nie.

<sup>10</sup> En dit was verkeerd in die oë van die HERE wat hy gedoen het; daarom het Hy hom ook laat sterwe.

<sup>11</sup> Toe sê Juda vir Tamar, sy skoondogter: Bly 'n weduwee in die huis van jou vader totdat my seun Sela groot is. Want hy het gedink: Anders sterwe hy ook soos sy broers! So het Tamar dan gaan woon in die huis van haar vader.

<sup>12</sup> En ná verloop van geruime tyd het die dogter van Sua, die vrou van Juda, gesterwe. En toe Juda klaar getreur het, het hy opgegaan na die skeerders van sy kleinvee, na Timna toe, hy en sy vriend Hira, die Adullamiet.

<sup>13</sup> En hulle het Tamar te kenne gegee en gesê: Kyk, jou skoonvader gaan op na Timna om sy kleinvee te skeer.

<sup>14</sup> Toe trek sy die klere van haar weduweeskap uit en bedek haar met 'n sluier en draai haar toe; en sy het gaan sit by die ingang van Enaim wat op die pad na Timna lê. Want sy het gesien dat Sela groot geword het, maar sy was aan hom nie as vrou gegee nie.

<sup>15</sup> Toe Juda haar sien, het hy haar vir 'n hoer gehou, omdat sy haar gesig toegebind het;

<sup>16</sup> en hy het na haar uitgedraai by die pad

## Génesis 39

en gesê: Kom tog, laat my by jou ingaan; want hy het nie geweet dat dit sy skoondogter was nie. En sy vra: Wat sal jy my gee as jy by my ingaan?

<sup>17</sup> En hy antwoord: Ek sal jou 'n boklam van die kleinvee af stuur. Toe sê sy: As jy 'n pand gee totdat jy dit stuur.

<sup>18</sup> En hy sê: Wat is die pand wat ek jou moet gee? Toe antwoord sy: Jou seëlring met die bandjie en jou staf wat in jou hand is. Hy gee dit toe aan haar en gaan by haar in, en sy het by hom swanger geword.

<sup>19</sup> En sy het opgestaan en weggegaan en haar sluier afgehaal en die klere van haar weduweeskap aangetrek.

<sup>20</sup> En Juda het die boklam gestuur deur middel van sy vriend, die Adullamiet, om die pand uit die hand van die vrou te gaan haal. Maar hy het haar nie gevind nie.

<sup>21</sup> Toe vra hy die mense van haar woonplek: Waar is daardie hoer wat in Enaim by die pad was? En hulle antwoord: Hier was geen hoer nie.

<sup>22</sup> Daarop gaan hy na Juda terug met die berig: Ek het haar nie gevind nie. En die mense van die plek het ook gesê: Hier was geen hoer nie.

<sup>23</sup> Toe sê Juda: Laat sy dit hou, dat ons nie 'n bespotting word nie. Kyk, ek het hierdie boklam gestuur, maar jy het haar nie gevind nie.

<sup>24</sup> Ná omtrent drie maande het hulle Juda laat weet en gesê: Tamar, jou skoondogter, het gehoereer, en sy is ook swanger deur hoerery! En Juda sê: Bring haar uit, dat sy verbrand kan word.

<sup>25</sup> Terwyl sy uitgebring word, laat sy haar

skoonvader dit weet: By die man aan wie hierdie dinge behoort, is ek swanger. En sy het gesê: Kyk tog mooi aan wie hierdie seëlring en bandjies en staf behoort.

<sup>26</sup> En Juda het dit herken en gesê: Sy het reg teenoor my, want ek het haar mos nie aan my seun Sela gegee nie. En hy het haar verder nie meer beken nie.

<sup>27</sup> En toe sy sou baar, was daar 'n tweeling in haar skoot.

<sup>28</sup> En terwyl sy baar, het een die hand uitgesteek; en die vroedvrou het dit gegryp en 'n rooi draad om sy hand gebind en gesê: Hierdie een is eerste gebore.

<sup>29</sup> Maar toe hy sy hand teruggetrek het, word sy broer gebore! En sy sê: Hoe kragtig het jy deurgebreek! En hulle het hom Peres genoem.

<sup>30</sup> En daarna is sy broer gebore aan wie se hand die rooi draad was. En hulle het hom Serag genoem.

**39** EN Josef is afgebring na Egipte; en Pótifar, 'n hofdienaar van Farao, die owerste van die lyfwag, 'n Egiptiese man, het hom gekoop uit die hand van die Ismaeliete wat hom daarheen afgebring het.

<sup>2</sup> En die HERE was met Josef, sodat hy 'n voorspoedige man was; en hy het in die huis van sy heer, die Egiptenaar, gebly.

<sup>3</sup> En toe sy heer sien dat die HERE met hom was, en dat die HERE alles wat hy doen, in sy hand voorspoedig maak,

<sup>4</sup> het Josef guns in sy oë gevind en hom gedien; en hy het hom aangestel oor sy huis, en alles wat in sy besit was, aan hom oorgegee.



## Génesis 40

---

<sup>5</sup> En vandat hy hom aangestel het oor sy huis en oor alles wat in sy besit was, het die HERE die huis van die Egiptenaar geseën ter wille van Josef; ja, die seën van die HERE was by alles wat syne was, in die huis en op die veld.

<sup>6</sup> En hy het alles wat syne was, aan Josef oorgelaat, sodat hy met sy hulp van niks kennis geneem het nie as net van die brood wat hy geëet het. En Josef was skoon van gestalte en mooi van aansien.

<sup>7</sup> Ná hierdie dinge het die vrou van sy heer haar oë na Josef opgeslaan en gesê: Kom hou gemeenskap met my.

<sup>8</sup> Maar hy het geweier en aan die vrou van sy heer gesê: Kyk, deur my is dit dat my heer geen kennis neem van wat in die huis is nie; en alles wat syne is, het hy aan my oorgegee.

<sup>9</sup> Hy is in hierdie huis nie groter as ek nie en het my niks onthou nie behalwe u, omdat u sy vrou is; hoe kan ek dan hierdie groot kwaad doen en sondig teen God?

<sup>10</sup> En nadat sy met Josef dag ná dag gespreek het, en hy na haar nie wou luister om by haar te lê om met haar gemeenskap te hou nie,

<sup>11</sup> kom hy eendag in die huis om sy werk te doen terwyl niemand van die huisgenote binne was nie.

<sup>12</sup> Toe gryp sy hom aan sy kleed en sê: Kom hou gemeenskap met my. Maar hy het sy kleed in haar hand laat agterbly en gevlug en na buite geloop.

<sup>13</sup> Toe sy dan sien dat hy sy kleed in haar hand laat bly en buitentoe gevlug het,

<sup>14</sup> roep sy na haar huisgenote en sê aan

hulle: Kyk, hy het vir ons 'n Hebreeuse man hier gebring om met ons gek te skeer; hy het na my gekom om met my gemeenskap te hê, en ek het hard geskreeu; <sup>15</sup> en toe hy hoor dat ek my stem verhef en skreeu, het hy sy kleed by my laat agterbly en gevlug en na buite geloop.

<sup>16</sup> En sy het sy kleed by haar neergelê totdat sy heer tuisgekom het.

<sup>17</sup> En sy het hom met dieselfde woorde aangespreek en gesê: Die Hebreeuse kneg wat jy vir ons hier gebring het, het na my gekom om met my gek te skeer;

<sup>18</sup> en toe ek my stem verhef en skreeu, het hy sy kleed by my laat agterbly en na buite gevlug.

<sup>19</sup> Toe sy heer die woorde hoor waarmee sy vrou hom aanspreek: So en so het jou kneg aan my gedoen—het hy baie kwaad geword;

<sup>20</sup> en die heer van Josef het hom laat vang en hom in die gevangenis gesit op die plek waar die gevangenes van die koning opgesluit was; en hy was daar in die gevangenis.

<sup>21</sup> Maar die HERE was met Josef, en Hy het goedertierenheid aan hom bewys en hom guns verleen in die oë van die owerste van die gevangenis.

<sup>22</sup> En die owerste van die gevangenis het almal wat in die gevangenis opgesluit was, aan Josef toevertrou; en alles wat daar te doen was, het hý gedoen.

<sup>23</sup> Die owerste van die gevangenis het glad nie na iets omgekyk wat aan hom toevertrou was nie, omdat die HERE met hom was; en wat hy doen, het die HERE

## Génesis 40

voorspoedig laat wees.

**40** NÁ hierdie dinge het die skinker van die koning van Egipte en die bakker hulle misgaan jeens hulle heer, die koning van Egipte,

<sup>2</sup> sodat Farao baie kwaad geword het vir sy twee hofdiensmaats, die voorman van die skinkers en die voorman van die bakkers.

<sup>3</sup> En hy het hulle in bewaring gegee in die huis van die owerste van die lyfwag, in die gevangenis, die plek waar Josef gevange was.

<sup>4</sup> En die owerste van die lyfwag het Josef by hulle aangestel om hulle te bedien. En hulle was 'n tyd lank in bewaring.

<sup>5</sup> En hulle het altwee 'n droom gehad, elkeen sy droom, in dieselfde nag, elkeen 'n droom met besondere betekenis, die skinker en die bakker van die koning van Egipte, wat in die gevangenis gevange gesit het.

<sup>6</sup> En Josef het die volgende môre by hulle gekom en gesien dat hulle ontstemd was.

<sup>7</sup> Toe vra hy die hofdiensmaats van Farao wat by hom in bewaring was in die huis van sy heer, en sê: Waarom lyk julle aangesig vandag so droewig?

<sup>8</sup> En hulle antwoord hom: Ons het 'n droom gehad, en daar is niemand wat dit kan uitleg. En Josef vra hulle: Is uitlegging nie 'n saak van God nie? Vertel my tog.

<sup>9</sup> Toe vertel die voorman van die skinkers aan Josef sy droom en sê vir hom: In my droom was daar 'n wingerdstok voor my,

<sup>10</sup> en aan die wingerdstok was drie ranke; en skaars het hy gebot of sy bloeisel was

uit, sy trosse het ryp druiwe geword.

<sup>11</sup> En die beker van Farao was in my hand. En ek het die druiwe geneem en dit in die beker van Farao uitgedruk en die beker in die hand van Farao gegee.

<sup>12</sup> Toe sê Josef vir hom: Dit is die uitlegging daarvan: die drie ranke is drie dae.

<sup>13</sup> Binne drie dae sal Farao jou hoof verhef—jou in jou rang herstel; en jy sal die beker van Farao in sy hand gee net soos vroeër toe jy sy skinker was.

<sup>14</sup> Hou my tog net in gedagte as dit met jou goed gaan, en bewys my tog 'n guns en maak melding van my by Farao en bring my uit hierdie huis uit;

<sup>15</sup> want ek is gesteel, ja gesteel, uit die land van die Hebreërs, en ek het hier ook niks gedoen dat hulle my in die gevangenis gesit het nie.

<sup>16</sup> Toe die voorman van die bakkers sien dat hy 'n gunstige uitlegging gegee het, sê hy aan Josef: Ook in my droom—toe was daar drie mandjies met witbrood op my hoof,

<sup>17</sup> en in die boonste mandjie was allerhande eetware vir Farao deur bakkers klaargemaak, en die voëls het dit uit die mandjie bo-op my hoof weggepick.

<sup>18</sup> Toe antwoord Josef en sê: Dit is die uitlegging daarvan—die drie mandjies is drie dae.

<sup>19</sup> Binne drie dae sal Farao jou hoof bo-oor jou verhef—hy sal jou aan 'n paal ophang, en die voëls sal jou vlees van jou af wegpick.

<sup>20</sup> En op die derde dag, die verjaarsdag van Farao, het hy 'n maaltyd vir al sy diensmaats berei en die hoof van die voorman

## Génesis 41

van die skinkers en die hoof van die voorman van die bakkers te midde van sy dienaars verhef—

<sup>21</sup> hy het die voorman van die skinkers herstel in sy skinkersamp, sodat hy die beker in die hand van Farao kon gee,

<sup>22</sup> maar die voorman van die bakkers het hy opgehang—soos Josef dit aan hulle uitgelê het.

<sup>23</sup> En die voorman van die skinkers het nie aan Josef gedink nie, maar hom vergeet.

**41** Ná verloop van twee volle jare het Farao gedroom dat hy by die Nyl staan;

<sup>2</sup> en kyk, daar kom sewe koeie uit die Nyl uit op wat mooi van aansien en vet van vleis was, en hulle het gaan wei in die rietgras.

<sup>3</sup> En kyk, ná hulle kom daar nog sewe koeie uit die Nyl uit op wat lelik van aansien en maer van vleis was, en hulle het by die ander koeie op die wal van die Nyl gaan staan.

<sup>4</sup> En die koeie wat lelik van aansien en maer van vleis was, het die sewe koeie wat mooi van aansien en vet was, opgeëet. Toe het Farao wakker geword.

<sup>5</sup> En hy het weer aan die slaap geraak en nog 'n keer gedroom; en kyk, sewe vet en mooi are skiet op aan een steel;

<sup>6</sup> en ná hulle spruit daar sewe are uit wat maer en deur die oostewind verskroei was;

<sup>7</sup> en die maer are het die sewe vet en vol are verslind. Toe het Farao wakker geword en kyk, dit was 'n droom!

<sup>8</sup> Dié môre was sy gees onrustig, en hy het al die towenaars en al die wyse manne van

Egipte laat roep; en Farao het aan hulle sy droom vertel, maar niemand kon dit aan Farao uitlê nie.

<sup>9</sup> Toe het die voorman van die skinkers met Farao gespreek en gesê: Ek moet vandag my sondes in gedagtenis bring.

<sup>10</sup> Farao was baie kwaad vir sy dienaars en het my in bewaring gegee in die huis van die owerste van die lyfwag, my en die voorman van die bakkers.

<sup>11</sup> En ons het in dieselfde nag 'n droom gehad, ek en hy; ons het gedroom, elkeen 'n droom met besondere betekenis.

<sup>12</sup> En daar was by ons 'n Hebreuse jongman, 'n kneg van die owerste van die lyfwag—aan hom het ons dit vertel, en hy het ons drome vir ons uitgelê; aan elkeen het hy die uitlegging volgens sy droom gegee.

<sup>13</sup> En soos hy ons dit uitgelê het, so het dit gebeur—my het hy in my rang herstel, maar hom opgehang.

<sup>14</sup> Toe laat Farao Josef roep, en hulle het hom gou uit die gevangenis uitgehaal, en hy het hom geskeer en ander klere aangetrek; en hy het by Farao gekom.

<sup>15</sup> Toe sê Farao vir Josef: Ek het 'n droom gehad, en daar is niemand wat dit kan uitlê nie; maar ek het van jou hoor verklaar dat jy 'n droom net hoef te hoor om dit uit te lê.

<sup>16</sup> En Josef het Farao geantwoord en gesê: Niks vir my nie! God sal Farao 'n gunstige antwoord gee.

<sup>17</sup> Toe sê Farao vir Josef: Kyk, ek het in my droom gestaan op die wal van die Nyl,

<sup>18</sup> en sewe koeie het uit die Nyl uit opgekom wat vet van vleis en mooi van

## Génesis 41

---

uiterlik was, en hulle het gaan wei in die rietgras.

<sup>19</sup> En kyk, ná hulle kom daar nog sewe koeie op, skraal en baie lelik van uiterlik en maer van vleis; ek het soos hulle so lelik in die ganse Egipteland nie gesien nie.

<sup>20</sup> En die maer en lelike koeie het die sewe eerste vet koeie opgeëet;

<sup>21</sup> dié het in hulle maag ingegaan, maar 'n mens kon nie merk dat hulle in hul maag ingegaan het nie; want hulle aansien was lelik soos in die begin. Toe het ek wakker geword.

<sup>22</sup> Daarna het ek in my droom gesien, en kyk, sewe vol en mooi are skiet op aan een steel.

<sup>23</sup> En ná hulle spruit daar sewe are uit wat dor, maer en deur die oostewind verskroei was;

<sup>24</sup> en die sewe maer are het die sewe mooi are verslind. En ek het dit aan die towenaars meegedeel, maar niemand kon my inligting gee nie.

<sup>25</sup> Toe sê Josef vir Farao: Die droom van Farao is een en dieselfde. Wat God van plan is om te doen, het Hy aan Farao te kenne gegee.

<sup>26</sup> Die sewe mooi koeie is sewe jare; en die sewe mooi are is sewe jare; die droom is een en dieselfde.

<sup>27</sup> En die sewe maer en lelike koeie wat ná hulle opgekom het, is sewe jare; en die sewe maer, deur die oostewind verskroei are sal sewe jare van hongersnood wees.

<sup>28</sup> Dit is die woord wat ek tot Farao gespreek het: wat God van plan is om te doen, het Hy Farao laat sien.

<sup>29</sup> Kyk, daar kom sewe jare van groot oorvloed in die hele Egipteland;

<sup>30</sup> maar daarna sal sewe jare van hongersnood aanbreek, en al die oorvloed sal in Egipteland vergeet word, en die hongersnood sal die land verteer.

<sup>31</sup> En van die oorvloed sal in die land niks gemerk word weens dié hongersnood wat daarna sal wees nie; want dit sal baie swaar wees.

<sup>32</sup> En wat dit betref dat die droom twee maal vir Farao herhaal is—dit is omdat die saak deur God vas besluit is en God dit gou sal doen.

<sup>33</sup> Laat Farao dan nou uitkyk na 'n verstandige en wyse man en hom aanstel oor Egipteland.

<sup>34</sup> Farao moet so maak en opsigters oor die land aanstel en in die sewe jare van oorvloed die vyfde deel hef van die opbrings van Egipteland.

<sup>35</sup> En hulle moet al die voedsel van hierdie goeie jare wat kom, versamel en onder leiding van Farao koring ophoop as voedsel in die stede en dit wegbêre.

<sup>36</sup> So sal dan die voedsel 'n voorraad wees vir die land vir die sewe jare van hongersnood wat in Egipteland sal kom, sodat die land nie deur die hongersnood te gronde gaan nie.

<sup>37</sup> En die woord was goed in die oë van Farao en van al sy dienaars.

<sup>38</sup> Daarop het Farao aan sy dienaars gesê: Kan ons wel iemand vind soos hierdie man in wie die Gees van God is?

<sup>39</sup> En Farao sê vir Josef: Aangesien God dit alles aan jou bekend gemaak het, is daar

## Génesis 42

niemand verstandig en wys soos jy nie.

<sup>40</sup> Jý moet oor my huis wees, en na jou bevel moet my hele volk hulle skik; alleen deur die troon sal ek groter wees as jy.

<sup>41</sup> Verder het Farao vir Josef gesê: Kyk, ek stel jou aan oor die hele Egipteland.

<sup>42</sup> Toe trek Farao sy seëlring van sy hand af en sit dit aan die hand van Josef; en hy het hom fyn linneklere laat aantrek en die goue ketting om sy hals gehang

<sup>43</sup> en hom laat ry op sy tweede rytuig; en hulle het voor hom uitgeroep: Pas op! So het hy hom dan oor die hele Egipteland aangestel.

<sup>44</sup> En Farao sê vir Josef: Ek is Farao, maar sonder jou mag niemand sy hand of voet in die hele Egipteland verroer nie.

<sup>45</sup> En Farao het Josef genoem Sáfenat-Panéag en aan hom Ásenat, die dogter van Potiféra, die priester van On, as vrou gegee. En Josef het uitgetrek oor Egipteland.

<sup>46</sup> En Josef was dertig jaar oud toe hy voor Farao, die koning van Egipte, gestaan het; en Josef het van Farao af weggegaan en die hele Egipteland deurgetrek.

<sup>47</sup> En die land het met handvolle opgelewer in die sewe jare van oorvloed.

<sup>48</sup> Toe het hy al die voedsel van die sewe jare versamel wat in Egipteland gekom het, en voedsel in die stede weggesit—die voedsel van die land wat rondom elke stad was, het hy daarin weggesit.

<sup>49</sup> So het Josef dan 'n baie groot hoeveelheid koring opgehoop soos die sand van die see, totdat hulle opgehou het om te tel, want dit was ontelbaar.

<sup>50</sup> En vir Josef is twee seuns gebore—voordat die jaar van hongersnood gekom het—wat Ásenat, die dogter van Potiféra, die priester van On, vir hom gebaar het.

<sup>51</sup> En Josef het die eersgeborene Manasse genoem; want, het hy gesê, God het my al my moeite laat vergeet en ook die hele huis van my vader.

<sup>52</sup> En die tweede het hy Efraim genoem; want, het hy gesê, God het my vrugbaar gemaak in die land van my ellende.

<sup>53</sup> Toe het die sewe jare van oorvloed wat daar in Egipteland was, ten einde gekom,

<sup>54</sup> en die sewe jare van hongersnood het begin aankom soos Josef voorspel het. En daar was hongersnood in al die lande, maar in die hele Egipteland was daar brood.

<sup>55</sup> En toe die hele Egipteland honger gely en die volk na Farao geroep het om brood, sê Farao aan al die Egiptenaars: Gaan na Josef, doen wat hy julle sê.

<sup>56</sup> En die hongersnood was oor die hele oppervlakte van die aarde, en Josef het alles waarin iets was, oopgemaak en aan die Egiptenaars verkoop; en die hongersnood was swaar in Egipteland.

<sup>57</sup> En die hele wêreld het na Josef in Egipte gekom om koring te koop, want die hongersnood was swaar op die hele aarde.

**42** TOE Jakob merk dat daar koring in Egipte was, het Jakob aan sy seuns gesê: Wat kyk julle so na mekaar?

<sup>2</sup> En hy sê: Kyk, ek het gehoor dat daar koring in Egipte is; trek daarheen af, en koop vir ons daar koring, dat ons kan lewe

## Génesis 42

---

en nie sterwe nie.

<sup>3</sup> Daarop het tien van Josef se broers afgetrek om koring uit Egipte te koop.

<sup>4</sup> Maar Benjamin, die broer van Josef, het Jakob nie saam met sy broers gestuur nie; want hy het gedink: Altemit kan 'n ongeluk hom oorkom.

<sup>5</sup> So het die seuns van Israel dan gekom om koring te koop onder diegene wat daar aangekom het; want daar was hongersnood in die land Kanaän.

<sup>6</sup> En Josef was die maghebber oor die land, hy wat aan al die mense van die land koring verkoop het; daarom het die broers van Josef gekom en hulle voor hom met die aangesig na die aarde gebuig.

<sup>7</sup> Sodra Josef sy broers sien, het hy hulle herken maar hom vreemd teenoor hulle gehou en hulle hard aangespreek en vir hulle gesê: Waar kom julle vandaan? En hulle antwoord: Uit die land Kanaän om voedsel te koop.

<sup>8</sup> En Josef het sy broers herken, maar hulle het hom nie herken nie.

<sup>9</sup> Toe dink Josef aan die drome wat hy aangaande hulle gedroom het; en hy sê vir hulle: Julle is spioene, julle het gekom om te kyk waar die land oop is.

<sup>10</sup> Maar hulle het hom geantwoord: Nee, my heer, maar u dienaars het gekom om voedsel te koop.

<sup>11</sup> Ons is almal seuns van een man, ons is eerlike mense; u dienaars is geen spioene nie.

<sup>12</sup> Toe sê hy vir hulle: Nee, maar julle het gekom om te kyk waar die land oop is.

<sup>13</sup> En hulle antwoord: U dienaars is twaalf

in getal, ons is broers, seuns van een man in die land Kanaän; en kyk, die jongste is nou by ons vader, maar die een is daar nie meer nie.

<sup>14</sup> Toe sê Josef vir hulle: Dit is wat ek julle gesê het: Julle is spioene!

<sup>15</sup> Hieraan sal julle getoets word: so waar as Farao leef, julle sal hiervandaan nie trek tensy dat julle jongste broer hierheen kom nie.

<sup>16</sup> Stuur een van julle, dat hy julle broer gaan haal, maar julle moet in die gevangenis bly. So sal dan julle woorde getoets word, of die waarheid by julle is of nie. So waar as Farao leef, julle is spioene!

<sup>17</sup> Daarop het hy hulle saam drie dae lank in bewaring laat hou.

<sup>18</sup> En op die derde dag sê Josef vir hulle: Doen dit, dan sal julle lewe; ek vrees God!

<sup>19</sup> As julle eerlike mense is, laat een van julle broers gevange bly in die huis waar julle in bewaring is; maar gaan julle, bring die koring vir die honger van julle huisgesinne weg,

<sup>20</sup> en bring julle jongste broer na my toe—dan sal julle woorde waar gemaak word, en julle sal nie sterwe nie. En hulle het so gedoen.

<sup>21</sup> Toe sê hulle vir mekaar: Voorwaar, ons boet nou vanweë ons broer, omdat ons die benoudheid van sy siel gesien het toe hy ons gesmeek het en ons nie geluister het nie—daarom kom hierdie benoudheid oor ons.

<sup>22</sup> Daarop antwoord Ruben hulle: Het ek nie vir julle gesê nie: Besondig julle nie aan die seun nie? Maar julle het nie geluister

## Génesis 43

nie. Kyk, so word dan ook sy bloed geëis.

<sup>23</sup> En hulle het nie geweet dat Josef dit verstaan nie, want daar was 'n tolk tussen hulle.

<sup>24</sup> Toe draai hy hom van hulle af weg en ween. Daarna het hy na hulle teruggegaan en met hulle gespreek; en hy het Símeon onder hulle uitgeneem en hom voor hulle oë gebind.

<sup>25</sup> Daarop gee Josef bevel om hulle sakke vol koring te maak en elkeen se geld weer in sy sak te sit en om aan hulle padkos vir die reis saam te gee. En so is aan hulle gedoen.

<sup>26</sup> En hulle het die koring op hulle esels gelaai en daar weggetrek.

<sup>27</sup> En toe die een sy sak oopmaak om sy esel in die herberg voer te gee, sien hy sy geld; en kyk, dit was somaar bo in sy sak!

<sup>28</sup> En hy sê vir sy broers: My geld is teruggegee; hier lê dit dan ook in my sak! Toe het hulle hart hul begewe, en hulle draai verskrik na mekaar toe en sê: Wat het God ons nou aangedoen?

<sup>29</sup> En hulle het by hul vader Jakob in die land Kanaän gekom en hom alles vertel wat hulle wedervaar het en gesê:

<sup>30</sup> Die man, die heer van die land, het ons hard aangespreek en ons vir spioene van die land gehou.

<sup>31</sup> Maar ons het aan hom gesê: Ons is eerlike mense, ons is geen spioene nie.

<sup>32</sup> Ons is twaalf broers, seuns van ons vader; die een is daar nie meer nie, en die jongste is nou by ons vader in die land Kanaän.

<sup>33</sup> Daarop het die man, die heer van die

land, aan ons gesê: Hieraan sal ek weet dat julle eerlike mense is—laat een van julle broers by my bly; en neem vir die honger van julle huisgesinne en trek weg,

<sup>34</sup> en bring julle jongste broer na my toe; dan sal ek weet dat julle geen spioene is nie. As julle eerlike mense is, sal ek julle broer aan julle teruggee, en julle mag in die land rondtrek.

<sup>35</sup> En toe hulle hul sakke leegmaak, was elkeen se bondeltjie geld daar in sy sak! En toe hulle hul bondeljies geld sien, hulle en hul vader, was hulle bevrees.

<sup>36</sup> Daarop sê Jakob, hulle vader, vir hulle: Julle beroof my van kinders. Josef is weg! En Símeon is weg! En Benjamin wil julle wegneem! Alles is teen my!

<sup>37</sup> Toe spreek Ruben sy vader aan en sê: U kan my twee seuns doodmaak as ek hom nie na u terugbring nie. Vertrou hom aan my toe, en ék sal hom na u terugbring.

<sup>38</sup> Maar hy sê: My seun sal nie saam met julle aftrek nie, want sy broer is dood, en hy het alleen oorgebly; en as 'n ongeluk hom oorkom op die pad wat julle sal gaan, dan sal julle my grys hare met kommer in die doderyk laat afdaal.

**43** EN die hongersnood was swaar in die land.

<sup>2</sup> En nadat die koring wat hulle uit Egipte gebring het, opgeëet was, sê hulle vader vir hulle: Gaan koop vir ons weer 'n bietjie voedsel.

<sup>3</sup> Toe het Juda hom geantwoord: Die man het ons uitdruklik gewaarsku en gesê: Julle sal my aangesig nie sien as julle broer nie by julle is nie.

## Génesis 43

<sup>4</sup> As u ons broer saam met ons stuur, sal ons aftrek en vir u voedsel koop;

<sup>5</sup> maar as u hom nie stuur nie, sal ons nie aftrek nie; want die man het aan ons gesê: Julle sal my aangesig nie sien as julle broer nie by julle is nie.

<sup>6</sup> Toe sê Israel: Waarom het julle so verkeerd teen my gehandel deur die man te vertel dat julle nog 'n broer het?

<sup>7</sup> En hulle antwoord: Die man het uitdruklik na ons en ons familie gevra met die woorde: Lewe julle vader nog? Het julle nog 'n broer? Toe het ons hom dit te kenne gegee volgens hierdie woorde. Kon ons dan ooit weet dat hy sou sê: Bring julle broer af?

<sup>8</sup> Daarop sê Juda aan sy vader Israel: Stuur die seun saam met my; dan sal ons klaarmaak en wegtrek, sodat ons kan lewe en nie sterwe nie—ons en ook u en ons kinders nie.

<sup>9</sup> Ek sal vir hom borg wees; van my hand kan u hom eis. As ek hom nie na u bring en voor u stel nie, sal ek lewenslank teenoor u skuldig staan.

<sup>10</sup> Ja, as ons nie getalm het nie, waarlik dan was ons nou al twee maal terug.

<sup>11</sup> Toe het Israel, hulle vader, vir hulle gesê: As dit so is, doen dan dit: neem van die opbrings van die land in julle sakke en bring vir die man 'n geskenk af—bietjie balsem en bietjie heuning, speserye en gom, neut en amandels;

<sup>12</sup> en neem dubbel soveel geld met julle saam en bring die geld wat weer bo in julle sakke gesit is, met julle saam terug. Miskien was dit 'n vergissing.

<sup>13</sup> En neem julle broer—maak julle klaar en gaan terug na die man.

<sup>14</sup> En mag God, die Almagtige, julle barmhartigheid verleen by die man, sodat hy julle ander broer en Benjamin saam met julle kan laat trek! En ek—as ek van kinders beroof is, dan is ek beroof.

<sup>15</sup> Daarop neem die manne dié geskenk, en hulle neem dubbel soveel geld saam met hulle en ook Benjamin, en hulle het klaargemaak en na Egipte afgetrek en voor Josef gaan staan.

<sup>16</sup> Toe Josef Benjamin by hulle sien, sê hy aan die opsigter oor sy huis: Bring die manne in die huis en slag slagvee en maak dit gereed, want die manne moet vanmiddag by my eet.

<sup>17</sup> En die man het gedoen soos Josef beveel het, en die man het die manne in die huis van Josef gebring.

<sup>18</sup> En die manne het gevrees, omdat hulle in die huis van Josef gebring is, en gesê: Ter wille van die geld wat die vorige keer in ons sakke teruggekom het, word ons ingebring om ons te oorrompel, ons te oorval en ons as slawe te neem, saam met ons esels.

<sup>19</sup> Daarom het hulle nader gekom na die man wat oor die huis van Josef was, en met hom gespreek by die ingang van die huis

<sup>20</sup> en gesê: Ag, my heer, ons het die vorige keer net afgetrek om voedsel te koop,

<sup>21</sup> maar toe ons in die herberg kom en ons sakke oopmaak, was elkeen se geld bo in sy sak—ons geld volgens sy gewig—en ons het dit saam met ons teruggebring.

<sup>22</sup> Ons het ook ander geld saam met ons



## Génesis 44

afgebring om voedsel te koop. Ons weet nie wie ons geld in ons sakke gestee het nie.

<sup>23</sup> Toe antwoord hy: Vrede vir julle!

Moenie bang wees nie! Julle God en die God van julle vader het julle 'n skat in jul sakke gegee. Julle geld het by my gekom. Daarop het hy Símeon na hulle uitgebring.

<sup>24</sup> En die man het die manne in die huis van Josef gebring en water aan hulle gegee, en hulle het hul voete gewas; hy het ook hulle esels voer gegee.

<sup>25</sup> En hulle het die geskenk reggemaak teen dat Josef die middag sou kom, want hulle het gehoor dat hulle daar brood sou eet.

<sup>26</sup> Toe Josef dan in die huis kom, het hulle vir hom die geskenk binnegebring wat by hulle was, en hulle voor hom neergebuig na die aarde toe.

<sup>27</sup> En hy het hulle na hul welstand gevra en gesê: Gaan dit goed met julle ou vader van wie julle spreek het? Leef hy nog?

<sup>28</sup> En hulle antwoord: Dit gaan goed met u dienaar, ons vader; hy lewe nog. En hulle het hul eerbiedig neergebuig.

<sup>29</sup> Toe slaan hy sy oë op en sien sy broer Benjamin, die seun van sy moeder, en sê: Is dit julle jongste broer van wie julle met my spreek het? Daarop sê hy: Mag God jou genadig wees, my seun!

<sup>30</sup> En Josef het gou gemaak, want sy binneste was ontroerd oor sy broer: hy het geleentheid gesoek om te ween en in die kamer gegaan en daar geweet.

<sup>31</sup> Daarna het hy sy gesig gewas en uitgekom en hom bedwing en gesê: Bring die ete op!

<sup>32</sup> Toe bring hulle dit vir hom besonders op en vir hulle besonders en vir die Egiptenaars wat by hom eet, besonders; want die Egiptenaars mag nie saam met die Hebreërs eet nie, omdat dit vir die Egiptenaars 'n gruwel is.

<sup>33</sup> En hulle het gaan sit volgens sy bepaling, die eersgeborene na sy eersgeboorte en die jongste na sy jonkheid. Toe kyk die manne mekaar verbaas aan.

<sup>34</sup> Hierop het hy aan hulle porsies uitgedeel van die ete wat voor hom staan; maar die porsie van Benjamin was vyf maal groter as die porsies van hulle almal. En hulle het gedrink en saam met hom vrolik geword.

**44** TOE gee hy bevel aan die opsigter oor sy huis en sê: Maak die sakke van die manne vol met lewensmiddele soveel as hulle kan vervoer, en sit elkeen se geld bo in sy sak;

<sup>2</sup> en my beker, die silwerbeker, moet jy bo in die jongste se sak sit saam met die geld vir sy koring. En hy het gehandel volgens die woord wat Josef spreek het.

<sup>3</sup> Toe dit die môre lig word, het hulle die manne laat trek, hulle met hul esels.

<sup>4</sup> Hulle het uit die stad uitgetrek, hulle was nog nie ver nie toe Josef aan die opsigter oor sy huis sê: Maak jou klaar en jaag die manne agterna; en as jy hulle inhaal, vra hulle dan: Waarom het julle kwaad vir goed vergelde?

<sup>5</sup> Is dit nie die ding waaruit my heer drink en waarmee hy altyd waarneem nie? Julle het verkeerd gehandel met wat julle gedoen het.

## Génesis 44

---

<sup>6</sup> En hy het hulle ingehaal en hierdie woorde aan hulle meegedeel.

<sup>7</sup> Toe sê hulle vir hom: Waarom spreek my heer sulke woorde? Dit is ver van u dienaars om so iets te doen.

<sup>8</sup> Kyk, geld wat ons bo in ons sakke gevind het, het ons uit die land Kanaän aan u teruggebring—hoe sou ons dan silwer of goud uit die huis van u heer kan steel?

<sup>9</sup> Dié een van u dienaars by wie dit gevind word, moet sterwe; en ons sal ook my heer se slawe wees.

<sup>10</sup> Toe sê hy: Nou goed, laat dit wees soos julle gesê het. Dié een by wie dit gevind word, is my slaaf. Maar julle sal vry wees.

<sup>11</sup> Daarop het hulle gou elkeen sy sak op die grond neergesit en elkeen sy sak oopgemaak.

<sup>12</sup> En hy het gesoek; hy het begin by die oudste en opgehou by die jongste; en die beker is in Benjamin se sak gevind.

<sup>13</sup> Toe skeur hulle hul klere, en elkeen laai sy esel, en hulle gaan na die stad terug.

<sup>14</sup> En Juda het saam met sy broers in die huis van Josef gekom, terwyl hy nog daar was, en hulle het voor hom neergeval op die grond.

<sup>15</sup> Daarop sê Josef vir hulle: Wat is dit nou wat julle gedoen het? Weet julle nie dat 'n man soos ek dit ongetwyfeld moet waarneem nie?

<sup>16</sup> En Juda antwoord: Wat kan ons aan my heer sê? Wat kan ons spreek? En waarmee kan ons ons regverdig? God het die ongeregtigheid van u dienaars uitgevind. Kyk, ons is my heer se slawe, ons sowel as hy by wie die beker gevind is.

<sup>17</sup> Maar hy sê: Dit is ver van my om dit te doen; die man by wie die beker gevind is, dié sal my slaaf wees. Maar trek julle in vrede op na julle vader.

<sup>18</sup> Toe kom Juda nader na hom en sê: Ag, my heer, mag u dienaar tog 'n woord spreek voor die ore van my heer, en laat u toorn nie teen u dienaar ontvlam nie, want u staan gelyk met Farao.

<sup>19</sup> My heer het sy dienaars gevra en gesê: Het julle 'n vader of broer?

<sup>20</sup> En ons het my heer geantwoord: Ons het 'n ou vader; en daar is 'n jong seun, 'n kind van die ouderdom, maar sy broer is dood; en hy het alleen oorgebly van sy moeder, en sy vader het hom lief.

<sup>21</sup> Toe het u aan u dienaars gesê: Bring hom af na my toe, dat ek my oog op hom kan rig.

<sup>22</sup> En ons het my heer geantwoord: Die seun kan sy vader nie verlaat nie, want sy vader sal sterwe as hy hom verlaat.

<sup>23</sup> Daarop het u aan u dienaars gesê: As julle jongste broer nie saam met julle afkom nie, sal julle my aangesig nie weer sien nie.

<sup>24</sup> En toe ons na u dienaar, my vader, opgetrek het en hom die woorde van my heer te kenne gegee het,

<sup>25</sup> het ons vader gesê: Gaan koop weer vir ons 'n bietjie voedsel.

<sup>26</sup> Maar ons het gesê: Ons kan nie aftrek nie. As ons jongste broer by ons is, sal ons aftrek; want ons mag die aangesig van die man nie sien as ons jongste broer nie by ons is nie.

<sup>27</sup> En u dienaar, my vader, het aan ons gesê: Julle weet dat my vrou vir my twee

## Génesis 45

gebaar het—

<sup>28</sup> die een het van my af weggegaan, en ek het gesê: Voorwaar, hy is verskeur, verskeur! En ek het hom tot hiertoe nie gesien nie.

<sup>29</sup> As julle nou hierdie een ook van my af wegneem en hom 'n ongeluk oorkom, dan sal julle my grys hare met droefenis in die doderyk laat afdaal.

<sup>30</sup> As ek dan nou by u dienaar, my vader, kom en die seun nie by ons is nie—terwyl sy siel innig aan hom verkleef is—

<sup>31</sup> sal hy sterwe as hy sien dat die seun daar nie is nie; en u dienaars sal die grys hare van u dienaar, ons vader, met kommer in die doderyk laat afdaal.

<sup>32</sup> Want u dienaar het die seun deur borgskap van my vader verkry deurdat hy gesê het: As ek hom nie na u bring nie, sal ek lewenslank teenoor my vader skuldig staan.

<sup>33</sup> Laat u dienaar dan nou tog in die plek van die seun my heer se slaaf bly, en laat die seun saam met sy broers optrek.

<sup>34</sup> Want hoe kan ek na my vader optrek as die seun nie by my is nie? Mag ek maar net die ellende nie aansien wat my vader sal tref nie!

**45** TOE kon Josef hom nie langer bedwing voor almal wat by hom gestaan het nie, en hy roep: Laat almal van my af weggaan! En daar het niemand by hom gestaan toe Josef hom aan sy broers bekend gemaak het nie.

<sup>2</sup> Daarop bars hy in trane uit, sodat die Egiptenaars en ook die huis van Farao dit gehoor het.

<sup>3</sup> En Josef sê vir sy broers: Ek is Josef! Leef my vader nog? Maar sy broers kon hom nie antwoord nie, want hulle was verskrik voor hom.

<sup>4</sup> Verder sê Josef vir sy broers: Kom tog nader na my. En toe hulle nader kom, sê hy: Ek is julle broer Josef vir wie julle na Egipte verkoop het.

<sup>5</sup> Maar wees nou nie bedroef nie, en laat daar geen ontstemming by julle wees dat julle my hierheen verkoop het nie. Want om lewens te behou, het God my voor julle uit gestuur.

<sup>6</sup> Want daar was nou twee jaar hongersnood in die land, en daar is nog vyf jaar waarin nie geploeg of geoes sal word nie.

<sup>7</sup> Maar God het my voor julle uit gestuur om vir julle 'n oorblyfsel op die aarde te verseker en om julle in die lewe te hou tot 'n groot verlossing.

<sup>8</sup> Julle het my dan nou nie hierheen gestuur nie, maar God; en Hy het my 'n raadsman van Farao gemaak en 'n gebieder oor sy hele huis en 'n regeerder in die hele Egipteland.

<sup>9</sup> Trek gou op na my vader en sê vir hom: So spreek u seun Josef: God het my 'n gebieder oor die hele Egipteland gemaak. Kom af na my, moenie versuim nie!

<sup>10</sup> En u kan in die land Gosen woon en naby my wees, u en u kinders en u kindskinders en u kleinvee en u beeste en alles wat u besit.

<sup>11</sup> En ek sal u daar onderhou, want daar sal nog vyf jaar hongersnood wees; sodat u nie verarm nie, u en u huis en alles wat aan u

## Génesis 46

behoort.

<sup>12</sup> En kyk, julle oë sien dit, en die oë van my broer Benjamin, dat dit my mond is wat met julle spreek.

<sup>13</sup> Vertel my vader dan van al my heerlijkheid in Egipte en van alles wat julle gesien het, en bring my vader gou hierheen af.

<sup>14</sup> Toe val hy sy broer Benjamin om die hals en ween; en ook Benjamin het aan sy hals geweene.

<sup>15</sup> En hy het al sy broers gesoen en aan hulle hals geweene; en daarna het sy broers met hom gespreek.

<sup>16</sup> Toe die gerug in die huis van Farao gehoor word dat Josef se broers gekom het, was dit goed in die oë van Farao en van sy dienaars.

<sup>17</sup> En Farao het met Josef gespreek: Sê aan jou broers: Doen dit, laai julle diere en trek weg na die land Kanaän.

<sup>18</sup> En gaan haal julle vader en julle huisgesinne en kom na my toe, dan sal ek julle die beste van Egipteland gee; en eet die vettigheid van die land.

<sup>19</sup> Jý kry dan bevel—doen dit: Neem vir julle uit Egipteland waens vir julle kinders en julle vroue, en vervoer julle vader en kom.

<sup>20</sup> En julle hoef geen spyt te hê oor julle huisraad nie, want die beste van die hele Egipteland is julle s'n.

<sup>21</sup> Die seuns van Israel het toe so gedoen; en Josef het vir hulle waens verskaf volgens die bevel van Farao en hulle padkos gegee vir die reis.

<sup>22</sup> Hy het aan hulle almal, man vir man, 'n

stel nuwe klere gegee; maar aan Benjamin het hy driehonderd sikkels silwer en vyf stel nuwe klere gegee.

<sup>23</sup> En net so het hy ook aan sy vader gestuur tien esels, gelaai met die beste goed van Egipte, en tien eselinne, gelaai met koring en brood en voedsel vir sy vader op die reis.

<sup>24</sup> Daarop het hy sy broers weggestuur, en hulle het vertrek; en hy het aan hulle gesê: Moenie vir mekaar kwaad word op die pad nie.

<sup>25</sup> En hulle het opgetrek uit Egipte en in die land Kanaän aangekom by hulle vader Jakob.

<sup>26</sup> Toe hulle hom vertel: Josef lewe nog—en dat hy regeerder is in die hele Egipteland—het sy hart beswyk, want hy het hulle nie geglo nie.

<sup>27</sup> Maar toe hulle hom al die woorde van Josef te kenne gee wat hy met hulle gespreek het, en hy die waens sien wat Josef gestuur het om hom te vervoer, het die gees van Jakob, hulle vader, lewendig geword.

<sup>28</sup> En Israel het gesê: Dit is genoeg! My seun Josef lewe nog! Ek sal gaan en hom sien voordat ek sterwe.

**46** EN Israel het weggetrek met alles wat aan hom behoort het, en in Berséba gekom; en hy het offerandes gebring aan die God van sy vader Isak.

<sup>2</sup> En God het tot Israel gespreek in naggestigte en gesê: Jakob, Jakob! En hy antwoord: Hier is ek!

<sup>3</sup> Toe sê Hy: Ek is God, die God van jou vader. Moenie bevrees wees om na Egipte

## Génesis 46

af te trek nie, want Ek sal jou daar 'n groot nasie maak.

<sup>4</sup> Ek sal saam met jou aftrek na Egipte, en Ek sal jou gewis ook weer laat optrek; en Josef sal jou oë toedruk.

<sup>5</sup> Daarna het Jakob weggetrek van Berséba af. En die seuns van Israel het hulle vader Jakob met hulle kinders en hulle vroue op die waens gelaai wat Farao gestuur het om hom te vervoer.

<sup>6</sup> En hulle het hul vee en besittings geneem wat hulle in die land Kanaän verwerf het, en in Egipte gekom, Jakob en sy hele geslag saam met hom:

<sup>7</sup> sy seuns en sy kleinseuns saam met hom; sy dogters en kleindogters en sy hele geslag het hy saam met hom in Egipte gebring.

<sup>8</sup> En dit is die name van die seuns van Israel wat in Egipte gekom het—Jakob en sy seuns. Die eersgeborene van Jakob was Ruben.

<sup>9</sup> En die seuns van Ruben: Henog en Pallu en Hesron en Karmi.

<sup>10</sup> En die seuns van Símeon: Jémuel en Jamin en Ohad en Jagin en Sohar en Saul, die seun van die Kanaänitiese vrou.

<sup>11</sup> En die seuns van Levi: Gerson, Kehat en Merári.

<sup>12</sup> En die seuns van Juda: Er en Onan en Sela en Peres en Serag. Maar Er en Onan het gesterwe in die land Kanaän; en die seuns van Peres was Hesron en Hamul.

<sup>13</sup> En die seuns van Íssaskar: Tola en Puwa en Job en Simron.

<sup>14</sup> En die seuns van Sébulon: Sered en Elon en Jágleël.

<sup>15</sup> Dit is die seuns van Lea wat sy vir Jakob

gebaar het in Paddan-Aram, saam met sy dogter Dina; al die siele van sy seuns en dogters was drie-en-dertig.

<sup>16</sup> En die seuns van Gad: Sifjon en Haggi, Suni en Esbon, Eri en Aródi en Areëli.

<sup>17</sup> En die seuns van Aser: Jimna en Jiswa en Jiswi en Bería en Serag, hulle suster; en die seuns van Bería: Heber en Máلكiël.

<sup>18</sup> Dit is die seuns van Silpa wat Laban aan sy dogter Lea gegee het; en sy het vir Jakob hierdie sestien siele gebaar.

<sup>19</sup> Die seuns van Ragel, die vrou van Jakob: Josef en Benjamin.

<sup>20</sup> En vir Josef is in Egipteland gebore Manasse en Efraim wat Ásenat, die dogter van Potiféra, die priester van On, vir hom gebaar het.

<sup>21</sup> En die seuns van Benjamin: Bela en Beger en Asbel, Gera en Naäman, Egi en Ros, Muppim en Huppim en Ard.

<sup>22</sup> Dit is die seuns van Ragel wat vir Jakob gebore is, almal saam veertien siele.

<sup>23</sup> En die seuns van Dan: Husim.

<sup>24</sup> En die seuns van Náftali: Jágseël en Guni en Jeser en Sillem.

<sup>25</sup> Dit is die seuns van Bilha wat Laban aan sy dogter Ragel gegee het; en sy het hulle vir Jakob gebaar, almal saam sewe siele.

<sup>26</sup> Al die siele wat aan Jakob behoort het en, uit sy heup afkomstig, na Egipte gegaan het, behalwe die vroue van die seuns van Jakob, was almal saam ses-en-sestig siele.

<sup>27</sup> En die seuns van Josef wat vir hom in Egipte gebore is, was twee siele. Al die siele van die huis van Jakob wat in Egipte gekom het, was sewentig.

<sup>28</sup> En hy het Juda voor hom uit gestuur na

## Génesis 47

Josef, dat dié voor hom uit die pad moes wys na Gosen; en hulle het in die land Gosen aangekom.

<sup>29</sup> Toe span Josef sy wa in, en hy trek op, sy vader Israel tegemoet na Gosen. En toe hy homself aan hom vertoon, het hy om sy hals geval en lank aan sy hals geweene.

<sup>30</sup> En Israel sê vir Josef: Nou kan ek sterwe nadat ek jou aangesig gesien het, dat jy nog leef!

<sup>31</sup> Daarna het Josef met sy broers en die huis van sy vader gespreek: Ek sal optrek en aan Farao vertel en aan hom sê: My broers en die huis van my vader wat in die land Kanaän was, het na my gekom.

<sup>32</sup> En die manne is herders van kleinvee—want hulle was veeboere—en hulle het hul kleinvee en hul beeste en alles wat hulle besit, saamgebring.

<sup>33</sup> En as Farao julle laat roep en sê: Wat is julle nering?

<sup>34</sup> dan moet julle antwoord: U dienaars was veeboere van ons jeug af tot nou toe, ons sowel as ons vaders—sodat julle in die land Gosen kan woon. Want elke herder van kleinvee is vir die Egiptenaars 'n gruwel.

**47** DAAROP het Josef gekom en aan Farao vertel en gesê: My vader en my broers en hulle kleinvee en beeste en alles wat hulle besit, het gekom uit die land Kanaän, en daar is hulle nou in die land Gosen.

<sup>2</sup> En hy het uit die getal van sy broers vyf man saamgeneem en hulle aan Farao voorgestel.

<sup>3</sup> Toe sê Farao aan sy broers: Wat is julle

nering? En hulle antwoord Farao: U dienaars is herders van kleinvee, ons sowel as ons vaders.

<sup>4</sup> Verder sê hulle vir Farao: Ons het gekom om as vreemdelinge in die land te vertoef, want daar is geen weiding vir die kleinvee van u dienaars nie, omdat die hongersnood in die land Kanaän swaar is. Laat u dienaars dan nou tog in die land Gosen woon.

<sup>5</sup> Daarop het Farao met Josef gespreek en gesê: Jou vader en jou broers het na jou gekom.

<sup>6</sup> Egipteland lê voor jou oop; laat jou vader en jou broers in die beste deel van die land woon; hulle kan in die land Gosen woon.

En as jy weet dat daar onder hulle bekwame manne is, stel hulle dan aan as veeopsigters oor my eiendom.

<sup>7</sup> Toe bring Josef sy vader Jakob in en stel hom aan Farao voor. En Jakob het Farao gegroet met 'n seënwen.

<sup>8</sup> Daarop sê Farao vir Jakob: Hoeveel is die dae van jou lewensjare?

<sup>9</sup> En Jakob het Farao geantwoord: Die dae van die jare van my vreemdelingskap is honderd-en-dertig jaar. Min in getal en vol teëspoed was die dae van my lewensjare, en hulle het nie gehaal by die dae van die lewensjare van my vaders gedurende die dae van hulle vreemdelingskap nie.

<sup>10</sup> Toe het Jakob Farao gegroet met 'n seënwen en van Farao af weggegaan.

<sup>11</sup> En Josef het vir Jakob en sy broers woonplekke aangewys en aan hulle besitting in Egipteland gegee, in die beste deel van die land, in die landstreek

## Génesis 47

Raämses, soos Farao beveel het.

<sup>12</sup> En Josef het sy vader en sy broers en die hele huis van sy vader met brood onderhou ooreenkomstig die getal van die kinders.

<sup>13</sup> En daar was in die hele land geen brood nie, want die hongersnood was baie swaar, sodat Egipteland en die land Kanaän uitgeput was weens die hongersnood.

<sup>14</sup> En Josef het al die geld versamel wat in Egipteland en in die land Kanaän te vinde was, vir die koring wat hulle gekoop het, en Josef het die geld in die paleis van Farao gebring.

<sup>15</sup> En toe die geld in Egipteland en in die land Kanaän op was, het al die Egiptenaars na Josef gekom en gesê: Gee vir ons brood! En: Waarom moet ons voor u oë sterwe, want die geld is gedaan?

<sup>16</sup> En Josef antwoord: Gee julle vee, dan sal ek dit aan julle gee vir julle vee as die geld gedaan is.

<sup>17</sup> Toe bring hulle hul vee na Josef, en Josef het aan hulle brood gegee vir die perde en die besitting aan kleinvee en beeste en vir die esels; en hy het hulle dié jaar versorg met brood vir die waarde van al hulle besittings aan vee.

<sup>18</sup> Toe dié jaar om was, het hulle na hom gekom in die tweede jaar en vir hom gesê: Ons kan dit vir my heer nie wegsteek nie, maar die geld is op en die besitting aan vee is my heer s'n. Daar het niks vir my heer oorgebly nie as net ons lyf en ons grond.

<sup>19</sup> Waarom moet ons voor u oë te gronde gaan, ons sowel as ons landerye? Koop ons en ons grond vir brood, dan sal ons met ons grond aan Farao diensbaar wees; en gee

saadkoring, dat ons kan lewe en nie sterwe nie, en dat die grond nie woens word nie.

<sup>20</sup> So het Josef dan al die grond van Egipte vir Farao opgekoop, want die Egiptenaars het elkeen sy stuk grond verkoop, omdat die hongersnood vir hulle te swaar was. So het die land dan Farao se eiendom geword.

<sup>21</sup> En wat die volk betref—hy het hulle laat verhuis na die stede, van die een end van die Egiptiese gebied na die ander end daarvan.

<sup>22</sup> Net die grond van die priesters het hy nie gekoop nie; want die priesters het 'n vaste inkomste van Farao ontvang en van hulle vaste inkomste geëet wat Farao hulle toegestaan het. Daarom het hulle hul grond nie verkoop nie.

<sup>23</sup> Toe sê Josef aan die volk: Kyk, ek het vandag julle en jul grond vir Farao gekoop: daar is saadkoring vir julle, dat julle die grond kan besaai.

<sup>24</sup> En by die insameling moet julle 'n vyfde deel aan Farao afgee, en die ander vier dele sal julle eiendom wees, as saad vir die land en as voedsel vir julleself en die wat in julle huise is, en as voeding vir julle kinders.

<sup>25</sup> En hulle antwoord: U het ons lewe gered. Laat ons guns mag vind in die oë van my heer, dan sal ons die dienaars van Farao wees.

<sup>26</sup> En Josef het dit 'n wet gemaak tot vandag toe vir die saaigrond van Egipte—die vyfde deel behoort aan Farao. Net die grond van die priesters alleen het nie die eiendom van Farao geword nie.

<sup>27</sup> So het Israel dan in Egipteland gewoon, in die land Gosen; en hulle het vaste

## Génesis 48

besittings daarin verwerf en vrugbaar geword en sterk vermeerder.

<sup>28</sup> En Jakob het sewentien jaar in Egipteland gelewe, sodat die dae van Jakob, die jare van sy lewe, honderd-sewen-en-veertig jaar was.

<sup>29</sup> En toe die dae van Israel nader kom dat hy moes sterwe, het hy sy seun Josef laat roep en vir hom gesê: As ek nou guns in jou oë gevind het, sit dan tog jou hand onder my heup en bewys my liefde en trou—begrawe my tog nie in Egipte nie.

<sup>30</sup> Wanneer ek met my vaders ontslaap het, bring my dan weg uit Egipte en begrawe my in hulle graf. En hy antwoord: Ek sal handel ooreenkomstig u woord.

<sup>31</sup> Toe sê hy: Sweer my dit tog. En hy het vir hom gesweer. Toe het Israel in aanbidding gebuig oor die koppenent van die bed.

**48** NÁ hierdie dinge het hulle aan Josef meegedeel: Kyk, u vader is siek. Toe neem hy sy twee seuns, Manasse en Efraim, met hom saam.

<sup>2</sup> En hulle het aan Jakob berig gebring en gesê: Kyk, u seun Josef kom na u toe. Daarop het Jakob sy krag versamel en op die bed gaan sit.

<sup>3</sup> En Jakob het vir Josef gesê: God, die Almagtige, het aan my verskyn by Lus, in die land Kanaän, en my geseën

<sup>4</sup> en vir my gesê: Kyk, Ek sal jou vrugbaar maak en jou vermeerder en jou tot 'n menigte van volke maak, en Ek sal aan jou nageslag ná jou hierdie land as ewige besitting gee.

<sup>5</sup> Nou dan, jou twee seuns wat vir jou in

Egipteland gebore is voordat ek in Egipte na jou gekom het, is myne. Efraim en Manasse sal myne wees net soos Ruben en Simeon.

<sup>6</sup> Maar jou nakomelinge wat jy ná hulle verwek het, sal jou wees. Hulle sal na die naam van hulle broers genoem word in dié se erfdeel.

<sup>7</sup> En toe ek van Paddan gekom het, het Ragel by my gesterwe in die land Kanaän, op die reis toe daar nog 'n kort ent pad was om by Efrat te kom; en ek het haar daar begrawe langs die pad na Efrat, dit is Betlehem.

<sup>8</sup> Toe Israel die seuns van Josef sien, sê hy: Wie is dit?

<sup>9</sup> En Josef antwoord sy vader: Dit is my seuns wat God my hier gegee het. En hy sê: Bring hulle tog by my, dat ek hulle kan seën.

<sup>10</sup> Maar Israel se oë was swaar van ouderdom, hy kon nie sien nie. En toe hy hulle by hom bring, het hy hulle gesoen en hulle omhels.

<sup>11</sup> En Israel sê vir Josef: Ek het geen gedagte gehad om jou aangesig te sien nie, en kyk, God het my ook jou nageslag laat sien.

<sup>12</sup> Daarop laat Josef hulle van sy knieë af weggaan, en hy buig hom met sy aangesig na die aarde toe.

<sup>13</sup> En Josef neem hulle twee, Efraim met sy regterhand, links van Israel, en Manasse met sy linkerhand, regs van Israel, en hy bring hulle by hom.

<sup>14</sup> Toe steek Israel sy regterhand uit en lê dit op die hoof van Efraim, hoewel hy die



## Génesis 49

jongste was, en sy linkerhand op die hoof van Manasse: hy het sy hande oorkruis gehou, want Manasse was die eersgeborene.

<sup>15</sup> En hy het Josef geseën en gesê: Die God voor wie se aangesig my vaders Abraham en Isak gewandel het, die God wat my as Herder my lewe lank gelei het tot vandag toe,

<sup>16</sup> die Engel wat my uit elke teëspoed verlos het—mag Hy die seuns seën, en mag deur hulle my naam genoem word en die naam van my vaders Abraham en Isak, en mag hulle vermeerder in die land in menigte.

<sup>17</sup> Toe Josef sien dat sy vader sy regterhand op die hoof van Efraim gelê het, was dit verkeerd in sy oë; en hy het die hand van sy vader gegryp om dit van die hoof van Efraim op die hoof van Manasse oor te bring.

<sup>18</sup> En Josef sê aan sy vader: Nie so nie, my vader; want hierdie een is die eersgeborene: lê u regterhand op sy hoof.

<sup>19</sup> Maar sy vader weier en sê: Ek weet, my seun, ek weet. Hy sal ook 'n volk word, en hy sal ook groot word; nogtans sal sy jongste broer groter wees as hy, en sý nageslag sal 'n menigte van nasies word.

<sup>20</sup> So het hy hulle dan dié dag geseën en gesê: Met jou sal Israel 'n seën toewens, met die woorde: Mag God jou maak soos Efraim en soos Manasse! So het hy dan Efraim voor Manasse gestel.

<sup>21</sup> Daarop sê Israel vir Josef: Kyk, ek gaan sterwe, maar God sal met julle wees, en Hy sal julle terug laat gaan na die land van

julle vaders.

<sup>22</sup> En ek gee jou een stuk land bo jou broers, wat ek met my swaard en my boog van die Amoriete afgeneem het.

**49** DAARNA het Jakob sy seuns geroep en gesê: Kom bymekaar, dat ek julle kan verkondig wat julle aan die einde van die dae sal wedervaar.

<sup>2</sup> Versamel en hoor, seuns van Jakob, en luister na Israel, julle vader!

<sup>3</sup> Ruben, jy is my eersgeborene, my krag en die eersteling van my sterkte; die vernaamste in hoogheid en die vernaamste in mag!

<sup>4</sup> Opbruising soos van waters—jy sal die vernaamste nie wees nie, want jy het die bed van jou vader beklim; toe het jy dit ontheilig. Hy het my bed beklim.

<sup>5</sup> Simeon en Levi is broers. Hulle wapens is werktuie van geweld.

<sup>6</sup> Laat my siel nie kom in hulle raad nie, laat my eer nie eens wees met hulle vergadering nie. Want in hul toorn het hulle manne doodgeslaan, en in hulle moedswilligheid het hulle beeste vermink.

<sup>7</sup> Vervloek is hulle toorn, want dit is heftig; en hulle grimmigheid, want dit is hard. Ek sal hulle verdeel in Jakob en hulle verstrooi in Israel.

<sup>8</sup> Juda, jy is dit! Jou sal jou broers loof. Jou hand sal op die nek van jou vyande wees; voor jou sal die seuns van jou vader hulle neerbuig.

<sup>9</sup> Juda is 'n jong leeu; van die roof af het jy opgeklim, my seun. Hy buig hom, hy gaan lê soos 'n leeu en soos 'n leeuin; wie sal hom opjaag?

## Génesis 49

<sup>10</sup> Die septer sal van Juda nie wyk nie, nòg die veldheerstaf tussen sy voete uit totdat Silo kom; en aan Hom sal die volke gehoorsaam wees.

<sup>11</sup> Hy maak sy jong esel vas aan die wingerdstok en die vul van sy eselin aan die edelste wynstok; hy was sy kleed in wyn en sy gewaad in druiwebloed.

<sup>12</sup> Hy is donkerder van oë as wyn en witter van tande as melk.

<sup>13</sup> Sébulon sal woon by die strand van die see; en hy sal by die strand van die skepe wees, met die sykant na Sidon toe.

<sup>14</sup> Íssaskar is 'n sterkgebeende esel wat tussen die veekrale lê.

<sup>15</sup> Toe hy sien dat die rus goed en die land lieflik is, het hy sy skouer gebuig om te dra, en hy moes dwangarbeid verrig.

<sup>16</sup> Dan sal aan sý volk reg verskaf net soos enigeen van die stamme van Israel.

<sup>17</sup> Laat Dan 'n slang wees op die weg, 'n horingslang op die pad, wat die perd aan die hakskene byt, sodat sy ruiter agteroorval.

<sup>18</sup> Op u verlossing wag ek, HERE!

<sup>19</sup> Gad—'n bende sal hom aanval, maar hý sal hulle aan die hakskeen gryp.

<sup>20</sup> Aser, sy spys is vet, en hý lewer koninklike lekkernye.

<sup>21</sup> Náftali is soos 'n wildsbok so vry, hy wat mooi woorde laat hoor.

<sup>22</sup> Josef is 'n jong vrugteboom, 'n jong vrugteboom by 'n fontein; sy takke klim oor die muur.

<sup>23</sup> Die boogskutters het hom wel geprikkel en hom beskiet en hom bestry,

<sup>24</sup> maar sy boog het sterk gebly, en die

arms van sy hande was buigsaam, deur die hande van die Magtige van

Jakob—daarvandaan waar die Herder, die Steen van Israel, is,

<sup>25</sup> van die God van jou vader, wat jou help, en met die hulp van die Almagtige wat jou seën met seëninge van die hemel daarbo, met seëninge van die watervloed wat daaronder lê, met seëninge van borste en moederskoot.

<sup>26</sup> Die seëninge wat jou vader ontvang het, oortref die seëninge van die ewige berge, die kostelike gawes van die ewige heuwels. Dit sal wees op die hoof van Josef en op die hoofskedel van die uitverkorene onder sy broers.

<sup>27</sup> Benjamin is 'n wolf wat verskeur; in die môre eet hy sy prooi, en in die aand deel hy buit uit.

<sup>28</sup> Hülle almal is die twaalf stamme van Israel; en dit is wat hulle vader aan hulle gesê het, en hy het hulle geseën; hy het hulle geseën, elkeen volgens sy besondere seën.

<sup>29</sup> Daarna het hy hulle bevel gegee en aan hulle gesê: Ek word versamel by my volk. Begrawe my by my vaders in die spelonk wat op die stuk grond van Efron, die Hetiet, is;

<sup>30</sup> in die spelonk wat op die stuk grond van Magpéla is, wat oos van Mamre lê, in die land Kanaän; die stuk grond wat Abraham van Efron, die Hetiet, as eiendomsgraf gekoop het.

<sup>31</sup> Daar het hulle Abraham begrawe en Sara, sy vrou; daar het hulle Isak begrawe en Rebekka, sy vrou; en daar het ek Lea

## Génesis 49

begrawe—

<sup>32</sup> die stuk grond en die spelonk wat daarin is, wat gekoop is van die seuns van Het.

<sup>33</sup> Toe Jakob klaar sy bevele aan sy seuns gegee het, trek hy sy voete terug op die bed en blaas die asem uit; en hy is by sy volksgenote versamel.

**50** TOE val Josef op sy vader se aangesig, en hy het oor hom geweene en hom gesoen.

<sup>2</sup> En Josef het aan sy dienaars, die geneeshere, bevel gegee om sy vader te balsem. En die geneeshere het Israel gebalsem.

<sup>3</sup> En veertig dae het daarvoor verbygegaan; want so lank duur die dae van balseming. En die Egiptenaars het hom sewentig dae lank beweene.

<sup>4</sup> En toe die dae van geweene oor hom verby was, het Josef met die huis van Farao gespreek en gesê: As ek dan guns in julle oë gevind het, spreek tog dit voor die ore van Farao:

<sup>5</sup> My vader het my laat sweer en gesê: Kyk, ek gaan sterwe; in my graf wat ek vir my in die land Kanaän uitgekap het, daar moet jy my begrawe. Laat my dan nou tog optrek en my vader begrawe. Daarna sal ek terugkom.

<sup>6</sup> En Farao sê: Trek op en begrawe jou vader soos hy jou laat sweer het.

<sup>7</sup> Toe het Josef opgetrek om sy vader te begrawe, en al die dienaars van Farao, die oudstes van sy huis, het saam met hom opgetrek, en al die oudstes van Egipteland;

<sup>8</sup> ook die hele huis van Josef en sy broers en die huis van sy vader. Net hulle kinders

en hulle kleinvee en hulle beeste het hulle in die land Gosen laat agterbly.

<sup>9</sup> En saam met hom het opgetrek strydwaens sowel as ruiters, sodat dit 'n baie groot trek was.

<sup>10</sup> En toe hulle by die Steekdoring-dorsvloer kom, wat oos van die Jordaan lê, het hulle daar 'n groot en baie swaar rouklag gehou. En hy het oor sy vader rou laat bedrywe sewe dae lank.

<sup>11</sup> Toe die inwoners van die land, die Kanaäniete, die roubedryf by die Steekdoring-dorsvloer sien, sê hulle: Dit is 'n swaar rou vir die Egiptenaars. Daarom het hulle dit Abel-Misraim genoem, wat oos van die Jordaan lê.

<sup>12</sup> En sy seuns het met hom gedoen net soos hy hulle beveel het:

<sup>13</sup> sy seuns het hom weggebring na die land Kanaän en hom begrawe in die spelonk van die stuk grond van Magpéla, die stuk grond wat Abraham as eiendomsgraf gekoop het van Efron, die Hetiet, oos van Mamre.

<sup>14</sup> Daarna het Josef na Egipte teruggegaan, hy en sy broers en almal wat saam met hom opgetrek het om sy vader te begrawe, nadat hy sy vader begrawe het.

<sup>15</sup> Toe die broers van Josef sien dat hulle vader dood was, het hulle gesê: Sê nou Josef gaan ons as vyande behandel en hy gaan ons werklik vergelde al die kwaad wat ons hom aangedoen het!

<sup>16</sup> Daarom het hulle hierdie boodskap na Josef gestuur: U vader het voor sy dood bevel gegee met hierdie woorde:

<sup>17</sup> So moet julle vir Josef sê: Ag, vergewe

---

tog die oortreding van jou broers en hulle sonde, want hulle het jou kwaad aangedoen. Maar nou, vergewe tog die oortreding van ons wat die God van u vader dien. En Josef het geween toe hulle met hom spreek.

<sup>18</sup> En sy broers het ook self gegaan en voor hom neergeval en gesê: Kyk, ons is u slawe.

<sup>19</sup> Maar Josef het hulle geantwoord: Moenie bevrees wees nie; want is ek in die plek van God?

<sup>20</sup> Want julle het wel kwaad teen my bedink, maar God het dit ten goede gedink om te doen soos dit vandag is, om 'n groot volk in die lewe te hou.

<sup>21</sup> Wees dan nou nie bevrees nie: ék sal julle en julle kinders onderhou. So het hy hulle dan getroos en na hulle hart gespreek.

<sup>22</sup> En Josef het in Egipte gewoon, hy en die

huis van sy vader. En Josef het honderd-en-tien jaar gelewe.

<sup>23</sup> En Josef het van Efraim kinders gesien van die derde geslag. Ook die kinders van Magir, die seun van Manasse, is op Josef se knieë gebore.

<sup>24</sup> En Josef het aan sy broers gesê: Ek gaan sterwe, maar God sal gewis op julle ag gee en julle uit hierdie land laat optrek na die land wat Hy aan Abraham, Isak en Jakob met 'n eed beloof het.

<sup>25</sup> En Josef het die seuns van Israel laat sweer en gesê: As God sekerlik op julle ag sal gee—bring dan my gebeente hiervandaan op.

<sup>26</sup> En Josef het gesterwe, honderd-en-tien jaar oud. En hulle het hom gebalsem, en hy is in 'n kis gesit in Egipte.

# Exodus

**1** EN dit is die name van die seuns van Israel wat in Egipte gekom het; saam met Jakob het hulle gekom, elkeen met sy huisgesin:

<sup>2</sup> Ruben, Símeon, Levi en Juda;

<sup>3</sup> Íssaskar, Sébulon en Benjamin;

<sup>4</sup> Dan en Náftali, Gad en Aser.

<sup>5</sup> En al die siele wat uit Jakob se lende voortgekom het, was sewentig siele. Maar Josef was in Egipte.

<sup>6</sup> En Josef het gesterwe, en al sy broers en daardie hele geslag.

<sup>7</sup> Maar die kinders van Israel was vrugbaar en het baie geword, en hulle het vermeerder en buitengewoon magtig geword, sodat die land vol was van hulle.

<sup>8</sup> Toe staan daar 'n nuwe koning oor Egipte op wat niks van Josef geweet het nie.

<sup>9</sup> Dié het aan sy volk gesê: Kyk, die volk van die kinders van Israel is meer en magtiger as ons.

<sup>10</sup> Kom, laat ons 'n slim plan teen hulle beraam, sodat hulle nie kan vermeerder nie, en as ons in oorlog geraak, hulle ook nie by ons vyande aansluit en teen ons veg en uit die land optrek nie.

<sup>11</sup> Daar is toe opsigters van dwangarbeid oor hulle aangestel om hulle met harde arbeid te verdruk. En hulle het vir Farao die voorraadstede Pitom en Raämses gebou.

<sup>12</sup> Maar hoe meer hulle verdruk is, hoe meer het hulle vermenigvuldig en hulle uitgebrei, sodat hulle bang geword het vir

die kinders van Israel.

<sup>13</sup> Daarom het die Egiptenaars die kinders van Israel met hardheid laat dien

<sup>14</sup> en hulle lewe verbitter deur swaar werk met klei en bakstene en deur allerhande werk in die landerye—al dié werk wat hulle met hardheid deur hulle laat verrig het.

<sup>15</sup> En die koning van Egipte het met die Hebreeuse vroedvroue—die een se naam was Sifra en die ander se naam

Pua—gespreek

<sup>16</sup> en gesê: As julle die Hebreeuse vroue by 'n geboorte help, moet julle na die geboortestoel kyk: as dit 'n seun is, maak hom dood; maar is dit 'n dogter, laat haar lewe.

<sup>17</sup> Maar die vroedvroue het God gevrees en nie gedoen soos die koning van Egipte aan hulle gesê het nie, maar die seuntjies laat lewe.

<sup>18</sup> Toe laat die koning van Egipte die vroedvroue roep, en hy sê vir hulle: Waarom het julle dit gedoen en die seuntjies laat lewe?

<sup>19</sup> En die vroedvroue sê vir Farao: Die Hebreeuse vroue is nie soos die Egiptiese nie, want hulle is sterk—voordat die vroedvrou by hulle kom, het hulle al gebaar.

<sup>20</sup> Maar God het aan die vroedvroue weldadigheid bewys. En die volk het vermenigvuldig en baie magtig geword.

<sup>21</sup> En omdat die vroedvroue God gevrees het, het Hy huisgesinne aan hulle geskenk.

## Exodus 2

---

<sup>22</sup> Toe gee Farao aan sy hele volk bevel en sê: Al die seuns wat gebore word, moet julle in die Nyl werp, maar al die dogters kan julle laat lewe.

**2** EN 'n man uit die huis van Levi het gegaan en 'n dogter van Levi geneem.

<sup>2</sup> En die vrou het swanger geword en 'n seun gebaar. En toe sy sien dat hy mooi was, het sy hom drie maande lank weggesteek.

<sup>3</sup> Maar toe sy hom nie langer verborge kon hou nie, het sy vir hom 'n mandjie van biesies geneem en dit met lymgrond en pik bestryk; en sy het die seuntjie daarin neergelê en dit in die riete aan die kant van die Nyl gesit.

<sup>4</sup> En sy suster het op 'n afstand gaan staan om te wete te kom wat met hom sou gebeur.

<sup>5</sup> En Farao se dogter het na die Nyl afgegaan om 'n bad te neem, terwyl haar diensmeisies aan die kant van die Nyl heen en weer geloop het. Toe sien sy die mandjie tussen die riete en stuur haar slavin en laat dit haal.

<sup>6</sup> Nadat sy dit oopgemaak het, sien sy die kind, en kyk, dit was 'n seuntjie wat huil! En sy het hom jammer gekry en gesê: Dit is een van die kinders van die Hebreërs.

<sup>7</sup> Toe sê sy suster aan die dogter van Farao: Sal ek vir u 'n pleegmoeder uit die Hebreëuse vroue gaan roep, dat sy vir u die seuntjie kan soog?

<sup>8</sup> En Farao se dogter antwoord haar: Ja. En die jongmeisie het geloop en die seuntjie se moeder geroep.

<sup>9</sup> Daarop sê Farao se dogter vir haar: Neem

hierdie seuntjie en soog hom vir my, en ek sal jou loon gee. En die vrou het die seuntjie geneem en hom gesoog.

<sup>10</sup> En toe die seuntjie groot geword het, bring sy hom na Farao se dogter; en hy het haar seun geword. En sy het hom Moses genoem en gesê: Ek het hom mos uit die water getrek.

<sup>11</sup> En in dié dae toe Moses al groot was, het hy na sy broers uitgegaan en hulle harde arbeid aangesien. En hy het gesien hoe 'n Egiptiese man 'n Hebreëuse man, een uit sy broers, slaan.

<sup>12</sup> En hy het hierheen en daarheen gekyk, en toe hy sien dat daar niemand was nie, het hy die Egiptenaar doodgeslaan en hom in die sand begrawe.

<sup>13</sup> Die volgende dag het hy weer uitgegaan, en daar was twee Hebreëuse manne wat met mekaar veg. Hy vra toe vir die een wat ongelyk gehad het: Waarom slaan jy jou naaste?

<sup>14</sup> En hy antwoord: Wie het jou as owerste en regter oor ons aangestel? Dink jy om my dood te slaan soos jy die Egiptenaar omgebring het? En Moses het gevrees en gesê: Waarlik, die saak het bekend geword!

<sup>15</sup> En toe Farao van dié saak hoor, het hy probeer om Moses dood te maak. Maar Moses het van Farao af weggevlug en in die land Mídián gaan woon. En hy het by 'n put gesit.

<sup>16</sup> En die priester van Mídián het sewe dogters gehad: dié het gekom om te put en die drinkbakke vol te maak om hulle vader se kleinvee te laat drink.

<sup>17</sup> Maar die veewagters het gekom en hulle

## Exodus 3

---

weggedrywe. Toe staan Moses op en help hulle en laat hulle vee drink.

<sup>18</sup> En toe hulle by hul vader Réhuel kom, sê hy: Waarom kom julle vandag so gou?

<sup>19</sup> En hulle antwoord: 'n Egiptiese man het ons uit die hand van die veewagters verlos; en hy het ook volop vir ons geput en die vee laat drink.

<sup>20</sup> Daarop sê hy vir sy dogters: En waar is hy? Waarom het julle die man dan daar laat staan? Roep hom, dat hy brood kan eet.

<sup>21</sup> En Moses het ingewillig om by die man te bly, en hy het aan Moses sy dogter Sippóra gegee.

<sup>22</sup> En toe sy 'n seun baar, het hy hom Gersom genoem. Want hy het gesê: Ek het 'n vreemdeling in 'n vreemde land geword.

<sup>23</sup> En in daardie lang tyd het die koning van Egipte gesterwe. En die kinders van Israel het gesug en geweeklaag vanweë die slawerny. En hulle geroep om hulp oor hulle slawerny het opgeklim tot God.

<sup>24</sup> En God het hulle gekerm gehoor, en God het gedink aan sy verbond met Abraham, met Isak en met Jakob.

<sup>25</sup> En God het die kinders van Israel aangesien, en God het hulle geken.

**3** EN Moses het die kleinvee opgepas van sy skoonvader Jetro, die priester van Mídián. En toe hy die kleinvee agter die woestyn gedryf het, kom hy by die berg van God, by Horeb.

<sup>2</sup> Daarop verskyn die Engel van die HERE aan hom in 'n vuurvlam uit 'n doringbos. En toe hy weer sien, brand die doringbos in die vuur, maar die doringbos word nie verteer nie!

<sup>3</sup> En Moses sê: Laat ek tog nader gaan en hierdie groot verskynsel bekyk, waarom die doringbos nie verbrand nie.

<sup>4</sup> Toe die HERE sien dat hy nuuskierig nader kom, roep God na hom uit die doringbos en sê: Moses, Moses! En hy antwoord: Hier is ek.

<sup>5</sup> En Hy sê: Moenie nader kom nie. Trek jou skoene van jou voete af, want die plek waar jy op staan, is heilige grond.

<sup>6</sup> Verder sê Hy: Ek is die God van jou vader, die God van Abraham, die God van Isak en die God van Jakob. Toe het Moses sy aangesig verberg, want hy was bevrees om God aan te sien.

<sup>7</sup> En die HERE sê: Ek het duidelik gesien die ellende van my volk wat in Egipte is; en Ek het hulle jammerklagte oor hulle drywers gehoor, ja, Ek ken hulle smarte.

<sup>8</sup> Daarom het Ek neergedaal om hulle uit die hand van die Egiptenaars te verlos en hulle te laat optrek uit daardie land na 'n goeie en wye land, na 'n land wat oorloop van melk en heuning, na die woonplek van die Kanaäniete en Hetiete en Amoriete en Feresiete en Hewiete en Jebusiete.

<sup>9</sup> En nou, kyk, die jammerklagte van die kinders van Israel het tot by My gekom. Ook het Ek die verdrukking gesien waarmee die Egiptenaars hulle verdruk.

<sup>10</sup> Gaan dan nou heen, dat Ek jou na Farao kan stuur; en lei my volk, die kinders van Israel, uit Egipte uit.

<sup>11</sup> Maar Moses het tot God gespreek: Wie is ek, dat ek na Farao sou gaan en dat ek die kinders van Israel uit Egipte sou lei?

<sup>12</sup> En Hy antwoord: Ek sal met jou wees,

## Exodus 4

en dit sal vir jou 'n teken wees dat Ek jou gestuur het: As jy die volk uit Egipte gelei het, sal julle op hierdie berg God dien.

<sup>13</sup> Hierop het Moses tot God gespreek: Maar as ek by die kinders van Israel kom en aan hulle sê: Die God van julle vaders het my na julle gestuur, en hulle my vra: Hoe is sy naam?—wat moet ek hulle antwoord?

<sup>14</sup> En God sê vir Moses: EK IS WAT EK IS. Ook sê Hy: So moet jy die kinders van Israel antwoord: EK IS het my na julle gestuur.

<sup>15</sup> Toe sê God verder vir Moses: Dit moet jy aan die kinders van Israel meedeel: Die HERE, die God van julle vaders, die God van Abraham, die God van Isak en die God van Jakob, het my na julle gestuur. Dit is my Naam vir ewig, en dit is my gedenknaam van geslag tot geslag.

<sup>16</sup> Gaan heen en versamel die oudstes van Israel en sê vir hulle: Die HERE, die God van julle vaders, het aan my verskyn, die God van Abraham, Isak en Jakob, en het gesê: Ek het terdeë ag gegee op julle en op wat julle in Egipte aangedoen is.

<sup>17</sup> Daarom het Ek besluit: Ek wil julle uit die ellende van Egipte laat optrek na die land van die Kanaäniete en Hetiete en Amoriete en Feresiete en Hewiete en Jebusiete, na 'n land wat oorloop van melk en heuning.

<sup>18</sup> En hulle sal na jou luister. Dan moet jy met die oudstes van Israel na die koning van Egipte gaan, en julle moet vir hom sê: Die HERE, die God van die Hebreërs, het ons ontmoet; laat ons dan nou tog drie

dagreise ver die woestyn intrek en aan die HERE, onse God, offer.

<sup>19</sup> Maar Ek weet dat die koning van Egipte julle nie sal laat gaan nie, ook nie deur 'n sterke hand nie.

<sup>20</sup> En Ek sal my hand uitstrek en Egipte met al my wonders teister wat Ek daarin sal doen; en daarna sal hy julle laat trek.

<sup>21</sup> En Ek sal aan hierdie volk guns verleen in die oë van die Egiptenaars; en as julle dan trek, moet julle nie met leë hande trek nie,

<sup>22</sup> maar elke vrou moet van haar buurvrou en van haar wat in haar huis vertoef, silwer- en goue voorwerpe en klere eis. En julle moet dit op julle seuns en dogters sit, en so Egipte berowe.

**4** TOE antwoord Moses en sê: Maar as hulle my nie glo en na my stem nie luister nie, maar sê: Die HERE het nie aan jou verskyn nie?

<sup>2</sup> Daarop vra die HERE vir hom: Wat is daar in jou hand? En hy antwoord: 'n Staf.

<sup>3</sup> En Hy sê: Gooi dit op die grond. Toe gooi hy dit op die grond, en dit het 'n slang geword; en Moses het daarvoor gevlug.

<sup>4</sup> Toe sê die HERE vir Moses: Steek jou hand uit en gryp dit aan die stert. Hierop het hy sy hand uitgesteek en dit gegryp, en dit het 'n staf in sy hand geword—

<sup>5</sup> sodat hulle kan glo dat die HERE, die God van hulle vaders, die God van Abraham, die God van Isak en die God van Jakob, aan jou verskyn het.

<sup>6</sup> En die HERE het verder vir hom gesê: Steek tog jou hand in jou boesem. En hy het sy hand in sy boesem gestee; en toe hy dit



## Exodus 4

---

uittrek, was sy hand melaats, soos sneeu!

<sup>7</sup> En Hy sê: Steek jou hand weer in jou boesem. En hy het sy hand weer in sy boesem gesteek; en toe hy dit uit sy boesem uittrek, was dit weer soos sy ander vlees!

<sup>8</sup> En as hulle jou nie glo en aan die eerste teken geen gehoor gee nie, dan sal hulle die laaste teken glo.

<sup>9</sup> En as hulle ook hierdie twee tekens nie glo en na jou stem nie luister nie, neem dan van die Nyl se water en giet dit op die droë grond uit; dan sal die water wat jy uit die Nyl neem, op die droë grond bloed word.

<sup>10</sup> Toe sê Moses aan die HERE: Ag, Here, ek is nie 'n man van woorde nie—van gister of van eergister of vandat U met u kneg gespreek het nie; want ek is swaar van mond en swaar van tong.

<sup>11</sup> En die HERE antwoord hom: Wie het vir die mens die mond gemaak, of wie maak stom of doof, of siende of blind? Is dit nie Ek, die HERE, nie?

<sup>12</sup> Gaan dan nou heen, en Ek sal met jou mond wees en jou leer wat jy moet sê.

<sup>13</sup> Maar hy sê: Ag, Here, stuur tog deur wie U wil stuur.

<sup>14</sup> Toe ontvlam die toorn van die HERE teen Moses, en Hy sê: Is jou broer Aäron, die Leviet, nie daar nie? Ek weet dat hy goed kan praat. En hy gaan ook al uit om jou te ontmoet, en as hy jou sien, sal hy bly wees in sy hart.

<sup>15</sup> Jy moet dan met hom spreek en die woorde in sy mond lê. En Ék sal met jou mond en sy mond wees en julle leer wat julle moet doen.

<sup>16</sup> En hy moet vir jou met die volk spreek,

en dan sal hy vir jou 'n mond wees en jy vir hom 'n god wees.

<sup>17</sup> Neem dan hierdie staf in jou hand waarmee jy die tekens moet doen.

<sup>18</sup> TOE gaan Moses weg en kom by sy skoonvader Jetro terug, en hy sê vir hom: Laat my tog trek en na my broers teruggaan wat in Egipte is, om te sien of hulle nog lewe. En Jetro sê vir Moses: Gaan in vrede.

<sup>19</sup> Ook het die HERE vir Moses in Mídian gesê: Gaan heen, keer terug na Egipte; want al die manne wat jou lewe gesoek het, is dood.

<sup>20</sup> Moses neem toe sy vrou en sy seuns en laat hulle op 'n esel ry, terug na Egipteland. Moses het ook die staf van God in sy hand geneem.

<sup>21</sup> En die HERE sê vir Moses: Nou dat jy wegtrek om na Egipte terug te gaan, kyk dat jy al die wonders voor Farao doen wat Ek in jou mag gestel het. Maar Ék sal sy hart verhard, sodat hy die volk nie sal laat trek nie.

<sup>22</sup> Dan moet jy vir Farao sê: So spreek die HERE: My eersgebore seun is Israel.

<sup>23</sup> Daarom beveel Ek jou: Laat my seun trek, dat hy My kan dien. Maar jy het geweier om hom te laat trek. Kyk, Ek sal jou eersgebore seun laat sterwe.

<sup>24</sup> En op die pad in die herberg het die HERE hom teëgekom en wou hom doodmaak.

<sup>25</sup> Toe neem Sippóra 'n skerp klip en sny die voorhuid van haar seun af en gooi dit voor sy voete en sê: Waarlik, jy is vir my 'n bloedbruidegom!

## Exodus 5

---

<sup>26</sup> En Hy het hom laat staan. Toe het sy gesê: Bloedbruidegom!—met die oog op die besnydenis.

<sup>27</sup> Die HERE het ook aan Aäron gesê: Loop Moses tegemoet in die woestyn. En hy het geloop en hom by die berg van God aangetref en hom gesoen.

<sup>28</sup> Daarop vertel Moses aan Aäron al die woorde van die HERE waarmee Hy hom gestuur het, en al die tekens wat Hy hom beveel het.

<sup>29</sup> En Moses en Aäron het vertrek en al die oudstes van die kinders van Israel bymekaar laat kom;

<sup>30</sup> en Aäron het al die woorde gespreek wat die HERE aan Moses gesê het, en die tekens gedoen voor die oë van die volk.

<sup>31</sup> En die volk het geglo. En toe hulle hoor dat die HERE op die kinders van Israel ag gegee en hulle ellende aangesien het, het hulle in aanbidding neergebuig.

**5** EN daarna gaan Moses en Aäron en sê vir Farao: So spreek die HERE, die God van Israel: Laat my volk trek, dat hulle vir My 'n fees kan hou in die woestyn.

<sup>2</sup> Maar Farao antwoord: Wie is die HERE na wie se stem ek moet luister om Israel te laat trek? Ek ken die HERE nie, en ek sal Israel ook nie laat trek nie.

<sup>3</sup> Toe sê hulle: Die God van die Hebreërs het ons ontmoet; laat ons tog drie dagreise ver die woestyn intrek en aan die HERE onse God offer, sodat Hy ons nie tref met die pes of die swaard nie.

<sup>4</sup> Maar die koning van Egipte antwoord hulle: Moses en Aäron, waarom hou julle die volk van hulle werk af? Loop na julle

werk toe.

<sup>5</sup> Verder het Farao gesê: Kyk, die volk van die land is alreeds baie; en julle wil hulle laat ophou met hulle werk?

<sup>6</sup> Daarom het Farao dieselfde dag aan die drywers onder die volk en die opsigters bevel gegee en gesê:

<sup>7</sup> Julle moet die volk geen strooi meer gee om bakstene te maak soos gister en eergister nie. Laat hulle self gaan en vir hulle strooi versamel.

<sup>8</sup> Maar die hoeveelheid bakstene wat hulle gister en eergister gemaak het, moet julle hulle oplê en niks daarvan verminder nie; want hulle is lui. Daarom roep hulle en sê: Laat ons gaan, laat ons offer aan onse God!

<sup>9</sup> Laat die werk swaar druk op die manne, dat hulle daarmee besig kan wees en nie op leuenagtige woorde let nie.

<sup>10</sup> Toe het die drywers van die volk en die opsigters uitgegaan en tot die volk gespreek en gesê: So spreek Farao: Ek gee julle geen strooi nie.

<sup>11</sup> Loop haal self vir julle strooi waar julle dit kan kry; maar van julle werk word niks verminder nie.

<sup>12</sup> Toe het die volk in die hele Egipteland rondgegaan om stoppels te versamel vir strooi.

<sup>13</sup> En die drywers het aangedryf en gesê: Voltooi julle werk volgens die eis van elke dag net soos toe daar strooi was.

<sup>14</sup> En die opsigters van die kinders van Israel wat Farao se drywers oor hulle aangestel het, het slae gekry, met die woorde: Waarom het julle gister en vandag nie soos tevore julle bepaalde werk, om

## Exodus 6

---

stene te maak, volbring nie?

<sup>15</sup> Daarom het die opsigters van die kinders van Israel gegaan, en hulle het gewee klaag by Farao en gesê: Waarom maak u so met u dienaars?

<sup>16</sup> Aan u dienaars word geen strooi gegee nie, en hulle sê vir ons: Maak bakstene! En kyk, u dienaars word geslaan, maar die skuld lê by u volk.

<sup>17</sup> Maar hy het geantwoord: Lui is julle, lui! Daarom sê julle: Laat ons gaan, laat ons aan die HERE offer.

<sup>18</sup> Nou dan, loop werk! Maar strooi sal julle nie gegee word nie. Ewenwel moet julle die hoeveelheid bakstene aflewer.

<sup>19</sup> Toe sien die opsigters van die kinders van Israel dat dit sleg met hulle staan, omdat daar gesê is: Julle mag jul bakstene, volgens die eis van elke dag, nie verminder nie.

<sup>20</sup> En hulle het Moses en Aäron teëgekom, wat daar gestaan het om hulle te ontmoet as hulle van Farao af weggaan,

<sup>21</sup> en het vir hulle gesê: Mag die HERE op julle let en oordeel, omdat julle ons gehaat gemaak het in die oë van Farao en in die oë van sy dienaars, sodat julle 'n swaard in hulle hand gegee het om ons om te bring.

<sup>22</sup> TOE gaan Moses weer na die HERE en sê: Here, waarom het U hierdie volk kwaad aangedoen? Waarom het U my tog gestuur?

<sup>23</sup> Want vandat ek na Farao gegaan het om in u Naam te spreek, het hy hierdie volk mishandel, en U het u volk glad nie verlos nie.

<sup>24</sup> Daarop het die HERE Moses

geantwoord: Nou sal jy sien wat Ek Farao sal aandoen. Want deur 'n sterke hand sal hy hulle laat trek, ja, deur 'n sterke hand gedwing, sal hy hulle uit sy land uitdrywe.

**6** VERDER het God met Moses gespreek en vir hom gesê: Ek is die HERE.

<sup>2</sup> En Ek het aan Abraham, aan Isak en aan Jakob verskyn as God, die Almagtige, maar met my Naam HERE het Ek My nie aan hulle bekend gemaak nie.

<sup>3</sup> Ook het Ek my verbond met hulle opgerig om hulle die land Kanaän te gee, die land van hulle vreemdelingskap waarin hulle vertoef het;

<sup>4</sup> en Ék het ook gehoor die gekerm van die kinders van Israel wat deur die Egiptenaars in slawerny gehou word, en Ek het aan my verbond gedink.

<sup>5</sup> Daarom, sê aan die kinders van Israel: Ek is die HERE, en Ek sal julle onder die harde arbeid van die Egiptenaars uitlei en julle red uit hulle slawerny, en Ek sal julle verlos deur 'n uitgestrekte arm en deur groot strafgerigte;

<sup>6</sup> en Ek sal julle as my volk aanneem en vir julle 'n God wees. En julle sal erken dat Ek die HERE julle God is wat julle uitlei onder die harde arbeid van die Egiptenaars uit.

<sup>7</sup> En Ek sal julle bring in die land waaromtrent Ek my hand opgehef het, om dit aan Abraham, aan Isak en aan Jakob te gee; en Ek sal dit aan julle as 'n besitting gee, Ek, die HERE.

<sup>8</sup> Moses het toe so met die kinders van Israel gespreek, maar hulle het nie na Moses geluister nie, uit ongeduldigheid en weens die harde diens.

## Exodus 7

<sup>9</sup> Verder het die HERE met Moses gespreek en gesê:

<sup>10</sup> Gaan spreek met Farao, die koning van Egipte, dat hy die kinders van Israel uit sy land moet laat uittrek.

<sup>11</sup> Maar Moses het voor die aangesig van die HERE gespreek en gesê: As die kinders van Israel na my nie geluister het nie, hoe sal Farao dan na my luister terwyl ek onbesnede van lippe is?

<sup>12</sup> Daarop het die HERE met Moses en Aäron gespreek en hulle met 'n boodskap gestuur na die kinders van Israel en na Farao, die koning van Egipte, om die kinders van Israel uit Egipteland uit te lei.

<sup>13</sup> DIT is die hoofde van hulle families. Die seuns van Ruben, die eersgeborene van Israel: Henog en Pallu, Hesron en Karmi; dit is die geslagte van Ruben.

<sup>14</sup> En die seuns van Símeon: Jémuel en Jamin en Ohad en Jagin en Sohar en Saul, die seun van die Kanaänitiese vrou; dit is die geslagte van Símeon.

<sup>15</sup> En dit is die name van die seuns van Levi volgens hulle afstamming: Gerson en Kehat en Merári. En die lewensjare van Levi was honderd-sewen-en-dertig jaar.

<sup>16</sup> Die seuns van Gerson: Libni en Símeï volgens hulle geslagte.

<sup>17</sup> En die seuns van Kehat: Amram en Jishar en Hebron en Ússiël; en die lewensjare van Kehat was honderd-drie-en-dertig jaar.

<sup>18</sup> En die seuns van Merári: Magli en Musi. Dit is die geslagte van Levi volgens hulle afstamming.

<sup>19</sup> En Amram het Jogébed, sy tante, vir

hom as vrou geneem, en sy het vir hom Aäron en Moses gebaar. En die lewensjare van Amram was honderd-sewen-en-dertig jaar.

<sup>20</sup> En die seuns van Jishar: Korag en Nefeg en Sigri.

<sup>21</sup> En die seuns van Ússiël: Mísael, Élsafan en Sitri.

<sup>22</sup> En Aäron het Eliséba, die dogter van Ammínadab, die suster van Nagson, vir hom as vrou geneem; en sy het vir hom gebaar: Nadab en Abíhu, Eleásar en Ítamar.

<sup>23</sup> En die seuns van Korag: Assir en Élkana en Abíasaf. Dit is die geslagte van die Koragiete.

<sup>24</sup> En Eleásar, die seun van Aäron, het vir hom een van die dogters van Pútiël as vrou geneem; en sy het vir hom Pínehas gebaar. Dit is die familiehoofde van die Leviete volgens hulle geslagte.

<sup>25</sup> Dit is Aäron en Moses aan wie die HERE gesê het: Lei die kinders van Israel uit Egipteland volgens hulle leërskaare.

<sup>26</sup> Dit is hulle wat met Farao, die koning van Egipte, gespreek het om die kinders van Israel uit Egipte uit te lei. Dit is Moses en Aäron.

<sup>27</sup> DIE dag toe die HERE met Moses gespreek het in Egipteland,

<sup>28</sup> het die HERE Moses aangespreek met die woorde: Ek is die HERE. Sê aan Farao, die koning van Egipte, alles wat Ek met jou spreek.

<sup>29</sup> Toe sê Moses voor die aangesig van die HERE: Ek is onbesnede van lippe! Hoe sal Farao dan na my luister?

**7** EN die HERE het aan Moses gesê:

## Exodus 7

---

Kyk, Ek stel jou as 'n god vir Farao, en jou broer Aäron sal jou profeet wees.

<sup>2</sup> Jý moet spreek alles wat Ek jou beveel, en jou broer Aäron moet met Farao spreek, sodat hy die kinders van Israel uit sy land laat uittrek.

<sup>3</sup> En Ék sal Farao se hart verhard en my tekens en wonders in Egipteland vermenigvuldig.

<sup>4</sup> Maar Farao sal na julle nie luister nie; en Ek sal my hand op Egipte lê en my leërskaars, my volk, die kinders van Israel, deur groot strafgerigte uit Egipteland uitlei.

<sup>5</sup> Dan sal die Egiptenaars weet dat Ek die HERE is, as Ek my hand oor Egipte uitstrek en die kinders van Israel tussen hulle uitlei.

<sup>6</sup> Moses en Aäron het toe gedoen soos die HERE hulle beveel het; so het hulle gedoen.

<sup>7</sup> En Moses was tagtig jaar en Aäron drie-en-tagtig jaar oud toe hulle met Farao gespreek het.

<sup>8</sup> En die HERE het Moses en Aäron aangespreek met die woorde:

<sup>9</sup> As Farao met julle spreek en sê: Doen tog 'n wonderteken vir julleself—dan moet jy vir Aäron sê: Neem jou staf en gooi dit voor Farao neer; dan sal dit 'n slang word.

<sup>10</sup> Toe het Moses en Aäron na Farao gegaan en gedoen net soos die HERE hulle beveel het: Aäron het sy staf voor Farao en voor sy dienaars neergegooi, en dit het 'n slang geword.

<sup>11</sup> Daarop laat Farao óók die wyse manne en die towenaars roep; en hulle, die Egiptiese towenaars, het ook dieselfde gedoen met hulle towerkunste:

<sup>12</sup> elkeen gooi sy staf neer, en hulle word slange! Maar Aäron se staf het hulle stawe verslind.

<sup>13</sup> Maar Farao se hart was verhard, sodat hy na hulle nie geluister het nie soos die HERE gespreek het.

<sup>14</sup> TOE sê die HERE vir Moses: Farao se hart is verhard; hy weier om die volk te laat trek.

<sup>15</sup> Gaan môre vroeg na Farao toe—kyk, hy sal uitgaan na die water; staan dan aan die kant van die Nyl om hom te ontmoet; en neem die staf wat in 'n slang verander het, in jou hand,

<sup>16</sup> en sê vir hom: Die HERE, die God van die Hebreërs, het my na u gestuur met die boodskap: Laat my volk trek, dat hulle My kan dien in die woestyn. Maar kyk, u het tot nou toe nie geluister nie.

<sup>17</sup> So spreek die HERE: Hieraan sal jy weet dat Ek die HERE is. Kyk, ek sal met die staf wat in my hand is, op die water slaan wat in die Nyl is, en dit sal in bloed verander word.

<sup>18</sup> En die visse in die Nyl sal doodgaan, sodat die Nyl sal stink. En die Egiptenaars sal vergeefs trag om die water uit die Nyl te drink.

<sup>19</sup> Verder het die HERE met Moses gespreek: Sê vir Aäron: Neem jou staf en steek jou hand uit oor die waters van die Egiptenaars, oor hulle strome, hulle kanale, hulle waterkuile en oor al hulle versamelplekke van water, sodat dit bloed word: daar sal bloed in die hele Egipteland wees, ook in hout- en in klipbakke.

<sup>20</sup> Moses en Aäron het toe so gedoen soos

## Exodus 8

---

die HERE beveel het—hy het die staf opgehef en die water wat in die Nyl was, geslaan voor die oë van Farao en voor die oë van sy dienaars; en al die water in die Nyl is in bloed verander.

<sup>21</sup> En die visse wat in die Nyl was, het doodgegaan; en die Nyl het gestink, sodat die Egiptenaars die water uit die Nyl nie kon drink nie. En daar was bloed in die hele Egipteland.

<sup>22</sup> Maar die Egiptiese towenaars het dieselfde gedoen met hulle towerkunste, sodat Farao se hart verhard is; en hy het na hulle nie geluister nie, soos die HERE gespreek het.

<sup>23</sup> En Farao het omgedraai en huis toe gegaan en dit ook nie ter harte geneem nie.

<sup>24</sup> Maar al die Egiptenaars het rondom die Nyl na water gegrawe om te drink, want hulle kon van die Nyl se water nie drink nie.

<sup>25</sup> So het dan sewe dae verbygegaan nadat die HERE die Nyl geslaan het.

**8** VERDER het die HERE met Moses gespreek: Gaan na Farao en sê vir hom: So spreek die HERE: Laat my volk trek, dat hulle My kan dien.

<sup>2</sup> En as jy weier om hulle te laat trek, kyk, dan sal Ek jou hele grondgebied met paddas teister,

<sup>3</sup> sodat die Nyl van paddas sal wemel. En hulle sal opklim en in jou huis kom en in jou slaapkamer en op jou bed; ook in die huis van jou dienaars en onder jou volk, en in jou bakoonde en in jou bakskottels.

<sup>4</sup> En die paddas sal teen jou en teen jou volk en teen al jou dienaars opspring.

<sup>5</sup> Verder het die HERE met Moses gespreek: Sê aan Aäron: Steek jou hand uit met jou staf oor die strome en oor die kanale en oor die waterkuile, en laat die paddas opkom oor Egipteland.

<sup>6</sup> En Aäron het sy hand oor die waters van Egipte uitgesteek, en daar het paddas opgekom en Egipteland oordek.

<sup>7</sup> Maar die towenaars het dieselfde gedoen met hulle towerkunste en paddas laat opkom oor Egipteland.

<sup>8</sup> Toe het Farao Moses en Aäron laat roep en gesê: Bid tot die HERE, dat Hy die paddas van my en van my volk wegneem. Dan sal ek die volk laat trek, dat hulle aan die HERE kan offer.

<sup>9</sup> Maar Moses sê aan Farao: Aan u die eer bo my! Teen watter tyd moet ek vir u en u dienaars en vir u volk bid, dat die paddas van u en uit u huise uitgeroei word om net in die Nyl oor te bly?

<sup>10</sup> En hy antwoord: Teen môre. Toe sê hy: Dit sal wees volgens u woord, dat u kan weet dat daar niemand is soos die HERE onse God nie.

<sup>11</sup> En die paddas sal u en u huise en u dienaars en u volk verlaat. Net in die Nyl sal hulle oorbly.

<sup>12</sup> Toe het Moses en Aäron van Farao af weggegaan; en Moses het tot die HERE geroep vanweë die paddas wat Hy oor Farao beskik het.

<sup>13</sup> En die HERE het gedoen volgens die woord van Moses: die paddas het weggesteek uit die huise, van die plase af en uit die veld.

<sup>14</sup> En hulle het dit by hope

## Exodus 8

---

bymeakaargemaak, en die land het gestink.

<sup>15</sup> En toe Farao sien dat daar verligting kom, het hy sy hart verhard en na hulle nie geluister nie, soos die HERE gespreek het.

<sup>16</sup> VERDER het die HERE met Moses gespreek: Sê aan Aäron: Steek jou staf uit en slaan die stof van die aarde, en dit sal muskiete word in die hele Egipteland.

<sup>17</sup> En hulle het so gedoen: Aäron het sy hand met sy staf uitgesteek en die stof van die aarde geslaan, en daar het muskiete gekom op die mense en op die vee. Al die stof van die aarde het muskiete geword in die hele Egipteland.

<sup>18</sup> En die towenaars het dieselfde gedoen met hulle towerkunste om die muskiete voort te bring, maar hulle kon nie. So was die muskiete dan op die mense en op die vee.

<sup>19</sup> Toe sê die towenaars vir Farao: Dit is die vinger van God! Maar Farao se hart was verhard, sodat hy na hulle nie geluister het nie, soos die HERE gespreek het.

<sup>20</sup> VERDER het die HERE vir Moses gesê: Maak jou môre vroeg klaar en stel jou voor Farao—kyk, hy sal na die water toe uitgaan—en sê vir hom: So spreek die HERE: Laat my volk trek, dat hulle My kan dien.

<sup>21</sup> Want as jy my volk nie laat trek nie, kyk, dan stuur Ek teen jou en teen jou dienaars en teen jou volk en teen jou huise die steekvlieë, sodat die huise van die Egiptenaars vol steekvlieë sal wees, en selfs die grond waar hulle op staan.

<sup>22</sup> Maar Ek sal op dié dag met die land Gosen, waarin my volk woon, 'n

uitsondering maak, dat daar geen steekvlieë sal wees nie; sodat jy kan weet dat Ek die HERE is in die land.

<sup>23</sup> En Ek sal 'n verlossing stel tussen my volk en jou volk. Môre sal hierdie teken plaasvind.

<sup>24</sup> En die HERE het so gedoen: dik swerms steekvlieë het in die huis van Farao en in die huis van sy dienaars en in die hele Egipteland gekom; die land is deur die steekvlieë verwoes.

<sup>25</sup> Toe laat Farao Moses en Aäron roep en sê: Gaan heen, offer aan julle God in die land.

<sup>26</sup> Maar Moses antwoord: Dit is nie reg om so te doen nie; want wat ons aan die HERE onse God offer, is 'n gruwel vir die Egiptenaars. As ons iets wat 'n gruwel is vir die Egiptenaars, voor hulle oë offer, sal hulle ons dan nie stenig nie?

<sup>27</sup> Laat ons drie dagreise ver die woestyn intrek, dat ons aan die HERE onse God kan offer soos Hy ons sal beveel.

<sup>28</sup> Toe sê Farao: Ek sal julle laat trek, dat julle aan die HERE julle God kan offer in die woestyn; julle moet maar net nie te ver wegtrek nie. Bid vir my.

<sup>29</sup> En Moses antwoord: Kyk, ek gaan van u af weg en sal tot die HERE bid, dat die steekvlieë môre Farao, sy dienaars en sy volk mag verlaat. Laat Farao ons net nie langer bedrieg deur die volk nie te laat trek om aan die HERE te offer nie.

<sup>30</sup> Toe het Moses van Farao af weggegaan en tot die HERE gebid.

<sup>31</sup> En die HERE het gedoen volgens die woord van Moses: Hy het die steekvlieë

## Exodus 9

---

van Farao, van sy dienaars en sy volk weggeneem. Daar het nie een oorgebly nie.  
<sup>32</sup> Maar Farao het sy hart ook hierdie keer verhard en die volk nie laat trek nie.

**9** VERDER het die HERE met Moses gespreek: Gaan na Farao en sê vir hom: So spreek die HERE, die God van die Hebreërs: Laat my volk trek, dat hulle My kan dien.

<sup>2</sup> Want as jy weier om hulle te laat trek en hulle nog langer vashou,

<sup>3</sup> kyk, dan sal die hand van die HERE wees teen jou vee wat in die veld is, teen die perde, teen die esels, teen die kamele, teen die beeste en teen die kleinvee met 'n baie swaar pes.

<sup>4</sup> En die HERE sal 'n onderskeid maak tussen die vee van die Israëliete en die vee van die Egiptenaars, sodat niks sal doodgaan van alles wat aan die kinders van Israel behoort nie.

<sup>5</sup> En die HERE het 'n bepaalde tyd gestel en gesê: Môre sal die HERE dit doen in die land.

<sup>6</sup> En die HERE het dit die volgende dag gedoen: al die vee van die Egiptenaars het doodgegaan. Maar van die vee van die kinders van Israel is nie een dood nie.

<sup>7</sup> Farao het toe gestuur, en kyk, van die vee van die Israëliete was daar nie een dood nie! Maar die hart van Farao was verhard, en hy het die volk nie laat trek nie.

<sup>8</sup> VERDER het die HERE aan Moses en Aäron gesê: Neem julle twee hande vol roet uit die oond, en laat Moses dit na die hemel uitstrooi voor die oë van Farao;

<sup>9</sup> en dit sal fyn stof word oor die hele

Egipteland en aan mense en diere swere veroorsaak wat in blare uitbreek, in die hele Egipteland.

<sup>10</sup> So het hulle dan roet uit die oond geneem en voor Farao gaan staan, en Moses het dit na die hemel uitgestrooi. Toe word dit swere wat uitbreek in blare aan mense en diere.

<sup>11</sup> En die towenaars kon voor Moses nie staan vanweë die swere nie. Want die swere was aan die towenaars en al die Egiptenaars.

<sup>12</sup> Maar die HERE het Farao se hart verhard, sodat hy nie na hulle geluister het nie, soos die HERE aan Moses gesê het.

<sup>13</sup> VERDER het die HERE aan Moses gesê: Maak jou môre vroeg klaar en stel jou voor Farao en sê vir hom: So spreek die HERE, die God van die Hebreërs: Laat my volk trek, dat hulle My kan dien.

<sup>14</sup> Want hierdie keer sal Ek al my plaie in jou hart stuur, en teen jou dienaars en jou volk, dat jy kan weet dat daar niemand op die hele aarde is soos Ek nie.

<sup>15</sup> Want anders sou Ek my hand uitgestrek en jou en jou volk met die pes getref het, en jy sou van die aarde verdelg gewees het;

<sup>16</sup> maar juis hierom het Ek jou nog laat bestaan, dat Ek jou my krag kan toon, en dat hulle my Naam op die hele aarde kan verkondig.

<sup>17</sup> Versit jy jou nog teen my volk, dat jy hulle nie wil laat trek nie?

<sup>18</sup> Kyk, Ek sal môre omtrent sulke tyd 'n baie swaar hael laat reën soos wat in Egipte nie gewees het van die dag af dat dit gegrond is tot nou toe nie.



## Exodus 10

---

<sup>19</sup> Stuur dan nou en laat jou vee en alles wat jy in die veld het, in veiligheid bring; al die mense en die diere wat in die veld gevind word, en wat nie binnekant gebring is nie—op hulle sal die hael val, sodat hulle sterwe.

<sup>20</sup> Hy wat die HERE se woord gevrees het onder die dienaars van Farao, het sy slawe en sy vee in die huise laat vlug;

<sup>21</sup> maar hy wat op die HERE se woord geen ag gegee het nie, het sy slawe en sy vee in die veld laat bly.

<sup>22</sup> Toe sê die HERE vir Moses: Steek jou hand na die hemel uit, en daar sal hael wees in die hele Egipteland, oor mense en diere en oor al die plante van die veld in Egipteland.

<sup>23</sup> En Moses het sy staf na die hemel uitgesteek, en die HERE het donder en hael gegee, en vuur het na die aarde uitgeskiet; en die HERE het hael op Egipteland laat reën.

<sup>24</sup> En daar was hael en onophoudelike vuur binne-in die hael, baie swaar, soos in die hele Egipteland nooit gewees het vandat dit aan 'n volk behoort het nie.

<sup>25</sup> En die hael het in die hele Egipteland geslaan alles wat in die veld was, mense sowel as diere. Ook het die hael al die plante van die veld geslaan en al die bome van die veld verbreek.

<sup>26</sup> Net in die land Gosen, waar die kinders van Israel was, was daar geen hael nie.

<sup>27</sup> Toe het Farao Moses en Aäron laat roep en vir hulle gesê: Ek het dié keer sonde gedoen. Die HERE is reg, maar ek en my volk het ongelyk.

<sup>28</sup> Bid tot die HERE, want daar is oorgenoeg donder van God en hael gewees; dan sal ek julle laat trek, en julle hoef nie langer te bly nie.

<sup>29</sup> Toe sê Moses vir hom: So gou as ek die stad uitgaan, sal ek my hande tot die HERE uitbrei: die donder sal ophou en die hael sal nie meer wees nie; sodat u kan weet dat die aarde aan die HERE behoort.

<sup>30</sup> Maar wat u en u dienaars betref—ek weet dat julle nog nie ontsag het vir die HERE God nie.

<sup>31</sup> En die vlas en die gars was weggeslaan, want die gars was in die aar en die vlas in die knop.

<sup>32</sup> Maar die koring en die spelt was nie weggeslaan nie, want hulle is later.

<sup>33</sup> So het Moses dan uit die stad gegaan van Farao af weg en sy hande tot die HERE uitgebrei. En die donder en hael het opgehou, en die reën het nie meer op die aarde gegiet nie.

<sup>34</sup> Toe Farao sien dat die reën en die hael en die donder ophou, het hy nog verder gesondig en sy hart verhard, hy en sy dienaars.

<sup>35</sup> Ja, Farao se hart was verhard, sodat hy die kinders van Israel nie laat trek het nie, soos die HERE deur die diens van Moses gespreek het.

**10** VERDER het die HERE vir Moses gesê: Gaan na Farao toe, want Ék het sy hart verhard, ook die hart van sy dienaars, sodat Ek hierdie tekens van My onder hulle kan verrig,

<sup>2</sup> en dat jy voor die ore van jou kind en jou kindskind kan vertel wat Ek Egipte

## Exodus 10

---

aangedoen het, en my tekens wat Ek onder hulle gedoen het, dat julle kan weet dat Ek die HERE is.

<sup>3</sup> Toe gaan Moses en Aäron na Farao, en hulle sê vir hom: So spreek die HERE, die God van die Hebreërs: Hoe lank weier jy om jou voor My te verootmoedig? Laat my volk trek, dat hulle My kan dien.

<sup>4</sup> Want as jy weier om my volk te laat trek, kyk, dan bring Ek môre sprinkane in jou grondgebied,

<sup>5</sup> en hulle sal die oppervlakte van die land oordek, sodat 'n mens die land nie sal kan sien nie. En hulle sal die oorblyfsel afeet van wat gered is, wat vir julle van die hael oorgebly het; en al die bome wat vir julle uit die veld opgroei, sal hulle afeet.

<sup>6</sup> En jou huise en die huise van al jou dienaars en die huise van al die Egiptenaars sal vol van hulle wees—soos jou vaders en die vaders van jou vaders nie gesien het van die dag af dat hulle op die aarde gewees het tot vandag toe nie. Daarop het hy omgedraai en van Farao af weggegaan.

<sup>7</sup> Toe vra Farao se dienaars vir hom: Hoe lank sal die man vir ons 'n strik wees? Laat die manne trek, dat hulle die HERE hulle God kan dien. Weet u nog nie dat Egipte te gronde gaan nie?

<sup>8</sup> Daarop bring hulle Moses en Aäron na Farao terug, en hy sê vir hulle: Gaan heen, dien die HERE julle God. Wie is dit eintlik wat wil gaan?

<sup>9</sup> En Moses antwoord: Ons wil gaan met ons jong mense en ons ou mense, met ons seuns en ons dogters; met ons kleinvee en

ons beeste wil ons gaan, want ons wil 'n fees vir die HERE hou.

<sup>10</sup> Toe sê hy vir hulle: Mag die HERE só met julle wees as wat ek julle en julle kinders sal laat trek! Pas op, want julle het 'n verkeerde ding voor oë.

<sup>11</sup> Nie so nie! Gaan dan, julle manne, en dien die HERE, want dít het julle verlang. En hulle het hulle van Farao af weggedrywe.

<sup>12</sup> Toe sê die HERE vir Moses: Steek jou hand uit oor Egipteland vanweë die sprinkane, dat hulle opkom oor Egipteland en al die plante van die land opeet, alles wat die hael laat oorbly het.

<sup>13</sup> En Moses het sy staf oor Egipteland uitgesteek, en die HERE het 'n oostewind in die land gebring, daardie hele dag en die hele nag; toe dit môre word, het die oostewind die sprinkane aangevoer:

<sup>14</sup> die sprinkane het opgekom oor die hele Egipteland en in die hele gebied van Egipte gaan sit, 'n baie groot menigte—tevore was daar so 'n sprinkaanswerm nie gewees nie, en daarna sal so iets nie weer voorkom nie.

<sup>15</sup> En hulle het die oppervlakte van die hele land bedek, sodat die land swart was; en hulle het al die plante van die land opgeëet en al die vrugte van die bome wat die hael laat oorbly het—daar het geen groenigheid aan die bome of plante van die veld in die hele Egipteland oorgebly nie.

<sup>16</sup> Toe het Farao gou vir Moses en Aäron laat roep en gesê: Ek het gesondig teen die HERE julle God en teen julle.

<sup>17</sup> Vergeef dan tog nou net dié keer my sonde, en bid tot die HERE julle God, dat

## Exodus 11

---

Hy net hierdie dood van my af wegneem.

<sup>18</sup> En hy het van Farao af weggegaan en tot die HERE gebid.

<sup>19</sup> Daarop laat die HERE die wind omslaan in 'n baie sterk westewind; dié het die sprinkane opgetel en hulle in die Skelfsee gedrywe. Daar het nie een sprinkaan in die hele gebied van Egipte oorgebly nie.

<sup>20</sup> Maar die HERE het Farao se hart verhard, sodat hy die kinders van Israel nie laat trek het nie.

<sup>21</sup> VERDER het die HERE vir Moses gesê: Steek jou hand na die hemel uit, en daar sal duisternis oor Egipteland kom, sodat 'n mens die duisternis kan gryp.

<sup>22</sup> Toe Moses sy hand uitsteek na die hemel, kom daar 'n dik duisternis in die hele Egipteland, drie dae lank.

<sup>23</sup> Die een het die ander nie gesien nie, en niemand het van sy plek opgestaan nie, drie dae lank. Maar al die kinders van Israel het lig in hulle woonplekke gehad.

<sup>24</sup> Toe het Farao Moses laat roep en gesê: Gaan heen, dien die HERE; net julle kleinvee en julle beeste moet agtergehou word. Selfs julle kinders kan met julle saamgaan.

<sup>25</sup> Maar Moses antwoord: U moet self ook slagoffers en brandoffers met ons saam gee, dat ons dit aan die HERE onse God kan aanbied.

<sup>26</sup> En ons vee moet ook met ons saamgaan: daar mag geen klou agterbly nie! Want daarvan moet ons neem om die HERE onse God te dien. En ons weet nie waarmee ons die HERE onse God sal dien voordat ons daar kom nie.

<sup>27</sup> Maar die HERE het Farao se hart verhard, en hy wou hulle nie laat trek nie.

<sup>28</sup> Maar Farao sê vir hom: Gaan weg van my af! Pas op dat jy my aangesig nie weer sien nie; want die dag as jy my aangesig sien, sal jy sterwe.

<sup>29</sup> En Moses antwoord: U het reg gepraat. Ek sal u aangesig nie weer sien nie.

**11** VERDER het die HERE vir Moses gesê: Nog een plaag sal Ek oor Farao en oor Egipte bring. Daarna sal hy julle hiervandaan laat trek. As hy julle geheel en al laat trek, sal hy julle selfs hiervandaan wegdrywe.

<sup>2</sup> Sê tog voor die ore van die volk dat elke man van sy naaste en elke vrou van haar naaste silwergoed en goue goed moet eis.

<sup>3</sup> En die HERE het aan die volk guns verleen in die oë van die Egiptenaars. Ook was die man Moses baie groot in Egipteland, in die oë van Farao se dienaars en in die oë van die volk.

<sup>4</sup> Toe sê Moses: So het die HERE gespreek: Omtrent middernag trek Ek uit dwarsdeur Egipte;

<sup>5</sup> dan sal al die eersgeborenes in Egipteland sterwe, van Farao se eersgeborene af wat op sy troon sit, tot die eersgeborene van die slavin agter die handmeul en al die eersgeborenes van die vee.

<sup>6</sup> En daar sal 'n groot gejammer in die hele Egipteland wees soos daar nie gewees het en soos daar nie weer sal wees nie.

<sup>7</sup> Maar teen geeneen van die kinders van Israel sal 'n hond sy tong verroer nie, van die mense af tot die diere toe, dat julle kan

## Exodus 12

weet dat die HERE 'n onderskeid maak tussen die Egiptenaars en die Israeliete.

<sup>8</sup> Dan sal al hierdie dienaars van u na my toe afkom en voor my neerbuig en sê: Trek uit, jy en die hele volk wat jou volg. En daarna sal ek uittrek. Toe het hy van Farao af weggegaan in gloeiende toorn.

<sup>9</sup> En die HERE het vir Moses gesê: Farao sal na julle nie luister nie, sodat my wonders in Egipteland baie kan word.

<sup>10</sup> En Moses en Aäron het al hierdie wonders voor Farao gedoen. Maar die HERE het Farao se hart verhard, sodat hy die kinders van Israel nie uit sy land laat trek het nie.

**12** EN die HERE het met Moses en Aäron in Egipteland gesprek en gesê:

<sup>2</sup> Hierdie maand moet vir julle die begin van die maande wees; dit moet vir julle die eerste van die maande van die jaar wees.

<sup>3</sup> Spreek tot die hele vergadering van Israel en sê: Op die tiende van hierdie maand moet hulle elkeen 'n lam neem volgens die families, 'n lam vir 'n huisgesin.

<sup>4</sup> Maar as 'n huisgesin te klein is vir 'n lam, dan moet hy en sy buurman wat die naaste aan sy huis is, dit neem volgens die sieletal; na wat elkeen gewoond is om te eet, moet julle die getal op die lam bereken.

<sup>5</sup> Julle moet 'n lam hê sonder gebrek, 'n jaaroud rammetjie. Van die skape of van die bokke kan julle dit neem.

<sup>6</sup> En julle moet dit in bewaring hou tot die veertiende dag van hierdie maand; en die hele vergadering van die gemeente van Israel moet dit slag teen die aand.

<sup>7</sup> En hulle moet van die bloed neem en dit stryk aan die twee deurposte en aan die bo-drumpel, aan die huise waarin hulle dit eet.

<sup>8</sup> En hulle moet die vleis in dieselfde nag eet, oor die vuur gebraai; saam met ongesuurde brode moet hulle dit met bitter kruie eet.

<sup>9</sup> Julle moet daarvan nie eet as dit rou is en as dit in water gaar gekook is nie, maar oor die vuur gebraai, die kop en pootjies saam met die binnegoed.

<sup>10</sup> Julle mag daar ook niks van laat oorbly tot die môre toe nie; maar wat daarvan tot die môre oorbly, moet julle met vuur verbrand.

<sup>11</sup> En só moet julle dit eet: Julle heupe moet omgord wees, julle skoene aan jul voete en julle staf in jul hand; baie haastig moet julle dit eet. 'n Pasga van die HERE is dit.

<sup>12</sup> Want Ek sal in hierdie nag deur Egipteland trek en al die eersgeborenes in Egipteland tref, van mense sowel as van diere. En Ek sal strafgerigte oefen aan al die gode van Egipte, Ek, die HERE.

<sup>13</sup> Maar die bloed sal vir julle 'n teken wees aan die huise waarin julle is: as Ek die bloed sien, sal Ek by julle verbygaan. En daar sal geen verderflike plaag onder julle wees wanneer Ek Egipteland tref nie.

<sup>14</sup> En hierdie dag moet vir julle 'n gedenkdag wees, en julle moet dit as 'n fees tot eer van die HERE vier. Julle moet dit in julle geslagte as 'n ewige insetting vier.

<sup>15</sup> Sewe dae lank moet julle ongesuurde brode eet; alreeds op die eerste dag moet julle die suurdeeg uit julle huise verwyder.

## Exodus 12

---

Want elkeen wat gesuurde brood eet, van die eerste dag af tot die sewende toe, dié siel moet uit Israel uitgeroei word.

<sup>16</sup> En op die eerste dag moet daar 'n heilige samekoms wees; ook op die sewende dag moet daar vir julle 'n heilige samekoms wees. Daar mag géén werk op dié dae gedoen word nie; net wat deur elkeen geëet moet word, dit alleen mag deur julle berei word.

<sup>17</sup> Onderhou dan die ongesuurde brode, want op daardie selfde dag het Ek julle leërs uit Egipteland uitgelei. Daarom moet julle hierdie dag in julle geslagte as 'n ewige insetting hou.

<sup>18</sup> In die eerste maand, op die veertiende dag van die maand, in die aand, moet julle ongesuurde brode eet, tot op die een-en-twintigste dag van die maand, in die aand.

<sup>19</sup> Sewe dae lank mag daar geen suurdeeg in julle huise gevind word nie. Want elkeen wat iets eet met suurdeeg in, dié siel moet uit die vergadering van Israel uitgeroei word, of hy al 'n vreemdeling is of 'n kind van die land.

<sup>20</sup> Julle mag niks eet met suurdeeg in nie. In al julle woonplekke moet julle ongesuurde brode eet.

<sup>21</sup> Moses het toe al die oudstes van Israel laat roep en aan hulle gesê: Gaan haal vir julle kleinvee vir julle families en slag die pasga.

<sup>22</sup> En neem 'n bossie hisop en steek dit in die bloed wat in die skottel is, en stryk aan die bo-drumpel en aan die twee deurposte van die bloed wat in die skottel is. Maar

niemand van julle mag uit die deur van sy huis uitgaan tot die môre toe nie.

<sup>23</sup> Want die HERE sal deurtrek om die Egiptenaars swaar te tref. Maar wanneer Hy die bloed sien aan die bo-drumpel en aan die twee deurposte, sal die HERE by die deur verbygaan en die verderwer nie toelaat om in julle huise in te gaan om te slaan nie.

<sup>24</sup> Onderhou dan hierdie saak as 'n insetting vir jou en jou kinders tot in ewigheid.

<sup>25</sup> En as julle in die land kom wat die HERE aan julle sal gee soos Hy beloof het, moet julle hierdie diens onderhou.

<sup>26</sup> En as julle kinders julle vra: Wat beteken die diens daar?

<sup>27</sup> dan moet julle sê: Dit is 'n paasoffer aan die HERE, wat by die huise van die kinders van Israel in Egipte verbygegaan het, toe Hy die Egiptenaars getref maar ons huise gered het. Toe het die volk in aanbidding neergebuig.

<sup>28</sup> En die kinders van Israel het gegaan en dit gedoen. Soos die HERE Moses en Aäron beveel het, so het hulle gedoen.

<sup>29</sup> En middernag het die HERE al die eersgeborenes in Egipteland getref, van die eersgeborene van Farao af wat op sy troon gesit het, tot die eersgeborene van die gevangene toe wat in die gevangenis was, en al die eersgeborenes van die diere.

<sup>30</sup> Toe staan Farao in die nag op, hy en al sy dienaars en al die Egiptenaars, en daar was 'n groot gejammer in Egipte, want daar was geen huis waar geen dooie in was nie.

<sup>31</sup> Daarop het hy Moses en Aäron in die

## Exodus 12

---

nag laat roep en gesê: Maak julle klaar, trek weg onder my volk uit, julle sowel as die kinders van Israel, en gaan dien die HERE soos julle gesprek het.

<sup>32</sup> Neem ook julle kleinvee en julle beeste saam soos julle gesprek het, en gaan weg en seën my ook.

<sup>33</sup> En die Egiptenaars het by die volk sterk aangehou—om hulle gou uit die land uit te stuur. Want hulle het gesê: Ons is almal dood!

<sup>34</sup> Toe neem die volk hulle deeg voordat dit ingesuur was, met hulle bakskottels, in hulle mantels toegebind, op die skouers.

<sup>35</sup> En die kinders van Israel het gehandel volgens die woord van Moses: hulle het van die Egiptenaars silwergoed en goue goed en klere geëis;

<sup>36</sup> en die HERE het aan die volk guns verleen in die oë van die Egiptenaars, en dié het hulle versoek ingewillig. So het hulle dan die Egiptenaars berowe.

<sup>37</sup> En die kinders van Israel het van Raämses na Sukkot weggetrek, omtrent seshonderdduisend te voet, die manne buiten die kinders.

<sup>38</sup> En 'n menigte mense van gemengde bloed het ook saam met hulle opgetrek, en kleinvee en beeste—'n groot hoeveelheid vee.

<sup>39</sup> En hulle het van die deeg wat hulle uit Egipte gebring het, ongesuurde koeke gebak; want dit was nie ingesuur nie, omdat hulle uit Egipte uitgedryf is, sodat hulle nie kon vertoef nie en ook geen padkos vir hulle klaargemaak het nie.

<sup>40</sup> En die tyd wat die kinders van Israel in

Egipte gewoon het, was vierhonderd-en-dertig jaar.

<sup>41</sup> En ná verloop van vierhonderd-en-dertig jaar, op daardie selfde dag, het al die leërske van die HERE uit Egipteland uitgetrek.

<sup>42</sup> Dit is 'n nag om plegtig onderhou te word tot eer van die HERE, omdat Hy hulle uit Egipteland uitgelei het. Dit is dié nag van die HERE om plegtig onderhou te word by al die kinders van Israel in hulle geslagte.

<sup>43</sup> VERDER het die HERE aan Moses en Aäron gesê: Dit is die insetting van die pasga: Géén uitlander mag daarvan eet nie.

<sup>44</sup> Maar elke slaaf wat 'n man met geld gekoop het, dié moet hy besny; dan kan hy daarvan eet.

<sup>45</sup> Geen vreemde inwoner of huurling mag daarvan eet nie.

<sup>46</sup> In een huis moet dit geëet word; jy mag niks van die vleis uit die huis buitentoe bring nie; en julle mag geen been daarvan breek nie.

<sup>47</sup> Die hele vergadering van Israel moet dit hou.

<sup>48</sup> En as 'n vreemdeling by jou vertoef en tot eer van die HERE die pasga wil vier, moet by hom almal wat manlik is, besny word; en dan mag hy nader kom om dit te vier, en hy sal soos 'n kind van die land wees. Maar géén onbesnedene mag daarvan eet nie.

<sup>49</sup> Een wet moet geld vir die kind van die land en vir die vreemdeling wat onder julle vertoef.

<sup>50</sup> En al die kinders van Israel het dit

## Exodus 13

gedoen. Soos die HERE Moses en Aäron beveel het, so het hulle gedoen.

<sup>51</sup> En op daardie selfde dag het die HERE die kinders van Israel, volgens hulle leërafdelings, uit Egipteland uitgelei.

**13** TOE het die HERE met Moses gespreek en gesê:

<sup>2</sup> Heilig vir My al die eersgeborenes. Alles wat die moederskoot open onder die kinders van Israel, van mense en van diere, dit is myne.

<sup>3</sup> Verder het Moses aan die volk gesê: Dink aan hierdie dag waarop julle uit Egipte, uit die slawehuis, uitgegaan het; want die HERE het julle deur 'n sterke hand hiervandaan uitgelei; daarom mag geen gesuurde brood geëet word nie.

<sup>4</sup> Vandag trek julle uit, in die maand Abib.

<sup>5</sup> En as die HERE jou bring in die land van die Kanaäniete en Hetiete en Amoriete en Hewiete en Jebusiete, wat Hy aan jou vaders met 'n eed beloof het om aan jou te gee, 'n land wat oorloop van melk en heuning, dan moet jy hierdie diens in hierdie maand onderhou.

<sup>6</sup> Sewe dae lank moet jy ongesuurde brode eet, en op die sewende dag is daar fees tot eer van die HERE.

<sup>7</sup> Ongesuurde brode moet die sewe dae geëet word: by jou mag geen gesuurde brood gesien word nie, en geen suurdeeg mag by jou in jou hele grondgebied gesien word nie.

<sup>8</sup> En jy moet jou seun op dié dag vertel en sê: Dit geskied ter wille van wat die HERE aan my gedoen het toe ek uit Egipte uitgetrek het.

<sup>9</sup> En dit moet vir jou as 'n teken wees op jou hand en 'n gedenkteken tussen jou oë, sodat die wet van die HERE in jou mond mag wees; want deur 'n sterke hand het die HERE jou uit Egipte uitgelei.

<sup>10</sup> Daarom moet jy hierdie insetting onderhou op die daarvoor bepaalde tyd, van jaar tot jaar.

<sup>11</sup> En as die HERE jou in die land van die Kanaäniete bring, soos Hy aan jou en jou vaders met 'n eed beloof het, en Hy dit aan jou gee,

<sup>12</sup> dan moet jy alles wat die moederskoot open, aan die HERE afgee; ook elke eersteling, die aanteel van vee, wat jy sal hê—wat manlik is, behoort aan die HERE.

<sup>13</sup> Maar elke eersteling van 'n esel moet jy met 'n lam loskoop. En as jy dit nie loskoop nie, moet jy sy nek breek. Maar al die eersgeborenes van mense onder jou seuns moet jy loskoop.

<sup>14</sup> En as jou seun jou later vra en sê: Wat beteken dit? dan moet jy hom antwoord: Die HERE het ons deur 'n sterke hand uit Egipte, uit die slawehuis, uitgelei.

<sup>15</sup> Want toe Farao swarigheid gemaak het om ons te laat trek, het die HERE al die eersgeborenes in Egipteland gedood, van die eersgeborene van die mense af tot die eersgeborene van die diere toe. Daarom offer ek aan die HERE alles wat die moederskoot open wat manlik is; maar al die eersgeborenes van my seuns koop ek los.

<sup>16</sup> En dit sal as 'n teken wees op jou hand en 'n voorhoofsband tussen jou oë; want die HERE het ons deur 'n sterke hand uit

## Exodus 14

Egipte uitgelei.

<sup>17</sup> TOE Farao die volk laat trek het, het God hulle nie op die pad na die land van die Filistyne gelei nie, alhoewel dit nader was; want God het gesê: Die volk kan dalk berou kry as hulle oorlog sien en teruggaan na Egipte.

<sup>18</sup> Daarom het God die volk laat wegdraai in die rigting na die woestyn, na die Skelfsee toe. En die kinders van Israel het goed gewapend uit Egipteland opgetrek.

<sup>19</sup> En Moses het die gebeente van Josef met hom saamgeneem; want hy het die kinders van Israel plegtig laat sweer en gesê: God sal eindelijk op julle ag gee; bring dan my gebeente saam met julle hiervandaan op.

<sup>20</sup> So het hulle dan van Sukkot af weggetrek en laer opgeslaan in Etam, aan die kant van die woestyn.

<sup>21</sup> En die HERE het voor hulle uit getrek, bedags in 'n wolkkolom om hulle op die pad te lei, en snags in 'n vuurkolom om hulle voor te lig, sodat hulle dag en nag kon trek.

<sup>22</sup> Die wolkkolom het nie bedags en die vuurkolom het nie snags voor die volk gewyk nie.

**14** TOE het die HERE met Moses gespreek en gesê:

<sup>2</sup> Sê aan die kinders van Israel dat hulle moet omdraai en laer opslaen voor Pi-Hágirot, tussen Migdol en die see. Reg teenoor Baäl-Sefon moet julle laer opslaen by die see.

<sup>3</sup> Dan sal Farao van die kinders van Israel sê: Hulle is verdwaal in die land, die woestyn het hulle ingesluit.

<sup>4</sup> En Ek sal Farao se hart verhard, dat hy hulle agtervolg; en Ek wil My aan Farao en sy hele leërmag verheerlik, en die Egiptenaars sal weet dat Ek die HERE is. En hulle het so gedoen.

<sup>5</sup> Toe die koning van Egipte berig ontvang dat die volk gevlug het, het die hart van Farao en van sy dienaars teenoor die volk verander, en hulle sê: Wat het ons nou gedoen dat ons Israel laat trek het, sodat hulle ons nie meer dien nie?

<sup>6</sup> Daarop het hy sy strydwa ingespan en sy manskappe saam met hom geneem.

<sup>7</sup> En hy het seshonderd uitgesoekte strydwaens geneem en al die ander strydwaens van Egipte, en die beste vegsmanne op elkeen daarvan.

<sup>8</sup> En die HERE het die hart van Farao, die koning van Egipte, verhard, sodat hy die kinders van Israel agtervolg het. Maar die kinders van Israel het deur 'n hoë hand uitgetrek.

<sup>9</sup> En die Egiptenaars het hulle agtervolg—al Farao se perde en strydwaens, sy ruiters en sy leërmag—en hulle ingehaai terwyl hulle in die laer gestaan het by die see by Pi-Hágirot, voor Baäl-Sefon.

<sup>10</sup> Toe Farao naby kom, slaan die kinders van Israel hulle oë op, en kyk, daar trek die Egiptenaars agter hulle aan; en hulle het baie bang geword. Daarop het die kinders van Israel tot die HERE geroep.

<sup>11</sup> En hulle het vir Moses gesê: Het u, omdat daar in Egipte glad geen grafte is nie, ons saamgeneem om in die woestyn te sterwe? Wat het u ons nou aangedoen, dat



## Exodus 14

---

u ons uit Egipte uitgelei het?

<sup>12</sup> Is dít nie die woord wat ons aan u in Egipte gesê het nie: Laat ons met rus, dat ons die Egiptenaars kan dien? Want dit is beter vir ons om die Egiptenaars te dien as om in die woestyn te sterwe.

<sup>13</sup> Maar Moses het aan die volk gesê: Wees nie bevrees nie, staan vas en aanskou die verlossing van die HERE wat Hy vandag vir julle sal bewerk; want soos julle die Egiptenaars vandag sien, sal julle hulle nie weer sien in ewigheid nie.

<sup>14</sup> Die HERE sal vir julle stry, en julle moet stil wees.

<sup>15</sup> Toe vra die HERE vir Moses: Wat roep jy na My? Sê aan die kinders van Israel dat hulle moet terugtrek.

<sup>16</sup> En jy, hef jou staf op en steek jou hand uit oor die see en kloof dit, sodat die kinders van Israel dwarsdeur die see op droë grond kan trek.

<sup>17</sup> En Ek, kyk, Ek sal die hart van die Egiptenaars verhard, sodat hulle agter hulle aan gaan. En Ek wil My verheerlik aan Farao en sy hele leërmag, aan sy strydwaens en aan sy ruiters.

<sup>18</sup> En die Egiptenaars sal weet dat Ek die HERE is, as Ek My verheerlik aan Farao, aan sy strydwaens en aan sy ruiters.

<sup>19</sup> En die Engel van God wat voor die leër van Israel uit getrek het, het daar weggegaan en agter hulle aan getrek. En die wolkkolom het ook voor hulle weggetrek en agter hulle gaan staan;

<sup>20</sup> so het dit dan tussen die leër van die Egiptenaars en die leër van Israel in gekom. En die wolk was daar met die

duisternis, en dit het die nag verlig, sodat die een nie naby die ander gekom het die hele nag deur nie.

<sup>21</sup> Toe steek Moses sy hand oor die see uit, en die HERE het deur 'n sterk oostewind die see laat wegvloei, die hele nag deur, en die see droog gemaak; en die waters is gekloof.

<sup>22</sup> En die kinders van Israel het midde-in die see getrek op droë grond. En die waters was vir hulle 'n muur aan hul regter- en aan hul linkerkant.

<sup>23</sup> Toe het die Egiptenaars hulle gejaag en agter hulle aan getrek—al Farao se perde, sy strydwaens en sy ruiters—die see in.

<sup>24</sup> En in die môrewaak het die HERE, in die vuur- en wolkkolom, op die leër van die Egiptenaars afgekyk en die leër van die Egiptenaars in verwarring gebring.

<sup>25</sup> En Hy het die wiele van hulle strydwaens laat insak en hulle met moeite laat voortgaan. Toe sê die Egiptenaars: Laat ons van Israel af wegvlug, want die HERE stry vir hulle teen die Egiptenaars.

<sup>26</sup> Daarop sê die HERE vir Moses: Steek jou hand uit oor die see, dat die waters kan terugvloei oor die Egiptenaars, oor hulle strydwaens en oor hulle ruiters.

<sup>27</sup> En Moses het sy hand oor die see uitgesteek, en die see het teen dagbreek in sy bedding teruggevloei, en die Egiptenaars het dit tegemoet gevlug. So het die HERE dan die Egiptenaars binne-in die see gestort.

<sup>28</sup> En toe die waters terugvloei, het hulle die strydwaens en die ruiters van Farao se hele leërmag wat agter hulle die see

## Exodus 15

ingetrek het, oordek. Geeneen van hulle het oorgebly nie.

<sup>29</sup> Maar die kinders van Israel het binne-in die see op droë grond getrek. En die waters was vir hulle 'n muur aan hul regter- en aan hul linkerkant.

<sup>30</sup> So het die HERE Israel dan dié dag uit die hand van die Egiptenaars verlos. En Israel het die Egiptenaars dood gesien aan die kant van die see.

<sup>31</sup> Ook het Israel die magtige daad gesien wat die HERE aan die Egiptenaars verrig het. Toe het die volk die HERE gevrees en geglo in die HERE en Moses, sy kneg.

**15** TOE het Moses en die kinders van Israel hierdie lied tot eer van die HERE gesing; en dit is wat hulle gesê het: Ek wil sing tot eer van die HERE, want Hy is hoog verhewe. Die perd en sy ruiter het Hy in die see gewerp.

<sup>2</sup> Die HERE is my krag en my psalm, en Hy het my tot heil geword. Hy is my God, Hom sal ek roem; die God van my vader, Hom sal ek verhef.

<sup>3</sup> Die HERE is 'n krygsman; HERE is sy naam.

<sup>4</sup> Hy het Farao se strydwaens en sy leërmag in die see gewerp. En sy beste vegsmanne het in die Skelfsee gesink.

<sup>5</sup> Die watervloede het hulle oordek. Hulle het in die kolke gesink soos 'n klip.

<sup>6</sup> o HERE, u regterhand is verheerlik deur krag. U regterhand, o HERE, verpletter die vyand.

<sup>7</sup> En in u grote hoogheid werp U diegene neer wat teen U opstaan. U stuur u toornloed uit: dit verteer hulle soos 'n

stoppel.

<sup>8</sup> En deur die geblaas van u neus het die waters hulle opgestapel, die strome het bly staan soos 'n wal, die watervloede het styf geword in die hart van die see.

<sup>9</sup> Die vyand het gesê: Ek sal agtervolg, inhaal, buit verdeel, my begeerte sal versadig word van hulle; ek sal my swaard trek, my hand sal hulle uitroei.

<sup>10</sup> U het met u asem geblaas: die see het hulle oordek; soos lood het hulle gesink in die geweldige waters.

<sup>11</sup> o HERE, wie is soos U onder die gode? Wie is soos U, verheerlik in heiligheid, gedug in roemryke dae, een wat wonders doen?

<sup>12</sup> U het u regterhand uitgestrek, die aarde het hulle verslind.

<sup>13</sup> U het deur u guns die volk gelei wat U verlos het; U het hulle deur u krag na u heilige woning gevoer.

<sup>14</sup> Die volke het dit gehoor, hulle het gesidder; weë het die inwoners van Filistea aangegryp.

<sup>15</sup> Toe is die stamhoofde van Edom verskrik, bewing het die magtiges van Moab aangegryp. Al die inwoners van Kanaän het gebewe.

<sup>16</sup> Verskrikking en vrees het op hulle geval; deur die grootheid van u arm was hulle stom soos 'n klip, terwyl u volk deurtrek, HERE, terwyl die volk deurtrek wat U verwerf het.

<sup>17</sup> U bring hulle in en plant hulle op die bergland van u erfenis, die plek, o HERE, wat U as vaste woonplek vir U berei het, die heiligdom wat u hande gestig het, o

## Exodus 16

HERE!

<sup>18</sup> Die HERE sal regeer vir ewig en altoos.

<sup>19</sup> Want Farao se perd, met sy strydwaens en sy ruiters, het in die see ingegaan, en die HERE het die waters van die see oor hulle laat terugkom. Maar die kinders van Israel het binne-in die see op droë grond getrek.

<sup>20</sup> En Mirjam, die profetes, die suster van Aäron, het 'n tamboeryn in haar hand geneem; en al die vroue het uitgegaan agter haar aan, met tamboeryne en in koordanse.

<sup>21</sup> En Mirjam het hulle al singende geantwoord: Sing tot eer van die HERE, want Hy is hoog verhewe. Hy het die perd met sy ruiters in die see gewerp.

<sup>22</sup> DAAROP het Moses die Israeliete laat wegtrek van die Skelfsee af, en hulle het uitgetrek na die woestyn Sur. Hulle het toe drie dae lank in die woestyn getrek en geen water gekry nie.

<sup>23</sup> En hulle het in Mara gekom, maar kon die water van Mara nie drink nie, want dit was bitter. Daarom heet die plek Mara.

<sup>24</sup> Toe murmureer die volk teen Moses en sê: Wat moet ons drink?

<sup>25</sup> En hy het die HERE aangeroop, en die HERE het hom 'n stuk hout gewys; dit het hy in die water gegooi, en die water het soet geword. Daar het Hy vir hulle 'n insetting en verordening vasgestel en hulle daar beproef

<sup>26</sup> en gesê: As jy getrou na die stem van die HERE jou God luister en doen wat reg is in sy oë, en luister na sy gebooie en al sy insettinge hou, dan sal Ek geeneen van die siektes op jou lê wat Ek op Egipteland gelê het nie; want Ek is die HERE wat jou

gesond maak.

<sup>27</sup> Daarop het hulle by Elim gekom, waar twaalf waterfonteine en sewentig palmbome was. En hulle het daar by die water laer opgeslaan.

**16** TOE hulle van Elim af wegtrek, het die hele vergadering van die kinders van Israel in die woestyn Sin gekom, wat tussen Elim en Sinai lê, op die vyftiende dag van die tweede maand ná hulle uittoeg uit Egipteland.

<sup>2</sup> En die hele vergadering van die kinders van Israel het teen Moses en teen Aäron in die woestyn gemurmureer.

<sup>3</sup> En die kinders van Israel het aan hulle gesê: Het ons maar in Egipteland deur die hand van die HERE gesterwe toe ons by die vleispotte gesit en volop brood geëet het! Want julle het ons in hierdie woestyn uitgelei om hierdie hele vergadering van honger te laat sterwe.

<sup>4</sup> Toe sê die HERE vir Moses: Kyk, Ek sal vir julle brood uit die hemel laat reën; dan kan die volk uitgaan en die dagmaat van elke dag insamel, sodat Ek hulle kan beproef, of hulle in my wet sal wandel of nie.

<sup>5</sup> En op die sesde dag, as hulle berei wat hulle inbring, sal dit dubbel soveel wees as wat hulle daaglik insamel.

<sup>6</sup> Toe sê Moses en Aäron aan al die kinders van Israel: Vanaand, dan sal julle weet dat die HERE julle uit Egipteland uitgelei het.

<sup>7</sup> En môre vroeg, dan sal julle die heerlijkheid van die HERE sien, omdat Hy julle murmureringe teen die HERE gehoor het—want wat is ons, dat julle teen ons

## Exodus 16

---

murmureer?

<sup>8</sup> Daarop sê Moses: Dít sal gebeur as die HERE julle in die aand vleis gee om te eet en in die môre volop brood, omdat die HERE julle murmureringe hoor wat julle teen Hom murmureer. Want wat is ons? Julle murmureringe is nie teen ons nie, maar teen die HERE.

<sup>9</sup> Verder het Moses met Aäron gespreek: Sê aan die hele vergadering van die kinders van Israel: Kom nader voor die aangesig van die HERE, want Hy het julle murmureringe gehoor.

<sup>10</sup> En onderwyl Aäron die hele vergadering van die kinders van Israel toespreek, draai hulle na die woestyn toe en meteens verskyn die heerlijkheid van die HERE in die wolk.

<sup>11</sup> Ook het die HERE met Moses gespreek en gesê:

<sup>12</sup> Ek het die murmureringe van die kinders van Israel gehoor; spreek met hulle en sê: Teen die aand sal julle vleis eet en in die môre met brood versadig word; en julle sal weet dat Ek die HERE julle God is.

<sup>13</sup> En in die aand het daar kwartels opgekom en die laer oordek. En in die môre was daar 'n doulaag rondom die laer.

<sup>14</sup> En nadat die doulaag opgetrek het, het daar oor die woestyn iets gelê wat fyn en korrelrig was, fyn soos ryp op die grond.

<sup>15</sup> Toe die kinders van Israel dit sien, sê hulle vir mekaar: Wat is dit? Want hulle het nie geweet wat dit was nie. Daarop sê Moses vir hulle: Dit is die brood wat die HERE julle gee om te eet.

<sup>16</sup> Dit is die saak wat die HERE beveel het:

Samel daarvan in, elkeen na sy behoefte: 'n gomer vir elke persoon volgens julle sieletal; elkeen moet dit neem vir die wat in sy tent is.

<sup>17</sup> En die kinders van Israel het so gedoen: hulle het ingesamel, die een baie en die ander min.

<sup>18</sup> Maar toe hulle dit met die gomer meet, het hy wat baie ingesamel het, niks oorgehad nie; en hy wat min ingesamel het, nie te min nie. Elkeen na sy behoefte het hulle ingesamel.

<sup>19</sup> En Moses het vir hulle gesê: Niemand moet daarvan laat oorbly tot môre toe nie.

<sup>20</sup> Maar hulle het nie na Moses geluister nie: sommige het daarvan laat oorbly tot die môre toe. Toe kom daar wurms in en dit bederwe. Daarom het Moses baie kwaad geword vir hulle.

<sup>21</sup> En hulle het dit môre vir môre ingesamel, elkeen na sy behoefte; en as die son warm word, smelt dit weg.

<sup>22</sup> En op die sesde dag het hulle 'n dubbele porsie brood ingesamel, twee gomers vir elkeen. En al die owerstes van die vergadering het gekom en dit aan Moses vertel.

<sup>23</sup> Toe sê hy vir hulle: Dit is wat die HERE gespreek het: Môre is dit rusdag, 'n heilige sabbat van die HERE. Wat julle wil bak, bak dit; en wat julle wil kook, kook dit; en bêre vir julle alles wat oor is, om dit te bewaar tot die môre toe.

<sup>24</sup> En hulle het dit gebêre tot die môre toe, soos Moses beveel het; en dit het nie bederwe nie, en daar het geen wurms in gekom nie.

## Exodus 17

<sup>25</sup> Toe sê Moses: Eet dit vandag, want dit is vandag die sabbat van die HERE. Vandag sal julle dit nie in die veld kry nie.

<sup>26</sup> Ses dae lank moet julle dit in-samel, maar op die sewende dag is dit sabbat; dan sal dit daar nie wees nie.

<sup>27</sup> En op die sewende dag het van die mense uitgegaan om in te samel, maar hulle het niks gekry nie.

<sup>28</sup> Toe sê die HERE vir Moses: Hoe lank weier julle om my gebooie en my wette te onderhou?

<sup>29</sup> Kyk, omdat die HERE julle die sabbat gegee het, daarom gee Hy julle op die sesde dag brood vir twee dae. Laat elkeen bly waar hy is; laat niemand op die sewende dag van sy woonplek af weggaan nie.

<sup>30</sup> So het die volk dan op die sewende dag gerus.

<sup>31</sup> En die huis van Israel het dit MAN genoem. En dit was wit soos koljandersaad, en dit het gesmaak soos heuningkoek.

<sup>32</sup> Verder het Moses gesê: Dit is die saak wat die HERE beveel het: 'n Gomer vol moet daarvan bewaar word vir julle geslagte, dat hulle die brood kan sien wat Ek julle in die woestyn laat eet het, toe Ek julle uit Egipteland uitgelei het.

<sup>33</sup> Moses sê toe vir Aäron: Neem 'n kruik en gooi 'n gomer vol manna daarin, en sit dit voor die aangesig van die HERE neer, om dit vir julle geslagte te bewaar.

<sup>34</sup> Soos die HERE Moses beveel het, so het Aäron dit voor die Getuienis neergesit om bewaar te word.

<sup>35</sup> En die kinders van Israel het die manna

veertig jaar lank geëet totdat hulle in 'n bewoonde land gekom het. Die manna het hulle geëet totdat hulle by die grens van die land Kanaän gekom het.

<sup>36</sup> En 'n gomer is die tiende van 'n efa.

**17** DAAROP het die hele vergadering van die kinders van Israel, volgens die bevel van die HERE, van plek tot plek uit die woestyn Sin getrek en laer opgeslaan in Ráfidim. En daar was geen water vir die volk om te drink nie.

<sup>2</sup> Toe twis die volk met Moses en sê: Gee julle vir ons water om te drink. Maar Moses antwoord hulle: Wat twis julle met my? Waarom versoek julle die HERE?

<sup>3</sup> Maar die volk het daar gesmag na water, en die volk het teen Moses gemurmureer en gesê: Waarom het u ons dan uit Egipte laat optrek om my en my kinders en my vee van dors te laat omkom?

<sup>4</sup> Toe het Moses die HERE aangeroep en gesê: Wat moet ek met hierdie volk doen? Dit skeel maar min of hulle stenig my.

<sup>5</sup> En die HERE het Moses geantwoord: Trek voor die volk uit, en neem van die oudstes van Israel met jou saam; en neem jou staf waarmee jy die Nyl geslaan het, in jou hand en gaan weg.

<sup>6</sup> Kyk, Ek sal daar voor jou by die rots op Horeb staan; dan moet jy die rots slaan, en daar sal water uit kom, dat die volk kan drink. En Moses het so gedoen voor die oë van die oudstes van Israel

<sup>7</sup> en die plek Massa en Mériba genoem vanweë die twis van die kinders van Israel en omdat hulle die HERE versoek het deur te sê: Is die HERE in ons midde of nie?

## Exodus 18

<sup>8</sup> DAAROP het Ámalek gekom om teen Israel by Ráfídim te veg.

<sup>9</sup> En Moses het aan Josua gesê: Kies vir ons manne en trek uit, veg teen Ámalek. Môre sal ek op die top van die heuwel staan met die staf van God in my hand.

<sup>10</sup> En Josua het gedoen soos Moses aan hom gesê het, om te veg teen Ámalek. Maar Moses, Aäron en Hur het op die top van die heuwel geklim.

<sup>11</sup> En telkens as Moses sy hand ophou, was Israel die sterkste; maar as hy sy hand laat sak, was Ámalek die sterkste.

<sup>12</sup> Maar die hande van Moses het swaar geword; daarom het hulle 'n klip geneem en dit onder hom neergelê, dat hy daarop kon sit. En Aäron en Hur het sy hande ondersteun, die een duskant en die ander anderkant. So het sy hande dan vas gebly tot sononder.

<sup>13</sup> En Josua het Ámalek en sy volk met die skerpste van die swaard 'n neerlaag toegebring.

<sup>14</sup> Toe sê die HERE vir Moses: Skrywe dit as 'n aandenking in 'n boek en prent dit Josua in, dat Ek die gedagtenis van Ámalek onder die hemel heeltemal sal uitdelg.

<sup>15</sup> En Moses het 'n altaar gebou en dit genoem: Die HERE is my banier.

<sup>16</sup> En hy het gesê: Waarlik, die hand op die troon van die HERE! Oorlog het die HERE teen Ámalek van geslag tot geslag.

**18** TOE Jetro, die priester van Mídián, Moses se skoonvader, hoor alles wat God aan Moses en aan sy volk Israel gedoen het—dat die HERE Israel uit Egipte uitgelei het—

<sup>2</sup> het Jetro, Moses se skoonvader, Sippóra, die vrou van Moses, geneem—nadat hy haar teruggestuur het—

<sup>3</sup> en haar twee seuns. (Die naam van die een was Gersom, want hy het gesê: Ek het 'n vreemdeling geword in 'n vreemde land;

<sup>4</sup> en die naam van die ander was Eliëser; want, het hy gesê, die God van my vader is my hulp en het my van Farao se swaard verlos.)

<sup>5</sup> En Jetro, Moses se skoonvader, het met sy seuns en sy vrou na Moses gekom in die woestyn waar hy by die berg van God met die laer gestaan het.

<sup>6</sup> En hy het Moses laat weet: Ek, jou skoonvader Jetro, kom na jou met jou vrou en haar twee seuns saam met haar.

<sup>7</sup> Daarop gaan Moses uit, sy skoonvader tegemoet, en hy het gebuig en hom gesoen; en hulle het na mekaar se welstand gevra en in die tent ingegaan.

<sup>8</sup> Moses vertel toe aan sy skoonvader alles wat die HERE aan Farao en aan die Egiptenaars, ter wille van Israel, gedoen het; al die moeilikheid wat hulle op die pad oorgekom het, en dat die HERE hulle verlos het.

<sup>9</sup> En Jetro het hom verheug oor al die goeie wat die HERE aan Israel gedoen het, dat Hy hulle uit die hand van die Egiptenaars verlos het.

<sup>10</sup> Daarop sê Jetro: Geseënd is die HERE wat julle verlos het uit die hand van die Egiptenaars en uit die hand van Farao, wat die volk onder die hand van die Egiptenaars uit verlos het.

<sup>11</sup> Nou weet ek dat die HERE groter is as al

## Exodus 19

die gode, naamlik in die saak waarin hulle vermetel was teen hulle.

<sup>12</sup> Daarop het Jetro, Moses se skoonvader, 'n brandoffer en slagoffers geneem tot eer van God. En Aäron en al die oudstes van Israel het gekom om saam met Moses se skoonvader brood te eet voor die aangesig van God.

<sup>13</sup> En die volgende dag het Moses gesit om reg te spreek vir die volk; en die volk het voor Moses gestaan van die môre tot die aand toe.

<sup>14</sup> En toe Moses se skoonvader sien alles wat hy vir die volk doen, sê hy: Wat is dit wat jy vir die volk doen? Waarom sit jy alleen, en die hele volk staan voor jou van die môre tot die aand toe?

<sup>15</sup> En Moses antwoord sy skoonvader: Omdat die volk na my kom om God te raadpleeg.

<sup>16</sup> As hulle 'n saak het, kom hulle na my; en dan moet ek regsprek tussen die partye en die insettinge van God en sy wette bekend maak.

<sup>17</sup> Maar Moses se skoonvader sê vir hom: Die ding wat jy doen, is nie goed nie.

<sup>18</sup> Jy sal heeltemal uitgeput raak, jy sowel as hierdie volk wat by jou is. Want die saak is te swaar vir jou; jy kan dit nie alleen doen nie.

<sup>19</sup> Luister nou na my; ek sal jou raad gee, en God sal met jou wees. Wat jou betref, wees jy die verteenwoordiger van die volk by God en bring jý die sake voor God,

<sup>20</sup> en onderrig hulle in die insettinge en die wette, en maak hulle die weg bekend waarop hulle moet gaan, en die werk wat

hulle moet doen.

<sup>21</sup> Maar kies jy uit die hele volk bekwame manne wat God vrees, betroubare manne wat onregverdige wins haat. En stel dié aan oor hulle: owerstes oor duisend, owerstes oor honderd, owerstes oor vyftig en owerstes oor tien;

<sup>22</sup> en laat hulle voortdurend oor die volk die regspraak uitoefen: al die groot sake moet hulle na jou bring, maar in al die klein sake moet hulle self regsprek. Maak dit so ligter vir jou, en laat hulle saam met jou dra.

<sup>23</sup> As jy dit doen en God dit jou beveel, kan jy dit uithou en sal ook al hierdie mense tevrede na hulle woonplek gaan.

<sup>24</sup> Moses het toe geluister na sy skoonvader en alles gedoen wat hy gesê het—

<sup>25</sup> Moses het bekwame manne uit die hele Israel gekies en hulle as hoofde oor die volk aangestel—owerstes oor duisend, owerstes oor honderd, owerstes oor vyftig en owerstes oor tien.

<sup>26</sup> En hulle het voortdurend oor die volk die regspraak uitgeoefen: die moeilike sake het hulle na Moses gebring, maar in al die klein sake self reggesprek.

<sup>27</sup> Toe het Moses sy skoonvader laat gaan, en hy het na sy land getrek.

**19** IN die derde maand ná die uittog van die kinders van Israel uit Egipteland, op dieselfde dag, het hulle in die woestyn Sinai gekom—

<sup>2</sup> hulle het van Ráfidim af opgebreek en in die woestyn Sinai gekom en in die woestyn laer opgeslaan. En Israel het daar teenoor die berg laer opgeslaan.

## Exodus 19

---

<sup>3</sup> Maar Moses het opgeklim na God toe, en die HERE het hom van die berg af toegeroep en gesê: So moet jy aan die huis van Jakob sê en aan die kinders van Israel verkondig:

<sup>4</sup> Julle het self gesien wat Ek aan die Egiptenaars gedoen het, en dat Ek julle op arendsvlerke gedra en julle na My toe gebring het.

<sup>5</sup> As julle dan nou terdeë na my stem luister en my verbond hou, sal julle my eiendom uit al die volke wees, want die hele aarde is myne.

<sup>6</sup> En julle sal vir My 'n koninkryk van priesters en 'n heilige nasie wees. Dit is die woorde wat jy aan die kinders van Israel moet meedeel.

<sup>7</sup> En Moses het gekom en die oudstes van die volk laat roep en hulle al hierdie woorde voorgehou wat die HERE hom beveel het.

<sup>8</sup> Toe antwoord die hele volk eenparig en sê: Alles wat die HERE gespreek het, sal ons doen. En Moses het die woorde van die volk aan die HERE oorgebring.

<sup>9</sup> En die HERE het met Moses gespreek: Kyk, Ek sal in 'n dik wolk na jou toe kom, dat die volk kan hoor as Ek met jou spreek, en hulle ook vir altyd aan jôu kan glo. Want Moses het die woorde van die volk aan die HERE meegedeel.

<sup>10</sup> Verder het die HERE aan Moses gesê: Gaan na die volk en heilig hulle vandag en môre, en laat hulle hul klere was

<sup>11</sup> en hulle gereed hou teen die derde dag. Want op die derde dag sal die HERE voor die oë van die hele volk op die berg Sinai

afdaal.

<sup>12</sup> Ook moet jy vir die volk 'n grens rondom aanwys en sê: Pas op dat julle nie op die berg klim of sy voet aanraak nie. Elkeen wat die berg aanraak, moet sekerlik gedood word.

<sup>13</sup> Geen hand mag hom aanraak nie; maar hy moet sekerlik gestenig of sekerlik met 'n pyl geskiet word; of dit 'n dier of 'n mens is—hy mag nie lewe nie. As die ramshoring lang geluide blaas, mag hulle op die berg klim.

<sup>14</sup> Toe het Moses van die berg af na die volk gegaan en die volk geheilig, en hulle het hul klere gewas.

<sup>15</sup> En hy het aan die volk gesê: Hou julle klaar teen die derde dag; moenie naby die vrou kom nie.

<sup>16</sup> En op die derde dag toe dit môre word, was daar donderslae en blitse en 'n swaar wolk op die berg en die geluid van 'n baie sterk basuin, sodat die hele volk wat in die laer was, gebeef het.

<sup>17</sup> Daarop het Moses die volk uit die laer gelei om God te ontmoet, en hulle het gaan staan by die voet van die berg.

<sup>18</sup> En die hele berg Sinai het gerook, omdat die HERE in 'n vuur daarop neergedaal het. En sy rook het opgetrek soos die rook van 'n oond, en die hele berg het vreeslik gebewe.

<sup>19</sup> Toe die geluid van die basuin sterker en sterker word, het Moses gespreek, en God het hom telkens hardop geantwoord.

<sup>20</sup> Terwyl die HERE op die berg Sinai neerdaal, op die top van die berg, het die HERE Moses na die top van die berg



## Exodus 20

geroep, en Moses het opgeklim.

<sup>21</sup> En die HERE het vir Moses gesê: Klim af, waarsku die volk, dat hulle nie na die HERE toe deurbreek om te sien en baie van hulle dan val nie.

<sup>22</sup> En ook die priesters wat naby die HERE kom, moet hulleself heilig, sodat die HERE nie teen hulle losbreek nie.

<sup>23</sup> Toe het Moses die HERE geantwoord: Die volk kan nie op die berg Sinai klim nie, want U het ons self gewaarsku en gesê: Baken die berg af en heilig dit.

<sup>24</sup> Daarop sê die HERE vir hom: Gaan heen, klim af. Dan moet jy, en Aäron saam met jou, opklim; maar die priesters en die volk mag nie deurbreek om na die HERE toe op te klim nie, sodat Hy nie teen hulle losbreek nie.

<sup>25</sup> En Moses het na die volk toe afgeklim en hulle dit aangesê.

**20** TOE het God al hierdie woorde gespreek en gesê:

<sup>2</sup> Ek is die HERE jou God wat jou uit Egipteland, uit die slawehuis, uitgelei het.

<sup>3</sup> Jy mag geen ander gode voor my aangesig hê nie.

<sup>4</sup> Jy mag vir jou geen gesnede beeld of enige gelykenis maak van wat bo in die hemel is, of van wat onder op die aarde is, of van wat in die waters onder die aarde is nie.

<sup>5</sup> Jy mag jou voor hulle nie neerbuig en hulle nie dien nie; want Ek, die HERE jou God, is 'n jaloerse God wat die misdaad van die vaders besoek aan die kinders, aan die derde en aan die vierde geslag van die wat My haat;

<sup>6</sup> en Ek bewys barmhartigheid aan duisende van die wat My liefhet en my gebooie onderhou.

<sup>7</sup> Jy mag die Naam van die HERE jou God nie ydellik gebruik nie, want die HERE sal die een wat sy Naam ydellik gebruik, nie ongestraf laat bly nie.

<sup>8</sup> Gedenk die sabbatdag, dat jy dit heilig.

<sup>9</sup> Ses dae moet jy arbei en al jou werk doen;

<sup>10</sup> maar die sewende dag is die sabbat van die HERE jou God; dan mag jy géén werk doen nie—jy of jou seun of jou dogter, of jou dienskneg of jou diensmaagd, of jou vee of jou vreemdeling wat in jou poorte is nie.

<sup>11</sup> Want in ses dae het die HERE die hemel en die aarde gemaak, die see en alles wat daarin is, en op die sewende dag het Hy gerus. Daarom het die HERE die sabbatdag geseën en dit geheilig.

<sup>12</sup> Eer jou vader en jou moeder, dat jou dae verleng mag word in die land wat die HERE jou God aan jou gee.

<sup>13</sup> Jy mag nie doodslaan nie.

<sup>14</sup> Jy mag nie egbreek nie.

<sup>15</sup> Jy mag nie steel nie.

<sup>16</sup> Jy mag geen valse getuienis teen jou naaste spreek nie.

<sup>17</sup> Jy mag nie jou naaste se huis begeer nie; jy mag nie jou naaste se vrou begeer nie, of sy dienskneg of sy diensmaagd, of sy os of sy esel of iets wat van jou naaste is nie.

<sup>18</sup> En toe die hele volk die donderslae en die blitse en die geluid van die basuin en die rokende berg bemerk, het die volk dit gesien en gebewe en op 'n afstand bly staan.

## Exodus 21

<sup>19</sup> En hulle het vir Moses gesê: Spreek u met ons, dat ons kan luister; maar laat God nie met ons spreek nie, anders sterwe ons.

<sup>20</sup> Toe antwoord Moses die volk: Wees nie bevrees nie, want God het gekom om julle te beproef en dat sy vrees voor julle oë mag wees, sodat julle nie sondig nie.

<sup>21</sup> So het die volk dan op 'n afstand bly staan. Maar Moses het nader gegaan na die wolkedonkerheid waar God was.

<sup>22</sup> Toe sê die HERE vir Moses: So moet jy met die kinders van Israel spreek: Julle het self gesien dat Ek met julle van die hemel af gespreek het.

<sup>23</sup> Julle mag naas My geen silwergode maak en geen goue gode vir julle maak nie.

<sup>24</sup> 'n Altaar van grond moet jy vir My maak, en daarop moet jy jou brandoffers en dankoffers, jou kleinvee en beeste, offer. Op elke plek waar Ek my Naam sal laat gedenk, sal Ek na jou toe kom en jou seën.

<sup>25</sup> Maar as jy vir My 'n klipaltaar maak, mag jy dit nie bou van gekapte klip nie; want as jy jou ystergereedskap daaroor swaai, dan ontheilig jy dit.

<sup>26</sup> Jy mag ook nie met trappe na my altaar opklim nie, dat jou skaamte nie daarop ontbloot word nie.

**21** EN dit is die verordeninge wat jy hulle moet voorhou:

<sup>2</sup> As jy 'n Hebreeuse slaaf koop, moet hy ses jaar lank dien, maar in die sewende moet hy as vryman verniet weggaan.

<sup>3</sup> As hy alleen kom, moet hy alleen vrygelaat word; as hy getroud is, moet sy vrou saam met hom vrygelaat word.

<sup>4</sup> As sy heer aan hom 'n vrou gee en sy vir

hom seuns of dogters baar, moet die vrou met haar kinders haar heer se eiendom wees, terwyl hy alleen vrygelaat word.

<sup>5</sup> Maar as die slaaf reguit sê: Ek het my heer, my vrou en my kinders lief; ek wil nie as vryman weggaan nie—

<sup>6</sup> dan moet sy heer hom na die owerhede bring en hom by die deur of die deurpos bring; en sy heer moet sy oor met 'n els deurboor; daarna moet hy hom vir altyd dien.

<sup>7</sup> En as iemand sy dogter as slavin verkoop, mag sy nie soos die slawe weggaan nie.

<sup>8</sup> As sy haar heer nie beval nie wat haar vir homself bestem het, moet hy haar laat loskoop. Hy is nie geregtig om haar aan 'n vreemde volk te verkoop nie, omdat hy troueloos met haar gehandel het.

<sup>9</sup> Maar as hy haar vir sy seun bestem, moet hy met haar handel volgens die reg van die dogters;

<sup>10</sup> as hy vir hom 'n ander een neem, mag hy haar voedsel, haar klere en haar huweliksgemeenskap nie verminder nie.

<sup>11</sup> En as hy hierdie drie dinge nie vir haar doen nie, kan sy verniet weggaan, sonder geld.

<sup>12</sup> Hy wat 'n mens slaan, dat hy sterwe, moet sekerlik gedood word.

<sup>13</sup> Maar as hy dit daar nie op toegelê het nie, maar God dit sy hand laat ontmoet het, dan sal Ek jou 'n plek aanwys waarheen hy kan vlug.

<sup>14</sup> Maar as iemand moedswillig teen sy naaste handel, om hom met lis dood te maak, moet jy hom van my altaar af

## Exodus 22

---

wegneem, om te sterwe.

<sup>15</sup> En hy wat sy vader of moeder slaan, moet sekerlik gedood word.

<sup>16</sup> En hy wat 'n mens steel en hom verkoop—of as hy in sy besit gevind word—dié moet sekerlik gedood word.

<sup>17</sup> En hy wat sy vader of moeder vloek, moet sekerlik gedood word.

<sup>18</sup> En as manne twis en die een die ander slaan met 'n klip of met die vuus, sodat hy nie sterwe nie, maar bedlêend word—

<sup>19</sup> as hy weer opstaan en buite met sy stok rondloop, moet hy wat geslaan het, ongestraf bly; net sy tydverlies moet hy vergoed en sorg dat hy heeltemal gesond word.

<sup>20</sup> En as iemand sy slaaf of slavin met 'n stok slaan, dat dié onder sy hand sterwe, moet dit sekerlik gewreek word.

<sup>21</sup> Maar as hy ná een of twee dae nog lewe, moet dit nie gewreek word nie, want hy is sy eiendom.

<sup>22</sup> En as manne met mekaar veg en 'n swanger vrou so stamp dat haar vrug afgaan, maar daar geen ander letsel is nie, moet hy sekerlik boete betaal soos die man van die vrou hom dit oplê, en hy moet dit deur skeidsregters gee.

<sup>23</sup> Maar is daar 'n letsel, dan moet jy gee lewe vir lewe,

<sup>24</sup> oog vir oog, tand vir tand, hand vir hand, voet vir voet,

<sup>25</sup> brandplek vir brandplek, wond vir wond, kwesplek vir kwesplek.

<sup>26</sup> En as iemand sy slaaf of slavin op die oog slaan en hy dit beskadig, moet hy hom vry laat weggaan vir sy oog.

<sup>27</sup> En as hy die tand van sy slaaf of die tand van sy slavin uitslaan, moet hy hom vry laat weggaan vir sy tand.

<sup>28</sup> En as 'n bees 'n man of 'n vrou stoot, sodat hy sterwe, moet die bees sekerlik gestenig word; en sy vleis mag nie geëet word nie, maar die baas van die bees sal ongestraf bly.

<sup>29</sup> Maar as die bees tevore al stoterig gewees het en sy baas gewaarsku was, maar dit nie opgepas het nie, en dit 'n man of 'n vrou doodmaak, moet die bees gestenig word, en sy baas moet ook gedood word.

<sup>30</sup> As aan hom losgeld opgelê word, moet hy vir die lossing van sy lewe alles gee wat hom opgelê word.

<sup>31</sup> Of dit 'n seun gestoot het of 'n dogter, volgens hierdie reg moet met hom gehandel word.

<sup>32</sup> As die bees 'n slaaf of slavin stoot, moet hy aan hulle heer dertig sikkels silwer gee, en die bees moet gestenig word.

<sup>33</sup> En as iemand 'n put oopmaak, of as iemand 'n put grawe en dit nie toemaak nie, en 'n bees of esel val daarin,

<sup>34</sup> moet die eienaar van die put vergoeding gee: hy moet aan die eienaar van die dier geld gee, maar die dooie dier moet syne wees.

<sup>35</sup> En as iemand se bees die bees van 'n ander stoot, sodat dit sterwe, moet hulle die lewendige bees verkoop en die geld daarvan verdeel; en die dooie een moet hulle ook verdeel.

<sup>36</sup> Of as dit bekend was dat die bees tevore al stoterig gewees het, en sy baas dit nie

## Exodus 22

opgepas het nie, moet hy ten volle bees vir bees vergoed; maar die dooie een moet syne wees.

**22** AS iemand 'n bees of 'n stuk kleinvee steel en dit slag of verkoop, moet hy vyf beeste vir 'n bees vergoed en vier stuks kleinvee vir 'n stuk kleinvee.

<sup>2</sup> As 'n dief betrap word terwyl hy inbreek, en hy word geslaan, sodat hy sterwe, sal daardeur geen bloedskuld ontstaan nie;

<sup>3</sup> as die son oor hom opgegaan het, ontstaan daardeur bloedskuld. Hy moet ten volle vergoeding gee; as hy niks het nie, moet hy vir sy diefstal verkoop word.

<sup>4</sup> As die gesteelde goed—of dit 'n bees, 'n esel of 'n stuk kleinvee is—nog lewendig in sy besit gevind word, moet hy dubbel vergoeding gee.

<sup>5</sup> As iemand 'n stuk veld of 'n wingerd laat afwei en sy vee vry laat loop, sodat dit in die veld van 'n ander wei, moet hy van die beste van sy veld en die beste van sy wingerd as vergoeding gee.

<sup>6</sup> As 'n vuur uitbreek en die dorings vat, sodat 'n mied of die ongesnyde graan of die veld verteer word, moet hy wat die vuur aan die brand gestee het, ten volle vergoeding gee.

<sup>7</sup> As iemand aan sy naaste geld of goed in bewaring gee, en dit word uit die man se huis gesteel, moet die dief, as hy uitgevind word, dubbel vergoeding gee.

<sup>8</sup> As die dief nie uitgevind word nie, moet die eienaar van die huis na die owerhede gaan om te beslis of hy nie sy hand na sy naaste se goed uitgesteek het nie.

<sup>9</sup> By alle sake van ontvreemding, of dit gaan oor 'n bees, oor 'n esel, oor kleinvee, oor klere of oor enigiets wat verloor is, waarvan iemand sê: Dit is myne!—moet die saak van altwee voor die owerhede kom; die een wat die owerhede skuldig verklaar, moet aan sy naaste dubbel vergoeding gee.

<sup>10</sup> As iemand aan sy naaste 'n esel of bees of stuk kleinvee of enige dier gee om op te pas, en dit gaan dood of kry 'n ongeluk of word weggevoer sonder dat iemand dit sien,

<sup>11</sup> dan moet die eed by die HERE tussen hulle twee beslis, of hy nie sy hand na sy naaste se goed uitgesteek het nie; en die eienaar moet daarmee tevrede wees, en die ander hoef geen vergoeding te gee nie.

<sup>12</sup> Maar as dit van hom weggesteel is, moet hy aan die eienaar vergoeding gee.

<sup>13</sup> As dit verskeur is, moet hy dit as bewys bring; wat verskeur is, hoef hy nie te vergoed nie.

<sup>14</sup> En as iemand van sy naaste iets te leen vra, en dit kry 'n ongeluk of gaan dood terwyl die eienaar daar nie by is nie, moet hy ten volle vergoeding gee.

<sup>15</sup> As die eienaar daarby gewees het, hoef hy geen vergoeding te gee nie. As dit gehuur was, kom die huurgeld daarvoor.

<sup>16</sup> As iemand 'n jongmeisie wat nie verloof is nie, verlei en met haar gemeenskap het, moet hy haar vir die volle huweliksprys as sy vrou koop.

<sup>17</sup> As haar vader beslis weier om haar aan hom te gee, moet hy geld gee volgens die huweliksprys vir jongmeisies.

## Exodus 23

<sup>18</sup> Die towerheks mag jy nie laat lewe nie.

<sup>19</sup> Elkeen wat met 'n dier gemeenskap het, moet sekerlik gedood word.

<sup>20</sup> Hy wat aan die gode offer, behalwe aan die HERE alleen, moet met die banvloek getref word.

<sup>21</sup> Jy mag ook die vreemdeling nie kwel of hom verdruk nie, want julle was vreemdelinge in Egipteland.

<sup>22</sup> Julle mag geen weduwee of wees verdruk nie.

<sup>23</sup> As jy hulle op enige manier verdruk, waarlik, dan sal Ek, as hulle na My roep, hulle geroep sekerlik hoor,

<sup>24</sup> en my toorn sal ontvlam, en Ek sal julle met die swaard ombring, sodat julle vroue weduwees en julle kinders wese word.

<sup>25</sup> As jy aan my volk, aan die arme by jou, geld leen, mag jy vir hom nie soos 'n skuldeiser wees nie: julle mag hom geen rente oplê nie.

<sup>26</sup> As jy ooit jou naaste se gewaad as pand neem, moet jy hom dit teruggee voor die son ondergaan;

<sup>27</sup> want dit is sy enigste bedekking, dit is die bekleding vir sy vel. Waarin moet hy anders slaap? En as hy na My roep, sal Ek hoor, want Ek is genadig.

<sup>28</sup> Jy mag God nie vloek nie, en 'n owerste onder jou volk mag jy nie verwens nie.

<sup>29</sup> Die offer uit jou volle opbrings en jou parskuip mag jy nie terughou nie. Die eersgeborene van jou seuns moet jy aan My gee.

<sup>30</sup> Jy moet dieselfde doen met jou beeste en jou kleinvee: sewe dae moet dit by sy moeder wees; op die agtste dag moet jy dit

aan My gee.

<sup>31</sup> En julle moet vir My heilige mense wees. Daarom mag julle nie vleis eet wat in die veld verskeur is nie. Julle moet dit vir die honde gooi.

**23** JY mag geen valse gerug rondstrooi nie. Verbind jou nie met die skuldige om 'n kwaadwillige getuie te wees nie.

<sup>2</sup> Jy mag die meerderheid nie volg in verkeerde dinge nie. En jy mag in 'n regspraak geen getuie aflê agter die meerderheid aan om die reg te verdraai nie.

<sup>3</sup> Ook mag jy die geringe nie voortrek in sy regspraak nie.

<sup>4</sup> As jy jou vyand se bees of esel teëkom wat rond dwaal, moet jy dit sekerlik vir hom terugbring.

<sup>5</sup> As jy jou vyand se esel onder sy pak sien lê, moet jy dit nie onverskillig aan hom oorlaat nie: jy moet dit sekerlik saam met hom aflaai.

<sup>6</sup> Jy mag die reg van jou arm mense in hulle regspraak nie verdraai nie.

<sup>7</sup> Hou jou ver van valse sake af. En moenie die onskuldige en die wat reg het, ombring nie, want Ek sal die skuldige nie regverdig verklaar nie.

<sup>8</sup> Ook mag jy geen omkoopgeskenk aanneem nie; want die geskenk maak die siendes blind en verdraai die sake van die regverdiges.

<sup>9</sup> Jy mag die vreemdeling ook nie verdruk nie; want julle ken self die gemoed van 'n vreemdeling, omdat julle vreemdelinge in Egipteland gewees het.

<sup>10</sup> En ses jaar lank moet jy jou land besaai

## Exodus 23

en die opbrings daarvan insamel;

<sup>11</sup> maar in die sewende moet jy dit ongebruik en braak laat lê, dat die armense van jou volk kan eet; en wat hulle laat oorbly, kan die diere van die veld opeet. So moet jy doen met jou wingerd en jou olyfbome.

<sup>12</sup> Ses dae moet jy jou werk verrig, maar op die sewende dag moet jy rus, dat jou os en jou esel kan uitrus en die seun van jou slavin en die vreemdeling kan asem skep.

<sup>13</sup> En in alles wat Ek julle gesê het, moet julle jul in ag neem. En die naam van ander gode mag julle nie vermeld nie; dit mag uit jou mond nie gehoor word nie.

<sup>14</sup> Drie maal in die jaar moet jy vir My 'n fees hou.

<sup>15</sup> Die fees van die ongesuurde brode moet jy hou: sewe dae lank moet jy ongesuurde brode eet soos Ek jou beveel het, op die bepaalde tyd in die maand Abib, want daarin het jy uit Egipte uitgetrek—maar hulle mag nie met leë hande voor my aangesig verskyn nie;

<sup>16</sup> verder die fees van die oes, van die eersteling van jou werk, van wat jy op die land saai; en ook die fees van die insameling aan die einde van die jaar as jy jou werk uit die land insamel.

<sup>17</sup> Drie maal in die jaar moet al jou manspersone voor die aangesig van die Here HERE verskyn.

<sup>18</sup> Jy mag die bloed van my offer nie saam met gesuurde brood offer nie. Ook mag die vet van my feesoffer nie tot die môre toe oorbly nie.

<sup>19</sup> Die beste van die eersteling van jou

grond moet jy in die huis van die HERE jou God bring. Jy mag die bokkie nie kook in sy moeder se melk nie.

<sup>20</sup> Kyk, Ek stuur 'n Engel voor jou uit om jou op die pad te bewaar en om jou na die plek te bring wat Ek gereedgemaak het.

<sup>21</sup> Neem jou in ag vir Hom en luister na sy stem; wees nie wederstrewig teen Hom nie; want Hy sal julle oortreding nie vergewe nie, want my Naam is in Hom.

<sup>22</sup> Maar as jy terdeë na sy stem luister en alles doen wat Ek sal sê, sal Ek die vyand van jou vyande en die teëstander van jou teëstanders wees.

<sup>23</sup> Want my Engel sal voor jou uit gaan en jou bring na die Amoriëte en Hetiëte en Feresiëte en Kanaäniete, Hewiëte en Jebusiëte; en Ek sal hulle vernietig.

<sup>24</sup> Jy mag jou voor hulle gode nie neerbuig en hulle nie dien nie, ook mag jy nie doen na hulle werke nie; maar jy moet hulle heeltemal afbreek en hulle klippilare kort en klein slaan.

<sup>25</sup> En julle moet die HERE julle God dien; dan sal Hy jou brood en jou water seën, en Ek sal siektes uit jou midde verwyder.

<sup>26</sup> Daar sal geen misdragtige of onvrugbare in jou land wees nie. Ek sal die getal van jou dae vol maak.

<sup>27</sup> Ek sal my skrik voor jou uit stuur en elke volk waarby jy kom, in verwarring bring. En Ek sal al jou vyande vir jou laat vlug.

<sup>28</sup> Ook sal Ek perdebye voor jou uit stuur; dié sal die Hewiëte, Kanaäniete en Hetiëte voor jou uit verdrywe.

<sup>29</sup> Ek sal hulle nie in een jaar voor jou uit verdrywe nie, dat die land nie woest word

## Exodus 24

en die ongediertes nie teen jou te veel word nie.

<sup>30</sup> Ek sal hulle so langamerhand voor jou uit verdrywe, totdat jy vrugbaar word en die land beërwe.

<sup>31</sup> En Ek sal jou grense vasstel van die Skelfsee af tot by die See van die Filistyne, en van die woestyn af tot by die Eufraat. Want Ek sal die inwoners van die land in julle hand gee, en jy sal hulle voor jou uit verdrywe.

<sup>32</sup> Jy mag met hulle of met hulle gode geen verbond maak nie.

<sup>33</sup> Hulle mag in jou land nie woon nie, dat hulle jou nie verlei om teen My te sondig nie. Want jy sal hulle gode dien, ja, dit sal vir jou 'n strik wees.

**24** DAARNA het Hy vir Moses gesê: Klim na die HERE toe op, jy en Aäron, Nadab en Abihu en sewentig van die oudstes van Israel, en buig julle neer van ver af.

<sup>2</sup> En laat Moses alleen nader kom na die HERE toe, maar hulle moet nie nader kom nie; en die volk mag nie saam met hom opklim nie.

<sup>3</sup> Toe Moses kom en aan die volk al die woorde van die HERE en al die verordeninge vertel, antwoord die hele volk met een stem en sê: Al die woorde wat die HERE gespreek het, sal ons doen.

<sup>4</sup> En Moses het al die woorde van die HERE opgeskrywe en die môre vroeg hom klaargemaak en onder die berg 'n altaar gebou, en twaalf gedenkstone volgens die twaalf stamme van Israel.

<sup>5</sup> En hy het jongmanne van die kinders van

Israel gestuur; dié het brandoffers geoffer en as dankoffers bulle vir die HERE geslag.

<sup>6</sup> En Moses het die helfte van die bloed geneem en dit in komme gegooi en die helfte van die bloed teen die altaar uitgegooi.

<sup>7</sup> En hy het die boek van die verbond geneem en dit voor die ore van die volk geles. En hulle het gesê: Alles wat die HERE gespreek het, sal ons doen en daarna luister.

<sup>8</sup> Toe neem Moses die bloed en gooi dit uit op die volk en sê: Dit is die bloed van die verbond wat die HERE met julle gesluit het op grond van al hierdie woorde.

<sup>9</sup> Daarop het Moses opgeklim met Aäron, Nadab en Abihu en sewentig van die oudstes van Israel.

<sup>10</sup> En hulle het die God van Israel gesien, en onder sy voete net soos 'n vloerwerk van saffierstone en so helder soos die hemel self.

<sup>11</sup> Maar Hy het sy hand nie na die uitgesoektes van die kinders van Israel uitgestrek nie, en hulle het God aanskou; daarop het hulle geëet en gedrink.

<sup>12</sup> Toe sê die HERE vir Moses: Klim op die berg na My toe en vertoef daar, dat Ek jou die kliptafels kan gee en die wet en gebooie wat Ek geskryf het om hulle te onderrig.

<sup>13</sup> Hierop het Moses klaargemaak en Josua, sy dienaar. En Moses het op die berg van God geklim

<sup>14</sup> en aan die oudstes gesê: Wag hier vir ons tot ons na julle terugkom. En kyk, Aäron en Hur is by julle; wie regsake het, kan na hulle gaan.

## Exodus 25

<sup>15</sup> Toe Moses die berg opklim, het 'n wolk die berg oordek.

<sup>16</sup> En die heerlijkheid van die HERE het op die berg Sinai gebly, en die wolk het dit ses dae lank oordek. En op die sewende dag het Hy na Moses geroep uit die wolk.

<sup>17</sup> En die verskyning van die HERE se heerlijkheid was in die oë van die kinders van Israel soos 'n verterende vuur op die top van die berg.

<sup>18</sup> En Moses het binne-in die wolk ingegaan en die berg opgeklim. En Moses was op die berg veertig dae en veertig nagte.

**25** TOE het die HERE met Moses gespreek en gesê:

<sup>2</sup> Sê aan die kinders van Israel dat hulle aan My 'n offergawe moet bring; van elkeen wie se hart hom aandrywe, moet julle my offergawe bring.

<sup>3</sup> En dit is die offergawe wat julle van hulle kant moet bring: goud en silwer en koper;

<sup>4</sup> en pers en purperrooi en bloedrooi stowwe en fyn linne en bokhaar;

<sup>5</sup> en rooigeverfde ramsvelle en robbevelle en akasiahout;

<sup>6</sup> olie vir die kandelaar, speserye vir die salfolie en vir die reukwerk van speserye;

<sup>7</sup> oniksstene en stene om in te lê vir die skouerkleed en die borstas.

<sup>8</sup> Ook moet hulle vir My 'n heiligdom maak, dat Ek in hulle midde kan woon.

<sup>9</sup> Volgens alles wat Ek jou laat sien—die voorbeeld van die tabernakel en die voorbeeld van alles wat daarby behoort—so moet julle dit maak.

<sup>10</sup> HULLE moet dan 'n ark van akasiahout

maak. Twee en 'n half el moet sy lengte, en anderhalf el sy breedte, en anderhalf el sy hoogte wees.

<sup>11</sup> En jy moet dit oortrek met suiwer goud, van binne en van buite moet jy dit oortrek. En jy moet daaraan 'n goue krans maak rondom.

<sup>12</sup> En giet daarvoor vier goue ringe, en sit dit aan sy vier voete vas, só dat twee ringe aan die een kant en twee ringe aan die ander kant is.

<sup>13</sup> En maak draaghoute van akasiahout, en trek dit oor met goud.

<sup>14</sup> En steek die draaghoute in die ringe aan weerskante van die ark om die ark daarmee te dra.

<sup>15</sup> Die draaghoute moet in die ringe van die ark bly; hulle mag daar nie uit weggeneem word nie.

<sup>16</sup> Daarna moet jy in die ark die Getuienis sit wat Ek aan jou sal gee.

<sup>17</sup> Maak ook 'n versoendeksel van suiwer goud. Twee en 'n half el moet sy lengte, en anderhalf el sy breedte wees.

<sup>18</sup> Maak ook twee gérubs van goud. Van dryfwerk moet jy hulle maak, aan die twee ente van die versoendeksel.

<sup>19</sup> En maak een gérub aan die een ent en een gérub aan die ander ent. Uit een stuk, saam met die versoendeksel, moet julle die gérubs maak, aan die twee ente.

<sup>20</sup> En die gérubs moet die vlerke boontoe uitgesprei hou, terwyl hulle met hul vlerke die versoendeksel beskut; en hulle aangesigte moet na mekaar toe wees; die gesigte van die gérubs moet op die versoendeksel gerig wees.



## Exodus 26

<sup>21</sup> En sit die versoendeksel bo-op die ark; maar in die ark moet jy die Getuienis neerlê wat Ek aan jou sal gee.

<sup>22</sup> En daar sal Ek met jou saamkom, en van die versoendeksel af, tussen die twee gérubs uit wat op die ark van die Getuienis is, sal Ek jou alles sê wat Ek jou vir die kinders van Israel sal beveel.

<sup>23</sup> MAAK ook 'n tafel van akasiahout. Twee el moet sy lengte, en 'n el sy breedte, anderhalf el sy hoogte wees.

<sup>24</sup> En trek dit oor met suiwer goud, en maak daarvoor 'n goue krans rondom.

<sup>25</sup> Maak daarvoor ook 'n lys van 'n handbreed rondom; en maak 'n goue krans vir die lys rondom.

<sup>26</sup> En maak daar vier goue ringe voor, en sit die ringe vas aan die vier hoeke van die vier pote.

<sup>27</sup> Naby die lys moet die ringe wees as plekke vir die draaghoute om die tafel te dra.

<sup>28</sup> En maak die draaghoute van akasiahout, en trek dit oor met goud; daarmee moet dan die tafel gedra word.

<sup>29</sup> Maak ook sy skottels en sy rookpanne en sy kanne en sy bekere waarmee gegiet moet word; van suiwer goud moet jy dit maak.

<sup>30</sup> En op die tafel moet jy altyddeur toonbrood voor my aangesig neersit.

<sup>31</sup> MAAK ook 'n kandelaar van suiwer goud. Van dryfwerk moet die kandelaar, sy voetstuk en sy stam gemaak word; sy kelkies, sy knoppe en sy blomme moet, daarmee saam, uit een stuk wees.

<sup>32</sup> En ses arms moet uit die sykante

daarvan uitgaan: drie arms van die kandelaar uit die een kant en drie arms van die kandelaar uit die ander kant.

<sup>33</sup> Drie kelkies soos amandelblomme aan die een arm, 'n knop en 'n blom, en drie kelkies soos amandelblomme aan die ander arm, 'n knop en 'n blom—so moet dit wees aan die ses arms wat uit die kandelaar uitgaan.

<sup>34</sup> Maar aan die kandelaar self moet vier kelkies soos amandelblomme wees, met knoppe en blomme:

<sup>35</sup> daar moet 'n knop wees onder die eerste paar arms wat daaruit uitgaan; en 'n knop onder die tweede paar arms wat daaruit uitgaan; en 'n knop onder die derde paar arms wat daaruit uitgaan—vir die ses arms wat uit die kandelaar uitgaan.

<sup>36</sup> Hulle knoppe en hulle arms moet, daarmee saam, uit een stuk wees—alles saam een stuk dryfwerk van suiwer goud.

<sup>37</sup> Jy moet ook sewe lampe daarvoor maak, en hulle moet sy lampe opsteek en die lig daarteenoor laat val aan die voorkant.

<sup>38</sup> Sy snuiters en sy bakkies moet van suiwer goud wees.

<sup>39</sup> Van 'n talent suiwer goud moet hulle dit maak—al hierdie voorwerpe.

<sup>40</sup> En kyk dat jy dit maak volgens die voorbeeld daarvan wat jou op die berg getoon is.

**26** EN die tabernakel moet jy van tien tentdoeke maak, van fyn dubbeldraad-linne en pers en purperrooi en bloedrooi stowwe, met gérubs; as kunstige werk moet jy dit maak.

<sup>2</sup> Die lengte van elke tentdoek moet

## Exodus 26

---

agt-en-twintig el wees en die breedte van elke tentdoek vier el. Al die tentdoeke moet een maat hê.

<sup>3</sup> Vyf van die tentdoeke moet aanmekaargewerk wees, die een aan die ander. En weer vyf tentdoeke aanmekaar, die een aan die ander.

<sup>4</sup> En jy moet lissies van pers stof maak aan die soom van die buitenste tentdoek van die een stel. En so moet jy dit maak aan die soom van die laaste tentdoek van die tweede stel.

<sup>5</sup> Vyftig lissies moet jy aan die een tentdoek maak, en vyftig lissies moet jy maak aan die rand van die tentdoek wat aan die tweede stel behoort. Die lissies moet die een teenoor die ander wees.

<sup>6</sup> Jy moet ook vyftig goue hakies maak en die tentdoeke saamvoeg met die hakies, die een aan die ander, sodat die tabernakel een geheel is.

<sup>7</sup> Ook moet jy doeke van bokhaar maak as 'n tentseil oor die tabernakel: elf tentdoeke moet jy dit maak.

<sup>8</sup> Die lengte van elke tentdoek moet dertig el wees en die breedte van elke tentdoek vier el: die elf tentdoeke moet een maat hê.

<sup>9</sup> En jy moet vyf van die tentdoeke besonders aanmekaarwerk en ses van die tentdoeke besonders. En die sesde tentdoek moet jy dubbel vou, aan die voorkant van die tent.

<sup>10</sup> En jy moet vyftig lissies maak aan die soom van die laaste tentdoek van die een stel, en vyftig lissies aan die soom van die laaste tentdoek van die tweede stel.

<sup>11</sup> Jy moet ook vyftig koperhakies maak en

die hakies in die lissies steek; en jy moet die tent saamvoeg, sodat dit een geheel is.

<sup>12</sup> En wat betref die oorhangende gedeelte aan die tentdoeke—die helfte van die tentdoek wat oorskiet, moet oorhang aan die agterkant van die tabernakel.

<sup>13</sup> En die el wat aan weerskante oorskiet in die lengte van die tentdoeke, moet oorhang aan die sykante van die tabernakel, aan weerskante, om dit te oordek.

<sup>14</sup> Jy moet ook vir die tent 'n dekkleed van rooigeverfde ramsvelle maak en 'n dekkleed van robbevelle daar bo-oor.

<sup>15</sup> Jy moet ook vir die tabernakel die regopstaande style van akasiahout maak.

<sup>16</sup> Die lengte van die styl moet tien el wees, en anderhalf el die breedte van elke styl.

<sup>17</sup> Elke styl moet twee tappe hê wat met mekaar verbind is. So moet jy dit maak vir al die style van die tabernakel.

<sup>18</sup> En die style vir die tabernakel moet jy maak: twintig style aan die suidekant, na die suide toe.

<sup>19</sup> Jy moet ook veertig silwervoetstukke onder die twintig style maak: twee voetstukke onder die een styl vir sy twee tappe en twee voetstukke onder die ander styl vir sy twee tappe.

<sup>20</sup> En vir die ander sykant van die tabernakel, aan die noordekant, twintig style

<sup>21</sup> met hulle veertig silwervoetstukke: twee voetstukke onder die een styl en twee voetstukke onder die ander styl.

<sup>22</sup> En vir die agterkant van die tabernakel, teen die weste, moet jy ses style maak.

<sup>23</sup> Ook moet jy twee style maak vir die

## Exodus 27

hoeke van die tabernakel, aan die agterkant.

<sup>24</sup> En hulle moet van onder dubbel wees, en net so moet hulle bo dubbel wees tot by die eerste ring. So moet dit met altwee wees; hulle moet die twee hoeke vorm.

<sup>25</sup> So moet daar dan agt style wees met hulle silwervoetstukke, sestien voetstukke: twee voetstukke onder die een styl en twee voetstukke onder die ander styl.

<sup>26</sup> Jy moet ook dwarshoute van akasiahout maak: vyf vir die style van die een sykant van die tabernakel

<sup>27</sup> en vyf dwarshoute vir die style van die ander sykant van die tabernakel; ook vyf dwarshoute vir die style van die agterkant van die tabernakel teen die weste.

<sup>28</sup> En die middelste dwarshout moet in die middel van die style oordwars loop, van die een ent na die ander.

<sup>29</sup> En jy moet die style met goud oortrek; en hulle ringe, as plekke vir die dwarshoute, moet jy van goud maak. Die dwarshoute moet jy ook met goud oortrek.

<sup>30</sup> So moet jy dan die tabernakel oprig volgens die plan wat jou op die berg getoon is.

<sup>31</sup> VERDER moet jy 'n voorhangsel maak van pers en purperrooi en bloedrooi stowwe en fyn dubbeldraad-linne. As kunstige werk moet jy dit maak, met gérubs.

<sup>32</sup> En jy moet dit ophang aan vier pilare van akasiahout wat met goud oorgetrek is en ook kramme van goud het en op vier silwervoetstukke staan.

<sup>33</sup> En jy moet die voorhangsel onder die

hakies ophang; en bring die ark van die Getuienis daar, binnekant die voorhangsel. En die voorhangsel moet vir julle 'n skeiding maak tussen die Heilige en die Allerheiligste.

<sup>34</sup> En jy moet die versoendeksel op die ark van die Getuienis neerlê in die Allerheiligste.

<sup>35</sup> En sit die tafel buitekant die voorhangsel, en die kandelaar teenoor die tafel aan die suidekant van die tabernakel. Maar die tafel moet jy aan die noordekant sit.

<sup>36</sup> Jy moet ook vir die ingang van die tent 'n bedekking maak van pers en purperrooi en bloedrooi stowwe en fyn dubbeldraad-linne, veelkleurige werk.

<sup>37</sup> En maak vir die bedekking vyf pilare van akasiahout, en trek hulle oor met goud; hulle kramme moet ook van goud wees; en jy moet daarvoor vyf kopervoetstukke giet.

**27** JY moet ook die altaar van akasiahout maak; vyf el moet die lengte wees en vyf el die breedte—vierkantig moet die altaar wees—en drie el sy hoogte.

<sup>2</sup> En jy moet sy horings op die vier hoeke maak; sy horings moet, daarmee saam, uit een stuk wees; en jy moet dit met koper oortrek.

<sup>3</sup> En maak sy potte om die as te verwyder, ook sy skoppe en komme en vurke en vuurpanne. Al dié gereedskap moet jy van koper maak.

<sup>4</sup> Jy moet daar 'n traliewerk aan maak, 'n netwerk van koper, en aan die net vier koperringe maak, aan die vier hoeke.

## Exodus 28

<sup>5</sup> En jy moet dit onder die lys van die altaar bevestig, onderaan, sodat die net tot by die helfte van die altaar kom.

<sup>6</sup> Jy moet ook draaghoute vir die altaar maak, draaghoute van akasihout; en trek dit oor met koper.

<sup>7</sup> En die draaghoute moet in die ringe gestee word, sodat die draaghoute aan altwee kante van die altaar is as hulle dit dra.

<sup>8</sup> Jy moet dit hol, van planke, maak. Soos dit jou op die berg getoon is, so moet hulle dit maak.

<sup>9</sup> Jy moet ook die voorhof van die tabernakel maak. Aan die suidekant, na die suide toe, moet daar vir die voorhof behangsels wees van fyn

dubbeldraad-linne; honderd el moet die lengte vir die een kant wees;

<sup>10</sup> daarby twintig pilare met hulle twintig kopervoetstukke; die kramme en die ringe van die pilare moet van silwer wees.

<sup>11</sup> So moet daar ook aan die noordekant, in die lengte, behangsels wees, honderd el lank; daarby twintig pilare met hulle twintig kopervoetstukke. Die kramme en die ringe van die pilare moet van silwer wees.

<sup>12</sup> En in die breedte van die voorhof, aan die westekant, moet daar behangsels van vyftig el wees; daarby tien pilare en hulle tien voetstukke.

<sup>13</sup> En die breedte van die voorhof aan die oostekant, teen sonop, vyftig el—

<sup>14</sup> sodat daar vyftien el behangsels vir die een kant is, daarby drie pilare en hulle drie voetstukke;

<sup>15</sup> en vir die ander kant vyftien el behangsels, daarby drie pilare en hulle drie voetstukke;

<sup>16</sup> en vir die poort van die voorhof 'n bedekking van twintig el, van pers, purperrooi en bloedrooi stowwe en fyn dubbeldraad-linne, veelkleurige werk; daarby vier pilare en hulle vier voetstukke.

<sup>17</sup> Al die pilare van die voorhof moet rondom van silwerringe voorsien wees; hulle kramme moet van silwer wees en hulle voetstukke van koper.

<sup>18</sup> Die lengte van die voorhof moet honderd el wees en die breedte vyftig by vyftig en die hoogte vyf el, van fyn dubbeldraad-linne, daarby voetstukke van koper.

<sup>19</sup> Aangaande al die gereedskap van die tabernakel, by sy hele bewerking, en al sy penne en al die penne van die voorhof, hulle moet van koper wees.

<sup>20</sup> En jý moet die kinders van Israel beveel dat hulle vir jou suiwer, uitgestampte olyfolie vir die kandelaar bring, om gedurigdeur 'n brandende lamp te hê.

<sup>21</sup> In die tent van samekoms, buitekant die voorhangsel wat voor die Getuienis is, moet Aäron en sy seuns dit regmaak om te brand van die aand tot die môre voor die aangesig van die HERE. Dit sal 'n ewige insetting wees in hulle geslagte, van die kant van die kinders van Israel.

**28** DAN moet jý jou broer Aäron, en sy seuns saam met hom, uit die kinders van Israel, laat nader kom na jou toe, dat hy vir My die priesteramp kan bedien: Aäron, Nadab en Abihu, Eleásar en

## Exodus 28

---

Ítamar, die seuns van Aäron.

<sup>2</sup> En jy moet vir jou broer Aäron heilige klere maak, tot eer en tot sieraad.

<sup>3</sup> Jý moet ook spreek met almal wat kunsvaardig is, wat Ek met die gees van wysheid vervul het, dat hulle vir Aäron klere maak, om hom te heilig, dat hy vir My die priesteramp kan bedien.

<sup>4</sup> En dit is die klere wat hulle moet maak: 'n borstas en 'n skouerkleed en 'n mantel en 'n kunstig bewerkte rok, 'n tulband en 'n gordel; so moet hulle dan vir Aäron, jou broer, heilige klere maak, en vir sy seuns, dat hy vir My die priesteramp kan bedien.

<sup>5</sup> En hulle moet die goud en die pers en purperrooi en bloedrooi stowwe en die fyn linne neem.

<sup>6</sup> En hulle moet die skouerkleed maak van goud, pers en purperrooi en bloedrooi stowwe en fyn dubbeldraad-linne, as kunstige werk.

<sup>7</sup> Dit moet twee skouerstukke hê wat aan mekaar vas is; aan die twee bo-ente moet dit saamgevoeg word.

<sup>8</sup> En die band wat daaraan is om dit vas te bind, moet van dieselfde werk en, daarmee saam, uit een stuk wees, van goud, pers en purperrooi en bloedrooi stowwe en fyn dubbeldraad-linne.

<sup>9</sup> En jy moet twee oniksstene neem en die name van die kinders van Israel daarop graveer:

<sup>10</sup> ses van dié name op die een steen en die ses ander name op die ander steen volgens hulle geboortes.

<sup>11</sup> Met graveerwerk, soos op 'n seëlsteen uitgesny word, moet jy die twee stene

graveer volgens die name van die kinders van Israel. Jy moet hulle maak dat hulle vassit in kassies van goud.

<sup>12</sup> En jy moet die twee stene op die skouerstukke van die skouerkleed bevestig as gedagtenisstene vir die kinders van Israel—Aäron moet hulle name op sy twee skouers dra voor die aangesig van die HERE om hulle in gedagtenis te bring.

<sup>13</sup> Jy moet dan kassies van goud maak

<sup>14</sup> en twee kettings van suiwer goud; gedraai soos toutjies moet jy hulle maak; en maak die kettings, soos toutjies gedraai, aan die kassies vas.

<sup>15</sup> Jy moet ook die borstas van beslissing maak van kunstige werk; soos die werk van die skouerkleed moet jy dit maak; van goud, pers en purperrooi en bloedrooi stowwe en van fyn dubbeldraad-linne moet jy dit maak.

<sup>16</sup> Vierkantig moet dit wees en dubbel gevou; 'n span sy lengte en 'n span sy breedte.

<sup>17</sup> En voorsien dit van 'n steeninvulling van vier rye stene: 'n ry met 'n karneool, 'n topaas en 'n smarag moet die eerste ry wees.

<sup>18</sup> En die tweede ry: 'n karbonkel, 'n saffier en 'n jaspis.

<sup>19</sup> En die derde ry: 'n hiasint, 'n agaathiasint en 'n ametis.

<sup>20</sup> En die vierde ry: 'n chrisoliet en 'n oniks en 'n sardoniks. Hulle moet in goud vasgesit wees by hulle invulling.

<sup>21</sup> En die stene moet volgens die name van die kinders van Israel twaalf wees, volgens hulle name. Soos op 'n seëlsteen uitgesny

## Exodus 28

---

word, so moet hulle vir twaalf stamme wees, elkeen volgens sy naam.

<sup>22</sup> Jy moet ook by die borstas gedraaide kettings, soos toutjies gedraai, van suiwer goud maak.

<sup>23</sup> En maak by die borstas twee goue ringe; en bevestig die twee ringe aan die twee bo-ente van die borstas,

<sup>24</sup> en maak die twee goue toutjies aan die twee ringe vas, aan die bo-ente van die borstas;

<sup>25</sup> en maak die twee ander ente van die twee toutjies vas aan die twee kassies, en bevestig dié dan aan die skouerstukke van die skouerkleed, aan die voorkant daarvan.

<sup>26</sup> Jy moet ook twee goue ringe maak, en bevestig dié aan die twee onder-ente van die borstas, aan die kant wat teen die skouerkleed aan lê, aan die binnekant.

<sup>27</sup> En maak twee goue ringe, en bevestig dié aan die twee skouerstukke van die skouerkleed, onderaan, aan die voorkant daarvan, by sy verbinding, bo die band van die skouerkleed.

<sup>28</sup> En hulle moet die borstas met sy ringe aan die ringe van die skouerkleed met 'n pers toutjie vasbind, sodat dit bo die band van die skouerkleed is en die borstas nie van die skouerkleed afskuiwe nie.

<sup>29</sup> So moet Aäron dan die name van die kinders van Israel in die borstas van beslissing op sy hart dra as hy in die heiligdom ingaan, om hulle in gedagtenis te bring voor die aangesig van die HERE gedurigdeur.

<sup>30</sup> Jy moet ook in die borstas van beslissing die Urim en die Tummim sit, dat hulle op

die hart van Aäron kan wees as hy voor die aangesig van die HERE ingaan. So moet Aäron dan die beslissing vir die kinders van Israel gedurigdeur op sy hart dra voor die aangesig van die HERE.

<sup>31</sup> En jy moet die mantel van die skouerkleed heeltemal van pers stof maak.

<sup>32</sup> En die opening vir die hoof moet in die middel daarvan wees. Rondom die opening moet 'n soom van wewerswerk wees. Soos die opening van 'n pantser moet dit daaraan wees, dat dit nie kan skeur nie.

<sup>33</sup> En maak aan die soom daarvan granaatjies van pers en purperrooi en bloedrooi kleur, aan die soom daarvan rondom, en daar tussenin goue klokkies rondom:

<sup>34</sup> 'n goue klokke en 'n granaatjie, 'n goue klokke en 'n granaatjie, aan die soom van die mantel rondom.

<sup>35</sup> En Aäron moet dit aanhê om te kan dien, sodat die geluid daarvan gehoor word as hy in die heiligdom, voor die aangesig van die HERE, ingaan en as hy daar uitgaan, dat hy nie sterwe nie.

<sup>36</sup> Verder moet jy 'n plaat van suiwer goud maak en daarop graveer, soos op 'n seëlsteen uitgesny word: HEILIG AAN DIE HERE.

<sup>37</sup> En maak dit vas aan 'n pers toutjie, sodat dit aan die tulband kan wees; aan die voorkant van die tulband moet dit wees.

<sup>38</sup> So moet dit dan op die voorhoof van Aäron wees, sodat Aäron die skuld kan dra met betrekking tot die heilige dinge wat die kinders van Israel sal heilig—al hulle

## Exodus 29

heilige gawes. En dit moet gedurigdeur op sy voorhoof wees, dat hulle voor die aangesig van die HERE welgevalle mag vind.

<sup>39</sup> Jy moet ook die rok van fyn linne kunstig bewerk. Jy moet ook 'n tulband van fyn linne maak, en 'n gordel moet jy van veelkleurige werk maak.

<sup>40</sup> En maak rokke vir die seuns van Aäron, en maak vir hulle gordels. Ook moet jy vir hulle musse maak, tot eer en tot sieraad.

<sup>41</sup> En trek dit jou broer Aäron en sy seuns saam met hom aan. En self hulle en stel hulle aan en heilig hulle, sodat hulle vir My die priesteramp kan bedien.

<sup>42</sup> Maak ook vir hulle linnebroeke om die vlees van die skaamte te bedek. Dit moet van die heupe tot by die dye wees.

<sup>43</sup> En Aäron en sy seuns moet dit aanhê as hulle in die tent van samekoms gaan, of as hulle nader kom na die altaar om in die heiligdom te dien, sodat hulle geen skuld op hulle laai en sterwe nie. Dit is 'n ewige insetting vir hom en vir sy nageslag ná hom.

**29** EN dit is die saak wat jy vir hulle moet doen om hulle te heilig, dat hulle vir My die priesteramp kan bedien: Neem een jong bul en twee ramme wat sonder gebrek is,

<sup>2</sup> en ongesuurde brood en ongesuurde koeke met olie gemeng en ongesuurde platkoeke met olie bestryk. Van fyn koringmeel moet jy dit maak.

<sup>3</sup> En sit dit in een mandjie, en bring dit aan in die mandjie saam met die bul en die twee ramme.

<sup>4</sup> Dan moet jy Aäron en sy seuns laat nader kom na die ingang van die tent van samekoms en hulle met water was.

<sup>5</sup> En neem die klere en beklee Aäron met die rok en die mantel van die skouerkleed en die skouerkleed self en die borstas, en bind hom die band van die skouerkleed om.

<sup>6</sup> En sit die tulband op sy hoof, en bevestig die heilige kroon aan die tulband.

<sup>7</sup> Neem dan die salfolie en giet dit op sy hoof en self hom.

<sup>8</sup> Ook sy seuns moet jy laat nader kom, en laat hulle die rokke aantrek,

<sup>9</sup> en omgord hulle met die gordel, Aäron en sy seuns, en bind vir hulle musse om, dat hulle die priesteramp kan besit as 'n ewige insetting. So moet jy dan Aäron en sy seuns as priesters aanstel.

<sup>10</sup> En jy moet die bul aanbring voor die tent van samekoms; en Aäron en sy seuns moet hulle hande op die kop van die bul lê.

<sup>11</sup> En slag die bul voor die aangesig van die HERE by die ingang van die tent van samekoms.

<sup>12</sup> Dan moet jy van die bloed van die bul neem en dit met jou vinger aan die horings van die altaar stryk; en al die orige bloed moet jy aan die onderkant van die altaar uitgiet.

<sup>13</sup> En neem al die vet wat oor die binnegoed is, en die lap aan die lewer en die twee niere en die vet wat daaraan is, en steek dit op die altaar aan die brand.

<sup>14</sup> Maar die vleis van die bul en sy vel en sy mis moet jy buitekant die laer met vuur verbrand. Dit is 'n sondoffer.

## Exodus 29

---

<sup>15</sup> Neem dan die een ram, en Aäron en sy seuns moet hulle hande op die ram se kop lê;

<sup>16</sup> daarna moet jy die ram slag en sy bloed neem en dit rondom teen die altaar uitgooi.

<sup>17</sup> En die ram moet jy in sy stukke verdeel, en was sy binnegoed en pote en sit dit by die orige stukke en by die kop.

<sup>18</sup> Jy moet dan die hele ram op die altaar aan die brand steek. Dit is 'n brandoffer aan die HERE; 'n lieflike geur, 'n vuuroffer is dit aan die HERE.

<sup>19</sup> Dan moet jy die ander ram neem, en Aäron en sy seuns moet hulle hande op die ram se kop lê;

<sup>20</sup> jy moet dan die ram slag en van sy bloed neem en dit stryk aan die regteroorlel van Aäron en aan die regteroorlel van sy seuns, ook aan die duim van hulle regterhand en aan die groottoon van hulle regtervoet. En die orige bloed moet jy rondom teen die altaar uitgooi.

<sup>21</sup> Dan moet jy van die bloed wat aan die altaar is, neem en van die salfolie en dit sprinkel op Aäron en op sy klere sowel as op sy seuns en op die klere van sy seuns saam met hom, dat hy heilig kan wees en sy klere sowel as sy seuns en die klere van sy seuns saam met hom.

<sup>22</sup> En neem van die ram die vet en die vetstert, ook die vet wat oor die binnegoed is, en die lap aan die lewer en die twee niere met die vet wat daaraan is, en die regterboud—want dit is 'n wydingsram—

<sup>23</sup> en een ronde brood en een oliebroodkoek en een platkoek uit die mandjie met ongesuurde koeke wat voor

die aangesig van die HERE is.

<sup>24</sup> En lê dit alles op die hande van Aäron en op die hande van sy seuns, en beweeg dit as beweegoffer voor die aangesig van die HERE.

<sup>25</sup> Neem dit dan uit hulle hand en steek dit op die altaar aan die brand, bo-op die brandoffer, as lieflike geur voor die aangesig van die HERE. Dit is 'n vuuroffer aan die HERE.

<sup>26</sup> En neem die bors van die wydingsram van Aäron en beweeg dit as beweegoffer voor die aangesig van die HERE; daarna moet dit jou deel wees.

<sup>27</sup> En jy moet die bors van die beweegoffer heilig en die boud van die hefoffer, wat beweeg en gehef is van die wydingsram, wat vir Aäron en sy seuns geld.

<sup>28</sup> En dit moet vir Aäron en sy seuns wees tot 'n ewige insetting van die kant van die kinders van Israel, want dit is 'n hefoffer; en dit sal 'n hefoffer wees van die kant van die kinders van Israel, van hulle dankoffers—hulle hefoffer aan die HERE.

<sup>29</sup> En die heilige klere van Aäron moet vir sy seuns ná hom wees, om hulle daarin te salf en as priesters aan te stel.

<sup>30</sup> Die een van sy seuns wat in sy plek priester word, wat in die tent van samekoms sal ingaan om in die heiligdom te dien, moet dit sewe dae lank aantrek.

<sup>31</sup> En jy moet die wydingsram neem en sy vleis in 'n heilige plek kook.

<sup>32</sup> Dan moet Aäron en sy seuns die ram se vleis eet en die brood wat in die mandjie is, by die ingang van die tent van samekoms.

<sup>33</sup> En hulle moet dié dinge eet waarmee



## Exodus 30

versoening bewerk is toe hulle as priesters aangestel en geheilig is; maar 'n onbevoegde mag daarvan nie eet nie, want dit is heilig.

<sup>34</sup> En as daar van die vleis van die wydingsoffer of van die brood tot die môre toe oorbly, moet jy wat oor is, met vuur verbrand; dit mag nie geëet word nie, want dit is heilig.

<sup>35</sup> So moet jy dan met Aäron en sy seuns doen net soos Ek jou beveel het. Sewe dae lank moet hulle wyding duur.

<sup>36</sup> Jy moet ook daagliks 'n sondofferbul tot versoening berei en die altaar ontsondig deur daarvoor versoening te doen; en jy moet dit salf om dit te heilig.

<sup>37</sup> Sewe dae lank moet jy versoening doen vir die altaar en dit heilig. So sal dan die altaar hoogheilig word: elkeen wat aan die altaar raak, word heilig.

<sup>38</sup> EN dit is wat jy op die altaar moet berei: twee jaaroud lammers gereeld elke dag.

<sup>39</sup> Die een lam moet jy in die môre berei, en die ander lam moet jy teen die aand berei,

<sup>40</sup> met 'n tiende van 'n efa fynmeel, gemeng met 'n kwart-hin uitgestampte olie, en as drankoffer 'n kwart-hin wyn vir die een lam.

<sup>41</sup> En die ander lam moet jy teen die aand berei. Jy moet dit klaarmaak volgens die môrespysoffer en volgens die drankoffer wat daarby behoort, tot 'n lieflike geur. Dit is 'n vuuroffer aan die HERE.

<sup>42</sup> Dit moet 'n voortdurende brandoffer vir julle geslagte wees, by die ingang van die tent van samekoms, voor die aangesig van die HERE, waar Ek met julle sal saamkom

om daar met jou te spreek.

<sup>43</sup> En daar sal Ek met die kinders van Israel saamkom en die tent sal deur my heerlijkheid geheilig word.

<sup>44</sup> So sal Ek dan die tent van samekoms en die altaar heilig. Ek sal Aäron en sy seuns ook heilig om vir My die priesteramp te bedien.

<sup>45</sup> En Ek sal onder die kinders van Israel woon en vir hulle 'n God wees;

<sup>46</sup> en hulle sal weet dat Ek die HERE hulle God is wat hulle uit Egipteland uitgelei het om in hulle midde te woon. Ek is die HERE hulle God.

**30** JY moet ook 'n altaar maak om reukwerk te brand. Van akasiahout moet jy dit maak.

<sup>2</sup> 'n El moet sy lengte wees en 'n el sy breedte—vierkantig moet dit wees; en twee el sy hoogte. Sy horings moet, daarmee saam, uit een stuk wees.

<sup>3</sup> En jy moet dit met suiwer goud oortrek: die plaat en die sykante rondom en die horings. En maak daarvoor 'n goue krans rondom.

<sup>4</sup> Maak ook twee goue ringe daarvoor onderkant die krans aan weerskante; jy moet dié aan die twee sykante maak. En hulle moet dien as plekke vir draaghoute om dit daarmee te dra.

<sup>5</sup> En maak die draaghoute van akasiahout, en trek dit oor met goud.

<sup>6</sup> Sit dit dan voor die voorhangsel wat voor die ark van die Getuienis is, voor die versoendeksel wat oor die Getuienis is, waar Ek met jou sal saamkom.

<sup>7</sup> En Aäron moet daarop reukwerk van

## Exodus 30

---

speserye aan die brand steek; elke môre as hy die lampe regmaak, moet hy dit aan die brand steek.

<sup>8</sup> En as Aäron teen die aand die lampe opsteek, moet hy dit aan die brand steek as 'n voortdurende reukwerk voor die aangesig van die HERE in julle geslagte.

<sup>9</sup> Julle mag daarop geen vreemde reukwerk of brandoffer of spysoffer bring nie. Julle mag ook geen drankoffer daarop uitgiet nie.

<sup>10</sup> En Aäron moet een maal in die jaar aan die horings daarvan versoening doen; met die bloed van die sondoffer van versoening moet hy een maal in die jaar daarvoor versoening doen vir julle geslagte.

Hoogheilig is dit aan die HERE.

<sup>11</sup> VERDER het die HERE met Moses gespreek en gesê:

<sup>12</sup> As jy die volle getal van die kinders van Israel opneem volgens hulle geteldes, moet hulle, elkeen vir sy lewe, losgeld aan die HERE gee as hulle getel word, sodat geen plaag onder hulle mag wees as hulle getel word nie.

<sup>13</sup> Dit moet hulle gee, elkeen wat na die geteldes oorgaan: 'n halfsikkel volgens die sikkel van die heiligdom—die sikkel is twintig gera—'n halfsikkel as offergawe aan die HERE.

<sup>14</sup> Elkeen wat oorgaan na die geteldes, van twintig jaar oud en daarbo, moet die offergawe van die HERE gee.

<sup>15</sup> Die ryke moet nie meer en die arme moet nie minder as 'n halfsikkel bring nie, as hulle die offergawe van die HERE gee om vir julle siele versoening te doen.

<sup>16</sup> Neem dan die versoeningsgeld van die kinders van Israel en bestee dit aan die bediening van die tent van samekoms, dat dit die kinders van Israel in gedagtenis kan bring voor die aangesig van die HERE, om vir julle siele versoening te doen.

<sup>17</sup> EN die HERE het met Moses gespreek en gesê:

<sup>18</sup> Jy moet ook 'n koperwaskom maak met sy kopervoetstuk, om in te was; en sit dit tussen die tent van samekoms en die altaar, en gooi water daarin,

<sup>19</sup> dat Aäron en sy seuns hulle hande en hulle voete daaruit kan was.

<sup>20</sup> As hulle in die tent van samekoms gaan, moet hulle hul met water was, sodat hulle nie sterwe nie; of as hulle naby die altaar kom om te dien deur 'n vuuroffer aan die HERE aan die brand te steek.

<sup>21</sup> Hulle moet dan hul hande en hulle voete was, sodat hulle nie sterwe nie. En dit moet vir hulle 'n ewige insetting wees, vir hom en sy nageslag in hulle geslagte.

<sup>22</sup> VERDER het die HERE met Moses gespreek en gesê:

<sup>23</sup> En jý, neem vir jou van die beste speserye: vyfhonderd sikkels fyn mirre en die helfte soveel geurige kaneel, tweehonderd-en-vyftig sikkels, en tweehonderd-en-vyftig sikkels geurige kalmoes

<sup>24</sup> en vyfhonderd sikkels kassie, volgens die sikkel van die heiligdom, en 'n hin olyfolie;

<sup>25</sup> en maak daarvan heilige salfolie, 'n salfmengsel soos 'n salfmenger dit maak; heilige salfolie moet dit wees.

## Exodus 31

<sup>26</sup> Daarmee moet jy dan die tent van samekoms salf en die ark van die Getuienis

<sup>27</sup> en die tafel met al sy gereedskap en die kandelaar met sy gereedskap en die reukaltaar

<sup>28</sup> en die brandofferaltaar met al sy gereedskap en die waskom met sy voetstuk.

<sup>29</sup> So moet jy hulle dan heilig, dat hulle hoogheilig kan wees. Elkeen wat aan hulle raak, word heilig.

<sup>30</sup> Jy moet ook Aäron en sy seuns salf en hulle heilig om vir My die priesteramp te bedien.

<sup>31</sup> En jy moet met die kinders van Israel spreek en sê: Dit moet vir My 'n heilige salfolie wees in julle geslagte.

<sup>32</sup> Op geen mens se liggaam mag dit uitgegiet word nie; julle mag ook, na dieselfde voorskrif, so iets nie maak nie: heilig is dit; heilig moet dit vir julle wees.

<sup>33</sup> Elkeen wat so iets meng of iets daarvan aan 'n onbevoegde laat kom, moet uit sy volksgenote uitgeroei word.

<sup>34</sup> Verder het die HERE vir Moses gesê: Neem vir jou speserye: storaksgom en naeltjies en gálbanum—speserye en ook suiwer wierook; alles in gelyke hoeveelhede,

<sup>35</sup> en maak daar reukwerk van, 'n mengsel soos die salfmenger dit maak, met sout gemeng, suiwer, heilig.

<sup>36</sup> En vrywe 'n gedeelte daarvan heeltemal fyn, en sit 'n deel daarvan neer voor die Getuienis in die tent van samekoms, waar Ek met jou sal saamkom; hoogheilig moet dit vir julle wees.

<sup>37</sup> En die reukwerk wat jy moet maak—na dieselfde voorskrif mag julle vir julle nie maak nie; as iets heiligs aan die HERE moet dit vir jou wees.

<sup>38</sup> Elkeen wat so iets maak om daaraan te ruik, moet uit sy volksgenote uitgeroei word.

**31** VERDER het die HERE met Moses gespreek en gesê:

<sup>2</sup> Kyk, Ek het Besáleël, die seun van Uri, die seun van Hur, van die stam van Juda, by sy naam geroep;

<sup>3</sup> en Ek het hom vervul met die Gees van God, met wysheid en verstand en kennis en bekwaamheid vir allerhande werk,

<sup>4</sup> om kunstige planne uit te dink, om dit uit te voer in goud en silwer en koper,

<sup>5</sup> en deur snywerk in stene wat ingelê moet word, en deur houtsnywerk; om werksaam te wees in allerhande werk.

<sup>6</sup> En kyk, Ek het hom Ohóliab bygegee, die seun van Ahísamag, van die stam van Dan. En in die hart van elkeen wat kunsvaardig is, het Ek wysheid gegee, dat hulle alles wat Ek jou beveel het, kan maak:

<sup>7</sup> die tent van samekoms en die ark van die Getuienis en die versoendeksel wat daarop moet wees, en alles wat behoort by die tent,

<sup>8</sup> en die tafel met sy gereedskap en die suiwer kandelaar met al sy gereedskap en die reukaltaar;

<sup>9</sup> ook die brandofferaltaar met al sy gereedskap en die waskom met sy voetstuk

<sup>10</sup> en die kunstige klere en die heilige klere van die priester Aäron en die klere van sy seuns, om die priesteramp te bedien;

<sup>11</sup> ook die salfolie en die reukwerk van

## Exodus 32

speserye vir die heiligdom—net soos Ek jou beveel het, moet hulle dit maak.

<sup>12</sup> VERDER het die HERE met Moses gespreek en gesê:

<sup>13</sup> Spreek jý met die kinders van Israel en sê: Julle moet sekerlik my sabbatte onderhou, want dit is 'n teken tussen My en julle in julle geslagte, sodat die mense kan weet dat Ek die HERE is wat julle heilig.

<sup>14</sup> Onderhou dan die sabbat, want dit moet vir julle heilig wees. Hy wat dit ontheilig, moet sekerlik gedood word; want elkeen wat daarop werk verrig, dié siel moet uitgeroei word onder sy volksgenote uit.

<sup>15</sup> Ses dae lank kan werk verrig word, maar op die sewende dag moet dit wees 'n dag van volkome rus, heilig aan die HERE. Elkeen wat op die sabbatdag werk doen, moet sekerlik gedood word.

<sup>16</sup> En die kinders van Israel moet die sabbat onderhou deur die sabbat te vier in hulle geslagte as 'n ewige verbond.

<sup>17</sup> Tussen My en die kinders van Israel is dit vir ewig 'n teken; want in ses dae het die HERE die hemel en die aarde gemaak, maar op die sewende dag het Hy gerus en Hom verkwik.

<sup>18</sup> En Hy het aan Moses, toe Hy geëindig het om met hom te spreek op die berg Sinai, die twee tafels van die Getuienis gegee, tafels van klip, beskrywe met die vinger van God.

**32** TOE die volk sien dat Moses vertoef om van die berg af te kom, het die volk rondom Aäron versamel en vir hom gesê: Kom, maak vir ons gode wat

voor ons uit trek; want hierdie Moses, die man wat ons uit Egipteland laat optrek het, ons weet nie wat van hom geword het nie.

<sup>2</sup> En Aäron sê vir hulle: Ruk die goue ringe af wat aan die ore van julle vroue, julle seuns en julle dogters is, en bring dit vir my.

<sup>3</sup> Toe het die hele volk die goue ringe afgeruk wat aan hulle ore was, en dit na Aäron gebring.

<sup>4</sup> En hy het dit uit hulle hand geneem en dit met die beitel bewerk en daar 'n gegote kalf van gemaak. Daarop sê hulle: Dit is jou gode, o Israel, wat jou uit Egipteland laat optrek het.

<sup>5</sup> Toe Aäron dit sien, het hy daarvoor 'n altaar gebou. En Aäron het uitgeroep en gesê: Môre is daar fees tot eer van die HERE.

<sup>6</sup> En hulle het die ander dag vroeg klaargemaak en brandoffers geoffer en dankoffers aangebring; daarop het die volk gaan sit om te eet en te drink, en hulle het opgestaan om te speel.

<sup>7</sup> Toe sê die HERE vir Moses: Gaan heen, klim af, want jou volk wat jy uit Egipteland laat optrek het, het verderflik gehandel.

<sup>8</sup> En hulle het gou van die weg afgewyk wat Ek hulle beveel het. Hulle het vir hulle 'n gegote kalf gemaak en daarvoor neergebuig en daaraan geoffer en gesê: Dit is jou gode, o Israel, wat jou uit Egipteland laat optrek het.

<sup>9</sup> Verder het die HERE vir Moses gesê: Ek het hierdie volk gesien, en kyk, dit is 'n hardnekkige volk.

<sup>10</sup> Laat My dan nou begaan, dat my toorn

## Exodus 32

---

teen hulle ontvlam en Ek hulle verteer. Dan sal Ek jou tot 'n groot nasie maak.

<sup>11</sup> Maar Moses het die HERE sy God om genade gesmeek en gesê: Waarom, o HERE, sou u toorn ontvlam teen u volk wat U met grote krag en met 'n sterke hand uit Egipteland uitgelei het?

<sup>12</sup> Waarom sou die Egiptenaars spreek en sê: In kwaadwilligheid het Hy hulle uitgelei om hulle in die berge om te bring en hulle van die aardbodem af te vernietig? Wend U af van die gloed van u toorn, en laat dit U berou oor die onheil van u volk.

<sup>13</sup> Gedenk aan Abraham, Isak en Israel, u knegte, vir wie U by Usself gesweer en aan wie U gesê het: Ek sal julle nageslag vermenigvuldig soos die sterre van die hemel, en hierdie hele land waarvan Ek gespreek het, sal Ek aan julle nageslag gee, dat hulle dit vir ewig kan beërwe.

<sup>14</sup> Toe het dit die HERE berou oor die onheil wat Hy gesê het dat Hy sy volk sou aandoen.

<sup>15</sup> En Moses het omgedraai en van die berg afgeklim, met die twee tafels van die Getuienis in sy hand, tafels wat op altwee kante beskrywe was; hulle was op die een en op die ander kant beskrywe.

<sup>16</sup> En die tafels was die werk van God. Die skrif was ook die skrif van God, in die tafels gegraveer.

<sup>17</sup> En toe Josua die stem van die volk hoor hoe hulle juig, sê hy aan Moses: Daar is oorlogsgeraas in die laer.

<sup>18</sup> Maar hy antwoord: Dit is nie die geluid van die wat sing van oorwinning nie; dit is ook nie die geluid van die wat sing van

neerlaag nie: ek hoor die geluid van beurtgesang.

<sup>19</sup> En toe hy naby die laer kom en die kalf en koordanse sien, het die toorn van Moses ontvlam, en hy het die tafels uit sy hande gegooi en hulle onder aan die berg verbrysel.

<sup>20</sup> En hy het die kalf geneem wat hulle gemaak het, en dit in die vuur verbrand en dit fyn gemaal. Toe het hy dit op die water gestrooi en die kinders van Israel dit laat drink.

<sup>21</sup> En Moses het vir Aäron gesê: Wat het hierdie volk jou gedoen, dat jy so 'n groot sonde oor hulle gebring het?

<sup>22</sup> Toe antwoord Aäron: Laat die toorn van my heer nie ontvlam nie. U self ken die volk, dat hulle deur en deur sleg is.

<sup>23</sup> Hulle het dan aan my gesê: Maak vir ons gode wat voor ons uit trek, want hierdie Moses, die man wat ons uit Egipteland laat optrek het, ons weet nie wat van hom geword het nie.

<sup>24</sup> Daarop het ek hulle geantwoord: Wie goud het, laat dié dit afruk! En hulle het dit aan my gegee. En ek het dit in die vuur gegooi, en hierdie kalf het daaruit gekom.

<sup>25</sup> Toe Moses sien dat die volk bandeloos was—want Aäron het hulle bandeloos laat word tot leedvermaak onder hulle teëstanders—

<sup>26</sup> het Moses in die poort van die laer gaan staan en gesê: Wie vir die HERE is, kom na my toe! Toe het al die seuns van Levi by hom versamel.

<sup>27</sup> En hy het vir hulle gesê: So spreek die HERE, die God van Israel: Laat elkeen sy

## Exodus 33

swaard aangord aan sy heup. Gaan heen en weer van poort tot poort in die laer, en laat elkeen sy broer en elkeen sy vriend en elkeen sy naaste doodmaak.

<sup>28</sup> En die seuns van Levi het gehandel volgens die woord van Moses, en daar het van die volk op dié dag omtrent drieduisend man geval.

<sup>29</sup> Toe het Moses gesê: Vul vandag julle hand om te offer aan die HERE—want elkeen is teen sy seun en teen sy broer—sodat Hy vandag ’n seën oor julle kan gee.

<sup>30</sup> EN die volgende dag het Moses aan die volk gesê: Julle het ’n groot sonde begaan; maar nou sal ek na die HERE opklim: miskien kan ek vir julle sonde versoening doen.

<sup>31</sup> En Moses het na die HERE teruggegaan en gesê: Ag, hierdie volk het ’n groot sonde begaan en vir hulle goue gode gemaak.

<sup>32</sup> Nou dan, as U tog maar hulle sonde wou vergewe! En so nie, delg my dan maar uit u boek wat U geskryf het!

<sup>33</sup> Toe het die HERE Moses geantwoord: Wie teen My gesondig het, dié sal Ek uitdelg uit my boek.

<sup>34</sup> Maar gaan nou en lei die volk waarheen Ek jou gesê het. Kyk, my engel sal voor jou uit gaan. Maar die dag as Ek besoeking doen, dan sal Ek hulle sonde oor hulle besoek.

<sup>35</sup> So het die HERE dan die volk getref, omdat hulle die kalf gemaak het wat Aäron vervaardig het.

hiervandaan op, jy en die volk wat jy uit Egipteland laat optrek het, na die land wat Ek met ’n eed aan Abraham, Isak en Jakob beloof het, met die woorde: Aan jou nageslag sal Ek dit gee;

<sup>2</sup> en Ek sal ’n engel voor jou uit stuur—en die Kanaäniete, Amoriete, Hetiete, Feresiete, Hewiete en Jebusiete verdrywe—

<sup>3</sup> na ’n land wat oorloop van melk en heuning; want Ek sal in jou midde nie optrek nie, omdat jy ’n hardnekkige volk is; anders sal jy op die weg verteer word.

<sup>4</sup> Toe die volk hierdie onheilspellende woord hoor, het hulle getreur; en niemand het sy versiersels aangesit nie.

<sup>5</sup> Die HERE het naamlik met Moses gespreek: Sê aan die kinders van Israel: Julle is ’n hardnekkige volk; as Ek vir een oomblik in jou midde sou optrek, sou Ek jou vernietig. Maar haal nou jou versiersels van jou af, dan sal Ek weet wat Ek met jou moet doen.

<sup>6</sup> Toe het die kinders van Israel hulleself beroof van hul versiersels, van die berg Horeb af.

<sup>7</sup> En Moses het elke keer ’n tent geneem en dit vir hom buitekant die laer opgeslaan, ver van die laer af; en hy het dit genoem die tent van samekoms. En elkeen wat die HERE wou raadpleeg, het uitgegaan na die tent van samekoms wat buitekant die laer was.

<sup>8</sup> En as Moses uitgaan na die tent, staan die hele volk op en gaan elkeen aan die ingang van sy tent staan. Dan kyk hulle Moses agterna tot hy in die tent ingegaan het.

<sup>9</sup> En as Moses in die tent ingaan, kom die

**33** VERDER het die HERE met Moses gespreek: Gaan heen, trek

## Exodus 34

wolkkolom af en gaan by die ingang van die tent staan, en dan spreek Hy met Moses.

<sup>10</sup> En as die hele volk die wolkkolom sien staan by die ingang van die tent, staan die hele volk op en buig, elkeen aan die ingang van sy tent.

<sup>11</sup> Dan spreek die HERE met Moses van aangesig tot aangesig soos 'n man met sy vriend spreek. Daarna gaan hy na die laer terug; maar sy dienaar Josua, 'n jongman, die seun van Nun, het hom nie uit die tent verwyder nie.

<sup>12</sup> Toe het Moses met die HERE gespreek: U sê nou wel aan my: Ek moet hierdie volk laat optrek, maar Ú laat my nie weet wie U saam met my sal stuur nie, hoewel U gesê het: Ek ken jou by die naam, en jy het ook genade in my oë gevind.

<sup>13</sup> As ek dan nou genade in u oë gevind het, maak my dan tog u weë bekend, dat ek U kan ken; sodat ek genade in u oë kan vind. En bedink tog dat hierdie nasie u volk is.

<sup>14</sup> En Hy antwoord: Moet Ek self meegaan om jou die rusplek te verskaf?

<sup>15</sup> Toe sê hy vir Hom: As U nie self meegaan nie, laat ons dan nie hiervandaan optrek nie.

<sup>16</sup> Want waaraan sou dan bekend word dat ek genade in u oë gevind het, ek en u volk? Is dit nie daaraan dat U met ons saamtrek nie? So sal ons, ek en u volk, onderskeie wees van elke volk wat op die aarde is.

<sup>17</sup> Toe sê die HERE aan Moses: Ook hierdie versoek wat jy uitgespreek het, daaraan sal Ek voldoen; want jy het genade gevind in

my oë, en Ek ken jou by die naam.

<sup>18</sup> Daarop vra hy: Laat my tog u heerlijkheid sien.

<sup>19</sup> Maar Hy antwoord: Ek sal al my majesteit by jou laat verbygaan en voor jou die Naam van die HERE uitroep; maar Ek sal genadig wees vir wie Ek genadig wil wees, en My ontferm oor wie Ek My wil ontferm.

<sup>20</sup> Verder het Hy gesê: Jy kan my aangesig nie sien nie, want geen mens kan My sien en bly lewe nie.

<sup>21</sup> Ook het die HERE gesê: Kyk, hier is 'n plek by My waar jy op die rots kan gaan staan.

<sup>22</sup> En as my heerlijkheid verbygaan, sal Ek jou in die skeur van die rots stel en jou met my hand oordek totdat Ek verbygegaan het.

<sup>23</sup> En as Ek my hand wegneem, sal jy My van agter sien; maar my aangesig kan nie gesien word nie.

**34** TOE het die HERE aan Moses gesê: Kap vir jou twee kliptafels soos die eerstes; dan sal Ek op die tafels die woorde skrywe wat op die eerste tafels was, wat jy verbrysel het.

<sup>2</sup> En hou jou gereed teen die môre, en klim in die môre op die berg Sinai en gaan daar staan by My op die top van die berg.

<sup>3</sup> Maar niemand mag saam met jou opklim nie; laat daar ook niemand op die hele berg gesien word nie; laat ook geen kleinvee of beeste teen hierdie berg wei nie.

<sup>4</sup> Toe het hy twee kliptafels gekap soos die eerstes, en Moses het die môre vroeg klaargemaak en op die berg Sinai geklim,

## Exodus 34

---

soos die HERE hom beveel het, en die twee kliptafels in sy hand geneem.

<sup>5</sup> En die HERE het neergedaal in die wolk en daar by hom gestaan. En Hy het die Naam van die HERE uitgeroep.

<sup>6</sup> En toe die HERE by hom verbygaan, het Hy geroep: HERE, HERE, barmhartige en genadige God, lankmoedig en groot van goedertierenheid en trou;

<sup>7</sup> wat die goedertierenheid bewaar vir duisende, wat ongeregtigheid en oortreding en sonde vergewe, maar nooit ongestraf laat bly nie; wat die ongeregtigheid van die vaders besoek aan die kinders en aan die kindskinders, aan die derde en aan die vierde geslag.

<sup>8</sup> Toe het Moses hom gou na die aarde toe gebuig en neergeval

<sup>9</sup> en gesê: Here, as ek genade in u oë gevind het, laat dan tog die HERE in ons midde trek; want dit is 'n hardnekkige volk; maar vergewe ons ongeregtigheid en ons sonde, en neem ons aan as 'n erfdeel.

<sup>10</sup> Toe antwoord Hy: Kyk, Ek sluit 'n verbond; voor jou hele volk sal Ek wonders doen soos daar op die hele aarde en onder al die nasies nie geskape is nie, sodat die hele volk onder wie jy is, die werk van die HERE kan sien. Want verskriklik is dit wat Ek aan jou gaan doen.

<sup>11</sup> Onderhou wat Ek jou vandag beveel. Kyk, Ek verdrywe voor jou uit die Amoriëte, Kanaäniete, Hetiëte, Feresiëte, Hewiëte en Jebusiëte.

<sup>12</sup> Neem jou in ag dat jy geen verbond sluit met die inwoner van die land waarin jy kom nie; sodat hy nie miskien 'n strik by

jou word nie.

<sup>13</sup> Maar hulle altare moet julle omgooi en hulle klippilare verbrysel en hulle heilige boomstamme afkap.

<sup>14</sup> Want jy mag jou nie neerbuig voor 'n ander god nie; want die HERE se Naam is Jaloers—'n jaloerse God is Hy.

<sup>15</sup> Sluit tog nie 'n verbond met die inwoner van die land nie! As hulle agter hulle gode aan hoereer en aan hulle gode offer, sal hy jou uitnoui, en jy sal van sy offer eet;

<sup>16</sup> en jy sal van sy dogters neem vir jou seuns, en sy dogters sal agter hulle gode aan hoereer en jou seuns agter hulle gode aan laat hoereer.

<sup>17</sup> Jy mag vir jou geen gegote gode maak nie.

<sup>18</sup> Die fees van die ongesuurde brode moet jy hou; sewe dae lank moet jy ongesuurde brode eet soos Ek jou beveel het, op die bepaalde tyd in die maand Abib; want in die maand Abib het jy uit Egipte uitgetrek.

<sup>19</sup> Alles wat die moederskoot open, is myne; ook al jou vee wat manlik is, die eersteling van beeste en kleinvee.

<sup>20</sup> Maar die eersteling van 'n esel moet jy met 'n lam loskoop; en as jy dit nie loskoop nie, moet jy sy nek breek. Al jou eersgebore seuns moet jy loskoop, en niemand mag met leë hande voor my aangesig verskyn nie.

<sup>21</sup> Ses dae moet jy arbei, maar op die sewende dag moet jy rus. In die ploegtyd en in die oestyd moet jy rus.

<sup>22</sup> Die fees van die weke moet jy ook hou, die fees van die eersteling van die koringoes; en die fees van die insameling



## Exodus 35

by die wisseling van die jaar.

<sup>23</sup> Al jou manspersone moet drie maal in die jaar voor die aangesig van die Here HERE, die God van Israel, verskyn.

<sup>24</sup> Want Ek sal nasies voor jou uitdrywe en jou grondgebied uitbrei, sodat niemand jou land sal begeer nie terwyl jy opgaan om te verskyn voor die aangesig van die Here jou God, drie maal in die jaar.

<sup>25</sup> Jy mag die bloed van my offer nie saam met gesuurde brood slag nie, en die offer van die paasfees mag nie tot die môre toe oorbly nie.

<sup>26</sup> Die beste van die eersteling van jou grond moet jy in die huis van die Here jou God bring. Jy mag die bokkie nie kook in sy moeder se melk nie.

<sup>27</sup> Verder het die Here vir Moses gesê: Skrywe vir jou hierdie woorde op, want volgens hierdie woorde het Ek 'n verbond gesluit met jou en met Israel.

<sup>28</sup> En hy was daar by die Here veertig dae en veertig nagte; hy het geen brood geëet en geen water gedrink nie. En Hy het op die tafels die woorde van die verbond, die tien woorde, geskrywe.

<sup>29</sup> En toe Moses van die berg Sinai afdaal—die twee tafels van die Getuienis was in die hand van Moses toe hy van die berg afdaal—het Moses nie geweet dat die vel van sy gesig blink omdat hy met Hom gespreek het nie.

<sup>30</sup> En toe Aäron en al die kinders van Israel Moses sien, het die vel van sy gesig geblink! Daarom was hulle bevrees om naby hom te kom.

<sup>31</sup> Maar Moses het hulle geroep, en Aäron

en al die owerstes in die vergadering het na hom teruggekom; en Moses het met hulle gespreek.

<sup>32</sup> En daarna het al die kinders van Israel nader gekom, en hy het hulle alles beveel wat die Here met hom gespreek het op die berg Sinai.

<sup>33</sup> Toe Moses klaar met hulle gespreek het, het hy 'n sluier oor sy gesig getrek.

<sup>34</sup> Maar as Moses voor die aangesig van die Here kom om met Hom te spreek, neem hy die sluier weg, totdat hy uitgaan. As hy dan uitgaan en aan die kinders van Israel meedeel wat hom beveel is,

<sup>35</sup> sien die kinders van Israel die gesig van Moses, dat die vel van Moses se gesig blink; daarop trek Moses dan weer die sluier oor sy gesig, totdat hy ingaan om met Hom te spreek.

**35** TOE het Moses die hele vergadering van die kinders van Israel bymekaar laat kom en aan hulle gesê: Dit is die woorde wat die Here beveel het, om dit te doen:

<sup>2</sup> Ses dae lank kan daar werk verrig word, maar op die sewende dag moet daar vir julle 'n heiligheid, 'n dag van volkome rus wees tot eer van die Here. Elkeen wat daarop werk verrig, moet gedood word.

<sup>3</sup> Julle mag op die sabbat geen vuur aansteek in enigeen van julle woonplekke nie.

<sup>4</sup> Verder het Moses die hele vergadering van die kinders van Israel toegesprek en gesê: Dít is die saak wat die Here beveel het:

<sup>5</sup> Neem van julle besittings 'n offergawe

## Exodus 35

---

aan die HERE. Laat elkeen wat gewillig is in sy hart, dit bring, die offergawe van die HERE: goud en silwer en koper;

<sup>6</sup> en pers en purperrooi en bloedrooi stowwe en fyn linne en bokhaar;

<sup>7</sup> en rooigeverfde ramsvelle en robbevelle en akasihout;

<sup>8</sup> en olie vir die kandelaar en speserye vir die salfolie en vir die reukwerk van speserye;

<sup>9</sup> en oniksstene en stene om in te lê, vir die skouerkleed en die borstas.

<sup>10</sup> En almal wat kunsvaardig is onder julle, moet kom en alles maak wat die HERE beveel het:

<sup>11</sup> die tabernakel, sy tent en sy dekkleed, sy hakies en sy style, sy dwarshoute, sy pilare en sy voetstukke;

<sup>12</sup> die ark en sy draaghoute, die versoendeksel en die voorhangsel tot bedekking;

<sup>13</sup> die tafel met sy draaghoute en al sy gereedskap, en die toonbrode;

<sup>14</sup> en die kandelaar tot verligting, met sy gereedskap en sy lampe, en die olie vir die kandelaar;

<sup>15</sup> en die reukaltaar met sy draaghoute, en die salfolie en die reukwerk van speserye, en die bedekking vir die ingang van die tabernakel;

<sup>16</sup> die brandofferaltair met sy traliwerk van koper, sy draaghoute en al sy gereedskap; die waskom met sy voetstuk;

<sup>17</sup> die behangsels van die voorhof, sy pilare en sy voetstukke, en die bedekking van die poort van die voorhof;

<sup>18</sup> die penne van die tabernakel en die

penne van die voorhof met hulle lyne;

<sup>19</sup> die kunstige klere om in die heiligdom te dien, die heilige klere vir die priester Aäron en die klere van sy seuns om die priesteramp te bedien.

<sup>20</sup> Toe het die hele vergadering van die kinders van Israel van Moses af weggegaan.

<sup>21</sup> En elkeen wie se hart hom opgewek en elkeen wie se gees hom aangedryf het, het gekom: hulle het die offergawe van die HERE gebring vir die werk aan die tent van samekoms en vir sy hele bediening en vir die heilige klere;

<sup>22</sup> die manne het met die vroue gekom, elkeen wat gewillig van hart was; hulle het gespes en ringe en vingerringe en halssierade, allerhande goue goed, gebring. En elkeen wat 'n offer van goud aan die HERE gewy het,

<sup>23</sup> en elkeen wat in besit was van pers en purperrooi en bloedrooi stowwe en fyn linne en bokhaar en rooigeverfde ramsvelle en robbevelle, het dit gebring.

<sup>24</sup> Elkeen wat 'n offergawe van silwer of koper kon aanbied, het die offergawe van die HERE gebring; en elkeen wat akasihout besit het, wat oral by die werk kon gebruik word, het dit gebring.

<sup>25</sup> En elke vrou wat kunsvaardig was, het met haar eie hande gespin en die spinsel gebring: die pers en purperrooi en bloedrooi stowwe en die fyn linne.

<sup>26</sup> En al die vroue wie se hart hulle opgewek het deur kunsvaardigheid, het die bokhaar gespin.

<sup>27</sup> En die owerstes het die oniksstene

## Exodus 36

gebring en die stene om in te lê, vir die skouerkleed en die borstas,

<sup>28</sup> en die speserye en die olie vir die kandelaar en vir die salfolie en vir die reukwerk van speserye.

<sup>29</sup> Elke man en vrou wie se hart hulle aangedryf het om iets by te dra vir al die werk wat die HERE deur die diens van Moses beveel het om te verrig—as vrywillige offergawe aan die HERE het die kinders van Israel dit gebring.

<sup>30</sup> Daarop het Moses aan die kinders van Israel gesê: Kyk, die HERE het Besáleël, die seun van Uri, die seun van Hur, van die stam van Juda, by sy naam geroep;

<sup>31</sup> en Hy het hom met die Gees van God vervul, met wysheid, met verstand en met kennis en bekwaamheid vir allerhande werk;

<sup>32</sup> en om kunstige planne uit te dink, om dié uit te voer in goud en silwer en koper,

<sup>33</sup> en deur snywerk in stene wat ingelê moet word, en deur houtsnywerk—om werksaam te wees in allerhande kunsarbeid.

<sup>34</sup> Hy het dit ook in sy hart gegee om ander te onderrig, aan hom en aan Ohóliab, die seun van Ahísamag, van die stam van Dan.

<sup>35</sup> Hy het hulle vervul met kunsvaardigheid om allerhande werk te maak van ’n ambagsman en ’n kunstenaar en van ’n bewerker van veelkleurige goed in pers en purperrooi en bloedrooi stowwe en fyn linne, en van ’n wewer—hulle wat al die werk moes verrig en kunstige planne moes uitdink.

en elkeen wat kunsvaardig is, in wie die HERE wysheid en verstand gegee het om met kennis al die werk tot vervaardiging van die heiligdom te verrig, dit maak net soos die HERE beveel het.

<sup>2</sup> En Moses het Besáleël en Ohóliab geroep en elkeen wat kunsvaardig was, in wie se hart die HERE wysheid gegee het; elkeen wie se hart hom opgewek het om aan die werk te gaan om dit klaar te maak.

<sup>3</sup> En hulle het voor die oë van Moses ontvang al die offergawes wat die kinders van Israel vir die verrigting van die werk by die vervaardiging van die heiligdom gebring het. Maar hulle het vir hom nog elke môre vrywillige offergawes gebring.

<sup>4</sup> Toe het al die kunsvaardige manne wat met al die werk by die heiligdom besig was, man vir man, van die werk af gekom waar hulle mee besig was,

<sup>5</sup> en hulle het met Moses gespreek en gesê: Die volk bring meer as wat nodig is vir die uitvoering van die werk waarvan die HERE die vervaardiging beveel het.

<sup>6</sup> Daarop het Moses bevel gegee, en hulle het ’n oproep deur die laer laat gaan en gesê: Laat geen man of vrou verder enige werksaamheid verrig in verband met die offergawe vir die heiligdom nie. Toe het die volk opgehou om te bring;

<sup>7</sup> want die boustof was vir hulle genoeg om die hele werk tot stand te bring; ja, daar het oorgebly.

<sup>8</sup> SO het dan almal wat kunsvaardig was onder die werksmense, die tabernakel uit tien tentdoeke vervaardig; uit fyn dubbeldraad-linne en pers en purperrooi

**36** SO moet dan Besáleël en Ohóliab

## Exodus 36

---

en bloedrooi stowwe, met gérubs; as kunstige werk het hy dit gemaak.

<sup>9</sup> Die lengte van elke tentdoek was agt-en-twintig el en die breedte van elke tentdoek vier el. Al die tentdoeke het een maat gehad.

<sup>10</sup> En hy het vyf van die tentdoeke aanmekaargewerk, die een aan die ander; en weer vyf tentdoeke het hy aanmekaargewerk, die een aan die ander.

<sup>11</sup> En hy het lissies van pers stof gemaak aan die soom van die buitenste tentdoek van die een stel; so het hy dit gemaak aan die soom van die laaste tentdoek van die tweede stel.

<sup>12</sup> Vyftig lissies het hy gemaak aan die een tentdoek, en vyftig lissies het hy gemaak aan die rand van die tentdoek wat aan die tweede stel behoort het. Die lissies was die een teenoor die ander.

<sup>13</sup> Hy het ook vyftig goue hakies gemaak en die tentdoeke saamgevoeg, die een aan die ander, met die hakies, sodat die tabernakel een geheel was.

<sup>14</sup> Verder het hy doeke van bokhaar gemaak as 'n tentseil oor die tabernakel: elf tentdoeke het hy dit gemaak.

<sup>15</sup> Die lengte van elke tentdoek was dertig el, en die breedte van elke tentdoek vier el: die elf tentdoeke het een maat gehad.

<sup>16</sup> En hy het vyf van die tentdoeke besonders aanmekaargewerk en ses van die tentdoeke besonders.

<sup>17</sup> En hy het vyftig lissies gemaak aan die soom van die laaste tentdoek van die een stel, en vyftig lissies het hy gemaak aan die soom van die laaste tentdoek van die

tweede stel.

<sup>18</sup> Hy het ook vyftig koperhakies gemaak om die tent saam te voeg, sodat dit een geheel was.

<sup>19</sup> Ook het hy vir die tent 'n dekkleed van rooigeverfde ramsvelle gemaak en daar bo-oor 'n dekkleed van robbevelle.

<sup>20</sup> Hy het ook vir die tabernakel die regopstaande style van akasiahout gemaak.

<sup>21</sup> Die lengte van die styl was tien el, en anderhalf el die breedte van elke styl.

<sup>22</sup> Elke styl het twee tappe gehad wat met mekaar verbind was. So het hy dit gemaak vir al die style van die tabernakel.

<sup>23</sup> En hy het die style vir die tabernakel gemaak: twintig style aan die suidekant, na die suide toe.

<sup>24</sup> En hy het veertig silwervoetstukke onder die twintig style gemaak: twee voetstukke onder die een styl vir sy twee tappe en twee voetstukke onder die ander styl vir sy twee tappe.

<sup>25</sup> Hy het ook vir die ander sykant van die tabernakel, aan die noordekant, twintig style gemaak

<sup>26</sup> met hulle veertig silwervoetstukke: twee voetstukke onder die een styl en twee voetstukke onder die ander styl.

<sup>27</sup> En vir die agterkant van die tabernakel, teen die weste, het hy ses style gemaak.

<sup>28</sup> Ook het hy twee style vir die hoeke van die tabernakel aan die agterkant gemaak.

<sup>29</sup> En hulle was dubbel van onder, en net so was hulle bo dubbel tot by die eerste ring. So het hy dit gemaak vir altwee, vir die twee hoeke.

<sup>30</sup> So was daar dan agt style met hulle

## Exodus 37

silwervoetstukke: sestien voetstukke; twee voetstukke onder elke styl.

<sup>31</sup> Hy het ook dwarshoute van akasiahout gemaak: vyf vir die style van die een sykant van die tabernakel

<sup>32</sup> en vyf dwarshoute vir die style van die ander sykant van die tabernakel; ook vyf dwarshoute vir die style van die agterkant van die tabernakel teen die weste.

<sup>33</sup> En hy het die middelste dwarshout gemaak om oordwars te loop, in die middel van die style, van die een ent na die ander.

<sup>34</sup> En hy het die style met goud oorgetrek; en hulle ringe, as plekke vir die dwarshoute, het hy van goud gemaak. Die dwarshoute het hy ook met goud oorgetrek.

<sup>35</sup> Verder het hy die voorhangsel gemaak van pers en purperrooi en bloedrooi stowwe en fyn dubbeldraad-linne; as kunstige werk het hy dit gemaak, met gérubs.

<sup>36</sup> En hy het vier pilare van akasiahout daarvoor gemaak en dit met goud oorgetrek; hulle kramme was ook van goud; en hy het daarvoor vier silwervoetstukke gegiet.

<sup>37</sup> Hy het ook vir die ingang van die tent 'n bedekking gemaak van pers en purperrooi en bloedrooi stowwe en fyn dubbeldraad-linne, veelkleurige werk;

<sup>38</sup> en die vyf pilare wat daarby behoort, met hulle kramme; en hy het hulle toppe en ringe met goud oorgetrek; en hulle vyf voetstukke was van koper.

el was sy lengte, en anderhalf el sy breedte, en anderhalf el sy hoogte.

<sup>2</sup> En hy het dit oorgetrek met suiwer goud, van binne en van buite; en hy het daaraan 'n goue krans gemaak rondom.

<sup>3</sup> En hy het daarvoor vier goue ringe gegiet, aan sy vier voete, só dat twee ringe aan die een kant en twee ringe aan die ander kant was.

<sup>4</sup> En hy het draaghoute van akasiahout gemaak en dit met goud oorgetrek;

<sup>5</sup> en hy het die draaghoute in die ringe gestee aan weerskante van die ark om die ark te dra.

<sup>6</sup> Hy het ook 'n versoendeksel van suiwer goud gemaak. Twee en 'n half el was sy lengte, en anderhalf el sy breedte.

<sup>7</sup> Ook het hy twee gérubs van goud gemaak. Van dryfwerk het hy hulle gemaak, aan die twee ente van die versoendeksel.

<sup>8</sup> Een gérub aan die een ent en een gérub aan die ander ent. Uit een stuk, saam met die versoendeksel, het hy die gérubs gemaak, aan die twee ente.

<sup>9</sup> En die gérubs het die vlerke boontoe uitgesprei gehou, terwyl hulle met hul vlerke die versoendeksel beskut; en hulle aangesigte was na mekaar toe. Die gesigte van die gérubs was op die versoendeksel gerig.

<sup>10</sup> Hy het ook die tafel van akasiahout gemaak. Twee el was sy lengte, en 'n el sy breedte, en anderhalf el sy hoogte.

<sup>11</sup> En hy het dit met suiwer goud oorgetrek en daarvoor 'n goue krans gemaak rondom.

**37** EN Besáleël het die ark van akasiahout gemaak; twee en 'n half

## Exodus 38

<sup>12</sup> Hy het ook daarvoor 'n lys van 'n handbreed gemaak rondom; en hy het 'n goue krans vir die lys gemaak rondom.

<sup>13</sup> Hy het ook vier goue ringe daarvoor gegiet; en hy het die ringe vasgesit aan die vier hoeke van die vier pote.

<sup>14</sup> Naby die lys was die ringe as plekke vir die draaghoute om die tafel te dra.

<sup>15</sup> Hy het ook die draaghoute van akasihout gemaak en dit met goud oorgetrek om die tafel te dra.

<sup>16</sup> En hy het die gereedskap gemaak wat op die tafel moes wees: sy skottels en sy rookpanne en sy bekere en sy kanne waarmee gegiet moes word, van suiwer goud.

<sup>17</sup> Hy het ook die kandelaar van suiwer goud gemaak. Van dryfwerk het hy die kandelaar gemaak, sy voetstuk en sy stam; sy kelkies, sy knoppe en sy blomme was, daarmee saam, uit een stuk.

<sup>18</sup> En ses arms het uit die sykkante daarvan uitgegaan: drie arms van die kandelaar uit die een kant en drie arms van die kandelaar uit die ander kant.

<sup>19</sup> Drie kelkies soos amandelblomme aan die een arm, 'n knop en 'n blom, en drie kelkies soos amandelblomme aan die ander arm, 'n knop en 'n blom—so was dit aan die ses arms wat uit die kandelaar uitgaan.

<sup>20</sup> Maar aan die kandelaar self was vier kelkies soos amandelblomme, met knoppe en blomme:

<sup>21</sup> daar was 'n knop onder die eerste paar arms wat daaruit uitgaan; en 'n knop onder die tweede paar arms wat daaruit uitgaan; en 'n knop onder die derde paar arms wat

daaruit uitgaan—vir die ses arms wat daaruit uitgaan.

<sup>22</sup> Hulle knoppe en hulle arms was, daarmee saam, uit een stuk—alles saam een stuk dryfwerk van suiwer goud.

<sup>23</sup> En hy het sewe lampe daarvoor gemaak en sy snuiters en sy bakkies van suiwer goud.

<sup>24</sup> Van 'n talent suiwer goud het hy dit gemaak met al sy gereedskap.

<sup>25</sup> En hy het die reukaltaar van akasihout gemaak; 'n el was sy lengte en 'n el sy breedte, vierkantig, en twee el sy hoogte. Sy horings was, daarmee saam, uit een stuk.

<sup>26</sup> En hy het dit met suiwer goud oorgetrek: die plaat, die sykkante en die horings. En hy het daarvoor 'n goue krans gemaak rondom.

<sup>27</sup> Hy het ook twee goue ringe daarvoor gemaak, onderkant die krans aan weerskante, aan die twee sykkante, as plekke vir draaghoute om dit daarmee te dra.

<sup>28</sup> En hy het die draaghoute van akasihout gemaak en dit met goud oorgetrek.

<sup>29</sup> Hy het ook die heilige salfolie gemaak en die suiwer reukwerk van speserye, soos 'n salfmenger dit maak.

**38** HY het ook die brandofferaltaar van akasihout gemaak. Vyf el was sy lengte en vyf el sy breedte, vierkantig, en drie el sy hoogte.

<sup>2</sup> En hy het sy horings op die vier hoeke gemaak; sy horings was, daarmee saam, uit een stuk; en hy het dit met koper oorgetrek.

## Exodus 38

---

<sup>3</sup> Hy het ook al die gereedskap van die altaar maak: die potte en die skoppe en die komme, die vurke en die vuurpanne. Al dié gereedskap het hy van koper maak.

<sup>4</sup> Ook het hy vir die altaar 'n traliewerk maak, 'n netwerk van koper, onder sy lys, onderaan tot by die helfte van die altaar.

<sup>5</sup> En hy het vier ringe aan die vier ente van die kopertraliewerk gegiet, as plekke vir die draaghoute.

<sup>6</sup> En hy het die draaghoute van akasiahout maak en dit met koper oorgetrek.

<sup>7</sup> En hy het die draaghoute in die ringe gestee, aan die kante van die altaar, om dit daarmee te dra; hy het dit hol, van planke, maak.

<sup>8</sup> Hy het ook die koperwaskom maak met sy kopervoetstuk, uit die spieëls van die diensdoende vroue wat by die ingang van die tent van samekoms gedien het.

<sup>9</sup> Hy het ook die voorhof maak. Aan die suidekant, na die suide toe, was daar die behangsels van die voorhof, van fyn dubbeldraad-linne, honderd el lank;

<sup>10</sup> daarby twintig pilare met hulle twintig kopervoetstukke; die kramme en die ringe van die pilare was van silwer;

<sup>11</sup> en aan die noordekant honderd el; daarby twintig pilare met hulle twintig kopervoetstukke; die kramme en die ringe van die pilare was van silwer.

<sup>12</sup> En aan die westekant was daar behangsels, vyftig el lank; daarby tien pilare met hulle tien voetstukke; die kramme en die ringe van die pilare was

van silwer.

<sup>13</sup> En aan die oostekant, teen son-op, was daar vyftig el;

<sup>14</sup> vyftien el behangsels vir die een kant, daarby drie pilare met hulle drie voetstukke;

<sup>15</sup> en vir die ander kant—aan weerskante van die poort van die voorhof—vyftien el behangsels, daarby drie pilare met hulle drie voetstukke.

<sup>16</sup> Al die behangsels van die voorhof rondom was van fyn dubbeldraad-linne;

<sup>17</sup> en die voetstukke van die pilare was van koper, en die kramme en die ringe van die pilare van silwer; en die oortreksel van hulle toppe van silwer; en hulle self, al die pilare van die voorhof, was van silwerringe voorsien.

<sup>18</sup> En die bedekking van die poort van die voorhof was veelkleurige werk, van pers en purperrooi en bloedrooi stowwe en fyn dubbeldraad-linne: twintig el was die lengte, en die hoogte—tewens die breedte van die stof—vyf el, net soos die behangsels van die voorhof.

<sup>19</sup> Daarby vier pilare met hulle vier voetstukke van koper en hulle kramme van silwer, en die oortreksel van hulle toppe en hulle ringe van silwer.

<sup>20</sup> En al die penne vir die tabernakel en die voorhof rondom was van koper.

<sup>21</sup> DIT is die berekening van die koste van die tabernakel, van die tabernakel van die Getuienis, soos dit bereken is op bevel van Moses, deur die diens van die Leviëte, onder leiding van Ítamar, die seun van die priester Aäron.

## Exodus 39

<sup>22</sup> En Besáleël, die seun van Uri, die seun van Hur, van die stam van Juda, het alles gemaak wat die HERE Moses beveel het.

<sup>23</sup> En saam met hom Ohóliab, die seun van Ahísamag, van die stam van Dan, 'n ambagsman en kunstenaar en kunswewer in pers en in purperrooi en in bloedrooi stowwe en in fyn linne.

<sup>24</sup> Al die goud wat vir die werk gebruik is, by al die werk van die heiligdom—die goud wat as offer aangebied was, het bedra negen-en-twintig talente en sewehonderd-en-dertig sikkels volgens die sikkal van die heiligdom.

<sup>25</sup> En die silwer van die geteldes van die vergadering was honderd talente en duisend-sewehonderd-vyf-en-sewentig sikkels volgens die sikkal van die heiligdom;

<sup>26</sup> 'n beka vir elke persoon, dit is 'n halfsikkal volgens die sikkal van die heiligdom, van elkeen wat oorgegaan het na die geteldes, van twintig jaar oud en daarbo, naamlik seshonderd-en-drieduisend-vyfhonderd-en-vyftig man.

<sup>27</sup> En die honderd talente silwer het gedien om die voetstukke van die heiligdom en die voetstukke van die voorhangsel te giet; honderd voetstukke vir honderd talente, 'n talent vir 'n voetstuk.

<sup>28</sup> Maar van die duisend-sewehonderd-vyf-en-sewentig sikkels het hy kramme vir die pilare gemaak, en hy het hulle toppe oorgetrek en hulle van ringe voorsien.

<sup>29</sup> En die koper wat as offer aangebied was, het bedra sewentig talente en

tweeënduisend-vierhonderd sikkels.

<sup>30</sup> En hy het daaruit die voetstukke van die ingang van die tent van samekoms gemaak en die koperaltaar en sy kopertraliewerk en al die gereedskap van die altaar;

<sup>31</sup> en die voetstukke van die voorhof rondom en die voetstukke van die poort van die voorhof en al die penne van die tabernakel, ook al die penne van die voorhof rondom.

**39** HULLE het ook kunstige klere van pers en purperrooi en bloedrooi stowwe gemaak om in die heiligdom te dien. Ook het hulle die heilige klere vir Aäron gemaak soos die HERE Moses beveel het.

<sup>2</sup> En hy het die skouerkleed gemaak van goud, pers en purperrooi en bloedrooi stowwe en fyn dubbeldraad-linne.

<sup>3</sup> En hulle het van die goud dun plate geslaan, en hy het dit in drade gesny om dit in te werk in die pers en purperrooi en bloedrooi stowwe en in die fyn linne—'n kunstige werk.

<sup>4</sup> Hulle het daar skouerstukke aan gemaak wat aan mekaar vas was; aan die twee bo-ente was dit saamgevoeg.

<sup>5</sup> En die band wat daaraan was om dit vas te bind, was daarmee saam uit een stuk, van dieselfde werk, van goud, pers en purperrooi en bloedrooi stowwe en fyn dubbeldraad-linne, soos die HERE Moses beveel het.

<sup>6</sup> Hulle het ook die oniksstene gemaak, vasgesit in kassies van goud, gegraveer soos op 'n seëlsteen ingesny word, volgens die name van die kinders van Israel.



## Exodus 39

---

<sup>7</sup> En hy het hulle op die skouerstukke van die skouerkleed bevestig as gedagtenisstene aan die kinders van Israel, soos die HERE Moses beveel het.

<sup>8</sup> Hy het ook die borstas van kunstige werk gemaak soos die werk van die skouerkleed; van goud, pers en purperrooi en bloedrooi stowwe en fyn dubbeldraad-linne.

<sup>9</sup> Dit was vierkantig; dubbel gevou het hulle die borstas gemaak; 'n span sy lengte en 'n span sy breedte, dubbel gevou was dit.

<sup>10</sup> En hulle het daarin vier rye stene ingevul: 'n ry met 'n karneool, 'n topaas en 'n smarag was die eerste ry.

<sup>11</sup> En die tweede ry: 'n karbonkel, 'n saffier en 'n jaspis.

<sup>12</sup> En die derde ry: 'n hiasint, 'n agaas en 'n ametis.

<sup>13</sup> En die vierde ry: 'n chrisoliet, 'n oniks en 'n sardoniks; hulle is in kassies van goud vasgesit by hulle invulling.

<sup>14</sup> En die stene was volgens die name van die kinders van Israel twaalf, volgens hulle name. Soos op 'n seëlsteen uitgesny word, was hulle vir twaalf stamme, elkeen volgens sy naam.

<sup>15</sup> Hulle het ook by die borstas gedraaide kettings gemaak, soos toutjies gedraai, van suiwer goud;

<sup>16</sup> en hulle het twee goue kassies en twee goue ringe gemaak, en die twee ringe aan die twee bo-ente van die borstas bevestig,

<sup>17</sup> en hulle het die twee goue toutjies aan die twee ringe aan die bo-ente van die borstas vasgemaak.

<sup>18</sup> Maar die twee ander ente van die twee

toutjies het hulle aan die twee kassies vasgemaak en dié dan aan die skouerstukke van die skouerkleed bevestig, aan die voorkant daarvan.

<sup>19</sup> Hulle het ook twee goue ringe gemaak en dié aan die twee onder-ente van die borstas bevestig, aan die kant wat teen die skouerkleed aan lê, aan die binnekant.

<sup>20</sup> En hulle het twee goue ringe gemaak en dié aan die twee skouerstukke van die skouerkleed bevestig, onderaan, aan die voorkant daarvan, by sy verbinding, bo die band van die skouerkleed.

<sup>21</sup> En hulle het die borstas, met sy ringe, aan die ringe van die skouerkleed met 'n pers toutjie vasgebind, sodat dit bo die band van die skouerkleed sou wees en die borstas nie van die skouerkleed kon afskuiwe nie, soos die HERE Moses beveel het.

<sup>22</sup> En hy het die mantel van die skouerkleed van wewerswerk gemaak, heeltemal van pers stof.

<sup>23</sup> En die opening van die mantel was in die middel daarvan soos die opening van 'n pantser; die opening het 'n soom rondom gehad, dat dit nie sou skeur nie.

<sup>24</sup> En aan die soom van die mantel het hulle granaatjies gemaak van pers en purperrooi en bloedrooi stowwe en fyn dubbeldraad-linne.

<sup>25</sup> Hulle het ook klokkies van suiwer goud gemaak en die klokkies tussen die granaatjies gesit, aan die soom van die mantel rondom, tussen die granaatjies in:

<sup>26</sup> 'n klokke en 'n granaatjie, 'n klokke en 'n granaatjie, aan die soom van die mantel

## Exodus 39

rondom, vir die diens, soos die HERE Moses beveel het.

<sup>27</sup> Hulle het ook die rokke van fyn linne gemaak, van wewerswerk, vir Aäron en sy seuns;

<sup>28</sup> en die tulband van fyn linne en die pronkmusse van fyn linne en die linnebroeke van fyn dubbeldraad-linne;

<sup>29</sup> en die gordel van fyn dubbeldraad-linne en van pers en purperrooi en bloedrooi stowwe, veelkleurige werk, soos die HERE Moses beveel het.

<sup>30</sup> Hulle het ook die plaat van die heilige kroon van suiwer goud gemaak en daarop geskrywe met letters soos dit op 'n seëlsteen uitgesny word: HEILIG AAN DIE HERE.

<sup>31</sup> En hulle het 'n pers toutjie daaraan vasgemaak om dit bo-op die tulband te bevestig, soos die HERE Moses beveel het.

<sup>32</sup> So is dan al die werk aan die tabernakel van die tent van samekoms voltooi; en die kinders van Israel het dit gemaak net soos die HERE Moses beveel het; so het hulle dit gemaak.

<sup>33</sup> En hulle het die tabernakel na Moses gebring, die tent self met alles wat daarby behoort, sy hakies, sy style, sy dwarshoute en sy pilare en sy voetstukke,

<sup>34</sup> en die dekkleed van rooigeverfde ramsvelle en die dekkleed van robbevelle en die voorhangsel tot bedekking;

<sup>35</sup> die ark van die Getuienis met sy draaghoute en die versoendeksel;

<sup>36</sup> die tafel met al sy gereedskap en die toonbrode;

<sup>37</sup> die suiwer kandelaar met sy lampe, die

lampe wat daarop gerangskik moes word, met al sy gereedskap en die olie vir die kandelaar;

<sup>38</sup> verder die goue altaar en die salfolie en die reukwerk van speserye en die bedekking vir die ingang van die tent;

<sup>39</sup> die koperaltaar en sy kopertraliwerk, sy draaghoute met al sy gereedskap, die waskom en sy voetstuk;

<sup>40</sup> die behangsels van die voorhof, sy pilare en sy voetstukke, en die bedekking vir die poort van die voorhof, die lyne en penne wat daarby behoort, en al die gereedskap vir die diens in die tabernakel van die tent van samekoms;

<sup>41</sup> die kunstige klere, om in die heiligdom te dien, die heilige klere van die priester Aäron en die klere van sy seuns, om die priesteramp te bedien.

<sup>42</sup> Net soos die HERE Moses beveel het, so het die kinders van Israel die hele werk gemaak.

<sup>43</sup> En Moses het die hele werk bekyk—en hulle het dit gemaak soos die HERE beveel het, so het hulle dit gemaak. Toe het Moses hulle geseën.

**40** VERDER het die HERE met Moses gespreek en gesê:

<sup>2</sup> Op die dag van die eerste maand, op die eerste van die maand, moet jy die tabernakel van die tent van samekoms oprig.

<sup>3</sup> En jy moet daarin plaas die ark van die Getuienis en die ark met die voorhangsel bedek.

<sup>4</sup> Dan moet jy die tafel inbring en daarop regsit wat daarop behoort. Jy moet ook die

## Exodus 39

---

kandelaar inbring en sy lampe opsteek.

<sup>5</sup> En jy moet die goue altaar vir die reukwerk voor die ark van die Getuienis neersit. Dan moet jy die bedekking van die ingang van die tabernakel ophang.

<sup>6</sup> Jy moet ook die brandofferaltaar voor die ingang van die tabernakel van die tent van samekoms neersit.

<sup>7</sup> En jy moet die waskom tussen die tent van samekoms en die altaar neersit en daar water in gooi.

<sup>8</sup> En maak die voorhof rondom, en hang die bedekking aan die poort van die voorhof op.

<sup>9</sup> Dan moet jy die salfolie neem, en jy moet die tabernakel salf en alles wat daarin is, en dit heilig met alles wat daarby behoort; en dit sal heilig wees.

<sup>10</sup> Jy moet ook die brandofferaltaar salf met al sy gereedskap, en jy moet die altaar heilig, en die altaar sal hoogheilig wees.

<sup>11</sup> Salf dan die waskom en sy voetstuk, en heilig dit.

<sup>12</sup> Jy moet ook Aäron en sy seuns laat nader kom, na die ingang van die tent van samekoms toe, en jy moet hulle met water was.

<sup>13</sup> Trek Aäron dan die heilige klere aan; en salf hom en heilig hom, dat hy vir My die priesteramp kan bedien.

<sup>14</sup> Jy moet ook sy seuns laat nader kom en hulle die rokke aantrek.

<sup>15</sup> Salf hulle dan, soos jy hulle vader gesalf het, dat hulle vir My die priesteramp kan bedien. En hul salwing moet vir hulle 'n ewige priesterskap in hulle geslagte wees.

<sup>16</sup> En Moses het gedoen net soos die HERE

hom beveel het; so het hy gedoen.

<sup>17</sup> En in die eerste maand, in die tweede jaar, op die eerste van die maand, is die tabernakel opgerig.

<sup>18</sup> En Moses het die tabernakel opgerig: hy het sy voetstukke neergesit en sy style daarop gesit en sy dwarshoute vasgemaak en sy pilare opgerig.

<sup>19</sup> En hy het die tentseil oor die tabernakel gespan en die dekkleed van die tent daar bo-oor getrek, soos die HERE Moses beveel het.

<sup>20</sup> Verder het hy die Getuienis geneem en dit in die ark neergelê en die draaghoute aan die kant van die ark ingestee, en die versoendeksel het hy bo-op die ark gesit.

<sup>21</sup> Toe het hy die ark in die tabernakel gebring en die voorhangsel tot bedekking opgehang en die ark van die Getuienis bedek, soos die HERE Moses beveel het.

<sup>22</sup> Hy het ook die tafel in die tent van samekoms neergesit, aan die kant van die tabernakel, teen die noorde, buitekant die voorhangsel.

<sup>23</sup> En hy het die brood daarop gerangskik voor die aangesig van die HERE, soos die HERE Moses beveel het.

<sup>24</sup> Hy het ook die kandelaar in die tent van samekoms gesit, teenoor die tafel, aan die suidekant van die tabernakel.

<sup>25</sup> En hy het die lampe opgesteek, voor die aangesig van die HERE, soos die HERE Moses beveel het.

<sup>26</sup> En hy het die goue altaar in die tent van samekoms neergesit, voor die voorhangsel,

<sup>27</sup> en reukwerk van speserye daarop aan die brand gestee, soos die HERE Moses

---

beveel het.

<sup>28</sup> Hy het ook die bedekking van die ingang van die tabernakel opgehang.

<sup>29</sup> En hy het die brandofferaltaar by die ingang van die tabernakel van die tent van samekoms neergesit, en hy het daarop die brandoffer en die spysoffer gebring, soos die HERE Moses beveel het.

<sup>30</sup> Hy het ook die waskom tussen die tent van samekoms en die altaar gesit, en hy het daar water in gegooi om mee te was.

<sup>31</sup> En Moses en Aäron en sy seuns het daaruit hulle hande en voete gewas.

<sup>32</sup> As hulle ingaan in die tent van samekoms of nader kom na die altaar, het hulle hul elke keer gewas, soos die HERE Moses beveel het.

<sup>33</sup> Hy het ook die voorhof opgerig, rondom die tabernakel en die altaar, en die bedekking vir die poort van die voorhof

opgehang. So het Moses dan die werk voltooi.

<sup>34</sup> Toe het die wolk die tent van samekoms oordek, en die heerlijkheid van die HERE het die tabernakel vervul,

<sup>35</sup> sodat Moses nie in die tent van samekoms kon ingaan nie, omdat die wolk daarop gerus en die heerlijkheid van die HERE die tabernakel vervul het.

<sup>36</sup> En as die wolk van die tabernakel af optrek, het die kinders van Israel elke keer weggetrek op al hulle togte;

<sup>37</sup> maar as die wolk nie optrek nie, dan trek hulle nie weg nie, totdat dit weer optrek.

<sup>38</sup> Want die wolk van die HERE was bedags op die tabernakel, en vuur was snags daarin, voor die oë van die hele huis van Israel, op al hulle togte.

# Levítikus

**1** EN die HERE het Moses geroep en met hom gesprek uit die tent van samekoms en gesê:  
**2** Spreek met die kinders van Israel en sê vir hulle: As iemand van julle aan die HERE 'n offer wil bring, kan julle jul offer bring van vee—van beeste of van kleinvee.  
**3** As sy offer 'n brandoffer is van beeste, moet dit 'n bul sonder gebrek wees wat hy bring. By die ingang van die tent van samekoms moet hy dit bring, sodat hy welgevalle voor die aangesig van die HERE kan vind.  
**4** En hy moet sy hand op die kop van die brandoffer lê, dan sal dit vir hom met welgevalle aangeneem word om versoening vir hom te doen.  
**5** Dan moet hy die jong bul voor die aangesig van die HERE slag; en die seuns van Aäron, die priesters, moet die bloed bring en die bloed rondom teen die altaar uitgooi wat by die ingang van die tent van samekoms is.  
**6** Dan moet hy die brandoffer afslag en dit in sy stukke verdeel.  
**7** En die seuns van Aäron, die priester, moet vuur op die altaar neersit en hout op die vuur reglê.  
**8** Ook moet die seuns van Aäron, die priesters, die stukke, die kop en die vet reglê op die hout wat op die altaarvuur is.  
**9** Maar die binnegoed en die pote moet hy met water was, en die priester moet dit alles op die altaar aan die brand steek as

brandoffer, 'n vuuroffer van lieflike geur aan die HERE.

**10** En as sy offer 'n stuk kleinvee is, van skape of van bokke, as brandoffer, moet dit 'n ram sonder gebrek wees wat hy bring.

**11** En hy moet dit slag aan die noordekant van die altaar, voor die aangesig van die HERE; en die seuns van Aäron, die priesters, moet die bloed daarvan rondom teen die altaar uitgooi.

**12** Daarna moet hy dit in sy stukke verdeel, met die kop en die vet, en die priester moet dit reglê op die hout wat op die altaarvuur is.

**13** Maar die binnegoed en die pootjies moet hy met water was, en die priester moet dit alles bring en op die altaar aan die brand steek; 'n brandoffer is dit, 'n vuuroffer van lieflike geur aan die HERE.

**14** En as sy offer aan die HERE 'n brandoffer is van voëls, moet hy sy offer bring van tortelduiwe of van jong duiwe.

**15** En die priester moet dit na die altaar bring en die kop afknyp en op die altaar aan die brand steek, en die bloed moet teen die kant van die altaar uitgedruk word.

**16** Dan moet hy die krop met die vere daaraan verwyder en dit by die altaar gooi, aan die oostekant, op die asplek.

**17** Dan moet hy dit by die vlerke skeur sonder om hulle af te trek; en die priester moet dit op die altaar aan die brand steek, op die hout wat oor die vuur is; 'n brandoffer is dit, 'n vuuroffer van lieflike geur aan die HERE.

**2** EN as iemand aan die HERE 'n spysoffer bring, moet sy offer fynmeel wees; en hy moet olie daarop giet en wierook daarby voeg;

<sup>2</sup> en hy moet dit na die seuns van Aäron, die priesters, bring; en die priester moet daarvan 'n handvol neem, van die fynmeel met die olie, met al die wierook wat daarby behoort; en hy moet dit as die gedenkoffer op die altaar aan die brand steek, 'n vuuroffer van lieflike geur aan die HERE.

<sup>3</sup> En wat oorbly van die spysoffer, is vir Aäron en sy seuns, 'n hoogheilige deel van die vuuroffers van die HERE.

<sup>4</sup> En as jy 'n spysoffer bring wat in die oond gebak is, moet dit fynmeel wees, ongesuurde koeke met olie gemeng, en ongesuurde platkoeke met olie bestryk.

<sup>5</sup> En as 'n spysoffer van die bakplaat jou offer is, moet dit fynmeel wees met olie gemeng en ongesuurd.

<sup>6</sup> Breek dit in stukkies en giet olie daarop: dit is 'n spysoffer.

<sup>7</sup> En as 'n spysoffer uit die pan jou offer is, moet dit van fynmeel met olie berei word.

<sup>8</sup> Dan moet jy die spysoffer wat daarvan berei word, aan die HERE bring: hulle moet dit na die priester aanbring, en hy moet dit na die altaar dra.

<sup>9</sup> En die priester moet van die spysoffer die gedenkoffer daarvan aflag en op die altaar aan die brand steek, 'n vuuroffer van lieflike geur aan die HERE.

<sup>10</sup> En wat oorbly van die spysoffer, is vir Aäron en sy seuns, 'n hoogheilige deel van die vuuroffers van die HERE.

<sup>11</sup> Geen spysoffer wat julle aan die HERE

bring, mag van iets wat ingesuur is, berei word nie; want van géén suurdeeg of heuning mag julle vir die HERE 'n vuuroffer aan die brand steek nie.

<sup>12</sup> As 'n offer van eersteling mag julle dit aan die HERE bring, maar op die altaar mag dit nie as lieflike geur kom nie.

<sup>13</sup> En jy moet al jou spysoffers met sout berei, en jy mag die sout van die verbond van jou God by jou spysoffer nie laat ontbreek nie; by al jou offers moet jy sout bring.

<sup>14</sup> En as jy aan die HERE 'n spysoffer van eersteling bring, moet jy as spysoffer van jou eersteling bring: are wat oor die vuur gebraai is, gebreekte korrels van vars graan.

<sup>15</sup> En jy moet olie daarby voeg en wierook daarop strooi; 'n spysoffer is dit.

<sup>16</sup> Dan moet die priester die gedenkoffer daarvan, 'n deel van die gebreekte koring en van die olie met al die wierook, aan die brand steek as 'n vuuroffer aan die HERE.

**3** EN as 'n dankoffer sy offer is, as hy dit bring van beeste, bul of vers, moet hy dit sonder gebrek voor die aangesig van die HERE bring.

<sup>2</sup> En hy moet sy hand op die kop van sy offer lê en dit slag by die ingang van die tent van samekoms. En die seuns van Aäron, die priesters, moet die bloed rondom teen die altaar uitgooi.

<sup>3</sup> Dan moet hy van die dankoffer 'n vuuroffer aan die HERE bring: die vet wat oor die binnegoed lê, en al die vet wat aan die binnegoed is,

<sup>4</sup> en die twee niere en die vet daarop wat

## Levítikus 4

aan die lendene is, en die lap aan die lewer—by die niere moet hy dit wegneem.

<sup>5</sup> En die seuns van Aäron moet dit op die altaar aan die brand steek, op die brandoffer wat op die hout is, bo-op die vuur, as 'n vuuroffer van lieflike geur aan die HERE.

<sup>6</sup> En as sy offer 'n stuk kleinvee is, as 'n dankoffer aan die HERE, moet hy dit bring sonder gebrek, ram of ooi.

<sup>7</sup> As hy 'n skaaplam bring as sy offer, moet hy dit voor die aangesig van die HERE bring

<sup>8</sup> en sy hand op die kop van sy offer lê en dit slag voor die tent van samekoms; en die seuns van Aäron moet die bloed rondom teen die altaar uitgooi.

<sup>9</sup> Daarna moet hy van die dankoffer die vet as vuuroffer aan die HERE bring: die hele vetstert—naby die stuitjie moet hy dit wegneem—en die vet wat oor die binnegoed lê, en al die vet wat aan die binnegoed is,

<sup>10</sup> en die twee niere en die vet daarop wat aan die lendene is, en die lap aan die lewer—by die niere moet hy dit wegneem.

<sup>11</sup> En die priester moet dit op die altaar aan die brand steek as vuurofferspys vir die HERE.

<sup>12</sup> En as sy offer 'n bok is, moet hy dit voor die aangesig van die HERE bring

<sup>13</sup> en sy hand op die kop daarvan lê en dit slag voor die tent van samekoms; en die seuns van Aäron moet die bloed rondom teen die altaar uitgooi.

<sup>14</sup> Dan moet hy daarvan sy offer as vuuroffer aan die HERE bring; die vet wat

oor die binnegoed lê, en al die vet wat aan die binnegoed is,

<sup>15</sup> en die twee niere en die vet daarop wat aan die lendene is, en die lap aan die lewer—by die niere moet hy dit wegneem.

<sup>16</sup> En die priester moet dit op die altaar aan die brand steek as vuurofferspys vir 'n lieflike geur. Al die vet behoort aan die HERE.

<sup>17</sup> 'n Ewige insetting is dit vir julle geslagte in al julle woonplekke: géén vet en géén bloed mag julle eet nie.

**4** VERDER het die HERE met Moses gespreek en gesê:

<sup>2</sup> Spreek met die kinders van Israel en sê: As iemand in swakheid sondig teen een van alle gebooie van die HERE en een van die dinge wat nie gedoen mag word nie, tog doen —

<sup>3</sup> as die gesalfde priester sondig, sodat die volk daardeur skuldig word, moet hy vir die sonde wat hy gedoen het, 'n jong bul sonder gebrek aan die HERE as sondoffer bring;

<sup>4</sup> en hy moet die bul bring na die ingang van die tent van samekoms, voor die aangesig van die HERE, en moet sy hand op die kop van die bul lê en die bul slag voor die aangesig van die HERE.

<sup>5</sup> Dan moet die gesalfde priester van die bloed van die bul neem en dit na die tent van samekoms bring,

<sup>6</sup> en die priester moet sy vinger in die bloed steek en van die bloed sewe maal sprinkel voor die aangesig van die HERE, voor die voorhangsel van die heiligdom.

<sup>7</sup> Ook moet die priester van die bloed stryk

## Levítikus 4

---

aan die horings van die altaar van die reukwerk van speserye, wat in die tent van samekoms is, voor die aangesig van die HERE; en hy moet al die orige bloed van die bul uitgiet aan die onderkant van die brandofferaltaar wat by die ingang van die tent van samekoms is;

<sup>8</sup> en al die vet van die sondofferbul moet hy van hom aflag, die vet wat oor die binnegoed lê, en al die vet wat aan die binnegoed is,

<sup>9</sup> en die twee niere en die vet daarop wat aan die lendene is, en die lap aan die lewer—by die niere moet hy dit wegneem —

<sup>10</sup> soos dit van die dankofferbul afgelig word—en die priester moet dit aan die brand steek op die brandofferaltaar.

<sup>11</sup> Maar die vel van die bul en al sy vleis met die kop en die pote en die binnegoed en die mis —

<sup>12</sup> die hele bul moet hy buitekant die laer uitbring op 'n rein plek waar die as uitgegooi word, en hy moet hom op hout met vuur verbrand; op die plek waar die as uitgegooi word, moet hy verbrand word.

<sup>13</sup> En as die hele vergadering van Israel hulle misgaan sonder dat die vergadering hom daarvan bewus is; en hulle enigiets doen wat die HERE verbied het, en skuldig word;

<sup>14</sup> en die sonde wat hulle so gedoen het, bekend word, moet die vergadering 'n jong bul as sondoffer laat aankom en hom voor die tent van samekoms bring,

<sup>15</sup> en die oudstes van die vergadering moet hulle hande op die kop van die bul lê voor

die aangesig van die HERE, en die bul moet voor die aangesig van die HERE geslag word.

<sup>16</sup> Dan moet die gesalfde priester van die bloed van die bul in die tent van samekoms bring,

<sup>17</sup> en die priester moet sy vinger in die bloed steek en sewe maal voor die aangesig van die HERE, voor die voorhangsel sprinkel.

<sup>18</sup> En hy moet van die bloed stryk aan die horings van die altaar wat in die tent van samekoms voor die aangesig van die HERE is. Dan moet hy al die orige bloed uitgiet aan die onderkant van die brandofferaltaar wat by die ingang van die tent van samekoms is;

<sup>19</sup> en hy moet al die vet van hom aflag en op die altaar aan die brand steek

<sup>20</sup> en met die bul doen soos hy met die sondofferbul gedoen het. So moet hy met hom maak; en die priester moet vir hulle versoening doen, en dit sal hulle vergewe word.

<sup>21</sup> Daarna moet hy die bul buitekant die laer uitbring en hom verbrand soos hy die eerste bul verbrand het; dit is 'n sondoffer van die vergadering.

<sup>22</sup> As 'n owerste sondig en in swakheid enigiets doen wat die HERE sy God verbied het, en hy skuldig word;

<sup>23</sup> of as sy sonde wat hy so gedoen het, aan hom bekend word, moet hy as sy offer bring 'n bok sonder gebrek, 'n ram;

<sup>24</sup> en hy moet sy hand op die kop van die bok lê en hom slag op die plek waar hulle die brandoffer voor die aangesig van die



## Levítikus 5

HERE slag; dit is 'n sondoffer.

<sup>25</sup> Dan moet die priester van die bloed van die sondoffer met sy vinger neem en dit aan die horings van die brandofferaltaar stryk; maar die orige bloed moet hy aan die onderkant van die brandofferaltaar uitgiet.

<sup>26</sup> Hy moet ook al die vet op die altaar aan die brand steek soos die vet van die dankoffer. So moet die priester dan vir hom versoening doen weens sy sonde, en dit sal hom vergewe word.

<sup>27</sup> En as iemand van die volk van die land in swakheid sondig, omdat hy enigiets doen wat die HERE verbied het, en hy skuldig word;

<sup>28</sup> of as sy sonde wat hy gedoen het, aan hom bekend word, dan moet hy as sy offer bring 'n bok sonder gebrek, 'n ooi, vir die sonde wat hy gedoen het;

<sup>29</sup> en hy moet sy hand op die kop van die sondoffer lê en die sondoffer slag op die plek van die brandoffer.

<sup>30</sup> Dan moet die priester van haar bloed met sy vinger neem en dit aan die horings van die brandofferaltaar stryk; maar al die orige bloed moet hy aan die onderkant van die altaar uitgiet;

<sup>31</sup> en al die vet moet hy wegneem soos die vet van die dankoffer af weggeneem is, en die priester moet dit op die altaar aan die brand steek as lieflike geur vir die HERE. So moet die priester dan vir hom versoening doen, en dit sal hom vergewe word.

<sup>32</sup> Maar ingeval hy 'n skaaplam as sy sondoffer bring, moet dit 'n ooi wees sonder gebrek wat hy bring;

<sup>33</sup> en hy moet sy hand op die kop van die sondoffer lê en dit as sondoffer slag op die plek waar hulle die brandoffer slag.

<sup>34</sup> Dan moet die priester van die bloed van die sondoffer met sy vinger neem en dit aan die horings van die brandofferaltaar stryk, maar al die orige bloed moet hy aan die onderkant van die altaar uitgiet;

<sup>35</sup> en al die vet moet hy wegneem soos die vet van die dankofferlam weggeneem word, en die priester moet dit op die altaar oor die vuuroffers van die HERE aan die brand steek. So moet die priester dan vir hom versoening doen vir die sonde wat hy gedoen het, en dit sal hom vergewe word.

**5** EN as iemand sondig—dat hy die luid uitgesproke beswering hoor, terwyl hy getuie was, dit gesien het of daarvan weet—as hy naamlik dit nie te kenne gee nie en so sy ongeregtheid moet dra;

<sup>2</sup> of as iemand enigiets aanraak wat onrein is—die aas van 'n onrein wilde dier of die aas van onrein vee of die aas van onrein gedierte wat rondkruip—en dit vir hom verborge was, maar hy onrein geword het en skuldig is;

<sup>3</sup> of as hy iets onreins van 'n mens aanraak—volgens al die onreinheid waardeur hy hom kan verontreinig—en dit vir hom verborge was, maar hy dit te wete gekom het en skuldig is;

<sup>4</sup> of as iemand sweer terwyl hy onverskillig met die lippe praat om kwaad of goed te doen—volgens alles wat 'n mens met 'n eed onverskillig kan praat—en dit vir hom verborge was, maar hy dit te wete gekom het en skuldig is aan een van

## Levítikus 6

---

hierdie dinge;

<sup>5</sup> as hy dan aan een van hierdie dinge skuldig is, moet hy bely waar hy teen gesondig het,

<sup>6</sup> en as boete vir die sonde wat hy gedoen het, aan die HERE 'n ooi bring van die kleinvee, 'n skaaplam of 'n bok, as sondoffer. En die priester moet vir hom versoening doen weens sy sonde.

<sup>7</sup> Maar as hy nie 'n stuk kleinvee kan bekostig nie, moet hy as boete vir wat hy gesondig het, twee tortelduiwe of twee jong duiwe aan die HERE bring, een as sondoffer en een as brandoffer;

<sup>8</sup> en hy moet hulle na die priester bring, wat dié een eerste moet offer wat as sondoffer bedoel is, en sy kop vlak voor sy nek afknyp sonder om dit af te trek.

<sup>9</sup> Dan moet hy van die bloed van die sondoffer teen die kant van die altaar sprinkel; maar wat oorbly van die bloed, moet aan die onderkant van die altaar uitgedruk word; dit is 'n sondoffer.

<sup>10</sup> En die ander een moet hy as brandoffer volgens voorskrif berei. So moet die priester dan vir hom versoening doen weens die sonde wat hy gedoen het, en dit sal hom vergewe word.

<sup>11</sup> Maar as hy nie twee tortelduiwe of twee jong duiwe kan bekostig nie, moet hy as offer vir wat hy gesondig het, die tiende van 'n efa fynmeel as sondoffer bring. Hy moet geen olie daarop gooi en geen wierook daar byvoeg nie, want dit is 'n sondoffer.

<sup>12</sup> En hy moet dit na die priester bring, en die priester moet daar 'n handvol van

neem as die gedenkoffer en dit op die altaar oor die vuuroffers van die HERE aan die brand steek; dit is 'n sondoffer.

<sup>13</sup> So moet die priester dan vir hom versoening doen vir die sonde wat hy gedoen het in enigeen van hierdie gevalle, en dit sal hom vergewe word; verder behoort dit aan die priester net soos die spysoffer.

<sup>14</sup> OOK het die HERE met Moses gespreek en gesê:

<sup>15</sup> As iemand in iets ontrou handel en in swakheid sondig met betrekking tot een van die heilige gawes van die HERE, moet hy as boete aan die HERE bring 'n ram sonder gebrek van die kleinvee, na jou skatting van die waarde in sikkels silwer, volgens die sikkels van die heiligdom, as 'n skuldoffer.

<sup>16</sup> En hy moet vir wat hy ten opsigte van die heilige gawes gesondig het, vergoeding gee en nog die vyfde deel daarvan byvoeg en dit aan die priester gee; en die priester moet vir hom versoening doen deur die skuldofferram, en dit sal hom vergewe word.

<sup>17</sup> En as iemand sondig en onbewus enigiets doen wat die HERE verbied het, en skuldig word en sy ongeregtheid moet dra,

<sup>18</sup> dan moet hy van die kleinvee, na jou skatting, 'n ram sonder gebrek as skuldoffer na die priester bring; en die priester moet vir hom versoening doen vir die misdryf wat hy sonder opset, onbewus begaan het; en dit sal hom vergewe word.

<sup>19</sup> Dit is 'n skuldoffer; hy is sekerlik

## Levítikus 6

skuldig teenoor die HERE.

**6** VERDER het die  
HERE met Moses gesprek en gesê:

<sup>2</sup> As iemand sondig en ontrou handel teen die HERE deurdat hy teenoor sy naaste ontken dat iets aan hom toevertrou of as pand gegee is of deur hom geroof is, of dat hy sy naaste iets afgepers het,

<sup>3</sup> of dat hy iets gekry het wat weg was, en dit ontken; of dat hy vals sweer ten opsigte van enigiets wat 'n mens kan doen om hom daarmee te besondig —

<sup>4</sup> as hy dan sondig en skuldig word, moet hy teruggee wat hy deur roof ontvreem of deur afpersing verkry het, of wat aan hom toevertrou was, of verlore goed wat hy gevind het;

<sup>5</sup> of alles waaroor hy vals gesweer het: hy moet daar ten volle vergoeding voor gee en nog die vyfde deel daarvan byvoeg; aan hom aan wie dit behoort, moet hy dit gee op die dag as hy boete doen.

<sup>6</sup> En hy moet van die kleinvee, na jou skatting, as boete aan die HERE 'n ram sonder gebrek as skuldoffer na die priester bring.

<sup>7</sup> Dan moet die priester vir hom versoening doen voor die aangesig van die HERE, en dit sal hom vergewe word—enigiets wat 'n mens doen, sodat hy daardeur skuldig word.

<sup>8</sup> VERDER het die HERE met Moses gesprek en gesê:

<sup>9</sup> Gee bevel aan Aäron en sy seuns en sê: Dit is die wet van die brandoffer: Dit, die brandoffer, moet op sy vuurherd op die altaar die hele nag lank tot die môre toe bly,

en die altaarvuur moet daardeur aan die brand gehou word.

<sup>10</sup> En die priester moet sy linnekleed aantrek, en die linnebroek moet hy oor sy vlees aantrek; dan moet hy die as wegneem waartoe die vuur die brandoffer op die altaar verteer het, en dit langs die altaar uitgooi.

<sup>11</sup> Daarna moet hy sy klere uittrek en ander klere aantrek, en die as buitekant die laer op 'n rein plek uitbring.

<sup>12</sup> En die vuur op die altaar moet daardeur aan die brand gehou word, dit mag nie doodgaan nie; maar die priester moet elke môre daarvoor hout aan die brand steek en die brandoffer daarvoor reglê en die stukke vet van die dankoffers daarvoor aan die brand steek.

<sup>13</sup> Vuur moet gedurigdeur op die altaar aan die brand gehou word; dit mag nie doodgaan nie.

<sup>14</sup> En dit is die wet van die spysoffer: Die seuns van Aäron moet dit voor die aangesig van die HERE voor die altaar bring,

<sup>15</sup> en een moet daarvan 'n handvol neem, van die spysoffer se fynmeel met die olie, en al die wierook wat op die spysoffer is, en hy moet op die altaar die gedenkoffer daarvan aan die brand steek as lieflike geur vir die HERE.

<sup>16</sup> En wat daarvan oorbly, moet Aäron en sy seuns eet; ongesuurd moet dit geëet word op 'n heilige plek; in die voorhof van die tent van samekoms moet hulle dit eet.

<sup>17</sup> Dit mag nie gesuurd gebak word nie; as hulle deel het Ek dit van my vuuroffers

## Levítikus 7

gegee. Hoogheilig is dit soos die sondoffer en die skuldoffer.

<sup>18</sup> Almal wat manlik is onder die seuns van Aäron, mag dit eet. Dit is 'n ewige insetting vir julle geslagte uit die vuuroffers van die HERE. Alles wat daaraan raak, word heilig.

<sup>19</sup> Verder het die HERE met Moses gespreek en gesê:

<sup>20</sup> Dit is die offer van Aäron en sy seuns wat hulle aan die HERE moet bring op die dag as hy gesalf word: die tiende van 'n efa fynmeel as voortdurende spysoffer; die helfte daarvan in die môre en die helfte in die aand.

<sup>21</sup> Dit moet op 'n plaat met olie berei word; deurmekaargeroer moet jy dit bring; in gebakte brokkies moet jy die spysoffer bring as lieflike geur vir die HERE.

<sup>22</sup> Ook moet die priester wat uit sy seuns in sy plek gesalf word, dit berei, as 'n ewige insetting. Dit moet geheel en al vir die HERE aan die brand gestee word.

<sup>23</sup> So moet dan elke spysoffer van 'n priester 'n voloffer wees; dit mag nie geëet word nie.

<sup>24</sup> Verder het die HERE met Moses gespreek en gesê:

<sup>25</sup> Spreek met Aäron en sy seuns en sê: Dit is die wet van die sondoffer: Op die plek waar die brandoffer geslag word, moet die sondoffer voor die aangesig van die HERE geslag word. Dit is hoogheilig.

<sup>26</sup> Die priester wat dit as sondoffer bring, moet dit eet; op 'n heilige plek moet dit geëet word, in die voorhof van die tent van samekoms.

<sup>27</sup> Alles wat aan die vleis daarvan raak,

word heilig; en as daar van die bloed op 'n kledingstuk spat, moet jy die stuk waar dit op spat, op 'n heilige plek was.

<sup>28</sup> En 'n erdepot waar dit in gekook is, moet stukkend gebreek word; maar as dit in 'n koperpot gekook is, moet dit geskuur en met water afgespoel word.

<sup>29</sup> Almal wat manlik is onder die priesters, mag dit eet; dit is hoogheilig.

<sup>30</sup> Maar elke sondoffer waarvan 'n deel van die bloed in die tent van samekoms gebring word, om in die heiligdom versoening te doen, mag nie geëet word nie; dit moet met vuur verbrand word.

**7** EN dit is die wet van die skuldoffer: dit is hoogheilig.

<sup>2</sup> Op die plek waar hulle die brandoffer slag, moet hulle die skuldoffer slag, en hy moet die bloed rondom teen die altaar uitgooi.

<sup>3</sup> En hy moet al die vet daarvan offer: die vetstert en die vet wat oor die binnegoed lê,

<sup>4</sup> en die twee niere en die vet daarop wat aan die lendene is, en die lap aan die lewer—by die niere moet hy dit wegneem.

<sup>5</sup> En die priester moet dit op die altaar aan die brand steek as vuuroffer aan die HERE; dit is 'n skuldoffer.

<sup>6</sup> Almal wat manlik is onder die priesters, mag dit eet. Op 'n heilige plek moet dit geëet word; dit is hoogheilig.

<sup>7</sup> Soos die sondoffer, so die skuldoffer; een wet geld vir hulle—die priester wat daardeur versoening doen, aan hom kom dit toe.

<sup>8</sup> En die priester wat die brandoffer van iemand bring—die vel van die brandoffer

## Levítikus 7

---

wat hy gebring het, aan die priester, aan hom kom dit toe.

<sup>9</sup> En elke spysoffer wat in die oond gebak word, en alles wat in die pan of op die bakplaat berei is, aan die priester wat dit offer, aan hom kom dit toe.

<sup>10</sup> En elke spysoffer, met olie gemeng of droog, aan al die seuns van Aäron kom dit toe, aan die een so goed as aan die ander.

<sup>11</sup> En dit is die wet van die dankoffer wat hulle aan die HERE bring:

<sup>12</sup> Ingeval hy dit as loffer bring, moet hy by die loffer bring: ongesuurde koeke met olie gemeng en ongesuurde platkoeke met olie bestryk en fynmeel wat as koeke deurmekaargeroer is, met olie gemeng;

<sup>13</sup> saam met koeke van gesuurde brood moet hy sy offergawe by sy lofdankoffer bring.

<sup>14</sup> En hy moet daarvan, een koek van elke gawe, as offergawe aan die HERE bring; aan die priester wat die bloed van die dankoffer uitgooi, aan hom kom dit toe.

<sup>15</sup> Maar die vleis van sy lofdankoffer moet geëet word op die dag as hy dit bring; daarvan mag hy niks tot die môre laat lê nie.

<sup>16</sup> En as die offer wat hy bring, 'n gelofte- of vrywillige offer is, moet dit geëet word op die dag as hy sy offer bring; en op die volgende dag, dan kan geëet word wat daarvan oorbly.

<sup>17</sup> Maar wat van die offervleis oorgebly het, moet op die derde dag met vuur verbrand word.

<sup>18</sup> En as daar van die vleis van sy dankoffer op die derde dag iets geëet word,

sal dit vir hom wat dit bring, nie met welgevalle aangeneem word nie; 'n onrein iets sal dit wees, en diegene wat daarvan eet, moet sy ongeregtigheid dra.

<sup>19</sup> En die vleis wat aan iets onreins raak, mag nie geëet word nie; met vuur moet dit verbrand word. Maar wat verder die vleis betref—elkeen wat rein is, mag vleis eet.

<sup>20</sup> Maar die een wat vleis eet van die dankoffer wat die HERE toekom, terwyl sy onreinheid aan hom is, dié siel moet uit sy volksgenote uitgeroei word.

<sup>21</sup> En as iemand aan iets onreins raak, aan die onreinheid van 'n mens of aan 'n onrein dier of aan enige onrein verfoeisels, en dan eet van die vleis van die dankoffer wat die HERE toekom, dié siel moet uit sy volksgenote uitgeroei word.

<sup>22</sup> VERDER het die HERE met Moses gespreek en gesê:

<sup>23</sup> Spreek met die kinders van Israel en sê: Géén vet van 'n bees of skaap of bok mag julle eet nie.

<sup>24</sup> Maar die vet van aas en die vet van wat verskeur is, kan vir allerhande werk gebruik word, maar jy mag niks daarvan eet nie.

<sup>25</sup> Want elkeen wat vet eet van die vee waarvan hulle aan die HERE 'n vuuroffer bring, diegene wat dit eet, moet uit sy volksgenote uitgeroei word.

<sup>26</sup> Ook mag julle géén bloed van voëls of van vee in enigeen van julle woonplekke eet nie.

<sup>27</sup> Elkeen wat maar enigsins bloed eet, dié siel moet uit sy volksgenote uitgeroei word.

## Levítikus 8

<sup>28</sup> Verder het die HERE met Moses  
gespreek en gesê:

<sup>29</sup> Spreek met die kinders van Israel en sê:  
Hy wat aan die HERE sy dankoffer bring,  
moet self aan die HERE die gawe uit sy  
dankoffer bring;

<sup>30</sup> sy hande moet die vuuroffers van die  
HERE bring: die vet met die bors moet hy  
bring; die bors, om dit as beweegoffer voor  
die aangesig van die HERE te beweeg.

<sup>31</sup> En die priester moet die vet op die altaar  
aan die brand steek, maar die bors kom  
Aäron en sy seuns toe.

<sup>32</sup> Julle moet ook die regterboud aan die  
priester as heffer gee uit julle dankoffers.

<sup>33</sup> Hy wat uit die seuns van Aäron die  
bloed van die dankoffers en die vet offer,  
aan hom kom die regterboud as deel toe.

<sup>34</sup> Want die beweegbors en die hefboud het  
Ek van die kinders van Israel uit hulle  
dankoffers geneem en dit aan Aäron, die  
priester, en aan sy seuns gegee as 'n deel  
wat hulle vir ewig toekom van die kant  
van die kinders van Israel.

<sup>35</sup> Dit is die aandeel van Aäron en die  
aandeel van sy seuns uit die vuuroffers van  
die HERE, op die dag toe Hy hulle laat  
nader kom het om die priesteramp vir die  
HERE te bedien —

<sup>36</sup> wat die HERE beveel het om hulle te gee  
van die kant van die kinders van Israel, op  
die dag toe Hy hulle gesalf het. Dit is 'n  
ewige insetting vir hulle geslagte.

<sup>37</sup> Dit is die wet vir die brandoffer, die  
spysoffer en die sondoffer en die skuldoffer  
en die wydingsoffer en die dankoffer

<sup>38</sup> wat die HERE Moses by die berg Sinai

beveel het, op die dag toe hy die kinders  
van Israel in die woestyn Sinai beveel het  
om hulle offers aan die HERE te bring.

**8** VERDER het die  
HERE met Moses gespreek en gesê:

<sup>2</sup> Neem Aäron en sy seuns saam met hom,  
en die klere en die salfolie en die  
sondofferbul en die twee ramme en die  
mandjie met ongesuurde koeke,

<sup>3</sup> en versamel die hele vergadering by die  
ingang van die tent van samekoms.

<sup>4</sup> En Moses het gedoen soos die HERE hom  
beveel het, en die vergadering het  
bymeekaargekom by die ingang van die tent  
van samekoms.

<sup>5</sup> Toe sê Moses aan die vergadering: Dit is  
die saak wat die HERE beveel het om te  
doen.

<sup>6</sup> En Moses het Aäron en sy seuns laat  
nader kom en hulle met water gewas.

<sup>7</sup> Daarop het hy hom die rok aangetrek en  
hom met die gordel gegord en hom die  
mantel aangetrek; ook het hy hom die  
skouerkleed aangetrek en hom gegord met  
die band van die skouerkleed en daarmee  
hom die skouerkleed omgebind.

<sup>8</sup> Verder het hy hom die borstas aangeheg  
en in die borstas die Urim en die Tummim  
gesit.

<sup>9</sup> En hy het die tulband op sy hoof gesit en  
aan die tulband, aan die voorkant, die goue  
plaat, die heilige kroon, bevestig, soos die  
HERE Moses beveel het.

<sup>10</sup> Toe het Moses die salfolie geneem en die  
tabernakel en alles wat daarin was, gesalf  
en dit geheilig.

<sup>11</sup> En hy het daarvan sewe maal op die

## Levítikus 8

---

altaar gesprinkel en die altaar gesalf en al sy gereedskap, met die waskom en sy voetstuk, om dit te heilig.

<sup>12</sup> Daarna het hy van die salfolie op die hoof van Aäron gegiet en hom gesalf om hom te heilig.

<sup>13</sup> Ook het Moses die seuns van Aäron laat nader kom en hulle die rokke aangetrek en hulle gegord met 'n gordel en hulle die musse omgebind soos die HERE Moses beveel het.

<sup>14</sup> Daarop het hy die sondofferbul laat aankom, en Aäron en sy seuns het hulle hande op die kop van die sondofferbul gelê.

<sup>15</sup> En Moses het dit geslag en die bloed geneem en daarvan met sy vinger rondom aan die horings van die altaar gestryk en die altaar ontsondig; maar die orige bloed het hy aan die onderkant van die altaar uitgegooi. So het hy dit dan geheilig deur daar versoening voor te doen.

<sup>16</sup> Verder het hy al die vet wat aan die binnegoed was en die lap aan die lewer en die twee niere en hulle vet geneem, en Moses het dit op die altaar aan die brand gesteeke.

<sup>17</sup> Maar die bul met sy vel en sy vleis en sy mis het hy buitekant die laer met vuur verbrand, soos die HERE Moses beveel het.

<sup>18</sup> Daarop het hy die brandofferram laat aankom, en Aäron en sy seuns het hulle hande op die kop van die ram gelê.

<sup>19</sup> En Moses het dit geslag en die bloed rondom teen die altaar uitgegooi.

<sup>20</sup> Hy het ook die ram in sy stukke verdeel, en Moses het die kop en die stukke en die

vet aan die brand gesteeke;

<sup>21</sup> maar die binnegoed en die pote het hy met water gewas, en Moses het die hele ram op die altaar aan die brand gesteeke; dit was 'n brandoffer as lieflike geur, 'n vuuroffer was dit aan die HERE, soos die HERE Moses beveel het.

<sup>22</sup> Daarop het hy die ander ram, die wydingsram, laat aankom; en Aäron met sy seuns het hulle hande op die kop van die ram gelê.

<sup>23</sup> En Moses het dit geslag en van die bloed geneem en dit aan die regteroorlel van Aäron en aan die duim van sy regterhand en aan die groottoon van sy regtervoet gestryk.

<sup>24</sup> Moses het ook die seuns van Aäron laat nader kom en van die bloed aan hulle regteroorlel en aan die duim van hulle regterhand en aan die groottoon van hulle regtervoet gestryk; daarna het Moses die orige bloed rondom teen die altaar uitgegooi.

<sup>25</sup> En hy het die vet geneem met die vetstert en al die vet wat aan die binnegoed was, en die lap aan die lewer en die twee niere en hulle vet en die regterboud.

<sup>26</sup> Ook het hy uit die mandjie met ongesuurde koeke wat voor die aangesig van die HERE was, een ongesuurde koek geneem en een olie-brood-koek en een platkoek; en hy het dit op die stukke vet en op die regterboud neergesit

<sup>27</sup> en dit alles op die hande van Aäron en die hande van sy seuns gelê; en hy het dit as beweegoffer voor die aangesig van die HERE beweeg.

## Levítikus 9

<sup>28</sup> Daarop het Moses dit uit hulle hande geneem en dit op die altaar, bo-op die brandoffer, aan die brand gestee; 'n wydingsoffer was dit as lieflike geur, 'n vuuroffer aan die HERE.

<sup>29</sup> Verder het Moses die bors geneem en dit as beweegoffer voor die aangesig van die HERE beweeg; van die wydingsram het dit aan Moses as deel toegekom, soos die HERE Moses beveel het.

<sup>30</sup> Moses het ook van die salfolie en van die bloed wat aan die altaar was, geneem en dit op Aäron, op sy klere, sowel as op sy seuns en op die klere van sy seuns gesprinkel. So het hy dan Aäron, sy klere, sowel as sy seuns en die klere van sy seuns geheilig.

<sup>31</sup> Toe sê Moses vir Aäron en sy seuns: Kook die vleis by die ingang van die tent van samekoms en eet dit daar met die brood wat in die wydingsmandjie is, soos ek beveel en gesê het: Aäron en sy seuns moet dit eet.

<sup>32</sup> Maar wat van die vleis en die brood oorbly, moet julle met vuur verbrand.

<sup>33</sup> Ook mag julle sewe dae lank nie by die ingang van die tent van samekoms uitgaan nie tot op die dag dat die dae van julle wyding verby is; want sewe dae lank moet julle wyding duur.

<sup>34</sup> Soos vandag gedoen is, het die HERE beveel om verder te doen, om vir julle versoening te bewerk.

<sup>35</sup> Julle moet dan by die ingang van die tent van samekoms bly, dag en nag, sewe dae lank; en julle moet die ordening van die HERE hou, dat julle nie sterwe nie;

want so is aan my bevel gegee.

<sup>36</sup> En Aäron en sy seuns het al die dinge gedoen wat die HERE deur die diens van Moses beveel het.

**9** EN op die agtste dag het Moses Aäron en sy seuns en die oudstes van Israel geroep

<sup>2</sup> en aan Aäron gesê: Neem vir jou 'n bulkalf as sondoffer en 'n ram as brandoffer, altwee sonder gebrek; en bring hulle voor die aangesig van die HERE.

<sup>3</sup> En spreek met die kinders van Israel en sê: Neem 'n bokram as sondoffer en 'n kalf en 'n lam, altwee een jaar oud, sonder gebrek, as brandoffer,

<sup>4</sup> ook 'n bul en 'n ram as dankoffer om voor die aangesig van die HERE te offer; en spysoffer met olie gemeng; want vandag verskyn die HERE aan julle.

<sup>5</sup> Toe het hulle voor die tent van samekoms gebring wat Moses beveel het. En die hele vergadering het nader gekom en gaan staan voor die aangesig van die HERE.

<sup>6</sup> En Moses het gesê: Dit is die saak wat die HERE julle beveel het om te doen, sodat die heerlijkheid van die HERE aan julle kan verskyn.

<sup>7</sup> En Moses het vir Aäron gesê: Kom nader na die altaar en berei jou sondoffer en jou brandoffer, en doen versoening vir jou en vir die volk, en berei die offer van die volk, en doen versoening vir hulle soos die HERE beveel het.

<sup>8</sup> Toe het Aäron na die altaar nader gekom en die sondofferkalf geslag wat vir hom bedoel was.

<sup>9</sup> En die seuns van Aäron het die bloed na



## Levítikus 10

hom gebring, en hy het sy vinger in die bloed gestee en dit aan die horings van die altaar gestryk. Daarna het hy die orige bloed aan die onderkant van die altaar uitgegiet.

<sup>10</sup> Maar die vet en die niere en die lap aan die lewer van die sondoffer het hy op die altaar aan die brand gestee soos die HERE Moses beveel het.

<sup>11</sup> En die vleis en die vel het hy buitekant die laer met vuur verbrand.

<sup>12</sup> Toe het hy die brandoffer geslag, en die seuns van Aäron het vir hom die bloed aangegee, en hy het dit rondom teen die altaar uitgegooi.

<sup>13</sup> Ook het hulle vir hom die brandoffer volgens sy stukke aangegee, met die kop, en hy het dit aan die brand gestee op die altaar.

<sup>14</sup> En hy het die binnegoed en die pote gewas en dit aan die brand gestee bo-op die brandoffer op die altaar.

<sup>15</sup> Daarna het hy die offer van die volk gebring; hy het naamlik die sondofferbok geneem wat vir die volk bedoel was, en dit geslag en dit as sondoffer gebring soos tevore.

<sup>16</sup> Verder het hy die brandoffer gebring en dit berei volgens voorskrif.

<sup>17</sup> En hy het die spysoffer gebring en 'n handvol daaruit geneem en dit aan die brand gestee op die altaar, behalwe die môrebrandoffer.

<sup>18</sup> Toe het hy die bul en die ram geslag wat vir die volk as dankoffer bedoel was; en die seuns van Aäron het vir hom die bloed aangegee—wat hy toe rondom teen die

altaar uitgegooi het —

<sup>19</sup> en die stukke vet van die bul, en van die ram die vetstert en die netvet en die niere en die lap aan die lewer;

<sup>20</sup> en hulle het die stukke vet op die borsstukke gesit, en hy het die stukke vet op die altaar aan die brand gestee.

<sup>21</sup> Maar die borsstukke en die regterboud het Aäron as beweegoffer voor die aangesig van die HERE beweeg soos Moses beveel het.

<sup>22</sup> Daarna het Aäron sy hande na die volk toe opgehef en hulle geseën. En hy het afgeklam nadat hy die sondoffer en brandoffer en dankoffer gebring het.

<sup>23</sup> Daarop het Moses en Aäron in die tent van samekoms gegaan; en toe hulle uitkom, het hulle die volk geseën. En die heerlijkheid van die HERE het aan die hele volk verskyn —

<sup>24</sup> vuur het van die aangesig van die HERE uitgegaan en op die altaar die brandoffer en die stukke vet verteer. Toe die hele volk dit sien, het hulle gejuig en op hulle aangesig geval.

**10** EN die seuns van Aäron, Nadab en Abihu, het elkeen sy vuurpan geneem en vuur daarin gegooi en reukwerk daarop gesit en vreemde vuur voor die aangesig van die HERE gebring, wat Hy hulle nie beveel het nie.

<sup>2</sup> Daarop het daar vuur van die aangesig van die HERE uitgegaan en hulle verteer, en hulle het gesterwe voor die aangesig van die HERE.

<sup>3</sup> Toe sê Moses vir Aäron: Dit is dit wat die HERE gespreek het deur te sê: In die wat

## Levítikus 10

---

naby My is, wil Ek My as die Heilige laat ken, en voor die oë van die hele volk wil Ek My verheerlik. Maar Aäron het stilgebly.

<sup>4</sup> En Moses het Mísael en Élsafan, die seuns van Ussíël, die oom van Aäron, geroep en aan hulle gesê: Kom nader, dra julle broers van die heiligdom af weg, buitekant die laer uit.

<sup>5</sup> Toe het hulle nader gekom en hulle in hul rokke buitekant die laer uitgedra soos Moses gesê het.

<sup>6</sup> Daarop sê Moses aan Aäron en sy seuns Eleásar en Ítamar: Laat julle hare nie loshang nie en maak geen skeure in julle klere nie, dat julle nie sterwe en Hy in toorn teen die hele vergadering losbreek nie. Maar julle broers, die hele huis van Israel, kan die brand beween wat die HERE aangesteek het.

<sup>7</sup> Julle mag ook uit die ingang van die tent van samekoms nie uitgaan nie, dat julle nie sterwe nie; want die salfolie van die HERE is op julle. En hulle het gehandel ooreenkomstig die woord van Moses.

<sup>8</sup> En die HERE het met Aäron gespreek en gesê:

<sup>9</sup> Moenie wyn of sterk drank drink nie, jy of jou seuns saam met jou as julle in die tent van samekoms ingaan, dat julle nie sterwe nie; 'n ewige insetting is dit vir julle geslagte;

<sup>10</sup> en julle moet onderskeid maak tussen wat heilig en wat onheilig, en tussen wat onrein en wat rein is;

<sup>11</sup> en julle moet die kinders van Israel leer al die insettinge wat die HERE deur die diens van Moses aan hulle verkondig het.

<sup>12</sup> En Moses het met Aäron gespreek en met sy seuns Eleásar en Ítamar wat oorgebly het: Neem die spysoffer wat van die vuuroffers van die HERE oorgebly het, en eet dit as ongesuurde koeke langs die altaar; want dit is hoogheilig.

<sup>13</sup> Daarom moet julle dit op 'n heilige plek eet, want dit is wat aan jou en jou seuns toekom uit die vuuroffers van die HERE; want so is aan my bevel gegee.

<sup>14</sup> Ook die beweegbors en die hefboud moet julle op 'n rein plek eet, jy en jou seuns en jou dogters saam met jou; want as deel wat aan jou en jou seuns toekom, is hulle uit die dankoffers van die kinders van Israel gegee.

<sup>15</sup> Die hefboud en die beweegbors moet hulle saam met die vuuroffers van die stukke vet bring om as beweegoffer voor die aangesig van die HERE te beweeg; en dit sal vir jou en jou seuns saam met jou 'n deel wees wat aan julle vir ewig toekom soos die HERE beveel het.

<sup>16</sup> En Moses het rondgesoek na die sondofferbok, maar dit was verbrand! Daarom was hy baie kwaad vir Eleásar en Ítamar, die seuns van Aäron wat oorgebly het; en hy het gesê:

<sup>17</sup> Waarom het julle die sondoffer nie op 'n heilige plek geëet nie? Want dit is hoogheilig, en Hy het dit aan julle gegee om die ongeregtigheid van die vergadering weg te neem, om versoening vir hulle te doen voor die aangesig van die HERE.

<sup>18</sup> Kyk, die bloed daarvan is nie binne-in die heiligdom gebring nie. Julle moes dit sekerlik in die heiligdom geëet het soos ek

## Levítikus 11

beveel het.

<sup>19</sup> Toe sê Aäron vir Moses: Kyk, hulle het vandag hul sondoffer en hul brandoffer voor die aangesig van die HERE gebring, en sulke dinge het my oorgekom; as ek vandag sondoffer geëet het, sou dit goed gewees het in die oë van die HERE?

<sup>20</sup> Toe Moses dit hoor, was dit goed in sy oë.

**11** EN die HERE het met Moses en Aäron gespreek en aan hulle gesê:

<sup>2</sup> Spreek met die kinders van Israel en sê: Dit is die diere wat julle mag eet van al die viervoetige diere wat op die aarde is.

<sup>3</sup> Alles wat onder die diere gesplitste kloue het, en wel heeltemal gesplitste kloue, en herkou—dit mag julle eet.

<sup>4</sup> Maar die volgende mag julle nie eet nie van die wat herkou en van die wat gesplitste kloue het: die kameel, want hy herkou, maar het geen gesplitste kloue nie—onrein is hy vir julle;

<sup>5</sup> en die das, want hy herkou, maar het geen gesplitste kloue nie—onrein is hy vir julle;

<sup>6</sup> en die haas, want hy herkou, maar het geen gesplitste kloue nie—onrein is hy vir julle;

<sup>7</sup> ook die vark, want hy het gesplitste kloue, ja, heeltemal gesplitste kloue, maar hy herkou nie—onrein is hy vir julle.

<sup>8</sup> Van hulle vleis mag julle nie eet nie en aan hulle aas nie raak nie—onrein is hulle vir julle.

<sup>9</sup> Dit mag julle eet van alles wat in die water is: alles wat vinne en skubbe het in die water, in die seë en in die riviere—dit

mag julle eet.

<sup>10</sup> Maar alles wat geen vinne en skubbe het in die seë en in die riviere nie, van al die gewemel van die water en van al die lewende wesens wat in die water is—'n gruwel is dit vir julle.

<sup>11</sup> Ja, 'n gruwel moet hulle vir julle wees; van hulle vleis mag julle nie eet nie, en hulle aas moet julle vir 'n gruwel hou.

<sup>12</sup> Alles wat geen vinne of skubbe in die water het nie—'n gruwel is dit vir julle.

<sup>13</sup> En die volgende moet julle van die voëls vir 'n gruwel hou—hulle mag nie geëet word nie, 'n gruwel is hulle: die arend en die lammervanger en die aasvoël;

<sup>14</sup> en die kuikendief en die valk volgens sy soorte;

<sup>15</sup> elke kraai volgens sy soorte;

<sup>16</sup> en die volstruis en die naguil en die seemeeu en die kleinvalk volgens sy soorte;

<sup>17</sup> en die steenuil en die visvanger en die steenuil;

<sup>18</sup> en die silweruil en die pelikaan en die klein-aasvoël;

<sup>19</sup> en die groot-sprinkaanvoël, die reier volgens sy soorte, die hoep-hoep en die vlermuis.

<sup>20</sup> Al die insekte met vlerke wat op vier pote loop—'n gruwel is hulle vir julle.

<sup>21</sup> Maar die volgende mag julle eet van al die insekte met vlerke wat op vier pote loop: wat bokant die pote springbene het om daarmee op die grond te spring.

<sup>22</sup> Van hulle mag julle die volgende eet: die treksprinkaan volgens sy soorte en die boomsprinkaan volgens sy soorte en die springer volgens sy soorte en die

## Levítikus 11

---

voetganger volgens sy soorte.

<sup>23</sup> Maar al die ander insekte met vlerke wat vier pote het—'n gruwel is hulle vir julle.

<sup>24</sup> En deur hierdie diere word julle verontreinig—elkeen wat aan hulle aas raak, sal tot die aand toe onrein wees;

<sup>25</sup> en elkeen wat van hulle aas dra, moet sy klere was en sal tot die aand toe onrein wees —

<sup>26</sup> aan al die diere wat gesplitste kloue het, wat nie heeltemal gesplits is nie, en wat nie herkou nie. Onrein is hulle vir julle; elkeen wat aan hulle raak, sal onrein wees.

<sup>27</sup> En alles wat op kaal pote loop onder al die viervoetige diere—onrein is hulle vir julle; elkeen wat aan hulle aas raak, sal tot die aand toe onrein wees.

<sup>28</sup> Ook hy wat hulle aas dra, moet sy klere was en sal onrein wees tot die aand toe. Onrein is hulle vir julle.

<sup>29</sup> En die volgende is vir julle onrein onder die ongediertes wat op die aarde wemel: die mol en die muis en die akkedis volgens sy soorte,

<sup>30</sup> en die krimpvarkie en die geitjie en die klipsalmander en die koggelmander en die verkleurmannetjie.

<sup>31</sup> Hulle is vir julle onrein onder al die ongediertes; elkeen wat aan hulle raak as hulle dood is, sal tot die aand toe onrein wees.

<sup>32</sup> En alles waar een van hulle op val as hulle dood is, sal onrein wees; enige houtvoorwerp of kledingstuk of vel of sak, elke ding waarmee werk gedoen word; dit moet in die water gesit word en sal tot die aand toe onrein wees; dan sal dit rein wees.

<sup>33</sup> En elke erdevoorwerp waar een van hulle in val—alles wat daarin is, sal onrein wees, en julle moet die voorwerp self stukkend breek;

<sup>34</sup> enige voedsel wat geëet word waar water op kom, sal daarin onrein wees; en enige drank wat in so 'n voorwerp, van watter soort ook, gedrink kan word, sal onrein wees.

<sup>35</sup> En alles waar iets van hulle aas op val, sal onrein wees; 'n bakoond of 'n driehoet moet stukkend geslaan word; hulle is onrein, en onrein moet hulle vir julle wees.

<sup>36</sup> Maar 'n fontein of put, 'n versamelplek van water, sal rein wees; maar hy wat aan die aas daarin raak, sal onrein wees.

<sup>37</sup> En as van hulle aas val op enige saad wat gesaai word—dit sal rein wees.

<sup>38</sup> Maar as daar water op die saad gegooi word, en van hulle aas daarop val, dan sal dit vir julle onrein wees.

<sup>39</sup> En as daar van die diere wat julle as voedsel dien, doodgaan, sal hy wat aan die aas raak, tot die aand toe onrein wees;

<sup>40</sup> en hy wat van dié aas eet, moet sy klere was en sal onrein wees tot die aand toe. En hy wat dié aas dra, moet sy klere was en sal onrein wees tot die aand toe.

<sup>41</sup> En al die ongediertes wat op die aarde wemel, is 'n gruwel—dit mag nie geëet word nie.

<sup>42</sup> Alles wat op die buik seil en alles wat op vier pote loop, ook alles wat baie pote het, naamlik al die ongediertes wat op die aarde wemel—julle mag dit nie eet nie, want dit is 'n gruwel.

<sup>43</sup> Moenie julle self 'n gruwel maak deur

## Levítikus 13

enige ongedierte wat wemel nie: julle moet jul daaraan nie verontreinig, sodat julle daardeur onrein word nie.

<sup>44</sup> Want Ek is die HERE julle God; toon dan dat julle heilig is en wees heilig, want Ek is heilig; daarom, verontreinig julle self nie deur enige ongedierte wat op die aarde kruip nie.

<sup>45</sup> Want Ek is die HERE wat julle uit Egipteland laat optrek het om julle God te wees. So moet julle dan heilig wees, omdat Ek heilig is.

<sup>46</sup> Dit is die wet oor die diere en die voëls en al die lewende wesens wat roer in die water en aangaande al die wesens wat op die aarde wemel,

<sup>47</sup> om te onderskei tussen wat onrein en rein is, en tussen die diere wat geëet en die diere wat nie geëet mag word nie.

**12** VERDER het die HERE met Moses gespreek en gesê:

<sup>2</sup> Spreek met die kinders van Israel en sê: As 'n vrou swanger word en 'n seun baar, sal sy sewe dae lank onrein wees; soos in die dae van die onreinheid as sy onwel is, sal sy onrein wees.

<sup>3</sup> En op die agtste dag moet hy aan die vlees van sy voorhuid besny word.

<sup>4</sup> Dan moet sy drie-en-dertig dae in die reinigingsbloed bly. Aan niks wat heilig is, moet sy raak nie en in die heiligdom mag sy nie kom nie totdat die dae van haar reiniging verby is.

<sup>5</sup> Maar as sy 'n dogter baar, sal sy twee weke onrein wees soos by haar maandelikse onreinheid. Dan moet sy ses-en-sestig dae in die reinigingsbloed bly.

<sup>6</sup> En as die dae van haar reiniging in die geval van 'n seun of 'n dogter verby is, moet sy 'n jaaroud lam as brandoffer en 'n jong duif of tortelduif as sondoffer bring na die ingang van die tent van samekoms, na die priester toe;

<sup>7</sup> dié moet dit offer voor die aangesig van die HERE en vir haar versoening doen; dan sal sy rein wees van haar bloedvloeiing. Dit is die wet van haar wat baar, in die geval van 'n seun of 'n dogter.

<sup>8</sup> Maar as sy 'n lam nie kan bekostig nie, moet sy twee tortelduiwe of twee jong duiwe neem, een as brandoffer en een as sondoffer; en die priester moet vir haar versoening doen; dan sal sy rein wees.

**13** VERDER het die HERE met Moses en Aäron gespreek en gesê:

<sup>2</sup> As 'n mens in die vel van sy vlees 'n swelsel of uitslag of ligte vlek het, en dit in die vel van sy vlees 'n plaag van melaatsheid word, moet hy na die priester Aäron of na een van sy seuns, die priesters, gebring word;

<sup>3</sup> en die priester moet na die aangetaste plek in die vel van die vlees kyk. Het die hare op die plek wit geword, en lyk dit of die plek dieper is as die vel van sy vlees, dan is dit die plaag van melaatsheid. As die priester dit sien, moet hy hom onrein verklaar.

<sup>4</sup> Maar as dit 'n wit vlek in die vel van sy vlees is en dit nie dieper lyk as die vel nie, en die hare daarvan nie wit geword het nie, moet die priester die aangetaste persoon sewe dae lank opsluit.

<sup>5</sup> As die priester hom op die sewende dag

## Levítikus 13

---

bekyk en sien dat die aangetaste plek, volgens hy kan sien, dieselfde gebly het, die plek nie in die vel versprei het nie, dan moet die priester hom nog 'n keer sewe dae lank opsluit.

<sup>6</sup> Bekyk die priester hom dan op die sewende dag nog 'n keer en sien hy dat die aangetaste plek dof van kleur geword en die plek in die vel nie versprei het nie, dan moet die priester hom rein verklaar. Dit is 'n uitslag; en hy moet sy klere was, dan is hy rein.

<sup>7</sup> Maar as die uitslag werklik in die vel versprei nadat hy hom aan die priester vertoon het om rein te word, moet hy hom nog 'n keer aan die priester vertoon.

<sup>8</sup> En sien die priester dat die uitslag in die vel versprei het, dan moet die priester hom onrein verklaar. Dit is melaatsheid.

<sup>9</sup> As die plaag van melaatsheid aan 'n mens is, moet hy na die priester gebring word.

<sup>10</sup> En as die priester sien dat daar 'n wit swelsel in die vel is wat die hare wit gemaak het, terwyl daar wilde vlees in die swelsel groei,

<sup>11</sup> dan is dit 'n verouderde melaatsheid in die vel van sy vlees, en die priester moet hom onrein verklaar. Hy moet hom nie opsluit nie, want hy is onrein.

<sup>12</sup> Maar as die melaatsheid so geweldig in die vel uitbreek, dat die melaatsheid die hele vel van die aangetaste persoon van sy hoof tot sy voete oordek, so ver as wat die oë van die priester kan sien;

<sup>13</sup> en sien die priester dat die melaatsheid sy hele vlees oordek het, dan moet hy die

aangetaste persoon rein verklaar: hy het heeltemal wit geword, hy is rein.

<sup>14</sup> Maar so gou as wilde vlees aan hom gesien word, sal hy onrein wees;

<sup>15</sup> en as die priester die wilde vlees sien, moet hy hom onrein verklaar. Die wilde vlees is onrein, dit is melaatsheid.

<sup>16</sup> Maar as die wilde vlees weer weggaan en hy wit word, moet hy na die priester kom.

<sup>17</sup> As die priester hom dan bekyk en sien dat die aangetaste plek wit geword het, dan moet die priester die aangetaste persoon rein verklaar; hy is rein.

<sup>18</sup> Maar as daar in die vlees aan hom, naamlik in die vel, 'n sweer is en gesond word,

<sup>19</sup> maar in die plek van die sweer 'n wit swelsel of 'n rooierige wit vlek kom, moet hy hom aan die priester vertoon.

<sup>20</sup> As die priester sien dat dit dieper lyk as die vel, en die hare daarvan wit geword het, dan moet die priester hom onrein verklaar; dit is 'n plaag van melaatsheid, dit het in die sweer uitgebreek.

<sup>21</sup> Maar as die priester dit bekyk, en daar geen wit hare op is nie, en dit nie dieper as die vel is nie en dof van kleur geword het, dan moet die priester hom sewe dae lank opsluit.

<sup>22</sup> En as dit werklik in die vel versprei, moet die priester hom onrein verklaar; dit is 'n plaag van melaatsheid.

<sup>23</sup> Maar as die ligte vlek bly waar dit is, nie versprei het nie, is dit die litteken van die sweer, en die priester moet hom rein verklaar.

## Levítikus 13

---

<sup>24</sup> Of as in die vlees, in sy vel 'n brandplek van vuur is en die nuwe vlees van die brandplek 'n rooierige wit of wit vlek is;

<sup>25</sup> en die priester dit bekyk en sien dat die hare op die ligte vlek wit geword het en dit dieper lyk as die vel, dan is dit melaatsheid; in die brandplek het dit uitgebreek. Daarom moet die priester hom onrein verklaar; dit is die plaag van melaatsheid.

<sup>26</sup> Maar as die priester dit bekyk en sien dat op die ligte vlek geen wit hare is nie, en dit nie dieper as die vel is nie en dof van kleur geword het, dan moet die priester hom sewe dae lank opsluit.

<sup>27</sup> Dan moet die priester op die sewende dag hom bekyk. As dit werklik in die vel versprei het, moet die priester hom onrein verklaar; dit is die plaag van melaatsheid.

<sup>28</sup> Maar as die ligte vlek bly waar dit is, nie in die vel versprei het nie en dof van kleur geword het, dan is dit die swelsel van die brandplek. Daarom moet die priester hom rein verklaar, want dit is die litteken van die brandplek.

<sup>29</sup> Verder, as daar by 'n man of vrou 'n aangetaste plek aan die hoof of in die baard is,

<sup>30</sup> en die priester die plek bekyk en sien dat dit dieper lyk as die vel, en daar geel dun hare op is, dan moet die priester hom onrein verklaar; dit is skurfte, dit is melaatsheid van die hoof of van die baard.

<sup>31</sup> Maar as die priester die plaag van skurfte bekyk en sien dat dit nie dieper as die vel lyk nie, en daar geen swart hare op is nie, dan moet die priester die deur

skurfte aangetaste persoon sewe dae lank opsluit.

<sup>32</sup> Bekyk die priester dan op die sewende dag die aangetaste plek en sien hy dat die skurfte nie versprei het nie, en daar geen geel hare op is nie, en die skurfte nie dieper lyk as die vel nie,

<sup>33</sup> dan moet die persoon hom skeer, maar die skurwe plek moet hy nie skeer nie, en die priester moet die skurwe persoon nog 'n keer sewe dae lank opsluit.

<sup>34</sup> Bekyk die priester dan die skurfte op die sewende dag en sien hy dat die skurfte nie in die vel versprei het nie en dit nie dieper as die vel lyk nie, dan moet die priester hom rein verklaar. En hy moet sy klere was en sal rein wees.

<sup>35</sup> Maar as die skurfte werklik in die vel versprei nadat hy rein verklaar is,

<sup>36</sup> en die priester dit bekyk en sien dat die skurfte in die vel versprei het, dan hoef die priester nie na die geel hare te soek nie; hy is onrein.

<sup>37</sup> Maar as die skurfte, volgens hy kan sien, dieselfde gebly en swart hare daarop gegroei het, dan is die skurfte gesond. Hy is rein, en die priester moet hom rein verklaar.

<sup>38</sup> Verder, as 'n man of vrou in die vel van hulle vlees ligte vlekke, wit vlekke het,

<sup>39</sup> en die priester sien dat daar dowwe wit vlekke in die vel van hulle vlees is, dan is dit gewone uitslag wat in die vel uitgebreek het; hy is rein.

<sup>40</sup> En as 'n man se hoof kaal word, is hy 'n kaalkop; hy is rein.

<sup>41</sup> En as sy hoof aan die voorkant kaal

## Levítikus 13

---

word, het hy 'n bles; hy is rein.

<sup>42</sup> Maar as daar in die kaalte of in die bles 'n rooierige wit plek is, dan is dit melaatsheid wat uitbreek in die kaalte of in die bles.

<sup>43</sup> As die priester dit bekyk en sien dat die swelsel van die aangetaste plek in die kaalte of in die bles rooierig wit is, wat lyk soos die melaatsheid van die vel van die vlees,

<sup>44</sup> dan is hy 'n melaatse, hy is onrein; die priester moet hom sekerlik onrein verklaar; op sy hoof het hy die plaag.

<sup>45</sup> Verder moet in die klere van die melaatse op wie die plaag is, skeure wees, en sy hare moet los hang; ook moet hy sy baard bedek en roep: Onrein, onrein!

<sup>46</sup> Al die tyd dat die plaag op hom is, sal hy onrein wees. Onrein is hy; alleen moet hy woon; buitekant die laer moet sy woning wees.

<sup>47</sup> Verder, as daar in 'n kledingstuk die plaag van melaatsheid is, in 'n kledingstuk van wol of linne;

<sup>48</sup> of in die skeerdraad of die inslag van linne of wol, of in 'n vel of enige leerwerk;

<sup>49</sup> en die aangetaste plek in die kledingstuk of in die vel of in die skeerdraad of die inslag of in enige leervoorwerp liggroen of rooierig is, dan is dit 'n plaag van melaatsheid, en hulle moet die priester dit laat sien.

<sup>50</sup> Die priester moet dan die aangetaste plek bekyk en die aangetaste voorwerp sewe dae lank opsluit.

<sup>51</sup> Dan moet hy op die sewende dag die plek bekyk; as die plaag versprei het in die

kledingstuk of in die skeerdraad of die inslag of in die vel, vir watter diens die vel ook al verwerk is, dan is die plaag 'n kwaadaardige melaatsheid; so iets is onrein.

<sup>52</sup> Daarom moet hy die kledingstuk of die skeerdraad of die inslag van wol of van linne of enige leervoorwerp waarin die aangetaste plek is, verbrand; want dit is 'n kwaadaardige melaatsheid. Dit moet met vuur verbrand word.

<sup>53</sup> Maar as die priester sien dat die plek in die kledingstuk of in die skeerdraad of die inslag of in enige leervoorwerp nie versprei het nie,

<sup>54</sup> dan moet die priester beveel dat hulle die voorwerp was waar die plek aan is; en hy moet dit nog 'n keer sewe dae lank opsluit.

<sup>55</sup> As die priester dan die aangetaste voorwerp bekyk, nadat dit gewas is, en sien dat die plek nog net so lyk, hoewel die plek nie versprei het nie, dan is dit onrein; jy moet dit met vuur verbrand. Dit is 'n invreting aan die agter- of aan die voorkant.

<sup>56</sup> Maar as die priester sien dat die plek, nadat dit gewas is, dof van kleur geword het, dan moet hy dit uit die kledingstuk of uit die vel of uit die skeerdraad of die inslag uitskeur.

<sup>57</sup> Maar as dit nog in die kledingstuk of in die skeerdraad of die inslag of in enige leervoorwerp gesien word, dan is dit 'n melaatsheid wat weer uitbreek; jy moet die aangetaste voorwerp met vuur verbrand.

<sup>58</sup> Maar die kledingstuk of die skeerdraad



## Levítikus 14

of die inslag of enige leervoorwerp wat jy was—as die plek daaruit verdwyn het, moet dit nog 'n keer gewas word, en dit sal rein wees.

<sup>59</sup> Dit is die wet oor die plaag van melaatsheid in 'n kledingstuk van wol of linne of in die skeerdraad of die inslag of in enige leervoorwerp, om dit rein of onrein te verklaar.

**14** VERDER het die HERE met Moses gespreek en gesê:

<sup>2</sup> Dit is die wet van die melaatse op die dag van sy reiniging. Hy moet na die priester gebring word,

<sup>3</sup> en die priester moet buitekant die laer gaan. As die priester sien dat die plaag van melaatsheid genees is, van die melaatse weg is,

<sup>4</sup> moet die priester bevel gee dat hulle vir hom wat gereinig moet word, twee lewendige rein voëls en sederhout en skarlakendraad en hisop moet bring.

<sup>5</sup> Die priester moet ook bevel gee dat hulle die een voël in 'n erdepot oor vars water slag.

<sup>6</sup> Die lewendige voël moet hy neem, sowel as die sederhout en die skarlakendraad en die hisop, en dié en die lewendige voël insteek in die bloed van die voël wat oor die vars water geslag is.

<sup>7</sup> En hy moet op hom wat van die melaatsheid gereinig moet word, sewe maal sprinkel en hom reinig, en die lewendige voël moet hy oor die oop veld laat wegvlieg.

<sup>8</sup> Dan moet hy wat gereinig moet word, sy klere was en al sy hare afskeer en 'n bad

neem; dan sal hy rein wees. En daarna kan hy in die laer kom, maar hy moet sewe dae lank buitekant sy tent bly.

<sup>9</sup> En op die sewende dag moet hy al sy hare afskeer, sy hoof en sy baard en sy winkbroue—al sy hare moet hy afskeer; en hy moet sy klere was en sy liggaam in die water bad. Dan sal hy rein wees.

<sup>10</sup> En op die agtste dag moet hy twee lammers sonder gebrek neem en een jaaroud ooilam sonder gebrek en drie-tiendes van 'n efa fynmeel as spysoffer, met olie gemeng, en een log olie.

<sup>11</sup> En die priester wat die reiniging bewerk, moet die man wat gereinig word, en dié gawes voor die aangesig van die HERE by die ingang van die tent van samekoms stel.

<sup>12</sup> En die priester moet die een lam neem en dit saam met die log olie as skuldoffer aanbring en dit as beweegoffer voor die aangesig van die HERE beweeg.

<sup>13</sup> Dan moet hy die lam slag op die plek waar hulle die sondoffer en die brandoffer slag, in die heilige plek; want die skuldoffer net soos die sondoffer behoort aan die priester; hoogheilig is dit.

<sup>14</sup> En die priester moet van die bloed van die skuldoffer neem, en die priester moet dit stryk aan die regteroorlel van hom wat gereinig word, en aan die duim van sy regterhand en aan die groottoon van sy regtervoet.

<sup>15</sup> Die priester moet ook van die log olie neem en dit giet in die priester se linkerhand.

<sup>16</sup> Dan moet die priester sy regtervinger in die olie steek wat in sy linkerhand is, en

## Levítikus 14

---

met sy vinger van die olie sewe maal sprinkel voor die aangesig van die HERE.

<sup>17</sup> En van die orige olie wat in sy hand is, moet die priester stryk aan die regteroorlel van hom wat gereinig word, en aan die duim van sy regterhand en aan die groottoon van sy regtervoet, bo-oor die bloed van die skuldoffer.

<sup>18</sup> Wat dan oor is van die olie wat in die priester se hand is, moet hy stryk op die hoof van hom wat gereinig word. So moet die priester dan vir hom versoening doen voor die aangesig van die HERE.

<sup>19</sup> Die priester moet ook die sondoffer berei en vir hom wat gereinig word, versoening doen weens sy onreinheid; en daarna moet hy die brandoffer slag.

<sup>20</sup> En die priester moet die brandoffer en die spysoffer op die altaar offer. So moet die priester dan vir hom versoening doen, en hy sal rein wees.

<sup>21</sup> Maar as hy arm is en dit nie kan bekostig nie, moet hy een lam as skuldoffer neem om beweeg te word, om vir hom versoening te doen; daarby een-tiende van 'n efa fynmeel met olie gemeng as spysoffer, en 'n log olie;

<sup>22</sup> ook twee tortelduiwe of twee jong duiwe—wat hy kan bekostig; en die een sal wees 'n sondoffer en die ander 'n brandoffer.

<sup>23</sup> Hy moet hulle dan op die agtste dag ná sy reiniging na die priester bring by die ingang van die tent van samekoms voor die aangesig van die HERE.

<sup>24</sup> En die priester moet die skuldofferlam en die log olie neem; en die priester moet

dit as beweegoffer voor die aangesig van die HERE beweeg.

<sup>25</sup> Dan moet hy die skuldofferlam slag, en die priester moet van die bloed van die skuldoffer neem en dit stryk aan die regteroorlel van hom wat gereinig word, en aan die duim van sy regterhand en aan die groottoon van sy regtervoet.

<sup>26</sup> Ook moet die priester van die olie in die priester se linkerhand giet.

<sup>27</sup> Dan moet die priester met sy regtervinger van die olie wat in sy linkerhand is, sewe maal sprinkel voor die aangesig van die HERE.

<sup>28</sup> En die priester moet van die olie wat in sy hand is, stryk aan die regteroorlel van hom wat gereinig word, en aan die duim van sy regterhand en aan die groottoon van sy regtervoet, bo-oor die plek van die bloed van die skuldoffer.

<sup>29</sup> Wat dan oor is van die olie wat in die priester se hand is, moet hy stryk op die hoof van hom wat gereinig word, om versoening vir hom te doen voor die aangesig van die HERE.

<sup>30</sup> Dan moet hy een van die tortelduiwe berei of van die jong duiwe wat hy kan bekostig —

<sup>31</sup> die een as sondoffer en die ander as brandoffer, saam met die spysoffer. So moet die priester dan vir hom wat gereinig word, versoening doen voor die aangesig van die HERE.

<sup>32</sup> Dit is die wet vir hom op wie die plaag van melaatsheid was, wat by sy reiniging nie vermoënd is nie.

<sup>33</sup> VERDER het die HERE met Moses en

## Levítikus 14

Aäron gespreek en gesê:

<sup>34</sup> As julle in die land Kanaän inkom wat Ek julle as besitting gee, en Ek die plaag van melaatsheid in 'n huis van die land van julle besitting laat kom,

<sup>35</sup> moet hy aan wie die huis behoort, kom en aan die priester te kenne gee en sê: Dit lyk my of daar 'n plaag in die huis is.

<sup>36</sup> En die priester moet bevel gee dat hulle die huis ontruim, voordat die priester die plaag kom bekyk, sodat alles wat in die huis is, nie onrein word nie; en daarna moet die priester kom om die huis te bekyk.

<sup>37</sup> As hy die plaag bekyk en sien dat die plaag aan die mure van die huis is soos liggroen of rooierige kuiltjies, en hulle dieper lyk as die muur,

<sup>38</sup> dan moet die priester uit die huis uitgaan na die deur van die huis en die huis sewe dae lank toesluit.

<sup>39</sup> Op die sewende dag moet die priester dan terugkom; sien hy dan dat die plaag hom uitgebrei het aan die mure van die huis,

<sup>40</sup> dan moet die priester bevel gee dat hulle die klippe uitbreek waaraan die plaag is, en dit buitekant die stad op 'n onrein plek gooi.

<sup>41</sup> En die huis moet hulle binnekant rondom afkrap en die klei wat hulle afgekrap het, buitekant die stad op 'n onrein plek weggooi.

<sup>42</sup> Dan moet hulle ander klippe neem en in die plek van daardie klippe insit, en hulle moet ander klei neem en die huis pleister.

<sup>43</sup> Maar as die plaag weer in die huis

uitbreek nadat hulle die klippe uitbreek en die huis afgekrap het en dit gepleister is, <sup>44</sup> moet die priester kom; en as hy sien dat die plaag in die huis versprei het, dan is dit 'n kwaadaardige melaatsheid in die huis; dit is onrein.

<sup>45</sup> Daarom moet hulle die huis afbreek: sy klippe en sy hout en al die klei van die huis, en hulle moet dit buitekant die stad op 'n onrein plek uitbring.

<sup>46</sup> En hy wat in die huis kom, al die tyd dat hulle dit toegesluit hou, sal tot die aand toe onrein wees.

<sup>47</sup> En hy wat in die huis slaap, moet sy klere was; en hy wat in die huis eet, moet sy klere was.

<sup>48</sup> Maar as die priester kom en sien dat die plaag nie in die huis versprei het nadat die huis gepleister is nie, dan moet die priester die huis rein verklaar, want die aangetaste plek het gesond geword.

<sup>49</sup> Dan moet hy om die huis te ontsondig twee voëls neem en sederhout en skarlakendraad en hisop,

<sup>50</sup> en die een voël in 'n erdepot oor vars water slag.

<sup>51</sup> Dan moet hy die sederhout en die hisop en die skarlakendraad en die lewendige voël neem en dit in die bloed van die geslagte voël en in die vars water insteek; en hy moet die huis sewe maal besprinkel.

<sup>52</sup> So moet hy dan die huis ontsondig met die bloed van die voël sowel as met die vars water en die lewendige voël en die sederhout en die hisop en die skarlakendraad.

<sup>53</sup> Daarop moet hy die lewendige voël

## Levítikus 15

buitekant die stad oor die oop veld laat wegvlieg. So moet hy dan vir die huis versoening doen, en dit sal rein wees.

<sup>54</sup> Dit is die wet oor elke plaag van melaatsheid en oor skurfte

<sup>55</sup> en oor melaatsheid van klere en huise

<sup>56</sup> en oor swelsels en uitslag en ligte vlekke,

<sup>57</sup> om te onderrig wanneer iets onrein en wanneer iets rein is. Dit is die wet oor die melaatsheid.

**15** VERDER het die HERE met Moses en Aäron gespreek en gesê:

<sup>2</sup> Spreek met die kinders van Israel en sê vir hulle: As enige man 'n vloeiing uit sy vlees het, dan is dié vog onrein.

<sup>3</sup> En dit sal sy onreinheid deur die vloeiing wees: As sy vlees die vog laat loop of sy vlees verstop raak van die vog—dit is 'n onreinheid in hom.

<sup>4</sup> Elke bed waar hy op lê wat die vloeiing het, sal onrein wees; en alles waar hy op sit, sal onrein wees.

<sup>5</sup> En elkeen wat aan sy bed raak, moet sy klere was en 'n bad neem en hy bly tot die aand toe onrein;

<sup>6</sup> en die een wat gaan sit op die voorwerp waarop hy gesit het wat die vloeiing het, moet sy klere was en 'n bad neem en hy bly tot die aand toe onrein;

<sup>7</sup> en die een wat aan die liggaam raak van hom wat die vloeiing het, moet sy klere was en 'n bad neem en hy bly tot die aand toe onrein.

<sup>8</sup> En as hy wat die vloeiing het, op 'n reine spuug, moet dié een sy klere was en 'n bad neem, en hy bly tot die aand toe onrein.

<sup>9</sup> En elke saal waar hy op ry wat die

vloeiing het, sal onrein wees.

<sup>10</sup> En elkeen wat aan iets raak wat onder hóm is, sal onrein wees tot die aand toe. En die een wat dit dra, moet sy klere was en 'n bad neem en hy bly tot die aand toe onrein.

<sup>11</sup> En elkeen aan wie hy raak wat die vloeiing het, sonder dat hy eers sy hande in die water afgespoel het, dié een moet sy klere was en 'n bad neem, en hy bly tot die aand toe onrein.

<sup>12</sup> Ook die erdegoed waar hy aan raak wat die vloeiing het, moet stukkend gebreek word; maar al die voorwerpe van hout moet in die water afgespoel word.

<sup>13</sup> En as hy wat die vloeiing het, van sy vloeiing rein word, moet hy sewe dae tel ná sy reiniging en sy klere was en sy liggaam in vars water bad; dan sal hy rein wees.

<sup>14</sup> En op die agtste dag moet hy vir hom twee tortelduiwe of twee jong duiwe neem en voor die aangesig van die HERE kom, by die ingang van die tent van samekoms, en dié aan die priester gee;

<sup>15</sup> en die priester moet hulle berei, die een as sondoffer en die ander as brandoffer; so moet die priester dan vir hom vanweë sy vloeiing versoening doen voor die aangesig van die HERE.

<sup>16</sup> En as daar van 'n man 'n saadvloeiing uitgaan, moet hy sy hele liggaam in die water bad, en hy sal tot die aand toe onrein wees.

<sup>17</sup> Ook elke kledingstuk en elke vel waar die saadvloeiing op kom, moet in die water gewas word en dit bly tot die aand toe onrein.

<sup>18</sup> En wat die vrou aangaan met wie 'n

## Levítikus 16

man vleeslike gemeenskap het—altwee moet 'n bad neem en sal tot die aand toe onrein wees.

<sup>19</sup> En as 'n vrou 'n vloeiing het, en die vloeiing in haar vlees bloed is, dan bly sy sewe dae lank in haar onreinheid; en elkeen wat aan haar raak, sal tot die aand toe onrein wees.

<sup>20</sup> En alles waar sy in haar onreinheid op lê, sal onrein wees; en alles waar sy op sit, sal onrein wees.

<sup>21</sup> En elkeen wat aan haar bed raak, moet sy klere was en 'n bad neem en hy bly tot die aand toe onrein.

<sup>22</sup> En elkeen wat raak aan enige voorwerp waar sy op sit, moet sy klere was en 'n bad neem en hy bly tot die aand toe onrein;

<sup>23</sup> en as daar iets op die bed is of op die voorwerp waar sy op sit, as hy dit aanraak, sal hy tot die aand toe onrein wees.

<sup>24</sup> En as 'n man met haar gemeenskap het, sodat haar onreinheid op hom kom, sal hy sewe dae lank onrein wees; en elke bed waar hy op lê, sal onrein wees.

<sup>25</sup> En as 'n vrou lank 'n bloedvloeiing het, buiten die tyd van haar onreinheid, of as sy vloei oor die tyd van haar onreinheid, moet sy gedurende al die dae van haar onreine vloeiing wees soos in die dae van haar maandelikse onreinheid; sy is onrein.

<sup>26</sup> Elke bed waar sy gedurende al die dae van haar vloeiing op lê, sal vir haar soos die bed van haar maandelikse onreinheid wees; en alles waar sy op sit, sal net so onrein wees soos iets wat deur haar maandelikse onreinheid verontreinig is.

<sup>27</sup> En elkeen wat aan hierdie dinge raak, sal

onrein wees: dié een moet sy klere was en 'n bad neem en bly tot die aand toe onrein.

<sup>28</sup> Maar as sy van haar vloeiing rein geword het, moet sy sewe dae tel, en daarna sal sy rein wees.

<sup>29</sup> En op die agtste dag moet sy vir haar twee tortelduiwe of twee jong duiwe neem en dié by die ingang van die tent van samekoms na die priester bring.

<sup>30</sup> Dan moet die priester die een as sondoffer en die ander as brandoffer berei; en die priester moet vanweë haar onreine vloeiing vir haar versoening doen voor die aangesig van die HERE.

<sup>31</sup> So moet julle dan die kinders van Israel van hulle onreinheid afsonder, dat hulle nie deur hulle onreinheid sterwe nie—deurdat hulle my tabernakel wat in hulle midde is, verontreinig.

<sup>32</sup> Dit is die wet vir hom wat 'n vloeiing het en vir hom van wie 'n saadvloeiing uitgaan, sodat hy daardeur onrein word;

<sup>33</sup> en vir die vrou wat deur haar onreinheid onwel is, en vir die een wat aan 'n vloeiing ly, man of vrou, en vir 'n man wat met 'n onrein vrou gemeenskap het.

**16** EN die HERE het met Moses gespreek ná die dood van die twee seuns van Aäron, wat gesterf het toe hulle voor die aangesig van die HERE nader gekom het;

<sup>2</sup> en die HERE het aan Moses gesê: Spreek met jou broer Aäron dat hy nie te eniger tyd moet ingaan in die heiligdom nie, binnekant die voorhangsel, voor die versoendeksel wat op die ark is, sodat hy nie sterwe nie; want Ek verskyn in die

## Levítikus 16

---

wolk op die versoendeksel.

<sup>3</sup> Hiermee moet Aäron in die heiligdom ingaan: met 'n jong bul as sondoffer en 'n ram as brandoffer.

<sup>4</sup> Hy moet 'n heilige linnerok aantrek en 'n linnebroek moet oor sy vlees wees en met 'n linnegordel moet hy hom gord en 'n linnetulband moet op sy hoof wees. Dit is heilige klere; en hy moet sy liggaam in die water bad en dit aantrek.

<sup>5</sup> En van die vergadering van die kinders van Israel moet hy twee bokramme as sondoffer en een ram as brandoffer neem.

<sup>6</sup> Dan moet Aäron die sondofferbul wat vir hom bedoel is, aanbring en vir hom en sy huis versoening doen.

<sup>7</sup> Hy moet ook die twee bokke neem en hulle voor die aangesig van die HERE stel by die ingang van die tent van samekoms.

<sup>8</sup> En Aäron moet oor die twee bokke die lot werp, een lot vir die HERE en een lot vir Asásel.

<sup>9</sup> Dan moet Aäron die bok aanbring waar die lot vir die HERE op gekom het en hom as sondoffer berei;

<sup>10</sup> maar die bok waar die lot vir Asásel op gekom het, moet lewendig voor die aangesig van die HERE gestel word, om oor hom versoening te bewerk deur hom vir Asásel in die woestyn te stuur.

<sup>11</sup> Aäron moet dan die sondofferbul wat vir hom bedoel is, laat aankom en vir hom en sy huis versoening doen: hy moet die sondofferbul slag wat vir hom bedoel is,

<sup>12</sup> en die vuurpan vol gloeiende kole van die altaar voor die aangesig van die HERE wegneem; daarby twee handevol

fyngestampte reukwerk van speserye en dit binnekant die voorhangsel bring.

<sup>13</sup> En hy moet die reukwerk op die vuur lê voor die aangesig van die HERE, dat die wolk van die reukwerk die versoendeksel wat op die Getuienis is, kan oordek, sodat hy nie sterwe nie.

<sup>14</sup> En hy moet van die bloed van die bul neem en dit met sy vinger op die versoendeksel aan die oostekant sprinkel; en voor die versoendeksel moet hy sewe maal met sy vinger van die bloed sprinkel.

<sup>15</sup> Dan moet hy die sondofferbok slag wat vir die volk bedoel is, en sy bloed binnekant die voorhangsel bring en met sy bloed doen soos hy met die bloed van die bul gedoen het: hy moet dit sprinkel op die versoendeksel en voor die versoendeksel.

<sup>16</sup> So moet hy dan vir die heiligdom versoening doen vanweë die onreinhede van die kinders van Israel en vanweë hulle oortredinge, wat hulle sondes ook al mag wees; so moet hy dit ook doen vir die tent van samekoms wat by hulle te midde van hulle onreinhede woon.

<sup>17</sup> En niemand mag in die tent van samekoms wees as hy ingaan om in die heiligdom versoening te doen totdat hy uitkom nie en versoening gedoen het vir hom en vir sy huis en vir die hele vergadering van Israel.

<sup>18</sup> Dan moet hy na die altaar uitgaan wat voor die aangesig van die HERE is en daarvoor versoening doen: hy moet van die bloed van die bul en van die bloed van die bok neem en dit rondom aan die horings van die altaar stryk

## Levítikus 17

<sup>19</sup> en met sy vinger van die bloed sewe maal daarop sprinkel. So moet hy dit dan reinig en heilig van die onreinhede van die kinders van Israel.

<sup>20</sup> En as hy die versoening van die heiligdom en die tent van samekoms en die altaar voleindig het, moet hy die lewendige bok laat aankom;

<sup>21</sup> en Aäron moet sy twee hande op die kop van die lewendige bok lê en oor hom belydenis doen van al die ongeregtighede van die kinders van Israel en al hulle oortredinge, wat hulle sondes ook al mag wees; en hy moet dié op die kop van die bok lê en hom deur 'n man wat gereed staan, na die woestyn toe stuur.

<sup>22</sup> So moet die bok dan op hom al hulle ongeregtighede na 'n woeste land wegdra; en hy moet die bok in die woestyn los.

<sup>23</sup> Dan moet Aäron in die tent van samekoms ingaan en die linneklere uittrek wat hy aangetrek het toe hy in die heiligdom ingegaan het, en dit daar neerlê.

<sup>24</sup> En hy moet sy liggaam op 'n heilige plek in die water bad en sy klere aantrek. Dan moet hy uitgaan en sy brandoffer en die brandoffer van die volk berei, om vir hom en vir die volk versoening te doen.

<sup>25</sup> Ook moet hy die vet van die sondoffer op die altaar aan die brand steek.

<sup>26</sup> En hy wat die bok vir Asásel weggedrywe het, moet sy klere was en sy liggaam in die water bad; en daarna mag hy in die laer kom.

<sup>27</sup> Maar die sondofferbul en die sondofferbok waarvan die bloed ingebring is om versoening te doen in die heiligdom,

moet hulle buitekant die laer uitbring; en hulle velle, hulle vleis en hulle mis moet met vuur verbrand word.

<sup>28</sup> En hy wat dit verbrand, moet sy klere was en sy liggaam in die water bad; en daarna mag hy in die laer kom.

<sup>29</sup> En dit moet vir julle 'n ewige insetting wees: in die sewende maand, op die tiende van die maand, moet julle jul verootmoedig en géén werk doen nie—die kind van die land sowel as die vreemdeling wat onder julle vertoef.

<sup>30</sup> Want op hierdie dag moet hy vir julle versoening doen om julle te reinig; van al julle sondes moet julle voor die aangesig van die HERE rein word.

<sup>31</sup> 'n Dag van volkome rus moet dit vir julle wees, en julle moet jul verootmoedig. Dit is 'n ewige insetting.

<sup>32</sup> En die priester wat gesalf en aangestel sal word om in die plek van sy vader die priesteramp te bedien, moet die versoening doen; en hy moet die linneklere, die heilige klere, aantrek

<sup>33</sup> en versoening doen vir die Allerheiligste; ook moet hy vir die tent van samekoms en die altaar versoening doen, en vir die priesters en die hele volk van die vergadering moet hy versoening doen.

<sup>34</sup> En dit moet vir julle 'n ewige insetting wees om vir die kinders van Israel weens al hulle sondes een maal in die jaar versoening te doen. En hy het gedoen soos die HERE Moses beveel het.

**17** VERDER het die HERE met Moses gesprek en gesê:

<sup>2</sup> Spreek met Aäron en sy seuns en met al

## Levítikus 18

die kinders van Israel en sê vir hulle: Dit is die saak wat die HERE beveel het:

<sup>3</sup> Elkeen uit die huis van Israel wat 'n bees of 'n lam of 'n bok in die laer slag of dit buitekant die laer slag,

<sup>4</sup> en dit nie bring by die ingang van die tent van samekoms om aan die HERE 'n offer voor die tabernakel van die HERE te bring nie—as bloedskuld moet dit dié man aangereken word. Hy het bloed vergiet; daarom moet dié man uitgeroei word onder sy volk uit;

<sup>5</sup> sodat die kinders van Israel hulle slagoffers wat hulle gewoon was om op die oop veld te offer, aan die HERE by die ingang van die tent van samekoms na die priester kan bring en dit as dankoffers aan die HERE kan slag.

<sup>6</sup> Dan moet die priester die bloed teen die altaar van die HERE by die ingang van die tent van samekoms uitgooi en die vet aan die brand steek as lieflike geur vir die HERE.

<sup>7</sup> En hulle mag nie meer hulle slagoffers offer aan die veldduiwels agter wie hulle aan hoereer nie. Dit moet vir hulle 'n ewige insetting wees vir hulle geslagte.

<sup>8</sup> En jy moet vir hulle sê: Elkeen uit die huis van Israel en uit die vreemdelinge wat onder hulle vertoef, wat 'n brandoffer of 'n slagoffer bring,

<sup>9</sup> en dit nie by die ingang van die tent van samekoms bring om dit vir die HERE te berei nie—dié man moet uit sy volksgenote uitgeroei word.

<sup>10</sup> EN elkeen uit die huis van Israel en uit die vreemdelinge wat onder hulle vertoef,

wat maar enigsins bloed eet—teen die een wat die bloed eet, sal Ek my aangesig rig en hom uitroei onder sy volk uit.

<sup>11</sup> Want die siel van die vlees is in die bloed, en Ek het dit aan julle op die altaar gegee om vir julle siele versoening te doen; want die bloed bewerk versoening deur die siel.

<sup>12</sup> Daarom het Ek aan die kinders van Israel gesê: Niemand van julle mag bloed eet nie; ook die vreemdeling wat onder julle vertoef, mag geen bloed eet nie.

<sup>13</sup> En elkeen uit die kinders van Israel en uit die vreemdelinge wat onder hulle vertoef, wat 'n stuk wild of 'n voël vang wat geëet mag word—hy moet die bloed daarvan laat uitloop en dit met grond toemaak;

<sup>14</sup> want wat die siel van alle vlees aangaan, sy bloed is met sy siel verbind. Daarom het Ek aan die kinders van Israel gesê: Julle mag die bloed van enige vlees nie eet nie, want die siel van alle vlees is sy bloed; elkeen wat dit eet, moet uitgeroei word.

<sup>15</sup> En elkeen wat aas eet of iets wat verskeur is, 'n kind van die land sowel as 'n vreemdeling, moet sy klere was en 'n bad neem, en hy bly tot die aand toe onrein. Dan sal hy rein wees.

<sup>16</sup> Maar as hy dit nie was nie en sy liggaam nie bad nie, moet hy sy ongeregtheid dra.

**18** VERDER het die HERE met Moses gespreek en gesê:

<sup>2</sup> Spreek met die kinders van Israel en sê vir hulle: Ek is die HERE julle God.

<sup>3</sup> Volgens die werke van die land van Egipte waar julle in gewoon het, mag julle



## Levítikus 18

---

nie doen nie; en volgens die werke van die land Kanaän waarheen Ek julle bring, mag julle nie doen nie, en julle mag in hulle insettinge nie wandel nie.

<sup>4</sup> My verordeninge moet julle doen en my insettinge hou om daarin te wandel. Ek is die HERE julle God.

<sup>5</sup> Hou dan my insettinge en my verordeninge wat die mens moet doen, dat hy daardeur kan lewe. Ek is die HERE.

<sup>6</sup> Niemand van julle mag naby sy naaste bloedverwant kom om die skaamte te ontbloot nie. Ek is die HERE.

<sup>7</sup> Jy mag die skaamte van jou vader en die skaamte van jou moeder nie ontbloot nie: sy is jou moeder—jy mag haar skaamte nie ontbloot nie.

<sup>8</sup> Jy mag die skaamte van die vrou van jou vader nie ontbloot nie; dit is die skaamte van jou vader.

<sup>9</sup> Die skaamte van jou suster, die dogter van jou vader of die dogter van jou moeder, in die huis of buitekant gebore—haar skaamte mag jy nie ontbloot nie.

<sup>10</sup> Die skaamte van jou seun se dogter of van jou dogter se dogter—hulle skaamte mag jy nie ontbloot nie; want hulle is jou eie skaamte.

<sup>11</sup> Die skaamte van die dogter van jou vader se vrou, wat deur jou vader verwek is—sy is jou suster, haar skaamte mag jy nie ontbloot nie.

<sup>12</sup> Jy mag die skaamte van jou vader se suster nie ontbloot nie; sy is jou vader se bloedverwant.

<sup>13</sup> Jy mag die skaamte van jou moeder se suster nie ontbloot nie, want sy is jou

moeder se bloedverwant.

<sup>14</sup> Jy mag die skaamte van jou vader se broer nie ontbloot nie: jy mag nie naby sy vrou kom nie; sy is jou tante.

<sup>15</sup> Jy mag die skaamte van jou skoondogter nie ontbloot nie; sy is jou seun se vrou: jy mag haar skaamte nie ontbloot nie.

<sup>16</sup> Jy mag die skaamte van jou broer se vrou nie ontbloot nie; dit is die skaamte van jou broer.

<sup>17</sup> Jy mag die skaamte van 'n vrou en haar dogter nie ontbloot nie; haar seun se dogter en haar dogter se dogter mag jy nie neem om haar skaamte te ontbloot nie. Hulle is bloedverwante. Bloedskande is dit.

<sup>18</sup> Jy mag ook geen vrou by haar suster as mededingster byneem om haar skaamte gelyk met die ander een, terwyl dié nog lewe, te ontbloot nie.

<sup>19</sup> Ook mag jy nie naby 'n vrou kom terwyl sy onrein is deur haar onreinheid, om haar skaamte te ontbloot nie.

<sup>20</sup> En jy mag geen vleeslike gemeenskap met jou naaste se vrou hê om jou met haar te verontreinig nie.

<sup>21</sup> En van jou kinders mag jy nie gee om vir Molog deur die vuur te laat deurgaen nie, dat jy die Naam van jou God nie ontheilig nie. Ek is die HERE.

<sup>22</sup> Met 'n manspersoon mag jy ook geen gemeenskap hê soos 'n mens met 'n vrou het nie. Dit is 'n gruwel.

<sup>23</sup> En jy mag met géén dier vleeslike gemeenskap hê om jou daardeur te verontreinig nie. 'n Vrou mag ook nie voor 'n dier gaan staan om daarmee te doen te hê nie. Dit is 'n gruwelike vermenging.

## Levítikus 19

<sup>24</sup> Verontreinig julle nie deur al hierdie dinge nie, want deur al hierdie dinge is die heidene verontreinig wat Ek voor julle uit verdryf.

<sup>25</sup> So het die land dan onrein geword; en Ek besoek sy ongeregtigheid daaraan, sodat die land sy inwoners uitspuug.

<sup>26</sup> Maar julle moet my insettinge en my verordeninge onderhou en niks van al hierdie gruwels doen nie—die kind van die land of die vreemdeling wat onder julle vertoef.

<sup>27</sup> Want die mense van die land, wat voor julle gewees het, het al hierdie gruwels gedoen, en die land het onrein geword.

<sup>28</sup> Laat die land julle dan nie uitspuug as julle dit verontreinig nie, soos dit die nasie uitgespuug het wat daar voor julle was.

<sup>29</sup> Want almal wat enigeen van hierdie gruwels doen—die siele wat dit doen, moet uitgeroei word onder hulle volk uit.

<sup>30</sup> Daarom moet julle my ordening onderhou om niks te doen van die gruwelike insettinge wat voor julle gedoen is nie, dat julle jul nie daardeur verontreinig nie. Ek is die HERE julle God.

**19** VERDER het die HERE met Moses gespreek en gesê:

<sup>2</sup> Spreek met die hele vergadering van die kinders van Israel en sê vir hulle: Heilig moet julle wees, want Ek, die HERE julle God, is heilig.

<sup>3</sup> Elkeen moet sy moeder en sy vader vrees, en my sabbatte hou. Ek is die HERE julle God.

<sup>4</sup> Begeef julle nie tot die afgode en maak vir julle geen gegote gode nie. Ek is die

HERE julle God.

<sup>5</sup> En as julle 'n dankoffer aan die HERE slag, moet julle dit so offer, dat julle welgevalle kan vind.

<sup>6</sup> Op die dag as julle dit offer en die dag daarna, moet dit geëet word; maar wat tot die derde dag toe oorbly, moet met vuur verbrand word.

<sup>7</sup> En as dit tog op die derde dag geëet word, sal dit 'n onrein ding wees; dit sal nie met welgevalle aangeneem word nie.

<sup>8</sup> En hy wat dit eet, moet sy ongeregtigheid dra, want wat heilig is aan die HERE, het hy ontheilig. Daarom moet dié siel uit sy volksgenote uitgeroei word.

<sup>9</sup> En as julle die opbrings van julle land oes, moet jy die kant van jou land nie heeltemal afoes en die are wat val, nie versamel nie.

<sup>10</sup> Jou wingerd moet jy ook nie skoon afoes nie, en die trossies wat van jou wingerd val, nie versamel nie. Vir die arme en die vreemdeling moet jy dit laat oorbly. Ek is die HERE julle God.

<sup>11</sup> Julle mag nie steel nie, en julle mag nie lieg nie, en julle mag die een die ander nie bedrieg nie.

<sup>12</sup> En julle mag nie vals sweer by my Naam en so die Naam van jou God ontheilig nie. Ek is die HERE.

<sup>13</sup> Jy mag jou naaste nie verdruk of beroof nie. Die dagloner se loon mag by jou nie tot die môre toe bly nie.

<sup>14</sup> Jy mag 'n dowe nie vloek nie, en voor die blinde geen struikelblok lê nie; maar jy moet jou God vrees. Ek is die HERE.

<sup>15</sup> Julle mag geen onreg doen in die gereg nie. Jy mag vir die geringe nie partydig

## Levítikus 19

---

wees nie en die aansienlike nie voortrek nie. Met geregtigheid moet jy oor jou naaste oordeel.

<sup>16</sup> Jy mag nie as 'n kwaadspreker onder jou volksgenote rondloop nie. Jy mag nie teen die lewe van jou naaste optree nie. Ek is die HERE.

<sup>17</sup> Jy mag jou broer in jou hart nie haat nie. Jy moet jou naaste vrymoedig berispe, sodat jy om sy ontwil geen sonde op jou laai nie.

<sup>18</sup> Jy mag nie wraakgierig of haatdraend teenoor die kinders van jou volk wees nie, maar jy moet jou naaste liefhê soos jouself. Ek is die HERE.

<sup>19</sup> Julle moet my insettinge hou. Twee soorte van jou vee mag jy nie laat paar nie. Jou akker moet jy nie met twee soorte saad besaai nie. En 'n kleed van twee soorte goed, van gemengde stof, mag nie op jou kom nie.

<sup>20</sup> En as 'n man vleeslike gemeenskap het met 'n vrou wat 'n slavin is, vir 'n ander man bestemd, sonder dat sy ooit losgekoop of vryheid aan haar gegee is, dan moet daar bestraffing plaasvind. Hulle mag nie gedood word nie, want sy was nie vrygelaat nie.

<sup>21</sup> En hy moet sy skuldoffer aan die HERE bring by die ingang van die tent van samekoms—'n ram as skuldoffer;

<sup>22</sup> en die priester moet met die skuldofferram vir hom versoening doen voor die aangesig van die HERE weens die sonde wat hy gedoen het; en hy sal vergifnis ontvang vir sy sonde wat hy gedoen het.

<sup>23</sup> En as julle in die land inkom en allerhande vrugtebome plant, moet julle hulle vrugte as verbode beskou; drie jaar lank moet hulle vir julle verbode wees; daar mag nie van geëet word nie.

<sup>24</sup> Maar in die vierde jaar moet al hulle vrugte 'n heilige feesgawe aan die HERE wees;

<sup>25</sup> en in die vyfde jaar mag julle hulle vrugte eet—dit alles om hulle opbrings vir julle meer te maak. Ek is die HERE julle God.

<sup>26</sup> Julle mag niks met bloed en al eet nie. Julle mag nie met verklaring van voortekens of goëlery omgaan nie.

<sup>27</sup> Julle mag die rand van julle hoofhare nie rond wegskeer nie. Ook mag jy die rand van jou baard nie skend nie.

<sup>28</sup> Julle mag ook ter wille van 'n dooie geen snye in julle vlees maak nie en geen ingeprikte tekening in julle vel maak nie. Ek is die HERE.

<sup>29</sup> Ontheilig jou dogter nie deur haar vir hoerery aan te hou nie, sodat die land nie hoereer en die land vol skandelijke dade word nie.

<sup>30</sup> Julle moet my sabbatte hou en my heiligdom ontsien. Ek is die HERE.

<sup>31</sup> Begeef julle nie tot die geeste van afgestorwenes en die geeste wat waarsê nie. Soek hulle nie om julle deur hulle te verontreinig nie. Ek is die HERE julle God.

<sup>32</sup> Vir die grys hare moet jy opstaan, en die persoon van 'n grysaard eer; en jy moet jou God vrees. Ek is die HERE.

<sup>33</sup> En as 'n vreemdeling by jou in julle land vertoef, mag julle hom nie verdruk nie.

## Levítikus 20

<sup>34</sup> Die vreemdeling wat by julle vertoef, moet vir julle wees soos 'n kind van die land wat onder julle is. En jy moet hom liefhê soos jouself, want julle was vreemdelinge in Egipteland. Ek is die HERE julle God.

<sup>35</sup> Julle mag geen onreg doen in die gereg, in lengtemaat, gewig of inhoudsmaat nie.

<sup>36</sup> Julle moet 'n regte weegskaal hê, regte weegstene, 'n regte efa en 'n regte hin. Ek is die HERE julle God wat julle uit Egipteland uitgelei het.

<sup>37</sup> Daarom moet julle al my insettinge en al my verordeninge onderhou en dit doen. Ek is die HERE.

**20** VERDER het die HERE met Moses gespreek en gesê:

<sup>2</sup> Jy moet ook aan die kinders van Israel sê: Elkeen uit die kinders van Israel of uit die vreemdelinge wat in Israel vertoef, wat van sy kinders aan Molog gee, moet sekerlik gedood word. Die volk van die land moet hom stenig.

<sup>3</sup> En Ek sal my aangesig teen dié man rig en sal hom uitroei onder sy volk uit; want hy het van sy kinders aan Molog gegee om my heiligdom te verontreinig en my heilige Naam te ontheilig.

<sup>4</sup> En as die volk van die land hulle oë maar enigins toemaak vir dié man as hy van sy kinders aan Molog gee, sodat hulle hom nie doodmaak nie,

<sup>5</sup> dan sal Ek my aangesig rig teen dié man en sy geslag, en Ek sal hom en almal wat agter hom aan hoereer om agter Molog aan te hoereer, uitroei onder hulle volk uit.

<sup>6</sup> En as 'n persoon hom begewe tot die

geeste van afgestorwenes en die geeste wat waarsê om agter hulle aan te hoereer, sal Ek my aangesig teen dié persoon rig en hom uitroei onder sy volk uit.

<sup>7</sup> Toon dan dat julle heilig is en wees heilig, want Ek is die HERE julle God.

<sup>8</sup> En onderhou my insettinge en doen dit. Ek is die HERE wat julle heilig.

<sup>9</sup> Want elkeen wat sy vader of moeder vloek, moet sekerlik gedood word. Hy het sy vader of sy moeder gevloek. Sy bloedskuld is op hom.

<sup>10</sup> En as iemand owerspel doen met 'n man se vrou, owerspel doen met sy naaste se vrou, moet hy en sy wat owerspel doen, sekerlik gedood word.

<sup>11</sup> En as 'n man met sy vader se vrou gemeenskap het, het hy die skaamte van sy vader ontbloot. Hulle altwee moet sekerlik gedood word. Hulle bloedskuld is op hulle.

<sup>12</sup> En as 'n man met sy skoondogter gemeenskap het, moet hulle altwee sekerlik gedood word. Hulle het 'n gruwelike vermenging bewerk. Hulle bloedskuld is op hulle.

<sup>13</sup> En as 'n man met 'n manspersoon gemeenskap het soos 'n mens met 'n vrou het, het hulle altwee iets gruweliks gedoen. Hulle moet sekerlik gedood word. Hulle bloedskuld is op hulle.

<sup>14</sup> En as 'n man 'n vrou en haar moeder neem, is dit 'n skandelijke daad; hulle moet hom en dié twee met vuur verbrand: daar mag geen bloedskande onder julle wees nie.

<sup>15</sup> En as 'n man vleeslike gemeenskap het

## Levítikus 21

met 'n dier, moet hy sekerlik gedood word, en die dier moet julle doodslaan.

<sup>16</sup> En as 'n vrou naby enige dier kom om daarmee te doen te hê, moet jy die vrou en die dier doodslaan. Hulle moet sekerlik gedood word. Hulle bloedskuld is op hulle.

<sup>17</sup> En as 'n man sy suster neem, sy vader se dogter of sy moeder se dogter, en hy haar skaamte sien en sy sy skaamte sien, is dit 'n skande. Daarom moet hulle voor die oë van die kinders van hulle volk uitgeroei word. Hy het die skaamte van sy suster ontbloot; hy moet sy ongeregtigheid dra.

<sup>18</sup> En as 'n man met 'n vrou gemeenskap het wat onwel is, en haar skaamte ontbloot—hy het haar fontein ontbloot en sý die fontein van haar bloed—dan moet hulle altwee uitgeroei word onder hulle volk uit.

<sup>19</sup> Ook mag jy die skaamte van jou moeder se suster en van jou vader se suster nie ontbloot nie, want hy het sy bloedverwante ontbloot; hulle moet hul ongeregtigheid dra.

<sup>20</sup> En as 'n man met sy tante gemeenskap het, het hy die skaamte van sy oom ontbloot. Hulle moet hul sonde dra; sonder kinders sal hulle sterwe.

<sup>21</sup> En as 'n man sy broer se vrou neem, is dit bloedskande. Hy het die skaamte van sy broer ontbloot; sonder kinders sal hulle wees.

<sup>22</sup> Onderhou dan al my insettinge en al my verordeninge en doen dit, dat die land waarheen Ek julle bring om daarin te woon, julle nie uitspuig nie.

<sup>23</sup> En julle mag nie wandel in die insettinge van die nasie wat Ek voor julle uit verdrywe nie; want al hierdie dinge het hulle gedoen; daarom het Ek 'n afsku van hulle gekry.

<sup>24</sup> En Ek het vir julle gesê: Julle sal hulle land in besit neem, en Ek sal dit aan julle as besitting gee, 'n land wat oorloop van melk en heuning. Ek is die HERE julle God wat julle van die volke afgesonder het.

<sup>25</sup> Daarom moet julle 'n onderskeid maak tussen die rein en onrein diere, en tussen die onrein en rein voëls; en maak julleself nie 'n gruwel deur diere of deur voëls of deur enigiets wat op die aarde roer nie—wat Ek vir julle afgesonder het deur dit onrein te verklaar.

<sup>26</sup> En julle moet vir My heilig wees, want Ek, die HERE, is heilig; en Ek het julle van die volke afgesonder om myne te wees.

<sup>27</sup> En as daar in 'n man of vrou 'n gees van 'n afgestorwene is of 'n gees wat waarsê, moet hulle sekerlik gedood word. Hulle moet gestenig word. Hulle bloedskuld is op hulle.

**21** VERDER het die HERE vir Moses gesê: Spreek met die priesters, die seuns van Aäron, en sê vir hulle: Aan 'n dooie moet 'n priester hom nie verontreinig onder sy volksgenote nie; <sup>2</sup> behalwe aan sy bloedverwant, sy nabestaande: aan sy moeder en sy vader en sy seun en sy dogter en sy broer; <sup>3</sup> en aan sy suster wat jongmeisie is, sy nabestaande, wat nie aan 'n man toebehoort het nie—aan haar mag hy hom verontreinig.

## Levítikus 22

---

<sup>4</sup> Hy mag hom as getroude man nie verontreinig onder sy volksgenote om hom te ontheilig nie.

<sup>5</sup> Hulle mag op hul hoof geen kaalte maak en die rand van hulle baard nie wegskeer en in hulle vlees geen insnyding maak nie.

<sup>6</sup> Heilig moet hulle aan hulle God wees en die Naam van hulle God nie ontheilig nie; want hulle offer die vuuroffers van die HERE, die spys van hulle God; daarom moet hulle heilig wees.

<sup>7</sup> Hulle mag geen vrou neem wat 'n hoer of 'n onteerde is nie; en 'n vrou wat deur haar man verstoot is, mag hulle nie neem nie; want hy is heilig aan sy God.

<sup>8</sup> Daarom moet jy hom heilig hou, omdat hy die spys van jou God offer. Hy moet vir jou heilig wees, want heilig is Ek, die HERE wat julle heilig.

<sup>9</sup> En as die dogter van 'n priester haar ontheilig om te hoereer, ontheilig sy haar vader; met vuur moet sy verbrand word.

<sup>10</sup> En die priester wat die hoogste onder sy broers is, op wie se hoof die salfolie uitgegiet is en wat as priester aangestel is om die klere aan te trek—hy mag sy hare nie laat loshang en geen skeure in sy klere maak nie.

<sup>11</sup> En hy mag by geen dooie kom nie, selfs aan sy vader en moeder hom nie verontreinig nie;

<sup>12</sup> en hy mag uit die heiligdom nie uitgaan nie, sodat hy die heiligdom van sy God nie ontheilig nie, want die wyding van die salfolie van sy God is op hom. Ek is die HERE.

<sup>13</sup> En hy moet 'n vrou in haar maagdelike

staat neem.

<sup>14</sup> 'n Weduwee of een wat verstoot is of 'n onteerde, of 'n hoer—hulle moet hy nie neem nie; maar 'n jongmeisie uit sy volksgenote moet hy as vrou neem,

<sup>15</sup> dat hy nie sy kroos onder sy volksgenote ontheilig nie; want Ek is die HERE wat hom heilig.

<sup>16</sup> Verder het die HERE met Moses gespreek en gesê:

<sup>17</sup> Spreek met Aäron en sê: Niemand uit jou nakomelinge, in hulle geslagte, aan wie 'n liggaamsgebrek is, mag nader kom om die spys van sy God te offer nie.

<sup>18</sup> Want niemand aan wie 'n liggaamsgebrek is, mag nader kom nie: 'n blinde of 'n lamme of een wat in die gesig vermink is of iemand by wie 'n liggaamsdeel te lank is,

<sup>19</sup> of iemand wat 'n been of 'n arm gebreek het,

<sup>20</sup> of wat 'n boggel het of uitgeteer is of 'n vlek in sy oog het of aan skurfte of uitslag ly of 'n gebreklike skaamdeel het.

<sup>21</sup> Geen man uit die nageslag van Aäron, die priester, aan wie 'n liggaamsgebrek is, mag nader kom om die vuuroffers van die HERE te offer nie. 'n Liggaamsgebrek is aan hom; hy mag nie nader kom om die spys van sy God te offer nie.

<sup>22</sup> Wat die spys van sy God aangaan, hy mag van die hoogheilige en heilige gawes eet;

<sup>23</sup> maar hy mag nie na die voorhangsel gaan en na die altaar nie nader kom nie, omdat 'n liggaamsgebrek aan hom is, dat hy my heiligdomme nie ontheilig nie; want

## Levítikus 22

Ek is die HERE wat hulle heilig.

<sup>24</sup> En Moses het dit aan Aäron en sy seuns gesê en aan al die kinders van Israel.

**22** VERDER het die HERE met Moses gespreek en gesê:

<sup>2</sup> Spreek met Aäron en sy seuns dat hulle versigtig moet wees met die heilige gawes van die kinders van Israel—wat hulle aan My heilig—sodat hulle my heilige Naam nie ontheilig nie. Ek is die HERE.

<sup>3</sup> Sê vir hulle: Enigeeen in julle geslagte wat uit al julle nakomelinge na die heilige gawes aankom wat die kinders van Israel aan die HERE heilig, terwyl sy onreinheid op hom is, dié siel moet uitgeroei word van my aangesig af weg. Ek is die HERE.

<sup>4</sup> Niemand uit die nageslag van Aäron wat melaats is of 'n vloeiing het, mag van die heilige gawes eet voordat hy rein is nie. En hy wat aan iemand raak wat deur 'n lyk onrein is, of van wie 'n saadvloeiing uitgaan,

<sup>5</sup> of iemand wat aan enige kruipende ongedierte raak, waardeur hy onrein word, of aan 'n mens, deur wie hy onrein word ten gevolge van watter onreinheid ook al —

<sup>6</sup> die persoon wat aan so iets raak, sal tot die aand toe onrein wees, en hy mag van die heilige gawes nie eet nie tensy dat hy sy liggaam in die water gebad het.

<sup>7</sup> Maar as die son onder is, sal hy rein wees; en daarna kan hy van die heilige gawes eet, want dit is sy voedsel.

<sup>8</sup> Aas of iets wat verskeur is, mag hy nie eet, sodat hy daardeur nie onrein word nie. Ek is die HERE.

<sup>9</sup> Hulle moet dan my ordening onderhou, dat hulle weens die heilige gawes geen sonde op hulle laai en daardeur sterwe nie, omdat hulle dit ontheilig het. Ek is die HERE wat hulle heilig.

<sup>10</sup> Ook mag geen onbevoegde eet wat heilig is nie. 'n Bywoner van 'n priester en 'n dagloner mag nie eet wat heilig is nie.

<sup>11</sup> Maar as 'n priester iemand met sy geld koop, mag dié daarvan eet, en die wat in sy huis gebore is; hulle mag van sy voedsel eet.

<sup>12</sup> Maar as die dogter van 'n priester aan 'n vreemde behoort, mag sy van die offergawe van die heilige gawes nie eet nie.

<sup>13</sup> Maar as die dogter van 'n priester weduwee is of verstoot word en sy kinderloos is en in die huis van haar vader terugkom soos in haar jeug, dan mag sy van die voedsel van haar vader eet; maar geen onbevoegde mag daarvan eet nie.

<sup>14</sup> En as iemand by vergissing iets eet wat heilig is, moet hy die vyfde deel daarvan byvoeg, en só wat heilig is, aan die priester teruggee.

<sup>15</sup> So moet hulle dan die heilige gawes wat die kinders van Israel aan die HERE afgee, nie ontheilig

<sup>16</sup> en op hulle geen strafbare skuld laai deurdat hulle die heilige gawes sou eet nie; want Ek is die HERE wat hulle heilig.

<sup>17</sup> VERDER het die HERE met Moses gespreek en gesê:

<sup>18</sup> Spreek met Aäron en sy seuns en met al die kinders van Israel en sê vir hulle: Enigeeen uit die huis van Israel of uit die vreemdelinge in Israel wat sy offer

## Levítikus 23

bring—volgens al hulle geloftes en al hulle vrywillige offers wat hulle aan die HERE as brandoffer bring —

<sup>19</sup> moet dit so bring, dat julle welgevalle vind: 'n dier van die manlike geslag sonder gebrek, van die beeste, die lammers of die bokke.

<sup>20</sup> Julle mag nie iets bring waar 'n liggaamsgebrek aan is nie, want dit sal julle nie ten goede kom nie.

<sup>21</sup> En as iemand 'n dankoffer aan die HERE offer om 'n besondere gelofte te volbring of as vrywillige offer, van die beeste of die kleinvee, dan moet dit sonder gebrek wees, sodat dit welgevallig kan wees; geen liggaamsgebrek mag daaraan wees nie.

<sup>22</sup> Wat blind is of wat gebreekte of verminkte liggaamsdele het of swere of skurfte of uitslag—dit moet julle aan die HERE nie bring nie, en daarvan mag julle vir die HERE geen vuuroffer op die altaar lê nie.

<sup>23</sup> Maar 'n bees of stuk kleinvee waarvan 'n liggaamsdeel te lank of te kort is, mag jy as vrywillige offer berei; maar as gelofte-offer sal dit nie met welgevalle aangeneem word nie.

<sup>24</sup> 'n Dier wat ontman is deur vrywe of stamp, deur uitskeur of uitsny, mag julle aan die HERE nie bring nie: in julle land mag julle dit nie doen nie,

<sup>25</sup> en uit die hand van 'n uitlander mag julle van al hierdie diere aan julle God geen spys bring nie, want hulle verminking is aan hulle, 'n liggaamsgebrek is aan hulle: hulle sal vir julle nie met welgevalle aangeneem word nie.

<sup>26</sup> Verder het die HERE met Moses gespreek en gesê:

<sup>27</sup> As 'n bees of 'n lam of 'n bok aankom, moet dit sewe dae lank onder sy moeder bly; maar van die agtste dag af en verder sal dit met welgevalle aangeneem word as 'n vuuroffergawe aan die HERE.

<sup>28</sup> 'n Bees of stuk kleinvee mag julle ook nie saam met sy kleintjie op een dag slag nie.

<sup>29</sup> En as julle 'n lofoffer aan die HERE bring, moet julle dit so offer, dat julle welgevalle kan vind.

<sup>30</sup> Op dieselfde dag moet dit geëet word. Julle moet daarvan niks laat oorbly tot die môre toe nie. Ek is die HERE.

<sup>31</sup> Hou dan my gebooie en doen dit. Ek is die HERE.

<sup>32</sup> En ontheilig my heilige Naam nie, sodat Ek geheilig kan word onder die kinders van Israel. Ek is die HERE wat julle heilig,

<sup>33</sup> wat julle uit Egipteland uitgelei het om vir julle 'n God te wees. Ek is die HERE.

**23** VERDER het die HERE met Moses gespreek en gesê:

<sup>2</sup> Spreek met die kinders van Israel en sê vir hulle: Die feestye van die HERE wat julle moet uitroep as heilige samekomste—dit is my feestye.

<sup>3</sup> Ses dae lank kan werk gedoen word, maar op die sewende dag is dit 'n dag van volkome rus, 'n heilige vierdag; géén werk mag julle doen nie—dit is 'n sabbat van die HERE in al julle woonplekke.

<sup>4</sup> Dit is die feestye van die HERE, die heilige vierdae wat julle moet uitroep op hulle bepaalde tyd.

<sup>5</sup> In die eerste maand, op die veertiende



## Levítikus 23

---

van die maand, teen die aand, is die pasga van die HERE;

<sup>6</sup> en op die vyftiende dag van hierdie maand is die fees van die ongesuurde brode van die HERE; sewe dae lank moet julle ongesuurde brode eet.

<sup>7</sup> Op die eerste dag moet daar vir julle 'n heilige vierdag wees; géén beroepswerk mag julle doen nie.

<sup>8</sup> Maar julle moet sewe dae lank aan die HERE 'n vuuroffer bring. Op die sewende dag moet daar 'n heilige vierdag wees; géén beroepswerk mag julle doen nie.

<sup>9</sup> En die HERE het met Moses gespreek en gesê:

<sup>10</sup> Spreek met die kinders van Israel en sê aan hulle: As julle in die land kom wat Ek julle gee en sy opbrings oes, moet julle die eerstelingsgerf van julle oes na die priester bring.

<sup>11</sup> En hy moet die gerf voor die aangesig van die HERE beweeg, sodat julle welgevallig kan wees; die dag ná die sabbat moet die priester dit beweeg.

<sup>12</sup> Julle moet ook op die dag as julle die gerf beweeg, 'n jaaroud lam sonder gebrek as brandoffer aan die HERE berei,

<sup>13</sup> en die spysoffer wat daarby behoort, twee-tiendes van 'n efa fynmeel met olie gemeng as vuuroffer aan die HERE, 'n lieflike geur, en daarby die drankoffer van wyn, 'n kwart-hin.

<sup>14</sup> En julle mag geen brood of gebraaide koring of vars graan eet tot daardie selfde dag toe nie, totdat julle die offer van julle God bring. Dit is 'n ewige insetting vir julle geslagte in al julle woonplekke.

<sup>15</sup> Dan moet julle tel van die dag ná die sabbat, van die dag af as julle die beweegoffergerf bring—sewe volle weke moet dit wees;

<sup>16</sup> tot die dag ná die sewende sabbat moet julle vyftig dae tel; dan moet julle 'n nuwe spysoffer aan die HERE bring.

<sup>17</sup> Julle moet uit jul woonplekke twee beweegbrode bring; dit moet van twee-tiendes van 'n efa fynmeel wees; gesuurd moet dit gebak word as eerstelinge aan die HERE.

<sup>18</sup> Julle moet ook by die brood sewe jaaroud lammers sonder gebrek en een jong bul en twee ramme bring. Hulle moet 'n brandoffer aan die HERE wees saam met die spysoffer en die drankoffers wat daarby behoort as vuuroffer van lieflike geur aan die HERE.

<sup>19</sup> En julle moet een bokram as sondoffer berei. Ook twee jaaroud lammers as dankoffer,

<sup>20</sup> en die priester moet hulle saam met die eerstelingsbrood as beweegoffer voor die aangesig van die HERE beweeg saam met die twee lammers; dié moet aan die HERE heilig wees, ten voordele van die priester.

<sup>21</sup> En julle moet op daardie selfde dag uitroep: 'n heilige vierdag moet dit vir julle wees; géén beroepswerk mag julle doen nie. Dit is 'n ewige insetting in al julle woonplekke vir julle geslagte.

<sup>22</sup> En as julle die opbrings van jul land oes, moet jy die kant van jou land as jy oes nie heeltemal afoes en die are wat val, nie versamel nie. Vir die arme en die vreemdeling moet jy dit laat oorbly. Ek is

## Levítikus 23

---

die HERE julle God.

<sup>23</sup> En die HERE het met Moses gespreek en gesê:

<sup>24</sup> Spreek met die kinders van Israel en sê: In die sewende maand, op die eerste van die maand, moet dit vir julle 'n rusdag wees, 'n gedenkdag deur basuingeklank, 'n heilige vierdag.

<sup>25</sup> Géén beroepswerk mag julle doen nie; maar julle moet aan die HERE 'n vuuroffer bring.

<sup>26</sup> Verder het die HERE met Moses gespreek en gesê:

<sup>27</sup> Maar op die tiende van hierdie sewende maand is dit die versoendag. 'n Heilige vierdag moet dit vir julle wees; dan moet julle jul verootmoedig en aan die HERE 'n vuuroffer bring.

<sup>28</sup> En op daardie selfde dag mag julle géén werk doen nie, want dit is 'n versoendag om vir julle versoening te doen voor die aangesig van die HERE julle God.

<sup>29</sup> Want elkeen wat hom op daardie selfde dag nie verootmoedig nie, moet uit sy volksgenote uitgeroei word.

<sup>30</sup> Ook elkeen wat op daardie selfde dag enige werk doen, dié siel sal Ek uitroei onder sy volk uit.

<sup>31</sup> Julle mag géén werk doen nie; dit is 'n ewige insetting vir julle geslagte in al julle woonplekke.

<sup>32</sup> 'n Dag van volkome rus moet dit vir julle wees, en julle moet jul verootmoedig. Op die negende van die maand in die aand, van aand tot aand, moet julle jul sabbat hou.

<sup>33</sup> En die HERE het met Moses gespreek en

gesê:

<sup>34</sup> Spreek met die kinders van Israel en sê: Op die vyftiende dag van hierdie sewende maand is dit sewe dae lank die huttefees vir die HERE.

<sup>35</sup> Op die eerste dag moet daar 'n heilige vierdag wees; géén beroepswerk mag julle doen nie.

<sup>36</sup> Sewe dae lank moet julle aan die HERE 'n vuuroffer bring. Op die agtste dag moet daar vir julle 'n heilige vierdag wees, en julle moet aan die HERE 'n vuuroffer bring. Dit is 'n feestyd; julle mag geen beroepswerk doen nie.

<sup>37</sup> Dit is die feestye van die HERE wat julle moet uitroep as heilige vierdae om aan die HERE 'n vuuroffer te bring: 'n brandoffer en spysoffer, 'n slagoffer en drankoffers soos vir elke dag voorgeskrywe;

<sup>38</sup> behalwe die sabbatte van die HERE en behalwe julle gawes en behalwe al julle geloftes en behalwe al julle vrywillige offers wat julle aan die HERE gee.

<sup>39</sup> Maar op die vyftiende dag van die sewende maand, as julle die opbrings van die land insamel, moet julle die fees van die HERE sewe dae lank vier; op die eerste dag is dit rusdag, en op die agtste dag is dit rusdag.

<sup>40</sup> En op die eerste dag moet julle vir julle vrugte neem van sierlike bome, met palmtakke en takke van digte bome en rivierwilgers, en sewe dae lank voor die aangesig van die HERE julle God vrolik wees.

<sup>41</sup> En julle moet dit as fees van die HERE sewe dae in die jaar vier. Dit is 'n ewige

## Levítikus 24

insetting vir julle geslagte. In die sewende maand moet julle dit vier.

<sup>42</sup> Sewe dae lank moet julle in hutte woon; almal wat in Israel gebore is, moet in hutte woon,

<sup>43</sup> sodat julle geslagte kan weet dat Ek die kinders van Israel in hutte laat woon het toe Ek hulle uit Egipteland uitgelei het. Ek is die HERE julle God.

<sup>44</sup> So het Moses dan die feestye van die HERE aan die kinders van Israel bekend gemaak.

**24** EN die HERE het met Moses gespreek en gesê:

<sup>2</sup> Gee bevel aan die kinders van Israel dat hulle vir jou suiwer, uitgestampte olyfolie vir die kandelaar moet bring, om gedurigdeur 'n brandende lamp te hê.

<sup>3</sup> Aäron moet dit buitekant die voorhangsel van die Getuienis, in die tent van samekoms, regmaak om te brand van die aand tot die môre voor die aangesig van die HERE, gedurigdeur. Dit is 'n ewige insetting vir julle geslagte.

<sup>4</sup> Hy moet op die rein kandelaar die lampe regmaak om te brand voor die aangesig van die HERE, gedurigdeur.

<sup>5</sup> Jy moet ook fynmeel neem en twaalf koeke daarvan bak, twee-tiendes van 'n efa moet elke koek wees;

<sup>6</sup> en jy moet hulle in twee stapels neersit, ses in 'n stapel, op die rein tafel voor die aangesig van die HERE.

<sup>7</sup> En by elke stapel moet jy suiwer wierook byvoeg, wat vir die brood as gedenkoffer moet dien, as vuuroffer aan die HERE.

<sup>8</sup> Op elke sabbatdag moet hy dit

gedurigdeur voor die aangesig van die HERE regsit, van die kant van die kinders van Israel as 'n ewige insetting.

<sup>9</sup> En dit moet aan Aäron en sy seuns toekom: hulle moet dit in 'n heilige plek eet; want as iets hoogheiligs behoort dit aan hom uit die vuuroffers van die HERE—'n ewige insetting.

<sup>10</sup> EN die seun van 'n Israelitiese vrou—maar hy was die seun van 'n Egiptiese man—het uitgegaan tussen die kinders van Israel in; en die seun van die Israelitiese vrou en 'n Israelitiese man het met mekaar geveg in die laer.

<sup>11</sup> Toe het die seun van die Israelitiese vrou die Naam gelaster en gevloek. Daarom het hulle hom na Moses gebring. En die naam van sy moeder was Sélomit, die dogter van Dibri, van die stam van Dan.

<sup>12</sup> En hulle het hom in die gevangenis gesit, dat hulle 'n beslissing kon verkry volgens die uitspraak van die HERE.

<sup>13</sup> En die HERE het met Moses gespreek en gesê:

<sup>14</sup> Bring die vloeker buitekant die laer uit, en almal wat dit gehoor het, moet hulle hande op sy hoof lê; dan moet die hele vergadering hom stenig.

<sup>15</sup> En met die kinders van Israel moet jy spreek en sê: As iemand sy God vloek, sal hy sy sonde dra.

<sup>16</sup> En wie die Naam van die HERE laster, moet sekerlik gedood word; die hele vergadering moet hom sekerlik stenig. Die vreemdeling net soos die kind van die land—as hy die NAAM laster, moet hy gedood word.

## Levítikus 25

<sup>17</sup> En as iemand enige mens doodslaan, moet hy sekerlik gedood word.

<sup>18</sup> Maar hy wat 'n stuk vee doodslaan, moet daar vergoeding voor gee; lewe vir lewe.

<sup>19</sup> En as iemand aan sy naaste 'n liggaamsgebrek toebring—soos hy gedoen het, net so moet ook aan hom gedoen word:

<sup>20</sup> breuk vir breuk, oog vir oog, tand vir tand—dieselfde liggaamsgebrek wat hy aan 'n mens toebring, moet ook aan hom toegebring word.

<sup>21</sup> Hy dan wat 'n stuk vee doodslaan, moet daar vergoeding voor gee; maar hy wat 'n mens doodslaan, moet gedood word.

<sup>22</sup> Net een wet moet daar vir julle wees—die vreemdeling moet soos die kind van die land wees; want Ek is die HERE julle God.

<sup>23</sup> Moses het toe met die kinders van Israel gespreek, en hulle het die vloeker buitekant die laer uitbring en hom gestenig. En die kinders van Israel het gedoen soos die HERE Moses beveel het.

**25** VERDER het die HERE met Moses gespreek by die berg Sinai en gesê:

<sup>2</sup> Spreek met die kinders van Israel en sê vir hulle: As julle in die land inkom wat Ek julle gee, moet die land 'n sabbat hou vir die HERE.

<sup>3</sup> Ses jaar lank mag jy jou land saai en ses jaar lank jou wingerd snoei en die opbrings daarvan insamel;

<sup>4</sup> maar in die sewende jaar moet daar vir die land volkome rus wees, 'n sabbat vir die HERE; jou land mag jy nie saai en jou wingerd nie snoei nie.

<sup>5</sup> Wat van jou oes opslaan, moet jy nie afoes nie, en die druiwe van jou ongesnoeide wingerdstok nie afsny nie. Dit moet 'n jaar van rus vir die land wees.

<sup>6</sup> En die opbrings van die sabbat van die land sal julle voedsel wees; vir jou en jou slaaf en jou slavin en jou dagloner en jou bywoner wat by jou vertoef,

<sup>7</sup> en vir jou vee en die wild wat in jou land is, sal die hele opbrings daarvan wees om te eet.

<sup>8</sup> Jy moet ook sewe jaarweke tel, sewe maal sewe jaar, sodat die dae van die sewe jaarweke vir jou negen-en-veertig jaar is.

<sup>9</sup> Dan moet jy in die sewende maand, op die tiende van die maand, 'n basuingeklank laat deurgaen; op die versoendag moet julle die basuin deur julle hele land laat gaan.

<sup>10</sup> En julle moet die vyftigste jaar heilig en 'n vrylating in die land uitroep aan al sy bewoners. Dit moet vir julle 'n jubeljaar wees; dan moet julle elkeen na sy besitting en elkeen na sy geslag teruggaan.

<sup>11</sup> 'n Jubeljaar moet dit, die vyftigste jaar, vir julle wees. Julle mag nie saai nie, ook nie afoes wat dan opslaan of die druiwe van die onbesnoeide wingerdstok dan afsny nie.

<sup>12</sup> Want dit is 'n jubeljaar, dit moet vir julle heilig wees: van die land af moet julle die opbrings daarvan eet.

<sup>13</sup> In hierdie jubeljaar moet julle elkeen na sy besitting teruggaan.

<sup>14</sup> Daarom, as jy iets aan jou naaste verkoop of van jou naaste koop, moet julle mekaar nie verdruk nie;

## Levítikus 25

---

<sup>15</sup> volgens die getal jare ná die jubeljaar moet jy van jou naaste koop; volgens die getal jare dat daar 'n oes is, moet hy dit aan jou verkoop;

<sup>16</sup> volgens die groter aantal jare moet jy die koopprys daarvan vermeerder, en volgens die kleiner aantal jare moet jy die koopprys daarvan verminder, want hy verkoop aan jou die aantal oeste.

<sup>17</sup> Laat niemand dan sy naaste verdruk nie, en vrees jy jou God; want Ek is die HERE julle God.

<sup>18</sup> En doen my insettinge en onderhou my verordeninge en doen dit, dat julle veilig kan woon in die land.

<sup>19</sup> En die land sal sy vrug gee, en julle sal volop eet en veilig daarin woon.

<sup>20</sup> En as julle sê: Wat moet ons in die sewende jaar eet as ons nie mag saai nie en ons oes nie mag insamel nie? —

<sup>21</sup> dan gebied Ek my seën vir julle in die sesde jaar, en dit sal die oes vir die drie jare oplewer.

<sup>22</sup> En in die agtste jaar moet julle saai en van die ou opbrings eet tot die negende jaar toe; totdat die opbrings hiervan inkom, moet julle die oue eet.

<sup>23</sup> DIE grond moet ook nie vir altyd verkoop word nie; want die land is myne, omdat julle vreemdelinge en bywoners by My is.

<sup>24</sup> Daarom moet julle, in die hele land van julle besitting, lossing van die grond toelaat.

<sup>25</sup> As jou broer verarm en van sy besitting verkoop, moet sy lossier wat sy nabestaande is, kom en hy moet los wat sy

broer verkoop het.

<sup>26</sup> En as iemand geen lossier het nie, maar dit kan bekostig en genoeg vind vir die lossing,

<sup>27</sup> moet hy die jare bereken dat dit verkoop is, en wat oorskiet, moet hy aan die man aan wie hy verkoop het, teruggee en dan na sy besitting teruggaan.

<sup>28</sup> Maar as hy nie genoeg vind om dit terug te koop nie, moet die verkoopte goed in die hand van die koper bly tot die jubeljaar toe; maar in die jubeljaar moet dit vry word, en hy moet na sy besitting teruggaan.

<sup>29</sup> En as iemand 'n woonhuis in 'n ommuurde stad verkoop, moet daar reg van lossing wees tot die end van die jaar dat dit verkoop is; 'n jaar lank moet daar reg van lossing wees.

<sup>30</sup> Maar as dit nie gelos word voordat 'n hele jaar verby is nie, moet die huis wat in die ommuurde stad is, vir altyd die eiendom van sy koper bly vir sy geslagte; in die jubeljaar sal dit nie vry word nie.

<sup>31</sup> Maar die huise van die dorpe wat rondom geen muur het nie, moet by die veld van die land gereken word; daar moet reg van lossing voor wees en in die jubeljaar moet dit vry word.

<sup>32</sup> Wat die stede van die Leviete aangaan, die huise in die stede wat in hulle besit is—vir die Leviete moet daar 'n ewige reg van lossing wees.

<sup>33</sup> En as iemand van die Leviete dit sal los, moet die huis wat verkoop is, naamlik in die stad van sy besitting, in die jubeljaar vry word; want die huise in die stede van die Leviete is hulle besitting onder die

## Levítikus 25

---

kinders van Israel.

<sup>34</sup> En die weiveld om hulle stede mag nie verkoop word nie, want dit is 'n ewige besitting vir hulle.

<sup>35</sup> En as jou broer by jou verarm en agterraak, moet jy hom ondersteun, soos 'n vreemdeling en bywoner, dat hy by jou kan lewe.

<sup>36</sup> Jy moenie rente of wins van hom neem nie, maar jy moet jou God vrees, dat jou broer by jou kan lewe.

<sup>37</sup> Jou geld mag jy hom nie op rente gee nie, en jou eetware mag jy nie teen wins gee nie.

<sup>38</sup> Ek is die HERE julle God wat julle uit Egipteland uitgelei het om julle die land Kanaän te gee, om julle God te wees.

<sup>39</sup> En as jou broer by jou verarm en hom aan jou verkoop, mag jy hom nie as slaaf laat dien nie.

<sup>40</sup> Soos 'n dagloner, soos 'n bywoner moet hy by jou wees; tot die jubeljaar toe moet hy by jou dien;

<sup>41</sup> dan moet hy vry van jou af weggaan, hy en sy kinders saam met hom; en hy moet na sy geslag terugkeer en na die besitting van sy vaders teruggaan.

<sup>42</sup> Want hulle is my knegte wat Ek uit Egipteland uitgelei het; hulle mag nie verkoop word soos 'n mens 'n slaaf verkoop nie.

<sup>43</sup> Jy mag nie met hardheid oor hom heers nie, maar jy moet jou God vrees.

<sup>44</sup> Wat jou slaaf of jou slavin aangaan wat aan jou sal behoort—van die nasies wat rondom julle is, van hulle mag julle 'n slaaf of slavin koop.

<sup>45</sup> En ook van die kinders van die bywoners wat by julle vertoef—van hulle mag julle koop en van hulle geslag wat by julle is, wat hulle in julle land verwek het; en dié sal vir julle 'n besitting wees.

<sup>46</sup> En julle mag dié aan julle kinders ná julle nalaat as 'n erflike besitting; vir ewig mag julle hulle laat dien. Maar oor julle broers, die kinders van Israel, die een oor die ander—oor hom mag jy nie met hardheid heers nie.

<sup>47</sup> En as 'n vreemdeling of bywoner by jou vermoënd word, en jou broer by hom verarm en hy homself aan 'n vreemdeling of bywoner by jou verkoop, of aan 'n familielid uit die geslag van 'n vreemdeling,

<sup>48</sup> dan moet daar vir hom, nadat hy hom verkoop het, reg van lossing wees; een van sy broers kan hom los,

<sup>49</sup> of sy oom of sy oom se seun kan hom los, of een van sy naaste bloedverwante uit sy geslag kan hom los, of as hy dit kan bekostig, kan hy homself los.

<sup>50</sup> En hy moet met sy koper reken van die jaar af dat hy hom aan hom verkoop het, tot die jubeljaar toe. En die prys waarvoor hy hom verkoop het, moet wees volgens die aantal jare; soos 'n dagloner sal hy dan dié tyd by hom gewees het.

<sup>51</sup> As daar nog baie jare is, moet hy volgens hulle sy losprys uit die geld waarvoor hy gekoop is, teruggee;

<sup>52</sup> en as daar maar min jare tot die jubeljaar toe oor is, moet hy daarmee rekening hou; volgens dié jare moet hy sy losprys teruggee.

## Levítikus 26

<sup>53</sup> Soos een wat van jaar tot jaar loonarbeider is, moet hy by hom wees; hy mag nie met hardheid oor hom voor jou oë heers nie.

<sup>54</sup> En as hy nie op dié wyse gelos word nie, moet hy in die jubeljaar vrygelaat word, hy en sy kinders saam met hom.

<sup>55</sup> Want die kinders van Israel is my knegte; my knegte is hulle wat Ek uit Egipteland uitgelei het. Ek is die HERE julle God.

**26** JULLE mag vir julle geen afgode maak nie; en 'n gesnede beeld of 'n klippilaar mag julle vir julle nie oprig nie en 'n steen met beeldhouwerk in julle land nie opstel om julle daarby neer te buig nie; want Ek is die HERE julle God.

<sup>2</sup> My sabbatte moet julle hou en my heiligdom ontsien. Ek is die HERE.

<sup>3</sup> As julle in my insettinge wandel en my gebooie hou en dit doen,

<sup>4</sup> sal Ek julle reëns gee op die regte tyd, en die land sal sy opbrings gee, en die bome van die veld sal hulle vrugte gee.

<sup>5</sup> En die dorstyd sal vir julle aanhou tot die druiwe-oes, en die druiwe-oes sal aanhou tot die saaityd, en julle sal jul brood volop eet en veilig in julle land woon.

<sup>6</sup> Ook sal Ek vrede gee in die land, sodat julle sal lê en rus sonder dat iemand julle skrikmaak; en Ek sal die wilde diere uit die land laat verdwyn, en geen swaard sal deur julle land trek nie.

<sup>7</sup> En julle sal jul vyande agtervolg, en hulle sal voor julle val deur die swaard.

<sup>8</sup> Vyf van julle sal honderd agtervolg, en honderd van julle sal tienduisend

agtervolg; en julle vyande sal voor julle val deur die swaard.

<sup>9</sup> En Ek sal My na julle wend en julle vrugbaar maak en julle vermenigvuldig; en my verbond sal Ek met julle bevestig.

<sup>10</sup> Julle sal ou koring van vorige jare eet en die oue laat plek maak vir die nuwe.

<sup>11</sup> En Ek sal my tabernakel onder julle oprig, en my siel sal van julle geen afsku hê nie.

<sup>12</sup> En Ek sal in jul midde wandel en vir julle 'n God wees, en julle sal vir My 'n volk wees.

<sup>13</sup> Ek is die HERE julle God wat julle uit Egipteland uitgelei het, dat julle nie hulle slawe moet wees nie; en Ek het julle jukskeie verbreek en het julle regop laat loop.

<sup>14</sup> Maar as julle nie na My luister en al hierdie gebooie nie doen nie;

<sup>15</sup> en as julle my insettinge verwerp, en as julle siel van my verordeninge 'n afsku het, sodat julle nie al my gebooie doen nie en my verbond verbreek —

<sup>16</sup> dan sal Ek dit ook aan julle doen: Ek sal verskrikking oor julle beskik: die tering en die koors wat die oë verteer en die lewe laat versmag; julle sal ook tevergeefs julle saad saai, want julle vyande sal dit opeet.

<sup>17</sup> En Ek sal my aangesig teen julle rig, sodat julle voor jul vyande verslaan word; en julle haters sal oor julle heers, en julle sal vlug terwyl niemand julle agtervolg nie.

<sup>18</sup> En as julle dan nog nie na My luister nie, sal Ek voortgaan om julle sewevoudig weens julle sondes te tugtig.

<sup>19</sup> En Ek sal julle trotse mag verbreek, en

## Levítikus 26

---

sal julle hemel maak soos yster en julle aarde soos koper.

<sup>20</sup> En julle krag sal tevergeefs verbruik word, want julle land sal sy opbrings nie gee nie, en die bome van die land sal hulle vrugte nie gee nie.

<sup>21</sup> En as julle jul teen My versit en na My nie wil luister nie, sal Ek meer plaë op julle lê, sewevoudig volgens julle sondes.

<sup>22</sup> En Ek sal die wilde diere van die veld onder julle in stuur, en dié sal julle kinderloos maak en julle vee uitroei en julle verminder, sodat julle paaie verlate sal wees.

<sup>23</sup> En as julle hierdeur jul nie deur My laat tugtig nie, maar julle teen My versit,

<sup>24</sup> sal Ek My ook teen julle versit en julle ook sewevoudig tref weens julle sondes.

<sup>25</sup> En Ek sal 'n swaard oor julle bring wat die wraak van die verbond sal uitoefen; en as julle dan in jul stede terugtrek, sal Ek pes onder julle in stuur, en julle sal in die hand van die vyand oorgegee word.

<sup>26</sup> As Ek vir julle die staf van die brood verbreek, sal tien vroue julle brood in een oond bak en julle brood by die gewig teruggee; en julle sal eet, maar nie versadig word nie.

<sup>27</sup> As julle ook hierom nie na My luister nie, maar julle teen My versit,

<sup>28</sup> sal Ek My in grimmigheid teen julle versit, en Ek sal julle ook sewevoudig tugtig weens julle sondes.

<sup>29</sup> En julle sal die vlees van julle seuns eet, en die vlees van julle dogters sal julle eet.

<sup>30</sup> En Ek sal julle hoogtes verwoes en julle sonpilare verdelg en julle lyke op die lyke

van julle drekgode gooi; en my siel sal 'n afsku van julle hê.

<sup>31</sup> En Ek sal julle stede puinhope maak en julle heiligdomme verwoes en julle lieflike geur nie ruik nie.

<sup>32</sup> Ja, Ek self sal die land verwoes, sodat julle vyande wat daarin gaan woon, daaroor verstom sal staan.

<sup>33</sup> En Ek sal julle onder die volke verstrooi en 'n swaard agter julle uittrek; en julle land sal 'n wildernis en julle stede puinhope word.

<sup>34</sup> Dan sal die land vir sy sabbatte vergoeding kry, al die dae van sy verwoesting, terwyl julle in die land van julle vyande is; dan sal die land rus en vir sy sabbatte vergoeding gee.

<sup>35</sup> Al die dae van sy verwoesting sal dit rus—die rus wat dit nie gehad het in julle sabbatte toe julle daarin gewoon het nie.

<sup>36</sup> En wat aangaan diegene wat onder julle oorgebly het—Ek sal in hulle hart 'n vreesagtigheid bring in die lande van hulle vyande, sodat die geruis van 'n verwaaide blaar hulle op die loop sal ja; en hulle sal vlug, soos 'n mens vir 'n swaard vlug en val sonder dat iemand agtervolg.

<sup>37</sup> En hulle sal struikel die een oor die ander soos vir die swaard, alhoewel niemand agtervolg nie; en julle sal voor julle vyande nie kan standhou nie.

<sup>38</sup> Maar julle sal omkom onder die nasies, en die land van julle vyande sal julle verteer.

<sup>39</sup> En die wat onder julle oorgebly het, sal oor hulle ongeregtheid wegteer in die lande van julle vyande, ja, ook oor die



ongeregtighede van hulle vaders saam met hulle wegteer.

<sup>40</sup> Dan sal hulle hul ongeregtigheid bely en die ongeregtigheid van hulle vaders deurdad hulle ontrou teen My gehandel het; en ook dat hulle hul teen My versit het, <sup>41</sup> sodat Ék My ook teen hulle versit het en hulle in die land van hul vyande moes bring; of, as hulle onbesnede hart hom dan verneder en hulle dan boet vir hul ongeregtigheid,

<sup>42</sup> sal Ek dink aan my verbond met Jakob; en ook aan my verbond met Isak en ook aan my verbond met Abraham sal Ek dink, en aan die land sal Ek dink.

<sup>43</sup> Maar die land moet eers van hulle verlate wees en moet vir sy sabbatte vergoeding kry, terwyl dit woens lê sonder hulle; en hulle sal vir hul ongeregtigheid boet, omdat, ja, omdat hulle my verordeninge verwerp en hulle siel van my insettinge 'n afsku gehad het.

<sup>44</sup> Maar ook dan, as hulle in die land van hul vyande is, verwerp Ek hulle nie en het Ek van hulle geen afsku, sodat Ek 'n einde aan hulle sou maak en my verbond met hulle sou verbreek nie; want Ek is die HERE hulle God.

<sup>45</sup> Maar Ek sal tot hulle beswil dink aan die verbond van die voorvaders wat Ek uit Egipteland voor die oë van die nasies uitgelei het om vir hulle 'n God te wees. Ek is die HERE.

<sup>46</sup> Dit is die insettinge en die verordeninge en die wette wat die HERE tussen Hom en die kinders van Israel by die berg Sinai deur die diens van Moses gegee het.

**27** VERDER het die HERE met Moses gespreek en gesê:

<sup>2</sup> Spreek met die kinders van Israel en sê vir hulle: As iemand 'n besondere gelofte aflê—mense aan die HERE toewy volgens jou skatting,

<sup>3</sup> dan moet jou skatting vir 'n manspersoon van twintig tot sestig jaar, dan moet jou skatting vyftig sikkels silwer wees, volgens die sikkels van die heiligdom.

<sup>4</sup> Maar is dit 'n vrou, dan moet jou skatting dertig sikkels wees.

<sup>5</sup> En is dit iemand van vyf tot twintig jaar, dan moet jou skatting vir 'n manspersoon twintig sikkels wees en vir 'n vroulike tien sikkels.

<sup>6</sup> Maar is dit iemand van 'n maand oud tot vyf jaar, dan moet jou skatting vir die manlike geslag vyf sikkels silwer wees en jou skatting vir die vroulike drie sikkels silwer.

<sup>7</sup> En is dit iemand van sestig jaar oud en daarbo—is dit 'n manspersoon, dan moet jou skatting vyftien sikkels wees en vir 'n vrou tien sikkels.

<sup>8</sup> Maar as hy te arm is vir die geskatte bedrag, moet hy voor die priester gestel word, sodat die priester hom kan skat; volgens wat hy kan bekostig wat die gelofte gedoen het, moet die priester hom skat.

<sup>9</sup> En as dit vee is waarvan hulle aan die HERE 'n offer kan bring, moet alles wat hy daarvan aan die HERE gee, heilig wees.

<sup>10</sup> Hy mag dit nie omwissel of omruil nie—'n goeie vir 'n slegte of 'n slegte vir 'n goeie nie; maar as hy tog 'n dier vir 'n

## Levítikus 26

---

ander een omruil, moet dit en die geruilde heilig wees.

<sup>11</sup> En as dit enige onrein stuk vee is waarvan hulle aan die HERE geen offer mag bring nie, moet hy die dier voor die priester stel,

<sup>12</sup> en die priester moet dit skat of dit goed of sleg is; na jou skatting, priester, so sal dit wees.

<sup>13</sup> Maar as hy dit wil los, moet hy die vyfde deel daarvan bo jou skatting byvoeg.

<sup>14</sup> En as iemand sy huis as heilige gawe aan die HERE toewy, moet die priester dit skat of dit goed of sleg is; soos die priester dit skat, so moet dit bly.

<sup>15</sup> En as hy wat dit geheilig het, sy huis wil los, moet hy die vyfde deel van die geld van jou skatting daar byvoeg; dan sal dit syne wees.

<sup>16</sup> En as iemand 'n stuk land van sy besitting aan die HERE heilig, moet jou skatting wees volgens die saad wat gesaai word: 'n homer garssaad op vyftig sikkels silwer.

<sup>17</sup> As hy sy stuk land van die jubeljaar af heilig—volgens jou skatting, so moet dit bly.

<sup>18</sup> Maar as hy sy stuk land ná die jubeljaar heilig, moet die priester vir hom die geld bereken na die jare wat tot die volgende jubeljaar oor is; en dit moet van jou skatting afgetrek word.

<sup>19</sup> En as hy wat die stuk land geheilig het, dit beslis wil los, moet hy die vyfde deel van die geld van jou skatting daar byvoeg; en dit sal syne bly.

<sup>20</sup> En as hy die stuk land nie los nie, of as

hy die stuk land aan 'n ander verkoop, mag dit nie meer gelos word nie;

<sup>21</sup> maar die stuk land moet, as dit in die jubeljaar vry word, aan die HERE heilig wees soos 'n stuk land onder die ban; die besit daarvan kom aan die priester toe.

<sup>22</sup> En as hy aan die HERE 'n stuk land heilig wat hy gekoop het, wat nie van die land van sy besitting is nie,

<sup>23</sup> moet die priester vir hom die bedrag van die skatting tot die jubeljaar bereken; en hy moet op dieselfde dag die skatting gee as 'n heilige gawe aan die HERE.

<sup>24</sup> In die jubeljaar moet die stuk land terugkom aan hom van wie hy dit gekoop het, aan hom wat in besit was van die stuk land.

<sup>25</sup> En alles wat jy skat, moet volgens die sikkels van die heiligdom wees; die sikkels moet twintig gera wees.

<sup>26</sup> Maar die eersgeborene van 'n dier wat as eersgeborene aan die HERE behoort, dit mag niemand heilig nie; of dit 'n bees is of 'n stuk kleinvee—dit behoort aan die HERE.

<sup>27</sup> Maar is dit van 'n onrein dier, dan moet hy dit na jou skatting loskoop en die vyfde deel daarvan byvoeg; en as dit nie gelos word nie, moet dit na jou skatting verkoop word.

<sup>28</sup> Maar niks van die bangoed wat iemand aan die HERE wy, van alles wat aan hom behoort—mense of vee of grond wat in sy besit is—mag verkoop of gelos word nie. Al die bangoed moet aan die HERE hoogheilig wees.

<sup>29</sup> Elkeen wat onder die ban is, wat onder

---

die mense met die ban getref is, mag nie losgekoop word nie; hy moet sekerlik gedood word.

<sup>30</sup> Ook al die tiendes van die land, van die graan van die land, van die vrugte van die bome, behoort aan die HERE; dit is heilig aan die HERE.

<sup>31</sup> Maar as iemand van sy tiende iets wil los, moet hy die vyfde deel daarvan byvoeg.

<sup>32</sup> Wat betref al die tiendes van beeste en kleinvee—alles wat onder die herderstaf

deurgaan—die tiende moet aan die HERE heilig wees.

<sup>33</sup> Hulle mag nie ondersoek of dit goed of sleg is nie, en dit nie omruil nie; maar as hulle dit tog omruil, moet dit en die geruilde heilig wees; dit mag nie gelos word nie.

<sup>34</sup> Dit is die gebooie wat die HERE Moses by die berg Sinai vir die kinders van Israel beveel het.

# Númeri

**1** VERDER het die HERE met Moses  
gespreek in die woestyn Sinai, in die  
tent van samekoms, op die eerste van die  
tweede maand, in die tweede jaar nadat  
hulle uit Egipteland uitgetrek het, en gesê:

<sup>2</sup> Neem julle die volle getal van die hele  
vergadering van die kinders van Israel op  
volgens hulle geslagte, volgens hulle  
families, na die getal name, almal wat  
manlik is, hoof vir hoof;

<sup>3</sup> van twintig jaar oud en daarbo, almal  
wat op kommando moet uittrek in Israel,  
dié moet julle tel volgens hulle  
leërafdelings, jy en Aäron.

<sup>4</sup> En met julle saam moet daar van elke  
stam 'n man wees, 'n man wat hoof is van  
sy families.

<sup>5</sup> En dit is die name van die manne wat  
julle moet bystaan: Vir Ruben: Elísur, die  
seun van Sedéür;

<sup>6</sup> vir Símeon: Selúmiël, die seun van  
Surísaddai;

<sup>7</sup> vir Juda: Nagson, die seun van  
Ammínadab;

<sup>8</sup> vir Íssaskar: Netáneël, die seun van Suar;

<sup>9</sup> vir Sébulon: Elíab, die seun van Helon;

<sup>10</sup> vir die kinders van Josef: vir Efraim:  
Elisáma, die seun van Ammíhud; vir  
Manasse: Gámliël, die seun van Pedásur;

<sup>11</sup> vir Benjamin: Abídan, die seun van  
Gideóni;

<sup>12</sup> vir Dan, Ahiëser, die seun van  
Ammísaddai;

<sup>13</sup> vir Aser: Págiël, die seun van Ogran;

<sup>14</sup> vir Gad: Éljasaf, die seun van Réhuel;

<sup>15</sup> vir Náftali: Ahíra, die seun van Enan.

<sup>16</sup> Dit was hulle wat uit die vergadering  
opgeroep was, die owerstes van hulle  
voorvaderlike stamme, die stamhoofde van  
Israel.

<sup>17</sup> Toe het Moses en Aäron dié manne  
geneem wat met hulle name aangewys  
was,

<sup>18</sup> en hulle het die hele vergadering op die  
eerste dag van die tweede maand  
bymekeer laat kom; en dié het hulle afkoms  
opgegee volgens hulle geslagte, volgens  
hulle families, na die getal name, van  
twintig jaar oud en daarbo, hoof vir hoof,

<sup>19</sup> soos die HERE Moses beveel het. En hy  
het hulle getel in die woestyn Sinai.

<sup>20</sup> En die seuns van Ruben, die  
eersgeborene van Israel—hulle  
nakomelinge volgens hulle geslagte,  
volgens hulle families, na die getal name,  
hoof vir hoof, almal wat manlik was, van  
twintig jaar oud en daarbo, almal wat op  
kommando moet uittrek —

<sup>21</sup> hulle geteldes van die stam van Ruben  
was ses-en-veertigduisend-vyfhonderd.

<sup>22</sup> Van die seuns van Símeon, hulle  
nakomelinge volgens hulle geslagte,  
volgens hulle families, na die getal name,  
hoof vir hoof, almal wat manlik was, van  
twintig jaar oud en daarbo, almal wat op  
kommando moet uittrek —

<sup>23</sup> hulle geteldes van die stam van Símeon  
was negen-en-vyftigduisend-driehonderd.

<sup>24</sup> Van die seuns van Gad, hulle

## Númeri 1

---

nakomelinge volgens hulle geslagte,  
volgens hulle families, na die getal name,  
van twintig jaar oud en daarbo, almal wat  
op kommando moet uittrek —

<sup>25</sup> hulle geteldes van die stam van Gad was  
vyf-en-veertigduisend-seshonderd-en-  
vyftig.

<sup>26</sup> Van die seuns van Juda, hulle  
nakomelinge volgens hulle geslagte,  
volgens hulle families, na die getal name,  
van twintig jaar oud en daarbo, almal wat  
op kommando moet uittrek —

<sup>27</sup> hulle geteldes van die stam van Juda  
was vier-en-sewentigduisend-seshonderd.

<sup>28</sup> Van die seuns van Íssaskar, hulle  
nakomelinge volgens hulle geslagte,  
volgens hulle families, na die getal name,  
van twintig jaar oud en daarbo, almal wat  
op kommando moet uittrek —

<sup>29</sup> hulle geteldes van die stam van Íssaskar  
was vier-en-vyftigduisend-vierhonderd.

<sup>30</sup> Van die seuns van Sébulon, hulle  
nakomelinge volgens hulle geslagte,  
volgens hulle families, na die getal name,  
van twintig jaar oud en daarbo, almal wat  
op kommando moet uittrek —

<sup>31</sup> hulle geteldes van die stam van Sébulon  
was sewen-en-vyftigduisend-vierhonderd.

<sup>32</sup> Van die seuns van Josef, van die seuns  
van Efraim, hulle nakomelinge volgens  
hulle geslagte, volgens hulle families, na  
die getal name, van twintig jaar oud en  
daarbo, almal wat op kommando moet  
uittrek —

<sup>33</sup> hulle geteldes van die stam van Efraim  
was veertigduisend-vyfhonderd;

<sup>34</sup> van die seuns van Manasse, hulle

nakomelinge volgens hulle geslagte,  
volgens hulle families, na die getal name,  
van twintig jaar oud en daarbo, almal wat  
op kommando moet uittrek —

<sup>35</sup> hulle geteldes van die stam van Manasse  
was twee-en-dertigduisend-tweehonderd.

<sup>36</sup> Van die seuns van Benjamin, hulle  
nakomelinge volgens hulle geslagte,  
volgens hulle families, na die getal name,  
van twintig jaar oud en daarbo, almal wat  
op kommando moet uittrek —

<sup>37</sup> hulle geteldes van die stam van  
Benjamin was  
vyf-en-dertigduisend-vierhonderd.

<sup>38</sup> Van die seuns van Dan, hulle  
nakomelinge volgens hulle geslagte,  
volgens hulle families, na die getal name,  
van twintig jaar oud en daarbo, almal wat  
op kommando moet uittrek —

<sup>39</sup> hulle geteldes van die stam van Dan was  
twee-en-sestigduisend-sewehonderd.

<sup>40</sup> Van die seuns van Aser, hulle  
nakomelinge volgens hulle geslagte,  
volgens hulle families, na die getal name,  
van twintig jaar oud en daarbo, almal wat  
op kommando moet uittrek —

<sup>41</sup> hulle geteldes van die stam van Aser  
was een-en-veertigduisend-vyfhonderd.

<sup>42</sup> Van die seuns van Náftali, hulle  
nakomelinge volgens hulle geslagte,  
volgens hulle families, na die getal name,  
van twintig jaar oud en daarbo, almal wat  
op kommando moet uittrek —

<sup>43</sup> hulle geteldes van die stam van Náftali  
was drie-en-vyftigduisend-vierhonderd.

<sup>44</sup> Dit is die geteldes wat Moses en Aäron  
en die owerstes van Israel getel het; twaalf

## Númeri 2

man was dit, elkeen vir sy families.

<sup>45</sup> So was dan al die geteldes van die kinders van Israel volgens hulle families, van twintig jaar oud en daarbo, almal wat in Israel op kommando moet uittrek —

<sup>46</sup> al die geteldes dan was seshonderd-en-drieduisend-vyfhonderd-en-vyftig.

<sup>47</sup> Maar die Leviete, volgens hulle voorvaderlike stam, is onder hulle nie getel nie.

<sup>48</sup> Die HERE het naamlik met Moses gesprek en gesê:

<sup>49</sup> Net die stam van Levi moet jy nie tel nie en hulle volle getal onder die kinders van Israel nie opneem nie;

<sup>50</sup> maar stel jy die Leviete aan oor die tabernakel van die Getuienis en oor al sy gereedskap en oor alles wat daarby behoort. Hulle moet die tabernakel dra en alles wat daarby behoort, en hulle moet dit bedien en rondom die tabernakel laer opslaan.

<sup>51</sup> En as die tabernakel wegtrek, moet die Leviete dit afbreek; en as die tabernakel rus, moet die Leviete dit oprig; en die onbevoegde wat nader kom, moet gedood word.

<sup>52</sup> En die kinders van Israel moet laer opslaan elkeen op sy laerplek en elkeen by sy vaandel, volgens hulle leërafdelings.

<sup>53</sup> Maar die Leviete moet laer opslaan rondom die tabernakel van die Getuienis, dat daar geen toorn oor die vergadering van die kinders van Israel kom nie. So moet dan die Leviete die diens van die tabernakel van die Getuienis waarneem.

<sup>54</sup> En die kinders van Israel het dit gedoen;

net soos die HERE Moses beveel het, so het hulle gedoen.

**2** EN die HERE het met Moses en Aäron gesprek en gesê:

<sup>2</sup> Die kinders van Israel moet laer opslaan elkeen by sy vaandel by die veldtekens van hulle families; op 'n afstand rondom die tent van samekoms moet hulle laer opslaan.

<sup>3</sup> En die wat aan die oostekant, teen sonop, laer opslaan, moet wees: die vaandel van die laer van Juda volgens hulle leërafdelings; en Nagson, die seun van Ammínadab, moet owerste oor die seuns van Juda wees.

<sup>4</sup> En sy leer met hulle geteldes was vier-en-sewentigduisend-seshonderd.

<sup>5</sup> En die wat langs hom laer opslaan, moet wees die stam van Íssaskar; en Netáneël, die seun van Suar, moet owerste oor die seuns van Íssaskar wees.

<sup>6</sup> En sy leer met hulle geteldes was vier-en-vyftigduisend-vierhonderd.

<sup>7</sup> Verder die stam van Sébulon; en Elíab, die seun van Helon, moet owerste oor die seuns van Sébulon wees.

<sup>8</sup> En sy leer met sy geteldes was sewen-en-vyftigduisend-vierhonderd.

<sup>9</sup> Al die geteldes in die laer van Juda was honderd-ses-en-tagtigduisend-vierhonderd volgens hulle leërafdelings. Hulle moet eerste opbreek.

<sup>10</sup> Die vaandel van die laer van Ruben volgens hulle leërafdelings moet aan die suidekant wees; en Elísur, die seun van Sedéür, moet owerste oor die seuns van Ruben wees.

## Númeri 2

---

<sup>11</sup> En sy leër met sy geteldes was ses-en-veertigduisend-vyfhonderd.

<sup>12</sup> En die wat langs hom laer opslaen, moet wees die stam van Símeon; en Selúmiël, die seun van Surísaddai, moet owerste oor die seuns van Símeon wees.

<sup>13</sup> En sy leër met hulle geteldes was negen-en-vyftigduisend-driehonderd.

<sup>14</sup> Verder die stam van Gad; en Éljásaf, die seun van Réhuel, moet owerste oor die seuns van Gad wees.

<sup>15</sup> En sy leër met hulle geteldes was vyf-en-veertigduisend-seshonderden-vyftig.

<sup>16</sup> Al die geteldes in die laer van Ruben was honderd-een-en-vyftigduisend-vierhonderd-en-vyftig volgens hulle leërafdelings. En hulle moet tweede opbreek.

<sup>17</sup> Daarna moet die tent van samekoms opbreek: die laer van die Leviete, tussen die ander laers in. Soos hulle laer opslaen, so moet hulle opbreek, elkeen op sy plek volgens hulle vaandels.

<sup>18</sup> Die vaandel van die laer van Efraim volgens hulle leërafdelings moet aan die westekant wees; en Elisáma, die seun van Ammíhud, moet owerste oor die seuns van Efraim wees.

<sup>19</sup> En sy leër met hulle geteldes was veertigduisend-vyfhonderd.

<sup>20</sup> En langs hom die stam van Manasse; en Gámliël, die seun van Pedásur, moet owerste oor die seuns van Manasse wees.

<sup>21</sup> En sy leër met hulle geteldes was twee-en-dertigduisend-tweehonderd.

<sup>22</sup> Verder die stam van Benjamin; en Abídan, die seun van Gideóni, moet

owerste oor die seuns van Benjamin wees.

<sup>23</sup> En sy leër met hulle geteldes was vyf-en-dertigduisend-vierhonderd.

<sup>24</sup> Al die geteldes in die laer van Efraim was honderd-en-agtduisend-eenhonderd volgens hulle leërafdelings. En hulle moet derde opbreek.

<sup>25</sup> Die vaandel van die laer van Dan moet aan die noordekant wees volgens hulle leërafdelings; en Ahiëser, die seun van Ammísaddai, moet owerste oor die seuns van Dan wees.

<sup>26</sup> En sy leër met hulle geteldes was twee-en-sestigduisend-sewehonderd.

<sup>27</sup> En die wat langs hom laer opslaen, moet wees die stam van Aser; en Págiël, die seun van Ogran, moet owerste oor die seuns van Aser wees.

<sup>28</sup> En sy leër met hulle geteldes was een-en-veertigduisend-vyfhonderd.

<sup>29</sup> Verder die stam van Náftali; en Ahíra, die seun van Enan, moet owerste oor die seuns van Náftali wees.

<sup>30</sup> En sy leër met hulle geteldes was drie-en-vyftigduisend-vierhonderd.

<sup>31</sup> Al die geteldes in die laer van Dan was honderd-sewen-en-vyftigduisend-seshonderd. Hulle moet laaste opbreek volgens hulle vaandels.

<sup>32</sup> Dit is die geteldes van die kinders van Israel volgens hulle families. Al die geteldes van die laers volgens hulle leërafdelings was seshonderd-en-drieduisend-vyfhonderd-en-vyftig.

<sup>33</sup> Maar die Leviete is onder die kinders van Israel nie getel nie, soos die HERE Moses beveel het.

## Númeri 3

<sup>34</sup> En die kinders van Israel het gedoen net soos die HERE Moses beveel het; so het hulle laer opgeslaan volgens hulle vaandels, en so het hulle opgebreek elkeen volgens sy geslagte, by sy families.

**3** EN dit is die nakomelinge van Aäron en Moses op die dag toe die HERE met Moses op die berg Sinai gespreek het.

<sup>2</sup> En dit is die name van die seuns van Aäron: die eersgeborene Nadab, daarna Abíhu, Eleásar en Ítamar.

<sup>3</sup> Dit is die name van die seuns van Aäron, die gesalfde priesters, wat hy aangestel het om die priesteramp te bedien.

<sup>4</sup> Maar Nadab en Abíhu het gesterwe voor die aangesig van die HERE toe hulle vreemde vuur voor die aangesig van die HERE in die woestyn Sinai gebring het, en hulle het geen kinders gehad nie; maar Eleásar en Ítamar het die priesteramp bedien voor die oë van hulle vader Aäron.

<sup>5</sup> En die HERE het met Moses gespreek en gesê:

<sup>6</sup> Laat die stam van Levi nader kom, en stel hulle voor die priester Aäron, dat hulle hom kan dien.

<sup>7</sup> En hulle moet sy diens waarneem en die diens van die hele vergadering voor die tent van samekoms, om die dienswerk van die tabernakel te verrig.

<sup>8</sup> En hulle moet sorg vir al die gereedskap van die tent van samekoms en vir die diens van die kinders van Israel, om die dienswerk van die tabernakel te verrig.

<sup>9</sup> En jy moet die Leviete aan Aäron en sy seuns gee; hulle is heeltemal aan hom gegee uit die kinders van Israel.

<sup>10</sup> Maar Aäron en sy seuns moet jy aanstel, dat hulle hul priesteramp kan waarneem; en die onbevoegde wat nader kom, moet gedood word.

<sup>11</sup> En die HERE het met Moses gespreek en gesê:

<sup>12</sup> Kyk, Ek self het die Leviete geneem onder die kinders van Israel uit in die plek van al die eersgeborenes wat die moederskoot open, uit die kinders van Israel, dat die Leviete myne kan wees.

<sup>13</sup> Want al die eersgeborenes is myne: op die dag toe Ek al die eersgeborenes in Egipteland getref het, het Ek al die eersgeborenes in Israel vir My geheilig, mense sowel as diere; hulle moet myne wees. Ek is die HERE.

<sup>14</sup> En die HERE het met Moses gespreek in die woestyn Sinai en gesê:

<sup>15</sup> Tel die seuns van Levi volgens hulle families, volgens hulle geslagte; almal wat manlik is, van 'n maand oud en daarbo—dié moet jy tel.

<sup>16</sup> En Moses het hulle volgens die bevel van die HERE getel soos dit hom beveel is.

<sup>17</sup> En dit was die seuns van Levi volgens hulle name: Gerson en Kehat en Merári.

<sup>18</sup> En dit is die name van die seuns van Gerson volgens hulle geslagte: Libni en Símeï.

<sup>19</sup> En die seuns van Kehat volgens hulle geslagte: Amram en Jishar, Hebron en Ússiël.

<sup>20</sup> En die seuns van Merári volgens hulle geslagte: Magli en Musi. Dit is die geslagte van die Leviete volgens hulle families.

<sup>21</sup> Aan Gerson behoort die geslag van die



## Númeri 3

---

Libniete en die geslag van die Simeïete. Dit is die geslagte van die Gersoniete.

<sup>22</sup> Hulle geteldes volgens die getal van almal wat manlik was, van 'n maand oud en daarbo—hulle geteldes was seweduisend-vyfhonderd.

<sup>23</sup> Die geslagte van die Gersoniete moet laer opslaen agter die tabernakel aan die westekant.

<sup>24</sup> En owerste oor die familie van die Gersoniete moet Éljásaf, die seun van Lael, wees.

<sup>25</sup> En die seuns van Gerson moet by die tent van samekoms versorg: die tabernakel en die tent, sy dekkleed en die bedekking vir die ingang van die tent van samekoms;

<sup>26</sup> en die behangsels van die voorhof en die bedekking vir die ingang van die voorhof wat rondom die tabernakel en die altaar is, en sy lyne—alles wat by sy bediening behoort.

<sup>27</sup> En aan Kehat het behoort die geslag van die Amramiete en die geslag van die Jishariete en die geslag van die Hebroniete en die geslag van die Ussiëliete. Dit is die geslagte van die Kehatiete.

<sup>28</sup> Volgens die getal van almal wat manlik is, van 'n maand oud en daarbo, was daar agtduisend-seshonderd wat die diens van die heiligdom waargeneem het.

<sup>29</sup> Die geslagte van die seuns van Kehat moet laer opslaen aan die kant van die tabernakel, aan die suidekant.

<sup>30</sup> En die owerste oor die familie vir die geslagte van die Kehatiete moet wees Elísafan, die seun van Ússiël.

<sup>31</sup> En hulle moet versorg: die ark en die

tafel en die kandelaar en die altare en die gereedskap van die heiligdom waarmee hulle diens doen, en die voorhangsel en alles wat by die bediening daarvan behoort.

<sup>32</sup> En die hoof van die owerstes van Levi moet wees Eleásar, die seun van Aäron, die priester, die opsigter oor die wat die diens van die heiligdom waarneem.

<sup>33</sup> Aan Merári het behoort die geslag van die Magliete en die geslag van die Musiete. Dit is die geslagte van Merári.

<sup>34</sup> En hulle geteldes volgens die getal van almal wat manlik is, van 'n maand oud en daarbo, was sesduisend-tweehonderd.

<sup>35</sup> En die owerste van die familie vir die geslagte van Merári moet wees Súriël, die seun van Abihail; hulle moet laer opslaen aan die kant van die tabernakel, aan die noordekant.

<sup>36</sup> En die toesig van die seuns van Merári—wat hulle te besorg het—moet wees oor die style van die tabernakel en sy dwarshoute en sy pilare en sy voetstukke en al die gereedskap sowel as die hele diens wat daarby behoort;

<sup>37</sup> en die pilare van die voorhof rondom en hulle voetstukke en hulle penne en hulle lyne.

<sup>38</sup> En die wat voor die tabernakel laer opslaen, aan die oostekant, voor die tent van samekoms, teen sonop, moet wees Moses en Aäron met sy seuns wat die diens van die heiligdom waarneem, naamlik die diens vir die kinders van Israel; en die onbevoegde wat nader kom, moet gedood word.

## Númeri 4

<sup>39</sup> Al die geteldes van die Leviete wat Moses en Aäron volgens die bevel van die HERE, volgens hulle geslagte getel het, almal wat manlik was, van 'n maand oud en daarbo, was twee-en-twintigduisend.

<sup>40</sup> En die HERE het aan Moses gesê: Tel al die manlike eersgeborenes van die kinders van Israel, van 'n maand oud en daarbo, en neem die getal van hulle name op.

<sup>41</sup> En jy moet vir My—Ek is die HERE—die Leviete neem in die plek van al die eersgeborenes onder die kinders van Israel, en die vee van die Leviete in die plek van al die eersgeborenes onder die vee van die kinders van Israel.

<sup>42</sup> En Moses het, soos die HERE hom beveel het, al die eersgeborenes onder die kinders van Israel getel.

<sup>43</sup> En al die manlike eersgeborenes volgens die getal name, van 'n maand oud en daarbo, volgens hulle geteldes, was twee-en-twintigduisend-tweehonderd-drie-en-sewentig.

<sup>44</sup> En die HERE het met Moses gesprek en gesê:

<sup>45</sup> Neem die Leviete in die plek van al die eersgeborenes onder die kinders van Israel, en die vee van die Leviete in die plek van hulle vee, sodat die Leviete myne kan wees. Ek is die HERE.

<sup>46</sup> Wat aangaan die loskoping van die tweehonderd-drie-en-sewentig wat oor is bo die Leviete, uit die eersgeborenes van die kinders van Israel,

<sup>47</sup> moet jy per hoof vyf sikkels neem; volgens die sikkels van die heiligdom moet jy dit neem; die sikkels is twintig gera.

<sup>48</sup> En jy moet die geld as losprys van die wat onder hulle oor is, aan Aäron en sy seuns gee.

<sup>49</sup> Daarop het Moses die loskoopgeld geneem van die wat oor was bo die wat deur die Leviete losgekoop was;

<sup>50</sup> van die eersgeborenes van die kinders van Israel het hy die geld geneem, duisend-driehonderd-vyf-en-sestig sikkels volgens die sikkels van die heiligdom.

<sup>51</sup> En Moses het die loskoopgeld aan Aäron en sy seuns gegee volgens die bevel van die HERE, soos die HERE Moses beveel het.

**4** EN die HERE het met Moses en Aäron gesprek en gesê:

<sup>2</sup> Neem die volle getal van die seuns van Kehat op, onder die seuns van Levi uit, volgens hulle geslagte, volgens hulle families,

<sup>3</sup> van dertig jaar oud en daarbo, tot vyftig jaar, almal wat dienspligtig is, om werk by die tent van samekoms te verrig.

<sup>4</sup> Dit sal die dienswerk van die seuns van Kehat by die tent van samekoms wees, naamlik die hoogheilige dinge.

<sup>5</sup> By die opbreek van die laer moet Aäron en sy seuns kom en die voor-hangsel tot bedekking afneem en daarmee die ark van die Getuienis bedek.

<sup>6</sup> En hulle moet 'n dekkleed van robbevelle daarop sit en 'n doek, heeltemal van pers stof, daar bo-oor uitsprei en sy draaghoute insteek.

<sup>7</sup> Hulle moet ook oor die toonbroodtafel 'n pers doek uitsprei en daarop neersit die skottels en die rookpanne en die bekere en die drankofferkanne; ook moet die

## Númeri 4

---

altydblywende brood daarop wees.

<sup>8</sup> Daarna moet hulle 'n skarlaken doek daaroor uitsprei en dit met 'n dekkleed van robbevelle toemaak en sy draaghoute insteek.

<sup>9</sup> Dan moet hulle 'n pers doek neem en die kandelaar tot verligting bedek, met sy lampe en sy snuiters en sy bakkies en al sy oliekanne waarmee hulle daarby diens doen.

<sup>10</sup> En hulle moet dit met al sy gereedskap op 'n dekkleed van robbevelle neerlê en dit op die draagbaar sit.

<sup>11</sup> En oor die goue altaar moet hulle 'n pers doek uitsprei en dit met 'n dekkleed van robbevelle toemaak en sy draaghoute insteek.

<sup>12</sup> Hulle moet ook al die gereedskap neem waarmee hulle diens in die heiligdom doen, en dit op 'n pers doek neerlê en met 'n dekkleed van robbevelle toemaak en dit op die draagbaar sit.

<sup>13</sup> En hulle moet die as van die altaar verwyder en daar 'n purper doek oor uitsprei.

<sup>14</sup> En hulle moet al sy gereedskap daarop neersit waarmee hulle daarby diens doen: die vuurpanne, die vurke en die skoppe en die komme, al die gereedskap van die altaar; en hulle moet daar 'n dekkleed van robbevelle oor uitsprei en sy draaghoute insteek.

<sup>15</sup> En eers nadat Aäron en sy seuns, by die opbreek van die laer, klaar is met die toemaak van die heiligdom en van al die gereedskap van die heiligdom, moet die seuns van Kehat kom om te dra; maar hulle

mag nie aan die heilige dinge raak nie, sodat hulle nie sterwe nie. Hierdie dinge is dit wat die seuns van Kehat moet dra van die tent van samekoms.

<sup>16</sup> En die toesig van Eleásar, die seun van die priester Aäron, gaan oor die olie vir die kandelaar en die reukwerk van speserye en die voortdurende spysoffer en die salfolie; die toesig oor die hele tabernakel en oor alles wat daarin is: die heiligdom en bybehorende gereedskap.

<sup>17</sup> En die HERE het met Moses en Aäron gespreek en gesê:

<sup>18</sup> Sorg dat die stam van die geslagte van die Kehatiete nie onder die Leviete uitgeroei word nie.

<sup>19</sup> Maar doen vir hulle dit, sodat hulle lewe en nie sterwe nie as hulle na die hoogheilige dinge aankom: Aäron en sy seuns moet ingaan en hulle aanstel elkeen oor sy dienswerk en oor wat hy moet dra.

<sup>20</sup> Maar hulle moet nie inkom om vir 'n oomblik die heiligdom te sien nie, sodat hulle nie sterwe nie.

<sup>21</sup> En die HERE het met Moses gespreek en gesê:

<sup>22</sup> Neem die volle getal op ook van die seuns van Gerson volgens hulle families, volgens hulle geslagte.

<sup>23</sup> Jy moet hulle tel van dertig jaar oud en daarbo, tot vyftig jaar, almal wat verplig is om diens te doen, om dienswerk te verrig by die tent van samekoms.

<sup>24</sup> Dit sal die dienswerk van die geslagte van die Gersoniete wees by die diens en by die vervoer:

<sup>25</sup> hulle moet die tentdoeke van die

## Númeri 4

---

tabernakel dra, ook die tent van samekoms, sy dekkleed en die dekkleed van robbevelle wat daar bo-oor is, en die bedekking vir die ingang van die tent van samekoms<sup>26</sup> en die behangsels van die voorhof en die bedekking vir die ingang van die poort van die voorhof wat rondom die tabernakel en die altaar is, en hulle lyne sowel as al die gereedskap wat by die bediening daarvan behoort; en alles wat daarvoor gedoen moet word, moet hulle verrig.

<sup>27</sup> Die hele dienswerk van die seuns van die Gersoniete—alles wat hulle moet dra en hulle hele diens—moet wees volgens die bevel van Aäron en sy seuns; en julle moet hulle al hulle drawerk aanwys om dit waar te neem.

<sup>28</sup> Dit is die dienswerk vir die geslagte van die seuns van die Gersoniete by die tent van samekoms; en wat hulle te besorg het, moet plaasvind onder leiding van Ítamar, die seun van die priester Aäron.

<sup>29</sup> Wat aangaan die seuns van Merári—dié moet jy tel volgens hulle geslagte, volgens hulle families.

<sup>30</sup> Jy moet hulle tel van dertig jaar oud en daarbo, tot vyftig jaar, almal wat dienspligtig is, om die dienswerk van die tent van samekoms te verrig.

<sup>31</sup> En dit is wat by hulle drawerk besorg moet word, hulle hele dienswerk by die tent van samekoms: die style van die tabernakel met sy dwarshoute en sy pilare en sy voetstukke

<sup>32</sup> en die pilare van die voorhof rondom met hulle voetstukke en hulle penne en hulle lyne—al die gereedskap sowel as

alles wat by die bediening daarvan behoort. En die gereedskap wat by hulle drawerk besorg moet word, moet julle met die naam aanwys.

<sup>33</sup> Dit is die dienswerk vir die geslagte van die seuns van Merári, hulle hele diens by die tent van samekoms onder leiding van Ítamar, die seun van die priester Aäron.

<sup>34</sup> En Moses en Aäron en die owerstes van die vergadering het die seuns van die Kehatiete getel volgens hulle geslagte en volgens hulle families;

<sup>35</sup> van dertig jaar oud en daarbo, tot vyftig jaar, almal wat dienspligtig was insake die dienswerk by die tent van samekoms.

<sup>36</sup> En hulle geteldes was volgens hulle geslagte tweeduisend-sewehonderd-en-vyftig.

<sup>37</sup> Dit is die geteldes van die geslagte van die Kehatiete, almal wat by die tent van samekoms gedien het, wat Moses en Aäron volgens die bevel van die HERE deur die diens van Moses getel het.

<sup>38</sup> En die geteldes van die seuns van Gerson volgens hulle geslagte en volgens hulle families,

<sup>39</sup> van dertig jaar oud en daarbo, tot vyftig jaar, almal wat dienspligtig was insake die dienswerk by die tent van samekoms —

<sup>40</sup> hulle geteldes was volgens hulle geslagte, volgens hulle families, twee-duisend-seshonderd-en-dertig.

<sup>41</sup> Dit is die geteldes van die geslagte van Gerson se seuns, almal wat by die tent van samekoms gedien het, wat Moses en Aäron volgens die bevel van die HERE getel het.

<sup>42</sup> En die geteldes van die geslagte van

## Númeri 5

Merári se seuns volgens hulle geslagte,  
volgens hulle families,

<sup>43</sup> van dertig jaar oud en daarbo, tot vyftig jaar, almal wat dienspligtig was insake die dienswerk by die tent van samekoms —

<sup>44</sup> hulle geteldes was volgens hulle geslagte drieduisend-tweehonderd.

<sup>45</sup> Dit is die geteldes van die geslagte van Merári se seuns wat Moses en Aäron volgens die bevel van die HERE deur die diens van Moses getel het.

<sup>46</sup> Al die getelde Leviete wat Moses en Aäron en die owerstes van Israel getel het, volgens hulle geslagte en volgens hulle families,

<sup>47</sup> van dertig jaar oud en daarbo, tot vyftig jaar, almal wat dienspligtig was om dienswerk te verrig en die werk van vervoer by die tent van samekoms —

<sup>48</sup> hulle geteldes was agtduisend-vyfhonderd-en-tagtig.

<sup>49</sup> Volgens die bevel van die HERE deur tussenkoms van Moses is hulle aangewys elkeen vir sy diens en vir sy drawerk; naamlik die geteldes, soos die HERE Moses beveel het.

**5** EN die HERE  
het met Moses gespreek en gesê:

<sup>2</sup> Gee bevel aan die kinders van Israel dat hulle uit die laer wegstuur al die melaatse mense en almal wat 'n vloeiing het, en almal wat deur 'n lyk onrein is.

<sup>3</sup> Man sowel as vrou moet julle wegstuur; buitekant die laer moet julle hulle wegstuur, sodat hulle nie hul laer verontreinig waar Ek in hulle midde woon nie.

<sup>4</sup> En die kinders van Israel het so gedoen en hulle buitekant die laer gestuur; soos die HERE met Moses gesprek het, so het die kinders van Israel gedoen.

<sup>5</sup> VERDER het die HERE met Moses gesprek en gesê:

<sup>6</sup> Spreek met die kinders van Israel: As 'n man of vrou enige menslike sonde doen, sodat ontrou teen die HERE gehandel word, en dié siel skuldig word,

<sup>7</sup> dan moet hulle hul sonde wat hulle gedoen het, bely; daarna moet hy wat hy skuldig is, ten volle teruggee en die vyfde deel daarvan byvoeg, en hy moet dit aan dié een gee teen wie hy hom skuldig gemaak het.

<sup>8</sup> Maar as die man geen losser het aan wie die skuld teruggee kan word nie, behoort die skuld wat teruggee moet word, aan die HERE, aan die priester, behalwe die versoeningsram waarmee hy vir hom versoening doen.

<sup>9</sup> En elke heffing van al die heilige gawes van die kinders van Israel wat hulle na die priester bring, moet syne wees.

<sup>10</sup> En elkeen se heilige gawes—dit moet syne wees: wat iemand aan die priester gee, moet syne wees.

<sup>11</sup> VERDER het die HERE met Moses gesprek en gesê:

<sup>12</sup> Spreek met die kinders van Israel en sê vir hulle: As iemand se vrou afwyk en 'n troubreuk teen hom begaan,

<sup>13</sup> en 'n man met haar vleeslike gemeenskap het, maar dit vir die oë van haar man verborge bly en sy nie uitgevind is nie—hoewel sy haar verontreinig

## Númeri 5

---

het—terwyl daar geen getuie teen haar is en sy nie betrap is nie;

<sup>14</sup> en daar kom 'n gees van jaloersheid oor hom, sodat hy jaloers word op sy vrou terwyl sy haar inderdaad verontreinig het; of 'n gees van jaloersheid kom oor hom, sodat hy jaloers word op sy vrou terwyl sy haar nie verontreinig het nie;

<sup>15</sup> dan moet die man sy vrou na die priester bring, en hy moet haar offer vir haar saambring: 'n tiende van 'n efa garsmeel; hy moet daar geen olie op giet en geen wierook daar byvoeg nie, omdat dit 'n spysoffer van jaloersheid is, 'n gedenkoffer wat die ongeregtigheid in gedagtenis bring.

<sup>16</sup> En die priester moet haar laat nader kom en haar voor die aangesig van die HERE stel.

<sup>17</sup> En die priester moet heilige water in die erdepot neem; en van die stof wat op die vloer van die tabernakel is, moet die priester neem en in die water gooi.

<sup>18</sup> Daarna moet die priester die vrou voor die aangesig van die HERE stel en die hare van die vrou losmaak, en hy moet die gedenkoffer op haar hande sit—'n spysoffer van jaloersheid is dit; en in die hand van die priester moet daar wees die water van bitter smart wat die vloek bring.

<sup>19</sup> En die priester moet haar besweer en aan die vrou sê: As geen man met jou gemeenskap gehad het nie, en jy, terwyl jy aan jou man toebehoort het, nie afgewyk het in onreinheid nie—wees dan vry van hierdie water van bitter smart wat die vloek bring.

<sup>20</sup> Maar as jy, terwyl jy aan jou man toebehoort het, afgewyk en jou verontreinig het deurdat 'n man behalwe jou eie man met jou vleeslike gemeenskap gehad het —

<sup>21</sup> so moet dan die priester die vrou met die eed van vervloeking besweer, en die priester moet aan die vrou sê: Mag die HERE jou tot 'n vervloeking en 'n verwensing maak onder jou volk deurdat die HERE jou heup laat inval en jou skoot laat opswel;

<sup>22</sup> en mag hierdie water wat die vloek bring, in jou ingewande ingaan om die skoot te laat opswel en die heup te laat inval. Dan moet die vrou sê: Amen, amen!

<sup>23</sup> Daarna moet die priester hierdie vervloeking op 'n blad skrywe en dit in die water van bitter smart uitwis;

<sup>24</sup> en hy moet die vrou laat drink die water van bitter smart wat die vloek bring, sodat die water wat die vloek bring, in haar kan ingaan tot bitter smart.

<sup>25</sup> En die priester moet uit die hand van die vrou die spysoffer van jaloersheid neem en die spysoffer voor die aangesig van die HERE beweeg en dit na die altaar bring.

<sup>26</sup> Die priester moet ook van die spysoffer 'n handvol, as gedenkoffer daarvan, neem en dit op die altaar aan die brand steek; en daarna moet hy die vrou die water laat drink.

<sup>27</sup> En as hy haar die water laat drink het, dan sal, as sy haar verontreinig en teen haar man troubreuk begaan het, die water wat die vloek bring, as bitter smart in haar ingaan, en haar skoot sal opswel en haar

## Númeri 6

heup inval; en die vrou sal onder haar volk 'n vervloeking wees.

<sup>28</sup> Maar as die vrou haar nie verontreinig het nie, maar rein is, sal sy vry wees en swanger word.

<sup>29</sup> Dit is die wet oor die jaloersheid: As 'n vrou afwyk terwyl sy aan haar man toebehoort, en haar verontreinig;

<sup>30</sup> of as oor 'n man die gees van jaloersheid kom en hy op sy vrou jaloers word—dan moet hy die vrou voor die aangesig van die HERE stel, en die priester moet met haar handel volgens hierdie hele wet.

<sup>31</sup> En die man sal vry wees van ongeregtheid, maar dié vrou sal haar ongeregtheid dra.

**6** EN die HERE het met Moses gespreek en gesê:

<sup>2</sup> Spreek met die kinders van Israel en sê vir hulle: As 'n man of 'n vrou 'n besondere gelofte aflê, die gelofte van 'n nasireër, om hom aan die HERE te wy,

<sup>3</sup> moet hy hom van wyn en sterk drank onthou; wynasyn en asyn van sterk drank mag hy nie drink nie, ja, geen druiwesap mag hy drink nie en geen vars of gedroogde druiwe eet nie.

<sup>4</sup> Al die dae van sy nasireërskap mag hy niks eet van alles wat van die wynstok gemaak is nie, selfs nie van die pitte en doppe nie.

<sup>5</sup> Al die dae van die gelofte van sy nasireërskap mag geen skeermes oor sy hoof gaan nie. Totdat die dae om is dat hy hom aan die HERE toewy, moet hy heilig wees—hy moet die hare van sy hoof vry laat groei.

<sup>6</sup> Al die dae dat hy hom aan die HERE gewy het, mag hy nie by 'n dooie kom nie.

<sup>7</sup> Aan sy vader of sy moeder, aan sy broer of sy suster—aan hulle mag hy hom nie verontreinig as hulle dood is nie; want die wyding van sy God is op sy hoof.

<sup>8</sup> Al die dae van sy nasireërskap is hy heilig aan die HERE.

<sup>9</sup> En as heeltemal onverwags iemand by hom sterwe, sodat hy sy gewyde hoof verontreinig, moet hy op die dag van sy reiniging sy hoof skeer; op die sewende dag moet hy dit skeer.

<sup>10</sup> En op die agtste dag moet hy twee tortelduiwe of twee jong duiwe na die priester, na die ingang van die tent van samekoms, bring.

<sup>11</sup> En die priester moet een as sondoffer en een as brandoffer berei en vir hom versoening doen vir wat hy uit oorsaak van die dooie gesondig het; so moet hy dan sy hoof op dieselfde dag heilig.

<sup>12</sup> Daarna moet hy die dae van sy nasireërskap aan die HERE wy en 'n jaaroud lam as skuldoffer bring; en die vorige dae moet wegval, omdat sy nasireërskap verontreinig is.

<sup>13</sup> En dit is die wet vir die nasireër: Op die dag as die dae van sy nasireërskap om is, moet hulle hom na die ingang van die tent van samekoms bring;

<sup>14</sup> en hy moet sy offer aan die HERE bring: een jaaroud lam sonder gebrek as brandoffer en een jaaroud ooilam sonder gebrek as sondoffer en een ram sonder gebrek as dankoffer

<sup>15</sup> en 'n mandjie ongesuurde koeke van

## Númeri 7

fynmeel, koeke met olie gemeng en ongesuurde platkoeke met olie bestryk, en die spysoffer en die drankoffers wat daarby behoort.

<sup>16</sup> En die priester moet dit voor die aangesig van die HERE bring en die sondoffer en brandoffer vir hom berei.

<sup>17</sup> Hy moet ook die lam as dankoffer aan die HERE gereedmaak saam met die mandjie ongesuurde koeke; en die priester moet die spysoffer en drankoffer vir hom berei.

<sup>18</sup> Dan moet die nasireër by die ingang van die tent van samekoms sy gewyde hoof skeer en die hare van sy gewyde hoof neem en dit op die vuur gooi wat onder die dankoffer is.

<sup>19</sup> Verder moet die priester die gekookte blad van die ram afneem en een ongesuurde koek uit die mandjie en een ongesuurde platkoek; en hy moet hulle op die hande van die nasireër sit nadat dié sy gewyde hare afgeskeer het.

<sup>20</sup> En die priester moet dit beweeg as beweegoffer voor die aangesig van die HERE. Dit is iets heiligs vir die priester saam met die bors van die beweegoffer en die boud van die hefoffer. En daarna mag die nasireër wyn drink.

<sup>21</sup> Dit is die wet vir die nasireër wat sy offer aan die HERE beloof op grond van sy nasireërskap, behalwe wat hy verder kan bekostig. Volgens sy gelofte wat hy afgelê het, só moet hy doen volgens die wet van sy nasireërskap.

<sup>22</sup> EN die HERE het met Moses gespreek en gesê:

<sup>23</sup> Spreek met Aäron en sy seuns en sê: So moet julle die kinders van Israel seën deur vir hulle te sê:

<sup>24</sup> Die HERE sal jou seën en jou behoed;

<sup>25</sup> die HERE sal sy aangesig oor jou laat skyn en jou genadig wees;

<sup>26</sup> die HERE sal sy aangesig oor jou verhef en aan jou vrede gee.

<sup>27</sup> So moet hulle dan my Naam op die kinders van Israel lê; en Ék sal hulle seën.

**7** EN op die dag toe Moses die tabernakel klaar opgerig en dit gesalf en geheilig het met al sy gereedskap, en die altaar met al sy gereedskap, en hy dit gesalf en geheilig het,

<sup>2</sup> het die owerstes van Israel, die hoofde van hulle families, offers gebring—hulle was die owerstes van die stamme, hulle wat oor die geteldes gestaan het —

<sup>3</sup> hulle het hul offer voor die aangesig van die HERE gebring: ses tentwaens en twaalf beeste; 'n wa vir twee owerstes en 'n bees vir elkeen; en hulle het dit voor die tabernakel gebring.

<sup>4</sup> En die HERE het met Moses gespreek en gesê:

<sup>5</sup> Neem dit van hulle aan, dat dit kan gebruik word om die dienswerk van die tent van samekoms te verrig; en jy moet dit aan die Leviete gee, aan elkeen volgens sy dienswerk.

<sup>6</sup> Toe het Moses die waens en die beeste geneem en dit aan die Leviete gegee:

<sup>7</sup> twee waens en vier beeste het hy aan die seuns van Gerson gegee volgens hulle dienswerk;

<sup>8</sup> en vier waens en agt beeste het hy aan



## Númeri 7

---

die seuns van Merári gegee volgens hulle dienswerk, onder leiding van Ítamar, die seun van die priester Aäron.

<sup>9</sup> Maar aan die seuns van Kehat het hy niks gegee nie; want die diens van die heiligdom het op hulle gerus: hulle moes dit op die skouers dra.

<sup>10</sup> En die owerstes het die inwydingsgawe van die altaar gebring op die dag toe dit gesalf is, en die owerstes het hulle offer voor die altaar gebring.

<sup>11</sup> En die HERE het aan Moses gesê: Elke owerste moet, elkeen op 'n afsonderlike dag, sy offer bring vir die inwyding van die altaar.

<sup>12</sup> En hy wat op die eerste dag sy offer gebring het, was Nagson, die seun van Ammínadab, van die stam van Juda.

<sup>13</sup> En sy offer was: een silwerskottel, honderd-en-dertig sikkels in gewig; een silwerkom van sewentig sikkels volgens die sikkels van die heiligdom; altwee vol fynmeel met olie gemeng as spysoffer;

<sup>14</sup> een rookpan van tien sikkels goud, vol reukwerk;

<sup>15</sup> een jong bul, een ram, een jaaroud lam as brandoffer;

<sup>16</sup> een bokram as sondoffer;

<sup>17</sup> en as dankoffer: twee beeste, vyf ramme, vyf bokramme, vyf jaaroud lammers. Dit was die offer van Nagson, die seun van Ammínadab.

<sup>18</sup> Op die tweede dag het Netáneël, die seun van Suar, die owerste van Íssaskar, aangebring —

<sup>19</sup> hy het sy offer gebring: een silwerskottel, honderd-en-dertig sikkels in

gewig; een silwerkom van sewentig sikkels volgens die sikkels van die heiligdom;

altwee vol fynmeel met olie gemeng as spysoffer;

<sup>20</sup> een rookpan van tien sikkels goud, vol reukwerk;

<sup>21</sup> een jong bul, een ram, een jaaroud lam as brandoffer;

<sup>22</sup> een bokram as sondoffer;

<sup>23</sup> en as dankoffer: twee beeste, vyf ramme, vyf bokramme, vyf jaaroud lammers. Dit was die offer van Netáneël, die seun van Suar.

<sup>24</sup> Op die derde dag die owerste van die kinders van Sébulon, Elíab, die seun van Helon.

<sup>25</sup> Sy offer was: een silwerskottel, honderd-en-dertig sikkels in gewig; een silwerkom van sewentig sikkels volgens die sikkels van die heiligdom; altwee vol fynmeel met olie gemeng as spysoffer;

<sup>26</sup> een rookpan van tien sikkels goud, vol reukwerk;

<sup>27</sup> een jong bul, een ram, een jaaroud lam as brandoffer;

<sup>28</sup> een bokram as sondoffer;

<sup>29</sup> en as dankoffer: twee beeste, vyf ramme, vyf bokramme, vyf jaaroud lammers. Dit was die offer van Elíab, die seun van Helon.

<sup>30</sup> Op die vierde dag die owerste van die kinders van Ruben, Elísur, die seun van Sedéür.

<sup>31</sup> Sy offer was: een silwerskottel, honderd-en-dertig sikkels in gewig; een silwerkom van sewentig sikkels volgens die sikkels van die heiligdom; altwee vol

## Númeri 7

---

fynmeel met olie gemeng as spysoffer;

<sup>32</sup> een rookpan van tien sikkels goud, vol reukwerk;

<sup>33</sup> een jong bul, een ram, een jaaroud lam as brandoffer;

<sup>34</sup> een bokram as sondoffer;

<sup>35</sup> en as dankoffer: twee beeste, vyf ramme, vyf bokramme, vyf jaaroud lammers. Dit was die offer van Elísur, die seun van Sedéür.

<sup>36</sup> Op die vyfde dag die owerste van die kinders van Símeon, Selúmiël, die seun van Surísaddai.

<sup>37</sup> Sy offer was: een silwerskottel, honderd-en-dertig sikkels in gewig; een silwerkom van sewentig sikkels volgens die sikkels van die heiligdom; altwee vol fynmeel met olie gemeng as spysoffer;

<sup>38</sup> een rookpan van tien sikkels goud, vol reukwerk;

<sup>39</sup> een jong bul, een ram, een jaaroud lam as brandoffer;

<sup>40</sup> een bokram as sondoffer;

<sup>41</sup> en as dankoffer: twee beeste, vyf ramme, vyf bokramme, vyf jaaroud lammers. Dit was die offer van Selúmiël, die seun van Surísaddai.

<sup>42</sup> Op die sesde dag die owerste van die kinders van Gad, Éljásaf, die seun van Réhuel.

<sup>43</sup> Sy offer was: een silwerskottel, honderd-en-dertig sikkels in gewig; een silwerkom van sewentig sikkels volgens die sikkels van die heiligdom; altwee vol fynmeel met olie gemeng as spysoffer;

<sup>44</sup> een rookpan van tien sikkels goud, vol reukwerk;

<sup>45</sup> een jong bul, een ram, een jaaroud lam as brandoffer;

<sup>46</sup> een bokram as sondoffer;

<sup>47</sup> en as dankoffer: twee beeste, vyf ramme, vyf bokramme, vyf jaaroud lammers. Dit was die offer van Éljásaf, die seun van Réhuel.

<sup>48</sup> Op die sewende dag die owerste van die kinders van Efraim, Elisáma, die seun van Ammíhud.

<sup>49</sup> Sy offer was: een silwerskottel, honderd-en-dertig sikkels in gewig; een silwerkom van sewentig sikkels volgens die sikkels van die heiligdom; altwee vol fynmeel met olie gemeng as spysoffer;

<sup>50</sup> een rookpan van tien sikkels goud, vol reukwerk;

<sup>51</sup> een jong bul, een ram, een jaaroud lam as brandoffer;

<sup>52</sup> een bokram as sondoffer;

<sup>53</sup> en as dankoffer: twee beeste, vyf ramme, vyf bokramme, vyf jaaroud lammers. Dit was die offer van Elisáma, die seun van Ammíhud.

<sup>54</sup> Op die agtste dag die owerste van die kinders van Manasse, Gámliël, die seun van Pedásur.

<sup>55</sup> Sy offer was: een silwerskottel, honderd-en-dertig sikkels in gewig; een silwerkom van sewentig sikkels volgens die sikkels van die heiligdom; altwee vol fynmeel met olie gemeng as spysoffer;

<sup>56</sup> een rookpan van tien sikkels goud, vol reukwerk;

<sup>57</sup> een jong bul, een ram, een jaaroud lam as brandoffer;

<sup>58</sup> een bokram as sondoffer;

## Númeri 7

---

<sup>59</sup> en as dankoffer: twee beeste, vyf ramme, vyf bokramme, vyf jaaroud lammers. Dit was die offer van Gámliël, die seun van Pedásur.

<sup>60</sup> Op die negende dag die owerste van die kinders van Benjamin, Abídan, die seun van Gideóni.

<sup>61</sup> Sy offer was: een silwerskottel, honderd-en-dertig sikkels in gewig; een silwerkom van sewentig sikkels volgens die sikkels van die heiligdom; altwee vol fynmeel met olie gemeng as spysoffer;

<sup>62</sup> een rookpan van tien sikkels goud, vol reukwerk;

<sup>63</sup> een jong bul, een ram, een jaaroud lam as brandoffer;

<sup>64</sup> een bokram as sondoffer;

<sup>65</sup> en as dankoffer: twee beeste, vyf ramme, vyf bokramme, vyf jaaroud lammers. Dit was die offer van Abídan, die seun van Gideóni.

<sup>66</sup> Op die tiende dag die owerste van die kinders van Dan, Ahiëser, die seun van Ammísaddai.

<sup>67</sup> Sy offer was: een silwerskottel, honderd-en-dertig sikkels in gewig; een silwerkom van sewentig sikkels volgens die sikkels van die heiligdom; altwee vol fynmeel met olie gemeng as spysoffer;

<sup>68</sup> een rookpan van tien sikkels goud, vol reukwerk;

<sup>69</sup> een jong bul, een ram, een jaaroud lam as brandoffer;

<sup>70</sup> een bokram as sondoffer;

<sup>71</sup> en as dankoffer: twee beeste, vyf ramme, vyf bokramme, vyf jaaroud lammers. Dit was die offer van Ahiëser, die seun van

Ammísaddai.

<sup>72</sup> Op die elfde dag die owerste van die kinders van Aser, Págiël, die seun van Ogran.

<sup>73</sup> Sy offer was: een silwerskottel, honderd-en-dertig sikkels in gewig; een silwerkom van sewentig sikkels volgens die sikkels van die heiligdom; altwee vol fynmeel met olie gemeng as spysoffer;

<sup>74</sup> een rookpan van tien sikkels goud, vol reukwerk;

<sup>75</sup> een jong bul, een ram, een jaaroud lam as brandoffer;

<sup>76</sup> een bokram as sondoffer;

<sup>77</sup> en as dankoffer: twee beeste, vyf ramme, vyf bokramme, vyf jaaroud lammers. Dit was die offer van Págiël, die seun van Ogran.

<sup>78</sup> Op die twaalfde dag die owerste van die kinders van Náftali, Ahíra, die seun van Enan.

<sup>79</sup> Sy offer was: een silwerskottel, honderd-en-dertig sikkels in gewig; een silwerkom van sewentig sikkels volgens die sikkels van die heiligdom; altwee vol fynmeel met olie gemeng as spysoffer;

<sup>80</sup> een rookpan van tien sikkels goud, vol reukwerk;

<sup>81</sup> een jong bul, een ram, een jaaroud lam as brandoffer;

<sup>82</sup> een bokram as sondoffer;

<sup>83</sup> en as dankoffer: twee beeste, vyf ramme, vyf bokramme, vyf jaaroud lammers. Dit was die offer van Ahíra, die seun van Enan.

<sup>84</sup> Dit was die inwydingsgawe van die altaar van die kant van Israel se owerstes op die dag toe dit gesalf is: twaalf

## Númeri 8

silwerskottels, twaalf silwerkomme, twaalf goue rookpanne —

<sup>85</sup> elke skottel honderd-en-dertig sikkels silwer, en elke kom sewentig; al die silwer van die goed was

twee-duisend-vierhonderd volgens die sikkels van die heiligdom —

<sup>86</sup> twaalf goue rookpanne, vol reukwerk; elke rookpan tien sikkels volgens die sikkels van die heiligdom; al die goud van die rookpanne was honderd-en-twintig sikkels.

<sup>87</sup> Al die beeste vir die brandoffer was twaalf bulle; die ramme twaalf, die jaaroud lammers twaalf, met hulle spysoffer; en twaalf bokramme as sondoffer.

<sup>88</sup> En al die beeste vir die dankoffer was vier-en-twintig bulle; die ramme sestig, die bokramme sestig, die jaaroud lammers sestig. Dit is die inwydingsgawe van die altaar nadat dit gesalf is.

<sup>89</sup> En as Moses in die tent van samekoms gegaan het om met Hom te spreek, het hy die stem met hom hoor spreek van die versoendeksel af wat op die ark van die Getuienis is, tussen die twee gérubs uit. So het Hy dan met hom gespreek.

**8** EN die HERE het met Moses gespreek en gesê:

<sup>2</sup> Spreek met Aäron en sê vir hom: As jy die lampe opsteek, moet die sewe lampe aan die voorkant van die kandelaar lig gee.

<sup>3</sup> En Aäron het so gedoen: aan die voorkant van die kandelaar het hy dié lampe opgesteek soos die HERE Moses beveel het.

<sup>4</sup> En dit was die maaksel van die kandelaar: dryfwerk uit goud; selfs sy

voetstuk en sy blomme was dryfwerk; volgens die beeltenis wat die HERE aan Moses getoon het, so het hy die kandelaar gemaak.

<sup>5</sup> EN die HERE het met Moses gespreek en gesê:

<sup>6</sup> Neem die Leviete onder die kinders van Israel uit en reinig hulle.

<sup>7</sup> En so moet jy met hulle doen om hulle te reinig: Sprinkel op hulle water van ontsondiging; en hulle moet 'n skeermes oor hulle hele liggaam laat gaan en hulle klere was en hulleself reinig.

<sup>8</sup> Daarna moet hulle 'n jong bul neem en die spysoffer wat daarby behoort: fynmeel met olie gemeng; en 'n ander jong bul moet jy as sondoffer neem.

<sup>9</sup> En jy moet die Leviete voor die tent van samekoms laat nader kom en die hele vergadering van die kinders van Israel versamel.

<sup>10</sup> Dan moet jy die Leviete voor die aangesig van die HERE laat nader kom, en die kinders van Israel moet hulle hande op die Leviete lê.

<sup>11</sup> En Aäron moet die Leviete as beweegoffer beweeg voor die aangesig van die HERE namens die kinders van Israel, sodat hulle daar kan wees om die dienswerk van die HERE te verrig.

<sup>12</sup> En die Leviete moet hulle hande op die kop van die bulle lê; en berei jy een as sondoffer en een as brandoffer vir die HERE, om vir die Leviete versoening te doen.

<sup>13</sup> Dan moet jy die Leviete stel voor Aäron en sy seuns en hulle as beweegoffer aan die

## Númeri 9

HERE beweeg.

<sup>14</sup> En jy moet die Leviete onder die kinders van Israel uit afsonder, dat die Leviete myne kan wees.

<sup>15</sup> En daarna moet die Leviete inkom om die tent van samekoms te bedien. So moet jy hulle dan reinig en hulle as beweegoffer beweeg.

<sup>16</sup> Want hulle is heeltemal aan My gegee onder die kinders van Israel uit, in die plek van alles wat die moederskoot open—al die eersgeborenes uit die kinders van Israel—het Ek hulle vir My geneem.

<sup>17</sup> Want al die eersgeborenes onder die kinders van Israel is myne, van mense en van diere; op die dag toe Ek al die eersgeborenes in Egipteland getref het, het Ek hulle vir My geheilig.

<sup>18</sup> En Ek het die Leviete in die plek van al die eersgeborenes onder die kinders van Israel geneem

<sup>19</sup> en die Leviete gegee—hulle is gegee aan Aäron en sy seuns onder die kinders van Israel uit om die dienswerk van die kinders van Israel in die tent van samekoms te verrig en om vir die kinders van Israel versoening te doen, sodat daar geen plaag mag wees onder die kinders van Israel as die kinders van Israel na die heiligdom aankom nie.

<sup>20</sup> En Moses en Aäron en die hele vergadering van die kinders van Israel het met die Leviete gedoen net soos die HERE Moses aangaande die Leviete beveel het; so het die kinders van Israel met hulle gedoen.

<sup>21</sup> En die Leviete het hulleself ontsondig en

hulle klere gewas, en Aäron het hulle beweeg as beweegoffer voor die aangesig van die HERE; en Aäron het versoening vir hulle gedoen om hulle te reinig.

<sup>22</sup> En daarna het die Leviete gekom om hulle dienswerk in die tent van samekoms voor Aäron en sy seuns te verrig; soos die HERE Moses aangaande die Leviete beveel het, so het hulle met hulle gedoen.

<sup>23</sup> En die HERE het met Moses gespreek en gesê:

<sup>24</sup> Dit is die saak wat die Leviete betref: Van vyf-en-twintig jaar oud en daarbo moet hy kom om sy plig te vervul by die dienswerk van die tent van samekoms.

<sup>25</sup> Maar van vyftig jaar oud moet hy vry wees van diensplig en nie meer dien nie —

<sup>26</sup> hy kan sy broers in die tent van samekoms behulpsaam wees om die diens waar te neem, maar dienswerk moet hy nie verrig nie. So moet jy met die Leviete doen insake hulle ampspligte.

**9** EN die HERE het met Moses gespreek in die woestyn Sinai—in die tweede jaar nadat hulle uit Egipteland uitgetrek het, in die eerste maand—en gesê

<sup>2</sup> dat die kinders van Israel die pasga op die bepaalde tyd moet hou.

<sup>3</sup> Op die veertiende dag in hierdie maand, teen die aand, moet julle dit op die bepaalde tyd hou; volgens al sy insettinge en al sy verordeninge moet julle dit hou.

<sup>4</sup> Toe het Moses met die kinders van Israel gespreek dat hulle die pasga moet hou.

<sup>5</sup> En hulle het die pasga gehou op die veertiende dag van die eerste maand, teen die aand, in die woestyn Sinai; net soos die

## Númeri 9

---

HERE Moses beveel het, so het die kinders van Israel gedoen.

<sup>6</sup> En daar was manne wat deur die lyk van 'n mens onrein geword het en op dieselfde dag die pasga nie kon hou nie. Daarom het hulle nader gekom voor Moses en Aäron op dieselfde dag,

<sup>7</sup> en dié manne het vir hom gesê: Ons is onrein deur die lyk van 'n mens; waarom moet ons te kort gedoen word, dat ons die offer van die HERE nie op die bepaalde tyd onder die kinders van Israel sou bring nie?

<sup>8</sup> En Moses het vir hulle gesê: Bly staan, dat ek kan hoor wat die HERE julle sal beveel.

<sup>9</sup> Toe het die HERE met Moses gespreek en gesê:

<sup>10</sup> Spreek met die kinders van Israel en sê: As iemand van julle of van julle geslagte deur 'n lyk onrein word of op 'n ver reis is, moet hy tog die pasga vir die HERE hou.

<sup>11</sup> In die tweede maand, op die veertiende dag, teen die aand, moet hulle dit hou; met ongesuurde brode en bitter kruie moet hulle dit eet.

<sup>12</sup> Hulle moet daarvan niks laat oorbly tot die môre toe of 'n been daaraan breek nie; volgens die hele insetting van die pasga moet hulle dit hou.

<sup>13</sup> Maar die man wat rein is en nie op reis is nie en nalaat om die pasga te hou, dié siel moet uit sy volksgenote uitgeroei word; want hy het die offer van die HERE nie op die bepaalde tyd gebring nie. Dié man moet sy sonde dra.

<sup>14</sup> En as 'n vreemdeling by julle vertoef en die pasga vir die HERE hou, moet hy dit

hou volgens die insetting van die pasga en volgens die verordening daarvan. Dit moet een insetting vir julle wees, vir die vreemdeling sowel as die kind van die land.

<sup>15</sup> EN op die dag toe hulle die tabernakel opgerig het, het die wolk die tabernakel van die tent van die Getuienis oordek, en in die aand was dit oor die tabernakel soos 'n gedaante van vuur, tot die môre toe.

<sup>16</sup> So was dit altyddeur: die wolk het dit oordek, en snags 'n gedaante van vuur.

<sup>17</sup> En so dikwels as die wolk van die tent af optrek, het die kinders van Israel daarna weggetrek; en op die plek waar die wolk rus, daar het die kinders van Israel laer opgeslaan —

<sup>18</sup> volgens die bevel van die HERE het die kinders van Israel weggetrek en volgens die bevel van die HERE laer opgeslaan; al die dae wat die wolk oor die tabernakel gerus het, het hulle in die laer gestaan.

<sup>19</sup> En as die wolk baie dae oor die tabernakel bly, het die kinders van Israel die diens van die HERE waargeneem en nie weggetrek nie.

<sup>20</sup> Maar somtyds was die wolk net 'n paar dae oor die tabernakel—volgens die bevel van die HERE het hulle laer opgeslaan, en volgens die bevel van die HERE het hulle weggetrek.

<sup>21</sup> En somtyds was die wolk daar van die aand tot die môre—as die wolk in die môre optrek, het hulle weggetrek; of by dag of by nag—as die wolk optrek, het hulle weggetrek;

<sup>22</sup> of ná twee dae of 'n maand of langer—as

## Númeri 10

---

die wolk lank oor die tabernakel bly, het die kinders van Israel in die laer gestaan en nie weggetrek nie; en as dit optrek, het hulle weggetrek.

<sup>23</sup> Volgens die bevel van die HERE het hulle laer opgeslaan, en volgens die bevel van die HERE het hulle weggetrek. Hulle het die voorskrif van die HERE in ag geneem volgens die bevel van die HERE deur die diens van Moses.

**10** VERDER het die HERE met Moses gespreek en gesê:

<sup>2</sup> Maak vir jou twee silwertrompette; van dryfwerk moet jy dit maak; en hulle moet vir jou dien om die vergadering byeen te roep en om die laers te laat opbreek.

<sup>3</sup> As hulle dan daarop blaas, moet die hele vergadering by jou byeenkom by die ingang van die tent van samekoms.

<sup>4</sup> Maar as hulle op een daarvan blaas, moet by jou byeenkom die owerstes, die stamhoofde van Israel.

<sup>5</sup> En as julle alarm blaas, moet die laers opbreek wat aan die oostekant staan.

<sup>6</sup> Maar as julle die tweede keer alarm blaas, moet die laers opbreek wat aan die suidekant staan. Alarm moet hulle blaas as hulle moet opbreek.

<sup>7</sup> Maar as die vergadering byeen moet kom, moet julle blaas, maar nie alarm maak nie.

<sup>8</sup> En die seuns van Aäron, die priesters, moet op die trompette blaas; en dié trompette moet vir julle 'n ewige insetting in julle geslagte wees.

<sup>9</sup> En as julle in jul land in oorlog kom teen die vyand wat met julle veg, moet julle met

die trompette alarm blaas; dan sal aan julle gedink word voor die aangesig van die HERE julle God, en julle sal van jul vyande verlos word.

<sup>10</sup> Op die dag as julle vrolik is, sowel as op julle feestye en by die begin van julle maande moet julle by jul brandoffers en by jul dankoffers op die trompette blaas: hulle sal dien om julle in gedagtenis te bring voor die aangesig van julle God. Ek is die HERE julle God.

<sup>11</sup> IN die tweede jaar, in die tweede maand, op die twintigste van die maand, het die wolk opgetrek van die tabernakel van die Getuienis af.

<sup>12</sup> En die kinders van Israel het van plek tot plek weggetrek uit die woestyn Sinai, en die wolk het gaan rus in die woestyn Paran.

<sup>13</sup> So het hulle dan die eerste keer weggetrek volgens die bevel van die HERE deur die diens van Moses.

<sup>14</sup> En eerste het weggetrek die vaandel van die laer van Juda se kinders volgens hulle leërafdelings; en oor sy afdeling was Nagson, die seun van Ammínadab.

<sup>15</sup> En oor die afdeling van die stam van Íssaskar se kinders was Netáneël, die seun van Suar.

<sup>16</sup> En oor die afdeling van die stam van Sébulon se kinders was Elíab, die seun van Helon.

<sup>17</sup> Toe is die tabernakel afgebreek; en die seuns van Gerson en die seuns van Merári, die draers van die tabernakel, het weggetrek.

<sup>18</sup> Daarna het weggetrek die vaandel van

## Númeri 11

---

die laer van Ruben volgens hulle leërafdelings; en oor sy afdeling was Elísur, die seun van Sedéür.

<sup>19</sup> En oor die afdeling van die stam van Símeon se kinders was Selúmiël, die seun van Surísaddai.

<sup>20</sup> En oor die afdeling van die stam van Gad se kinders was Éljásaf, die seun van Réhuel.

<sup>21</sup> Daarna het die Kehatiete, die draers van die heiligdom, weggetrek. En die ander het die tabernakel opgerig voordat hulle aangekom het.

<sup>22</sup> Daarna het weggetrek die vaandel van die laer van Efraim se kinders volgens hulle leërafdelings; en oor sy afdeling was Elisáma, die seun van Ammíhud.

<sup>23</sup> En oor die afdeling van die stam van Manasse se kinders was Gámliël, die seun van Pedásur.

<sup>24</sup> En oor die afdeling van die stam van Benjamin se kinders was Abídan, die seun van Gideóni.

<sup>25</sup> Toe het weggetrek die vaandel van die laer van Dan se kinders wat, volgens hulle leërafdelings, die agterhoede vir al die leërs was; en oor sy afdeling was Ahiëser, die seun van Ammísaddai.

<sup>26</sup> En oor die afdeling van die stam van Aser se kinders was Págiël, die seun van Ogran.

<sup>27</sup> En oor die afdeling van die stam van Náftali se kinders was Ahíra, die seun van Enan.

<sup>28</sup> Dit is die optogte van die kinders van Israel volgens hulle leërafdelings. En hulle het weggetrek.

<sup>29</sup> En Moses het vir Hobab, die seun van Réhuel, die Midianiet, die swaer van Moses, gesê: Ons trek na die plek waarvan die HERE gesê het: Ek sal dit aan julle gee. Trek saam met ons en ons sal aan jou goed doen; want die HERE het oor Israel goeie dinge gespreek.

<sup>30</sup> Maar hy het vir hom gesê: Ek sal nie saamtrek nie; maar ek sal na my land en my familie gaan.

<sup>31</sup> Toe sê hy: Moet ons tog nie verlaat nie, juis daarom dat jy weet hoe ons laer moet opslaan in die woestyn, en jy sal vir ons as oë dien.

<sup>32</sup> En as jy met ons saamtrek, sal ons daardie goeie wat die HERE aan ons sal doen, ook aan jou doen.

<sup>33</sup> En hulle het van die berg van die HERE af drie dagreise ver getrek; en die verbondsark van die HERE het drie dagreise ver voor hulle uit getrek om vir hulle 'n rusplek uit te soek.

<sup>34</sup> En die wolk van die HERE was bedags oor hulle as hulle uit die laer wegtek.

<sup>35</sup> En as die ark wegtek, het Moses gesê: Staan op, HERE, dat u vyande verstrooi kan word en u haters voor u aangesig kan vlug.

<sup>36</sup> En as dit rus, het hy gesê: Keer terug, HERE, na die tienduisende van die duisende van Israel!

**11** EN die volk het hulle voor die ore van die HERE beklaag dat dit sleg gaan. En toe die HERE dit hoor, het sy toorn ontvlam, en die vuur van die HERE het onder hulle gebrand en het gewoed aan die kant van die laer.



## Númeri 11

---

<sup>2</sup> Toe het die volk na Moses geroep, en Moses het tot die HERE gebid; en die vuur het doodgegaan.

<sup>3</sup> Daarom het hulle die plek Tabéra genoem, omdat die vuur van die HERE onder hulle gebrand het.

<sup>4</sup> EN die gemengde bevolking wat onder hulle was, is met lus bevang. Toe het die kinders van Israel ook weer geweene en gesê: Wie sal vir ons vleis gee om te eet?

<sup>5</sup> Ons dink aan die visse wat ons in Egipte verniet kon eet, aan die komkommers en die waterlemoene en die prei en die uie en die knoffel.

<sup>6</sup> Maar nou is ons siel dor; daar's glad niks nie: net die manna is voor ons oë.

<sup>7</sup> Die manna was soos koljandersaad, en dit het gelyk na balsemgom.

<sup>8</sup> Die volk het rondgeloop en dit versamel en in handmeule gemaal of in vysels gestamp, en hulle het dit in potte gekook en daarvan roosterkoeke gemaak. En die smaak daarvan was soos die smaak van oliekoek.

<sup>9</sup> En as die dou snags op die laer val, het die manna ook daarop geval.

<sup>10</sup> Toe het Moses die volk, volgens hulle geslagte, elkeen by die deur van sy tent hoor weene; en die toorn van die HERE het grootliks ontvlam; ook was dit verkeerd in die oë van Moses.

<sup>11</sup> En Moses sê aan die HERE: Waarom het U u kneg kwaad aangedoen, en waarom het ek geen genade in u oë gevind nie, dat U die las van hierdie hele volk op my lê?

<sup>12</sup> Het ék hierdie hele volk dan ontvang? Of het ék hulle gebaar, dat U vir my sê: Dra

hulle aan jou bors soos 'n oppasser die suigling dra, na die land wat U aan hulle vaders met 'n eed beloof het?

<sup>13</sup> Waarvandaan moet ek vleis kry om aan al hierdie volk te gee? Want hulle weene by my en sê: Gee vir ons vleis, dat ons kan eet.

<sup>14</sup> Ek alleen kan hierdie hele volk nie dra nie, want dit is vir my te swaar.

<sup>15</sup> En as U so met my wil handel, slaan my dan maar liewer dood as ek genade in u oë gevind het, en laat ek my ongeluk nie aansien nie.

<sup>16</sup> Toe sê die HERE aan Moses: Bring vir My sewentig manne uit die oudstes van Israel bymekaar, van wie jy weet dat hulle oudstes van die volk en sy opsigters is, en bring hulle by die tent van samekoms, dat hulle daar by jou kan staan.

<sup>17</sup> Dan sal Ek neerdaal en daar met jou spreek; en van die Gees wat op jou is, sal Ek afsonder en op hulle lê; en hulle sal jou help om die las van die volk te dra, sodat jy dit nie alleen hoef te dra nie.

<sup>18</sup> En aan die volk moet jy sê: Heilig julle teen môre; dan sal julle vleis eet. Want julle het voor die ore van die HERE geweene en gesê: Wie sal vir ons vleis gee om te eet? want dit was vir ons goed in Egipte. Daarom sal die HERE vir julle vleis gee, en julle sal eet.

<sup>19</sup> Julle sal nie een dag of twee dae eet nie, of vyf dae of tien dae of twintig dae nie —

<sup>20</sup> 'n hele maand lank, totdat dit uit julle neus uitkom en julle daarvan walg; omdat julle die HERE wat in julle midde is, verwerp en voor sy aangesig gehuil en gesê het: Waarom het ons tog uit Egipte

## Númeri 12

uitgetrek?

<sup>21</sup> Toe sê Moses: Seshonderdduisend te voet is die volk onder wie ek verkeer; en U het gesê: Ek sal aan hulle vleis gee, en hulle sal 'n hele maand lank eet!

<sup>22</sup> Sal daar vir hulle kleinvee en beeste geslag word, sodat daar vir hulle genoeg sal wees? Of sal al die visse van die see vir hulle versamel word, sodat daar vir hulle genoeg is?

<sup>23</sup> Maar die HERE sê vir Moses: Sou die hand van die HERE te kort wees? Nou sal jy sien of my woord vir jou uitkom of nie.

<sup>24</sup> Toe het Moses uitgegaan en die woorde van die HERE aan die volk te kenne gegee; en hy het sewentig manne uit die oudstes van die volk bymekaar laat kom en hulle rondom die tent laat staan.

<sup>25</sup> Daarop het die HERE neergedaal in die wolk en met hom gespreek; en Hy het van die Gees wat op hom was, afgesonder en op die sewentig oudstes gelê. En terwyl die Gees op hulle rus, het hulle geprofeteer; maar daarna nie meer nie.

<sup>26</sup> Maar twee manne het in die laer agtergebly: die naam van die een was Eldad en die naam van die ander Medad; en die Gees het op hulle gerus—hulle het behoort by die wat opgeskrywe was, hoewel hulle nie na die tent uitgegaan het nie—en hulle het in die laer geprofeteer.

<sup>27</sup> Toe hardloop 'n seun en vertel dit aan Moses en sê: Eldad en Medad profeteer in die laer.

<sup>28</sup> En Josua, die seun van Nun, die dienaar van Moses van sy jeug af, antwoord en sê: My heer Moses, belet hulle dit!

<sup>29</sup> Maar Moses sê vir hom: Ywer jy vir my? Ag, as die hele volk van die HERE maar profete was, dat die HERE sy Gees oor hulle mag gee!

<sup>30</sup> Daarop het Moses hom in die laer teruggetrek, hy en die oudstes van Israel.

<sup>31</sup> Toe het 'n wind wat van die HERE kom, uitgevaar en kwartels van die see af oorgedrywe en op die laer gestrooi omtrent 'n dagreis hier en omtrent 'n dagreis daar, rondom die laer; en hulle was omtrent twee el bokant die grond.

<sup>32</sup> Toe het die volk opgestaan daardie hele dag en die hele nag en die hele volgende dag en die kwartels versamel. Hy wat die minste gehad het, het tien homer versamel. En hulle het dit oral vir hulle uitgesprei rondom die laer.

<sup>33</sup> Die vleis was nog tussen hulle tande, voordat dit gekou was, toe die toorn van die HERE alreeds teen die volk ontvlam het, en die HERE het onder die volk 'n baie groot slagting teweeggebring.

<sup>34</sup> Daarom het hulle dié plek genoem Kibrot-Hattááwa; want daar het hulle die volk begrawe wat so begerig was.

<sup>35</sup> Van Kibrot-Hattááwa af het die volk weggetrek na Háserot toe, en hulle het in Háserot gebly.

**12** EN Mirjam en Aäron het teen Moses gespreek vanweë die Kusitiese vrou wat hy geneem het; want hy het 'n Kusitiese vrou geneem.

<sup>2</sup> En hulle het gesê: Het die HERE dan maar alleen met Moses gespreek? Het Hy nie ook met ons gespreek nie? En die HERE het dit gehoor.

## Númeri 13

---

<sup>3</sup> Maar die man Moses was baie sagmoedig, meer as al die mense op die aardbodem.

<sup>4</sup> Toe het die HERE dadelik met Moses en Aäron en Mirjam gespreek: Julle drie, kom uit na die tent van samekoms! En hulle drie het uitgekom.

<sup>5</sup> En die HERE het in 'n wolkkolom neergedaal en by die ingang van die tent gaan staan. Daarna het Hy Aäron en Mirjam geroep, en hulle twee het uitgekom.

<sup>6</sup> Toe sê Hy: Hoor tog my woorde. As julle profeet van die HERE is, sal Ek deur 'n gesig My aan hom bekend maak, deur 'n droom sal Ek met hom spreek.

<sup>7</sup> So is dit nie met my kneg Moses nie: in my hele huis is hy getrou.

<sup>8</sup> Mond tot mond spreek Ek met hom, en deur aanskouing en nie deur duister woorde nie; en hy sien die verskyning van die HERE. Waarom het julle dan nie gevrees om teen my kneg, teen Moses, te spreek nie?

<sup>9</sup> En die toorn van die HERE het teen hulle ontvlam, en Hy het weggegaan.

<sup>10</sup> En toe die wolk van die tent af weggetrek het, kyk, toe was Mirjam melaats, soos sneeu. En Aäron het Mirjam aangekyk en—sy was melaats!

<sup>11</sup> Daarop sê Aäron vir Moses: Ag, my heer, lê tog nie op ons die sonde wat ons in ons dwaasheid begaan het nie.

<sup>12</sup> Laat sy tog nie wees soos 'n dooie van wie se vleis, as hy uit sy moeder se skoot uitgaan, die helfte verteer is nie.

<sup>13</sup> En Moses het die HERE aangeroep en

gesê: o God, maak haar tog gesond!

<sup>14</sup> Toe sê die HERE vir Moses: As haar vader net maar in haar gesig gespuug het, sou sy nie sewe dae lank beskaamd wees nie? Laat sy sewe dae lank buitekant die laer opgesluit wees, en daarna mag sy opgeneem word.

<sup>15</sup> En hulle het Mirjam sewe dae lank buitekant die laer opgesluit; en die volk het nie weggetrek voordat Mirjam opgeneem was nie.

<sup>16</sup> Maar daarna het die volk van Háserot af weggetrek en in die woestyn Paran laer opgeslaan.

**13** EN die HERE het met Moses gespreek en gesê:

<sup>2</sup> Stuur vir jou manne uit, dat hulle die land Kanaän wat Ek aan die kinders van Israel sal gee, kan verken. Van elke vaderlike stam moet julle een man stuur, elkeen 'n owerste onder hulle.

<sup>3</sup> En Moses het hulle uitgestuur uit die woestyn Paran, volgens die bevel van die HERE—hulle almal manne wat hoofde was van die kinders van Israel.

<sup>4</sup> En dit is hulle name: Van die stam van Ruben: Sámmua, die seun van Sakkur.

<sup>5</sup> Van die stam van Símeon: Safat, die seun van Hori.

<sup>6</sup> Van die stam van Juda: Kaleb, die seun van Jefúnne.

<sup>7</sup> Van die stam van Íssaskar: Jígeal, die seun van Josef.

<sup>8</sup> Van die stam van Efraim: Hoséa, die seun van Nun.

<sup>9</sup> Van die stam van Benjamin: Palti, die seun van Rafu.

## Númeri 13

---

<sup>10</sup> Van die stam van Sébulon: Gáddiël, die seun van Sodi.

<sup>11</sup> Van die stam van Josef, vir die stam van Manasse: Gaddi, die seun van Susi.

<sup>12</sup> Van die stam van Dan: Ammiël, die seun van Gemálli.

<sup>13</sup> Van die stam van Aser: Setur, die seun van Mígaël.

<sup>14</sup> Van die stam van Náftali: Nagbi, die seun van Wofsi.

<sup>15</sup> Van die stam van Gad: Géhuel, die seun van Magi.

<sup>16</sup> Dit is die name van die manne wat Moses gestuur het om die land te verken; en Moses het Hoséa, die seun van Nun, Josua genoem.

<sup>17</sup> En Moses het hulle gestuur om die land Kanaän te verken en vir hulle gesê: Trek hier in die Suidland op en beklim die gebergte.

<sup>18</sup> En bekyk die land, hoe dit is, en die volk wat daarin woon, of dit sterk of swak, of dit min of baie is;

<sup>19</sup> en hoe die land is waar hulle in woon, of dit goed of sleg is; en hoe die stede is waar hulle in woon, laers of vestings;

<sup>20</sup> ook hoe die land is, of dit vet of skraal is, of daar bome in is of nie; en wees dapper en bring van die vrugte van die land saam. Dit was toe die tyd van die eerste druiwe.

<sup>21</sup> En hulle het opgetrek en die land verken van die woestyn Sin af tot by Rehob, na die ingang van Hammat —

<sup>22</sup> hulle het in die Suidland opgetrek en tot by Hebron gekom; en daar was Ahíman, Sesai en Talmai, die kinders van die Enakiete. En Hebron is sewe jaar voor Soan

in Egipte gebou.

<sup>23</sup> Daarop het hulle tot by die dal Eskol gekom en daar 'n rank met een tros druiwe afgesny, en twee het dit aan 'n draagstok gedra; ook van die granate en van die vye.

<sup>24</sup> Dié plek het hulle die dal Eskol genoem vanweë die tros wat die kinders van Israel daar afgesny het.

<sup>25</sup> En ná verloop van veertig dae het hulle teruggekom van die land te verken.

<sup>26</sup> En hulle het weggegaan en by Moses en Aäron en die hele vergadering van die kinders van Israel gekom in die woestyn Paran, in Kades, en aan hulle berig gebring, en aan die hele vergadering en hulle die vrugte van die land laat sien.

<sup>27</sup> En hulle het hom vertel en gesê: Ons het gekom in die land waarheen u ons gestuur het; en waarlik, dit loop oor van melk en heuning, en dít is sy vrugte.

<sup>28</sup> Maar die volk wat in die land woon, is sterk, en die stede is versterk en baie groot; en ons het daar ook die kinders van die Enakiete gesien.

<sup>29</sup> Die Amalekiete woon in die Suidland, maar die Hetiete en Jebusiete en Amoriete woon in die gebergte, en die Kanaäniete woon by die see en aan die kant van die Jordaan.

<sup>30</sup> Toe het Kaleb die volk stil gemaak teenoor Moses en gesê: Laat ons gerus optrek en dit in besit neem; want ons kan dit sekerlik oorweldig.

<sup>31</sup> Maar die manne wat saam met hom opgetrek het, het gesê: Ons kan nie teen die volk optrek nie, want hulle is sterker as ons.

## Númeri 14

<sup>32</sup> So het hulle dan slegte gerugte onder die kinders van Israel versprei oor die land wat hulle verken het, deur te sê: Die land wat ons deurgetrek het om dit te verken, is 'n land wat sy inwoners verteer; en al die mense wat ons daarin gesien het, is groot manne.

<sup>33</sup> Ons het daar ook die reuse gesien, die kinders van Enak, van die reuse afkomstig; en ons was soos sprinkane in ons oë; so was ons ook in hulle oë.

**14** TOE het die hele vergadering uitgeroep—hulle het hul stem verhef, en die volk het dié nag geweene.

<sup>2</sup> En al die kinders van Israel het gemurmureer teen Moses en teen Aäron, en die hele vergadering het aan hulle gesê: Ag, as ons maar in Egipteland gesterf het! Of as ons maar hier in die woestyn gesterf het!

<sup>3</sup> En waarom bring die HERE ons na hierdie land om deur die swaard te val? Ons vroue en ons kinders sal 'n buit word. Sal dit nie beter vir ons wees om na Egipte terug te gaan nie?

<sup>4</sup> En hulle sê vir mekaar: Laat ons 'n hoof aanstel en na Egipte teruggaan.

<sup>5</sup> Toe het Moses en Aäron op hulle aangesig geval voor die hele vergadering van die gemeente van die kinders van Israel.

<sup>6</sup> En Josua, die seun van Nun, en Kaleb, die seun van Jefúnne, twee van die wat die land verken het, het hulle klere geskeur

<sup>7</sup> en die hele vergadering van die kinders van Israel toegesprek en gesê: Die land wat ons deurgetrek het om dit te verken, is

'n buitengewoon goeie land.

<sup>8</sup> As die HERE 'n welbehag in ons het, sal Hy ons in hierdie land inbring en dit aan ons gee, 'n land wat oorloop van melk en heuning.

<sup>9</sup> Wees net nie teen die HERE opstandig nie, en wees julle nie bevrees vir die volk van die land nie, want hulle is ons spys. Hulle beskutting het van hulle gewyk, en die HERE is met ons. Wees nie bevrees vir hulle nie!

<sup>10</sup> Toe sê die hele vergadering dat hulle gestenig moet word. Maar die heerlikheid van die HERE het in die tent van samekoms verskyn voor al die kinders van Israel.

<sup>11</sup> Daarop het die HERE aan Moses gesê: Hoe lank sal hierdie volk My verag? En hoe lank sal hulle in My nie glo nie, ondanks al die tekens wat Ek onder hulle gedoen het?

<sup>12</sup> Ek sal hulle met die pes tref en hulle uitroei; en Ek sal jou 'n groter en sterker nasie maak as hulle.

<sup>13</sup> Toe het Moses aan die HERE gesê: Maar die Egiptenaars het gehoor dat U deur u krag hierdie volk onder hulle uit laat optrek het

<sup>14</sup> en dit aan die inwoners van hierdie land gesê. Hulle het gehoor dat U, HERE, in die midde van hierdie volk is; dat U, HERE, duidelik waarneembaar verskyn; dat u volk oor hulle staan en U in 'n wolkkolom voor hulle uit trek bedags en in 'n vuurkolom by nag.

<sup>15</sup> As U nou hierdie volk soos een man ombring, dan sal die nasies wat die tyding

## Númeri 14

---

aangaande U gehoor het, spreek en sê:

<sup>16</sup> Omdat die HERE hierdie volk nie kon inbring in die land wat Hy hulle met 'n eed beloof het nie, het Hy hulle in die woestyn omgebring.

<sup>17</sup> Laat dan nou tog die krag van die HERE groot word, soos U gespreek het deur te sê:

<sup>18</sup> Die HERE is lankmoedig en groot van goedertierenheid, wat die ongeregtigheid en oortreding vergewe, maar nooit ongestraf laat bly nie, wat die ongeregtigheid van die vaders besoek aan die kinders, aan die derde en aan die vierde geslag.

<sup>19</sup> Vergeef tog die ongeregtigheid van hierdie volk na die grootheid van u goedertierenheid, en soos U hierdie volk van Egipte af tot hiertoe vergewe het.

<sup>20</sup> Toe sê die HERE: Ek vergewe, volgens jou woord.

<sup>21</sup> Maar so waar as Ek leef en die hele aarde van die HERE se heerlikheid vol sal word,

<sup>22</sup> al die manne wat my heerlikheid en my tekens gesien het wat Ek in Egipte en in die woestyn gedoen het, en My nou al tien maal versoek het en na my stem nie geluister het nie,

<sup>23</sup> hulle sal die land nie sien wat Ek aan hulle vaders met 'n eed beloof het nie, ja, almal wat My verag het, sal dit nie sien nie.

<sup>24</sup> Maar my kneg Kaleb, omdat 'n ander gees in hom was en hy volhard het om My te volg—hom sal Ek bring in die land waarin hy gekom het, en sy geslag sal dit in besit neem.

<sup>25</sup> Die Amalekiete en die Kanaäniete woon in die laagte—draai môre weg en trek tog

die woestyn in, op pad na die Skelfsee.

<sup>26</sup> Daarna het die HERE met Moses en Aäron gespreek en gesê:

<sup>27</sup> Hoe lank sal hierdie bose vergadering aanhou dat hulle teen My murmureer? Ek het die murmureringe van die kinders van Israel gehoor waarmee hulle teen My bly murmureer.

<sup>28</sup> Sê vir hulle: So waar as Ek leef, spreek die HERE, waarlik, soos julle voor my ore gespreek het, so sal Ek aan julle doen.

<sup>29</sup> Julle lyke sal in hierdie woestyn lê, naamlik al julle geteldes, volgens julle volle getal, van twintig jaar oud en daarbo, julle wat teen My gemurmureer het.

<sup>30</sup> Waarlik, julle sal nie in die land kom waaroor Ek my hand opgehef het om julle daarin te laat woon nie, behalwe Kaleb, die seun van Jefúnne, en Josua, die seun van Nun.

<sup>31</sup> En julle kinders waarvan julle gesê het: Hulle sal 'n buit word—dié sal Ek inbring en dié sal die land leer ken wat julle verwerp het.

<sup>32</sup> Maar julle lyke sal in hierdie woestyn lê.

<sup>33</sup> En julle kinders sal soos herders rondtrek in die woestyn, veertig jaar lank, en sal so die gevolge van julle hoerery dra totdat julle lyke in die woestyn verteer is.

<sup>34</sup> Volgens die getal dae dat julle die land verken het, veertig dae, vir elke dag een jaar, moet julle jul ongeregtighede dra, veertig jaar lank, en my teëstand gewaar word.

<sup>35</sup> Ek, die HERE, het dit gespreek; waarlik, dit sal Ek aan hierdie hele bose vergadering doen wat teen My bymekaargekom het.

## Númeri 15

Hulle sal in hierdie woestyn omkom en daar sterwe.

<sup>36</sup> En die manne wat Moses gestuur het om die land te verken en wat ná hulle terugkoms die hele vergadering teen hom laat murmureer het deur 'n slegte gerug aangaande die land te versprei,

<sup>37</sup> die manne wat 'n slegte gerug aangaande die land versprei het, het gesterwe deur 'n plaag voor die aangesig van die HERE.

<sup>38</sup> Maar van dié manne wat die land gaan verken het, het Josua, die seun van Nun, en Kaleb, die seun van Jefúnne, in die lewe gebly.

<sup>39</sup> En toe Moses hierdie woorde aan al die kinders van Israel gesê het, het die volk baie getreur

<sup>40</sup> en die môre vroeg klaargemaak en op die top van die berg geklim en gesê: Hier is ons, en ons wil optrek na die plek wat die HERE gesê het, want ons het gesondig.

<sup>41</sup> Maar Moses het gesê: Waarom oortree julle tog die bevel van die HERE, aangesien dit tog nie sal geluk nie?

<sup>42</sup> Moenie optrek nie, want die HERE is nie in julle midde nie—anders word julle verslaan voor julle vyande.

<sup>43</sup> Want die Amalekiete en die Kanaäniete is daar voor julle, en julle sal deur die swaard val; omdat julle van die HERE afvallig geword het, daarom sal die HERE nie met julle wees nie.

<sup>44</sup> Nogtans het hulle vermetel gehandel om op die top van die berg te klim; maar die verbondsark van die HERE en Moses het nie uit die laer gewyk nie.

<sup>45</sup> Toe het die Amalekiete en die Kanaäniete wat in dié gebergte woonagtig was, afgekom en hulle verslaan en hulle verstrooi tot by Horma.

**15** DAARNA het die HERE met Moses gespreek en gesê:

<sup>2</sup> Spreek met die kinders van Israel en sê vir hulle: As julle in die land van julle inwoning kom wat Ek aan julle gee, <sup>3</sup> en julle 'n vuuroffer aan die HERE wil berei, 'n brandoffer of slagoffer—deur 'n besondere gelofte te volbring of as vrywillige offer of by julle feestye—om vir die HERE 'n lieflike geur van beeste of van kleinvee te berei,

<sup>4</sup> dan moet die een wat sy offer aan die HERE bring, as spysoffer bring 'n tiende van 'n efa fynmeel, gemeng met 'n kwart-hin olie;

<sup>5</sup> en wyn vir die drankoffer, 'n kwart-hin, moet jy berei by die brandoffer of vir die slagoffer, vir elke lam.

<sup>6</sup> Of vir 'n ram moet jy as spysoffer berei twee-tiendes van 'n efa fynmeel, met 'n derde van 'n hin olie gemeng.

<sup>7</sup> En 'n derde van 'n hin wyn vir die drankoffer moet jy as lieflike geur aan die HERE bring.

<sup>8</sup> En as jy 'n jong bul as brandoffer of slagoffer berei, deur 'n besondere gelofte te volbring of as dankoffer aan die HERE,

<sup>9</sup> moet hy by die jong bul as spysoffer bring drie-tiendes van 'n efa fynmeel met 'n half-hin olie gemeng.

<sup>10</sup> En vir die drankoffer moet jy 'n half-hin wyn bring, as vuuroffer van lieflike geur aan die HERE.

## Númeri 15

---

<sup>11</sup> So moet gedoen word by elke bees of by elke ram of by 'n lam van die skape of van die bokke.

<sup>12</sup> Volgens die getal wat julle berei—so moet julle doen by elkeen volgens hulle getal.

<sup>13</sup> Elke kind van die land moet hierdie dinge op dieselfde manier doen, om 'n vuuroffer van lieflike geur aan die HERE te bring.

<sup>14</sup> En as 'n vreemdeling by julle vertoef, of hy wat vir geslagte onder julle is, en 'n vuuroffer van lieflike geur vir die HERE berei—soos julle doen, so moet hy doen.

<sup>15</sup> Wat die vergadering aangaan, een en dieselfde insetting geld vir julle en vir die vreemdeling wat by julle vertoef. 'n Ewige insetting in julle geslagte is dit: soos julle, so moet die vreemdeling voor die aangesig van die HERE wees.

<sup>16</sup> Een wet en een reg moet geld vir julle en vir die vreemdeling wat by julle vertoef.

<sup>17</sup> Verder het die HERE met Moses gespreek en gesê:

<sup>18</sup> Spreek met die kinders van Israel en sê vir hulle: As julle in die land kom waarheen Ek julle bring,

<sup>19</sup> moet julle, as julle van die brood van die land eet, 'n offergawe aan die HERE afgee.

<sup>20</sup> As eersteling van julle growwe meel moet julle 'n koek as offergawe afgee; net soos die offergawe van die dorsvloer, so moet julle dit afgee.

<sup>21</sup> Van die eerstelinge van julle growwe meel moet julle 'n offergawe aan die HERE gee in julle geslagte.

<sup>22</sup> Verder, as julle jul misgaan en nie al

hierdie gebooie doen wat die HERE aan Moses meegedeel het nie —

<sup>23</sup> alles wat die HERE julle deur Moses beveel het van die dag af dat die HERE dit beveel het en verder in julle geslagte —

<sup>24</sup> dan moet die hele vergadering, as dit buiten wete van die vergadering, in swakheid gebeur het, een jong bul berei vir 'n brandoffer as lieflike geur aan die HERE, met die spysoffer en die drankoffer wat volgens voorskrif daarby behoort; en een bokram as sondoffer.

<sup>25</sup> En die priester moet versoening doen vir die hele vergadering van die kinders van Israel, en dit sal hulle vergewe word; want 'n swakheid was dit, en hulle het hul offer as vuuroffer aan die HERE en hul sondoffer, weens hulle swakheid, voor die aangesig van die HERE gebring.

<sup>26</sup> Dit sal dan die hele vergadering van die kinders van Israel vergewe word, ook die vreemdeling wat onder hulle vertoef; want dit het die hele volk deur swakheid oorgekom.

<sup>27</sup> En as 'n enkele siel in swakheid sondig, moet dié 'n jaaroud bokkooi as sondoffer bring.

<sup>28</sup> En die priester moet versoening doen vir die siel wat hom misgaan het, weens sy sonde in swakheid voor die aangesig van die HERE begaan, om vir hom versoening te doen; en dit sal hom vergewe word.

<sup>29</sup> Wat die kind van die land onder die kinders van Israel aangaan en die vreemdeling wat onder hulle vertoef—een en dieselfde wet moet vir julle geld, vir hom wat in swakheid iets doen.



## Númeri 16

---

<sup>30</sup> Maar die siel wat iets moedswillig doen, van die kinders van die land of van die vreemdelinge, hy versmaad die HERE; en dié siel moet uitgeroei word onder sy volk uit.

<sup>31</sup> Want die woord van die HERE het hy verag en sy gebod verbreek. Dié siel moet sekerlik uitgeroei word; sy ongeregtigheid is op hom.

<sup>32</sup> EN toe die kinders van Israel in die woestyn was, het hulle 'n man gekry wat op die sabbatdag hout bymekaarmaak.

<sup>33</sup> En die wat hom gekry het terwyl hy hout bymekaarmaak, het hom na Moses en Aäron en na die hele vergadering gebring.

<sup>34</sup> En hulle het hom in die gevangenis gesit, want dit was nie beslis wat met hom gedoen moes word nie.

<sup>35</sup> Toe sê die HERE vir Moses: Die man moet sekerlik gedood word; die hele vergadering moet hom buitekant die laer stenig.

<sup>36</sup> Toe het die hele vergadering hom buitekant die laer uitbring en hom gestenig, dat hy gesterf het, soos die HERE Moses beveel het.

<sup>37</sup> EN die HERE het met Moses gespreek en gesê:

<sup>38</sup> Spreek met die kinders van Israel en sê aan hulle, hulle moet vir hulle klossies maak aan die hoeke van hul klere, in hulle geslagte, en aan die hoekklossies 'n draad van pers stof vasbind.

<sup>39</sup> En dit sal julle as klossies dien: as julle dit sien, moet julle aan al die gebooie van die HERE dink, dat julle dit doen en nie jul hart en jul oë navolg waar julle agter aan

hoereer nie,

<sup>40</sup> sodat julle aan al my gebooie mag dink en dit doen, en aan julle God heilig mag wees.

<sup>41</sup> Ek is die HERE julle God wat julle uit Egipteland uitgelei het om vir julle 'n God te wees. Ek is die HERE julle God.

**16** EN Korag, die seun van Jishar, die seun van Kehat, die seun van Levi, saam met Datan en Abíram, seuns van Elíab, en On, die seun van Pelet, seuns van Ruben, het manne geneem,  
<sup>2</sup> en hulle het opgestaan voor die oë van Moses saam met tweehonderd-en-vyftig man uit die kinders van Israel, owerstes van die vergadering, manne wat opgeroep was vir die volksvergadering, manne van naam.

<sup>3</sup> En hulle het bymekaargekom teen Moses en Aäron en aan hulle gesê: Dit is nou genoeg; want die hele vergadering, hulle almal, is heilig; en die HERE is in hulle midde! Waarom verhef julle jul dan oor die vergadering van die HERE?

<sup>4</sup> Toe Moses dit hoor, het hy op sy aangesig geval;

<sup>5</sup> en hy het met Korag en sy hele bende gespreek en gesê: Môre vroeg, dan sal die HERE bekend maak wie Hom toebehoort en wie die heilige is, en wie Hy na Hom laat nader kom: wie Hy uitkies, sal Hy na Hom laat nader kom.

<sup>6</sup> Doen dit: Neem vir julle vuurpanne, Korag en sy hele bende,

<sup>7</sup> en gooi daar môre vuur in en lê daar reukwerk op voor die aangesig van die HERE; dan sal die man wat die HERE

## Númeri 16

---

uitkies, die heilige wees. Dit is nou genoeg, kinders van Levi!

<sup>8</sup> Verder het Moses vir Korag gesê: Luister tog, kinders van Levi!

<sup>9</sup> Is dit julle nie genoeg dat die God van Israel julle uit die vergadering van Israel afgeskei het om julle na Hom te laat nader kom, om die dienswerk van die HERE se tabernakel te verrig en te staan voor die vergadering om hulle te dien nie,

<sup>10</sup> en Hy jou laat nader kom het en al jou broers, die kinders van Levi, saam met jou—dat julle nou ook die priesteramp begeer?

<sup>11</sup> Daarom, jy en jou hele bende is mense wat teen die HERE vergader; want Aäron, wat is hy, dat julle teen hom murmureer?

<sup>12</sup> En Moses het gestuur om Datan en Abíram, die seuns van Elíab, te laat roep; maar hulle het gesê: Ons sal nie opkom nie.

<sup>13</sup> Is dit nie genoeg dat jy ons uit 'n land wat oorloop van melk en heuning laat optrek het om ons in die woestyn om te bring, dat jy ook gedurig oor ons die baas wil speel nie?

<sup>14</sup> Ook het jy ons nie gebring in 'n land wat oorloop van melk en heuning en aan ons geen lande en wingerde as erfdeel gegee nie. Wil jy die oë van hierdie manne uitgrawe? Ons sal nie opkom nie.

<sup>15</sup> Toe het Moses baie kwaad geword, en hy het aan die HERE gesê: Sien hulle offer nie aan nie. Ek het nie een esel van hulle geneem en nie een van hulle kwaad aangedoen nie.

<sup>16</sup> Verder het Moses vir Korag gesê: Jy en jou hele bende, sorg dat julle môre voor die

aangesig van die HERE is, jy en hulle en Aäron.

<sup>17</sup> En neem julle elkeen sy vuurpan en gooi daar reukwerk op, en bring voor die aangesig van die HERE elkeen sy vuurpan, tweehonderd-en-vyftig vuurpanne, ook jy en Aäron elkeen sy vuurpan.

<sup>18</sup> Toe het hulle elkeen sy vuurpan geneem en daar vuur op gegooi en reukwerk op gelê; en hulle het gaan staan by die ingang van die tent van samekoms, ook Moses en Aäron.

<sup>19</sup> En Korag het die hele vergadering teen hulle bymekaar laat kom by die ingang van die tent van samekoms. Toe verskyn die heerlijkheid van die HERE aan die hele vergadering.

<sup>20</sup> En die HERE het met Moses en Aäron gespreek en gesê:

<sup>21</sup> Skei julle af van hierdie vergadering, en Ek sal hulle in 'n oomblik verteer.

<sup>22</sup> Maar hulle het op hul aangesig geval en gesê: o God, God van die geeste van alle vlees! Sal een man sondig en U op die hele vergadering toornig word?

<sup>23</sup> En die HERE het met Moses gespreek en gesê:

<sup>24</sup> Spreek met die vergadering en sê: Maak dat julle wegkom rondom die woning van Korag, Datan en Abíram!

<sup>25</sup> Toe het Moses opgestaan en na Datan en Abíram gegaan, en die oudstes van Israel het agter hom aan gegaan.

<sup>26</sup> Daarop het hy die vergadering toegesprek en gesê: Verwyder julle tog van die tente van hierdie goddelose manne en raak nie aan iets wat aan hulle behoort

## Númeri 16

---

nie, dat julle nie weens al hulle sondes omkom nie.

<sup>27</sup> En hulle het gemaak dat hulle wegkom rondom die woning van Korag, Datan en Abíram; maar Datan en Abíram het uitgekom en gaan staan by die deur van hulle tente saam met hulle vroue en seuns en kindertjies.

<sup>28</sup> Toe sê Moses: Hieraan sal julle weet dat die HERE my gestuur het om al hierdie werke te doen, dat hulle nie uit my eie hart is nie:

<sup>29</sup> as hierdie mense sterwe soos alle mense sterwe en met die besoeking van alle mense besoek word, dan het die HERE my nie gestuur nie.

<sup>30</sup> Maar as die HERE iets nuuts skep en die grond sy mond oopmaak en hulle verslind met alles wat aan hulle behoort, en hulle lewendig na die doderyk afdaal, dan sal julle weet dat hierdie manne die HERE verag het.

<sup>31</sup> En toe hy al hierdie woorde klaar gespreek het, skeur die grond wat onder hulle was,

<sup>32</sup> en die aarde het sy mond oopgemaak en hulle verslind saam met hul huisgesinne en al die mense wat aan Korag behoort het en al die goed.

<sup>33</sup> So het hulle dan met alles wat hulle s'n was, lewendig na die doderyk afgedaal; en die aarde het hulle oordek, en hulle het omgekom uit die vergadering.

<sup>34</sup> En die hele Israel wat rondom hulle was, het gevlug vir hulle geroep; want hulle het gesê: Dalk verslind die aarde ons!

<sup>35</sup> Toe het 'n vuur van die HERE uitgegaan

en die tweehonderd-en-vyftig man verteer wat die reukwerk gebring het.

<sup>36</sup> En die HERE het met Moses gespreek en gesê:

<sup>37</sup> Sê aan Eleásar, die seun van die priester Aäron, dat hy die vuurpanne uit die brand moet wegneem en die vuur ver weg moet strooi; want hulle is heilig —

<sup>38</sup> naamlik die vuurpanne van die wat gesondig het ten koste van hulle lewe; en daarvan moet dun plate geslaan word as 'n oortreksel vir die altaar. Want hulle het dié voor die aangesig van die HERE gebring—daarom is hulle heilig; en hulle sal vir die kinders van Israel 'n teken wees.

<sup>39</sup> Toe het die priester Eleásar die kopervuurpanne geneem wat die mense wat verbrand is, gebring het, en hulle het dit plat geslaan as 'n oortreksel vir die altaar —

<sup>40</sup> 'n aandenking vir die kinders van Israel, sodat 'n onbevoegde wat nie uit die nageslag van Aäron is nie, nie sal nader kom om reukwerk voor die aangesig van die HERE aan die brand te steek nie; sodat hy nie word soos Korag en sy bende nie, soos die HERE aan hom deur die diens van Moses gesê het.

<sup>41</sup> Maar die volgende dag het die hele vergadering van die kinders van Israel teen Moses en Aäron gemurmureer en gesê: Julle het die volk van die HERE gedood.

<sup>42</sup> En terwyl die vergadering teen Moses en Aäron bymekaarkom, het hulle hul na die tent van samekoms gedraai, en meteens het die wolk dit oordek en die heerlijkheid van die HERE het verskyn.

## Númeri 18

<sup>43</sup> En toe Moses en Aäron tot voor die tent van samekoms kom,

<sup>44</sup> het die HERE met Moses gespreek en gesê:

<sup>45</sup> Trek julle terug uit hierdie vergadering, dat Ek hulle in 'n oomblik kan verteer. Toe val hulle op hul aangesig,

<sup>46</sup> en Moses sê vir Aäron: Neem die vuurpan en gooi vuur van die altaar daarin en lê reukwerk daarop, en bring dit gou na die vergadering en doen versoening vir hulle; want die toorn het van die HERE se aangesig uitgegaan, die plaag het begin!

<sup>47</sup> Toe neem Aäron dit soos Moses gespreek het en hardloop onder die vergadering in, en kyk, die plaag het al onder die volk begin! En hy het die reukwerk daarop gelê en versoening gedoen vir die volk.

<sup>48</sup> En terwyl hy tussen die dooies en die lewendes staan, het die plaag opgehou.

<sup>49</sup> En die wat deur die plaag gesterf het, was veertienduisend-sewehonderd, buiten die wat gesterf het om Korag se ontwil.

<sup>50</sup> Daarop gaan Aäron na Moses terug by die ingang van die tent van samekoms; en die plaag is gestuit.

**17** DAARNA het die HERE met Moses gespreek en gesê:

<sup>2</sup> Spreek met die kinders van Israel en neem van hulle vir elke stam 'n staf, van al hulle owerstes volgens hulle stamme, twaalf stawe; elkeen se naam moet jy skrywe op sy staf.

<sup>3</sup> En Aäron se naam moet jy skrywe op die staf van Levi; want een staf moet daar wees vir hulle stamhoof.

<sup>4</sup> En jy moet hulle wegsit in die tent van samekoms voor die Getuienis waar Ek met julle saamkom.

<sup>5</sup> En die staf van die man wat Ek uitkies, sal bloei; en Ek sal die murmureringe van die kinders van Israel wat hulle teen julle murmureer, stilmaak teenoor My.

<sup>6</sup> Daarop het Moses met die kinders van Israel gespreek; en al hulle owerstes het hom 'n staf gegee, vir elke owerste een volgens hulle stamme, twaalf stawe. Aäron se staf was ook onder hulle stawe.

<sup>7</sup> En Moses het die stawe voor die aangesig van die HERE in die tent van die Getuienis neergesit.

<sup>8</sup> En toe Moses die volgende dag in die tent van die Getuienis ingaan, kyk, daar het die staf van Aäron, vir die huis van Levi, gebloei: dit het bloeisel laat uitspruit en blomme laat oopgaan en amandels laat ryp word!

<sup>9</sup> Toe bring Moses al die stawe wat voor die aangesig van die HERE was, na al die kinders van Israel toe uit; en hulle het dit gesien en elkeen sy staf geneem.

<sup>10</sup> Daarop het die HERE vir Moses gesê: Bring die staf van Aäron terug voor die Getuienis om dit te bewaar as teken vir die wederstrewiges, en bevry My eindelik van hulle murmureringe, dat hulle nie sterwe nie.

<sup>11</sup> En Moses het dit gedoen; soos die HERE hom beveel het, so het hy gedoen.

<sup>12</sup> Toe het die kinders van Israel met Moses gespreek en gesê: Kyk, ons sterwe, ons vergaan, ons almal vergaan!

<sup>13</sup> Elkeen wat enigsins nader kom na die

## Númeri 18

---

tabernakel van die HERE, sal sterwe. Is ons dan geheel en al daarvoor bestemd om weg te sterwe?

**18** EN die HERE het vir Aäron gesê: Jy en jou seuns en die huis van jou vader saam met jou moet die ongeregtigheid met betrekking tot die heiligdom dra; en jy en jou seuns saam met jou moet die ongeregtigheid met betrekking tot julle priesteramp dra.

<sup>2</sup> En laat ook jou broers, die stam van Levi, die stam van jou vader, saam met jou nader kom, dat hulle by jou kan aansluit en jou dien, terwyl jy en jou seuns saam met jou voor die tent van die Getuienis is.

<sup>3</sup> En hulle moet jou diens waarneem en die diens van die hele tent; maar naby die voorwerpe van die heiligdom en naby die altaar mag hulle nie kom nie, dat hulle nie sterwe, hulle sowel as julle nie.

<sup>4</sup> Maar hulle moet by jou aansluit en die diens van die tent van samekoms waarneem: al die dienswerk van die tent; en 'n onbevoegde mag nie na julle toe aankom nie.

<sup>5</sup> En julle moet die diens van die heiligdom en die diens van die altaar waarneem, sodat daar verder geen toorn oor die kinders van Israel kom nie.

<sup>6</sup> Want Ek self het julle broers, die Leviete, onder die kinders van Israel uit geneem as 'n geskenk vir julle, mense wat aan die HERE gegee is om die dienswerk van die tent van samekoms te verrig.

<sup>7</sup> Maar jy en jou seuns saam met jou moet julle priesteramp waarneem met betrekking tot al die sake van die altaar en

van wat binnekant die voorhangsel is, en julle moet daar diens verrig. As 'n dienswerk wat geskenk word, gee Ek julle die priesteramp; en die onbevoegde wat naby kom, moet gedood word.

<sup>8</sup> Verder het die HERE met Aäron gespreek: Ek self het jou die diens van my offergawes gegee; wat betref al die heilige gawes van die kinders van Israel, aan jou gee Ek dit as aandeel en aan jou seuns as ewige insetting.

<sup>9</sup> Van die hoogheilige gawes, met uitsondering van wat verbrand word, moet dít jou wees: al hulle offers, naamlik elke spysoffer en elke sondoffer en elke skuldoffer van hulle, wat hulle My bring—as iets hoogheiligs moet dit vir jou en jou seuns wees.

<sup>10</sup> In 'n hoogheilige plek moet jy dit eet; almal wat manlik is, mag dit eet; heilig moet dit vir jou wees.

<sup>11</sup> Dit moet ook jou wees: die offergawe van hulle geskenke, van al die beweegoffers van die kinders van Israel; Ek gee dit aan jou en jou seuns en jou dogters saam met jou as 'n ewige insetting. Elkeen wat rein is in jou huis, mag dit eet.

<sup>12</sup> Al die beste van die olie en al die beste van die mos en die koring, die eerste daarvan wat hulle aan die HERE gee, dit gee Ek aan jou.

<sup>13</sup> Die eersteling van alles wat in hulle land is, wat hulle aan die HERE bring, moet jou wees. Elkeen wat rein is in jou huis, mag dit eet.

<sup>14</sup> Alles wat onder die ban is in Israel, moet jou wees.

## Númeri 18

---

<sup>15</sup> Alles wat die moederskoot open—alle vlees wat hulle vir die HERE aanbring, mense en diere—moet joue wees; maar die eersgeborenes van mense moet jy sekerlik loskoop; ook moet jy die eersgeborenes van onrein diere loskoop.

<sup>16</sup> En wat die loskoping daarvan aangaan: vanaf 'n maand oud moet jy loskoop, volgens jou skatting, vir 'n geldsom van vyf sikkels volgens die sikkels van die heiligdom; dit is twintig gera.

<sup>17</sup> Maar die eersgeborene van 'n bees of die eersgeborene van 'n skaap of die eersgeborene van 'n bok moet jy nie loskoop nie; heilig is hulle; hulle bloed moet jy uitgooi teen die altaar en hulle vet aan die brand steek as 'n vuuroffer van lieflike geur aan die HERE.

<sup>18</sup> En hulle vleis moet joue wees; soos die bors van die beweegoffer en die regterboud moet dit joue wees.

<sup>19</sup> Al die offergawes van die heilige dinge wat die kinders van Israel aan die HERE afgee, gee Ek aan jou en jou seuns en jou dogters saam met jou as 'n ewige insetting. Dit is 'n ewige soutverbond voor die aangesig van die HERE, vir jou en jou nageslag saam met jou.

<sup>20</sup> Ook het die HERE vir Aäron gesê: Jy sal in hulle land nie erwe nie, en jy sal geen deel onder hulle hê nie. Ek is jou deel en jou erfenis onder die kinders van Israel.

<sup>21</sup> En kyk, Ek gee aan die kinders van Levi al die tiendes in Israel as erfdeel vir hulle dienswerk wat hulle verrig, die dienswerk van die tent van samekoms.

<sup>22</sup> En die kinders van Israel moet nie meer

nader kom na die tent van samekoms om sonde op hulle te laai sodat hulle sterwe nie.

<sup>23</sup> Maar die Leviete, dié moet die dienswerk by die tent van samekoms verrig, en hulle moet hul ongeregtheid dra—'n ewige insetting in julle geslagte. En onder die kinders van Israel moet hulle geen erfdeel kry nie.

<sup>24</sup> Want die tiendes van die kinders van Israel wat hulle aan die HERE as offergawe afgee, gee Ek aan die Leviete as erfdeel. Daarom het Ek aangaande hulle gesê: Hulle moet onder die kinders van Israel geen erfdeel kry nie.

<sup>25</sup> En die HERE het met Moses gesprek en gesê:

<sup>26</sup> Jy moet ook met die Leviete spreek en aan hulle sê: As julle van die kinders van Israel die tiendes neem wat Ek aan julle van hulle as jul erfdeel gegee het, moet julle daarvan 'n offergawe aan die HERE afgee, 'n tiende van die tiende.

<sup>27</sup> En julle offergawe sal vir julle gereken word soos koring van die dorsvloer af en soos die volle opbrings uit die parskuip.

<sup>28</sup> Só moet julle ook 'n offergawe aan die HERE afgee van al julle tiendes wat julle van die kinders van Israel neem, en julle moet daarvan die offergawe aan die HERE aan die priester Aäron gee.

<sup>29</sup> Van al jul gawes moet julle die hele offergawe aan die HERE afgee, van al die beste daarvan, as die heilige gawe wat daarvan moet afgaan.

<sup>30</sup> Jy moet dan vir hulle sê: As julle die beste daarvan afgee, sal dit vir die Leviete

## Númeri 19

gereken word as opbrings van die dorsvloer en as opbrings van die parskuip.

<sup>31</sup> En julle mag dit op enige plek eet, julle en jul huisgesin; want dit is vir julle 'n loon vir jul dienswerk by die tent van samekoms.

<sup>32</sup> En julle sal daarby geen sonde op julle laai as julle die beste deel daarvan afgee nie; en julle mag die heilige gawes van die kinders van Israel nie ontheilig nie, sodat julle nie sterwe nie.

**19** VERDER het die HERE met Moses en Aäron gespreek en gesê:

<sup>2</sup> Dit is die wetsinsetting wat die HERE beveel het deur te sê: Spreek met die kinders van Israel dat hulle vir jou 'n rooi koei sonder gebrek bring waar geen liggaamsgebrek aan is, waarop geen juk gekom het nie.

<sup>3</sup> En julle moet haar aan die priester Eleásar gee, en hulle moet haar buitekant die laer uitbring en voor hom slag.

<sup>4</sup> En die priester Eleásar moet van haar bloed met sy vinger neem en van haar bloed sewe maal in die rigting van die voorkant van die tent van samekoms sprinkel.

<sup>5</sup> Daarna moet hulle die koei voor sy oë verbrand; haar vel en haar vleis en haar bloed, saam met haar mis, moet hulle verbrand.

<sup>6</sup> En die priester moet sederhout en hisop en skarlakendraad neem en dit binne-in die brand van die koei gooi.

<sup>7</sup> Dan moet die priester sy klere was en sy liggaam in die water bad, en daarna mag hy in die laer kom; en die priester sal tot

die aand toe onrein wees.

<sup>8</sup> Ook die een wat haar verbrand het, moet sy klere in die water was en sy liggaam in die water bad, en hy sal tot die aand toe onrein wees.

<sup>9</sup> En 'n rein man moet die as van die koei bymekaarmaak en buitekant die laer op 'n rein plek neersit, en dit moet vir die vergadering van die kinders van Israel bewaar word vir die reinigingswater: dit is 'n sondoffer.

<sup>10</sup> En die een wat die as van die koei bymekaargemaak het, moet sy klere was en sal tot die aand toe onrein wees. En dit moet vir die kinders van Israel en vir die vreemdeling wat onder hulle vertoef, 'n ewige insetting wees.

<sup>11</sup> Die een wat aan 'n dooie, enige lyk van 'n mens, raak, hy sal sewe dae lank onrein wees.

<sup>12</sup> Op die derde dag en op die sewende dag moet hy hom daarmee ontsondig—dan sal hy rein wees; maar as hy hom op die derde dag en op die sewende dag nie ontsondig nie, sal hy nie rein wees nie.

<sup>13</sup> Elkeen wat aan 'n dooie raak, aan die lyk van 'n mens wat gesterf het, en hom nie ontsondig nie, verontreinig die tabernakel van die HERE, en dié siel moet uit Israel uitgeroei word. Omdat geen reinigingswater op hom uitgegooi is nie, sal hy onrein wees; sy onreinheid is nog aan hom.

<sup>14</sup> Dit is die wet: As iemand in 'n tent sterwe, sal elkeen wat in die tent kom en al wat in die tent is, sewe dae lank onrein wees.

## Númeri 20

<sup>15</sup> Ook al die oop goed wat nie met 'n deksel toegebind word nie, is onrein.

<sup>16</sup> En elkeen wat in die oop veld aan iemand raak wat deur die swaard verslaan is, of aan 'n dooie of aan 'n mens se doodsbeen of aan 'n graf, sal sewe dae lank onrein wees.

<sup>17</sup> Vir die onreine moet hulle dan van die as neem van die sondoffer wat verbrand is, en daar vars water in 'n pot op gooi;

<sup>18</sup> en 'n rein man moet hisop neem en dit in die water insteek en op die tent sprinkel en op al die goed en op die persone wat daar gewees het; ook op hom wat aan 'n doodsbeen of aan een wat verslaan is, of aan 'n dooie of aan 'n graf geraak het.

<sup>19</sup> En die reine moet die onreine op die derde en op die sewende dag besprinkel en hom op die sewende dag ontsondig. Dan moet hy sy klere was en hom in die water bad, en in die aand sal hy rein wees.

<sup>20</sup> Maar as iemand onrein word en hom nie ontsondig nie, dan moet dié siel uitgeroei word uit die vergadering, want hy het die heiligdom van die HERE verontreinig: reinigingswater is op hom nie uitgegooi nie, hy is onrein.

<sup>21</sup> En dit moet vir hulle 'n ewige insetting wees. En die een wat die reinigingswater sprinkel, moet sy klere was; en die een wat aan die reinigingswater raak, sal tot die aand toe onrein wees.

<sup>22</sup> Ja, alles waar die onreine aan raak, sal onrein wees; en die persoon wat aan hom raak, sal tot die aand toe onrein wees.

Sin kom, in die eerste maand, het die volk in Kades gebly. En Mirjam het daar gesterwe en is daar begrawe.

<sup>2</sup> En daar was geen water vir die vergadering nie. Toe het hulle teen Moses en Aäron saamgekom.

<sup>3</sup> En die volk het met Moses getwis, en hulle het gespreek en gesê: Ag, het ons tog maar gesterwe toe ons broers voor die aangesig van die HERE gesterf het!

<sup>4</sup> En waarom het julle die vergadering van die HERE in hierdie woestyn gebring, dat ons en ons vee daar sou sterwe?

<sup>5</sup> En waarom het julle ons uit Egipte laat optrek om ons in hierdie slegte plek te bring? Dit is geen plek van graan of van vye of van wingerdstokke of van granate nie; ook is daar geen water om te drink nie.

<sup>6</sup> Daarop gaan Moses en Aäron van die vergadering af weg na die ingang van die tent van samekoms, en hulle het op hul aangesig geval; toe verskyn die heerlikheid van die HERE aan hulle.

<sup>7</sup> En die HERE het met Moses gespreek en gesê:

<sup>8</sup> Neem die staf en laat die vergadering byeenkom, jy en jou broer Aäron, en spreek julle die rots aan voor hulle oë; dan sal hy sy water gee. So moet jy dan vir hulle water uit die rots laat vloei en die vergadering en hulle vee laat drink.

<sup>9</sup> Toe neem Moses die staf voor die aangesig van die HERE weg soos Hy hom beveel het.

<sup>10</sup> En Moses en Aäron het die vergadering voor die rots laat byeenkom, en hy het vir hulle gesê: Hoor tog, julle wederstewiges,

**20** EN toe die kinders van Israel, die hele vergadering, in die woestyn



## Númeri 20

---

moet ons vir julle water uit hierdie rots laat vloei?

<sup>11</sup> Daarop tel Moses sy hand op en hy slaan die rots twee maal met sy staf; en daar het baie water uitgekom, sodat die vergadering gedrink het en hulle vee.

<sup>12</sup> Toe sê die HERE vir Moses en Aäron: Omdat julle in My nie geglo het om My voor die oë van die kinders van Israel te heilig nie, daarom sal julle hierdie vergadering nie in die land inbring wat Ek aan hulle gegee het nie.

<sup>13</sup> Dit is die waters van Mériba waar die kinders van Israel met die HERE getwis het en Hy Hom onder hulle as die Heilige laat ken het.

<sup>14</sup> Daarna het Moses uit Kades boodskappers na die koning van Edom gestuur: So sê jou broer Israel: Jy weet self al die moeilikheid wat ons oorgekom het.

<sup>15</sup> Ons vaders het na Egipte afgetrek, en ons het baie dae in Egipte gewoon, en die Egiptenaars het ons en ons vaders sleg behandel.

<sup>16</sup> Toe het ons die HERE aangeroep, en Hy het ons stem gehoor: Hy het 'n Engel gestuur en ons uit Egipte uitgelei. Hier is ons nou in Kades, 'n stad op die grens van jou grondgebied.

<sup>17</sup> Laat ons tog deur jou land trek: ons sal nie deur lande of wingerde trek nie en die water uit die putte nie drink nie; ons sal die koningsweg hou; ons sal nie regs of links uitdraai nie, totdat ons deur jou grondgebied getrek het.

<sup>18</sup> Maar Edom antwoord hom: Jy sal deur my nie trek nie, anders sal ek jou met die

swaard tegemoettrek.

<sup>19</sup> Toe sê die kinders van Israel vir hom: Ons sal met die grootpad trek, en as ons van jou water drink, ek en my vee, gee ek die prys daarvoor. Laat my net te voet deurtrek—verder niks nie.

<sup>20</sup> Maar hy antwoord: Jy sal nie deurtrek nie. En Edom het uitgetrek hom tegemoet met baie manskappe en met 'n sterk hand.

<sup>21</sup> So het Edom dan geweier om Israel toe te laat om deur sy grondgebied te trek. Daarop het Israel van hom af weggedraai.

<sup>22</sup> EN die kinders van Israel, die hele vergadering, het van Kades af weggetrek en by die berg Hor gekom.

<sup>23</sup> En die HERE het met Moses en Aäron by die berg Hor, op die grens van die land Edom, gespreek en gesê:

<sup>24</sup> Aäron sal by sy volksgenote versamel word, want hy mag nie kom in die land wat Ek aan die kinders van Israel gegee het nie, omdat julle teen my bevel wederstrewig was by die waters van Mériba.

<sup>25</sup> Neem Aäron en sy seun Eleásar, en laat hulle op die berg Hor opklim;

<sup>26</sup> en trek Aäron se klere uit en trek dit sy seun Eleásar aan; en Aäron sal daar by sy volksgenote versamel word en sterwe.

<sup>27</sup> Toe het Moses gedoen soos die HERE beveel het: hulle het op die berg Hor geklim voor die oë van die hele vergadering.

<sup>28</sup> En Moses het Aäron se klere uitgetrek en dit sy seun Eleásar aangetrek. En Aäron het daar gesterwe op die top van die berg, maar Moses en Eleásar het van die berg

## Númeri 21

afgeklím.

<sup>29</sup> En toe die hele vergadering sien dat Aäron gesterf het, het die hele huis van Israel Aäron beween dertig dae lank.

**21** TOE die Kanaäniet, die koning van Arad, wat in die Suidland gewoon het, hoor dat Israel met die pad van Átarim kom, het hy teen Israel geveg en sommige van hulle as gevangenes weggevoer.

<sup>2</sup> Daarop het Israel aan die HERE 'n gelofte gedoen en gesê: As U hierdie volk heeltemal in my hand gee, sal ek hulle stede met die banvloek tref.

<sup>3</sup> En die HERE het gehoor na die stem van Israel en die Kanaäniete oorgegee. En hy het hulle en hul stede met die banvloek getref en die plek Horma genoem.

<sup>4</sup> Toe trek hulle van die berg Hor af weg op pad na die Skelfsee om die land Edom om te trek; maar die siel van die volk het op die pad ongeduldig geword.

<sup>5</sup> En die volk het teen God en teen Moses gespreek: Waarom het U ons uit Egipte laat optrek om in die woestyn te sterwe? Want daar is geen brood en geen water nie, en ons siel walg van die ellendige kos.

<sup>6</sup> Toe stuur die HERE giftige slange onder die volk wat die volk gebyt het; en baie mense uit Israel het gesterwe.

<sup>7</sup> En die volk het na Moses gekom en gesê: Ons het gesondig dat ons teen die HERE en teen u gespreek het. Bid tot die HERE, dat Hy die slange van ons wegneem. En Moses het vir die volk gebid.

<sup>8</sup> Daarop sê die HERE aan Moses: Maak vir jou 'n giftige slang en sit dit op 'n paal; dan sal elkeen wat gebyt is en daarna kyk, lewe.

<sup>9</sup> Toe het Moses 'n koperslang gemaak en dit op 'n paal gesit: en as 'n slang iemand gebyt het en hy kyk na die koperslang, het hy in die lewe gebly.

<sup>10</sup> En die kinders van Israel het weggetrek en laer opgeslaan in Obot.

<sup>11</sup> DAARNA het hulle weggetrek van Obot af en laer opgeslaan in Ijje-Haábárim in die woestyn wat oostelik aan Moab vas lê.

<sup>12</sup> Daarvandaan het hulle weggetrek en laer opgeslaan by die spruit Sered.

<sup>13</sup> Daarvandaan het hulle weggetrek en laer opgeslaan oorkant die Arnon wat in die woestyn is en uit die grondgebied van die Amoriete kom; want die Arnon is die grens van Moab, tussen Moab en die Amoriete.

<sup>14</sup> Daarom word gesê in die Boek van die Oorloë van die HERE: Waheb in Sufa en die spruite, die Arnon,

<sup>15</sup> en die hang van die spruite wat na die streek van Ar afloop en leun teen die grondgebied van Moab.

<sup>16</sup> En daarvandaan het hulle na Beër getrek. Dit is die put waarvan die HERE aan Moses gesê het: Laat die volk bymeekaarkom, dat Ek vir hulle water kan gee.

<sup>17</sup> Toe het Israel hierdie lied gesing: Spring op, o put! Besing hom!

<sup>18</sup> o Put wat die vorste gegrawe het, wat die edeles van die volk gedelf het, met die septer, met hulle stawe!—En uit die woestyn uit na Mattána toe;

<sup>19</sup> en van Mattána na Naháliël; en van Naháliël na Bamot;

<sup>20</sup> en van Bamot na die dal wat in die veld

## Númeri 22

---

van Moab lê, by die top van Pisga, en oor die wildernis afkyk.

<sup>21</sup> En Israel het boodskappers gestuur na Sihon, die koning van die Amoriëte, en gesê:

<sup>22</sup> Laat my deur jou land trek. Ons sal nie wegdraai in die lande of in die wingerde nie; ons sal die water van die putte nie drink nie; ons sal die koningsweg hou tot ons deur jou grondgebied getrek het.

<sup>23</sup> Maar Sihon het Israel nie toegelaat om deur sy grondgebied te trek nie; maar Sihon het al sy manskappe versamel en uitgetrek na die woestyn, Israel tegemoet; en toe hy by Jahas kom, het hy teen Israel geveg.

<sup>24</sup> Maar Israel het hom verslaan met die skerpte van die swaard en sy land in besit geneem van die Arnon af tot by die Jabbok, tot by die kinders van Ammon; want die grens van die kinders van Ammon was sterk.

<sup>25</sup> So het Israel dan al hierdie stede ingeneem, en Israel het gewoon in al die stede van die Amoriëte, in Hesbon en in al sy onderhorige plekke.

<sup>26</sup> Want Hesbon was die stad van Sihon, die koning van die Amoriëte; hy het naamlik oorlog gevoer teen die vorige koning van die Moabiëte en het dié se hele land tot by die Arnon uit sy hand geruk.

<sup>27</sup> Daarom sê die spreukdigters: Kom na Hesbon toe! Laat die stad van Sihon gebou en bevestig word!

<sup>28</sup> Want 'n vuur het uitgegaan uit Hesbon, 'n vlam uit die vesting van Sihon; dit het Ar van die Moabiëte verteer, die bewoners

van die hoogtes van Arnon.

<sup>29</sup> Wee jou, Moab! Jy is verlore, volk van Kamos! Hy het sy seuns prysgegee as vlugtelingen, en sy dogters in gevangenskap, aan Sihon, die koning van die Amoriëte.

<sup>30</sup> Toe het ons hulle beskiet; verlore was Hesbon tot by Dibon; en ons het verwoes tot by Nofag, met vuur tot by Medéba.

<sup>31</sup> So het Israel dan gewoon in die land van die Amoriëte.

<sup>32</sup> Daarna het Moses gestuur om Jaéser te bespied, en hulle het sy onderhorige plekke ingeneem, en hy het die Amoriëte wat daar was, uit hulle besitting verdrywe.

<sup>33</sup> Toe het hulle gedraai en in die rigting van Basan opgetrek. En Og, die koning van Basan, hy en al sy manskappe, het hulle tegemoetgetrek na Edréi om te veg.

<sup>34</sup> Daarop sê die HERE vir Moses: Wees nie bevrees vir hom nie, want Ek het hom en sy hele volk en sy land in jou hand gegee; en jy moet met hom doen soos jy gedoen het met Sihon, die koning van die Amoriëte, wat in Hesbon gewoon het.

<sup>35</sup> En hulle het hom verslaan en sy seuns en sy hele volk, totdat daar niemand van hom oor was wat vrygeraak het nie; en hulle het sy land in besit geneem.

**22** DAARNA het die kinders van Israel weggetrek en laer opgeslaan in die vlaktes van Moab, oos van die Jordaan van Jérigo.

<sup>2</sup> Toe Balak, die seun van Sippor, sien alles wat Israel die Amoriëte aangedoen het,

<sup>3</sup> het Moab baie bang geword vir die volk, want hulle was talryk; en Moab het beangs

## Númeri 22

---

geword vanweë die kinders van Israel.

<sup>4</sup> Toe sê Moab vir die oudstes van Mídián: Nou sal hierdie menigte opeet alles wat rondom ons is, soos 'n bees die groenigheid van die veld opeet. En Balak, die seun van Sippor, was dié tyd koning van Moab.

<sup>5</sup> Daarop het hy boodskappers gestuur na Bileam, die seun van Beor, in Petor wat by die Eufraat is, in die land van die kinders van sy volk, om hom te roep en te sê: Kyk, daar het 'n volk uit Egipte getrek; kyk, hulle het die oppervlakte van die land oordek en staan gelaer teenoor my.

<sup>6</sup> Kom dan tog nou, vervloek hierdie volk vir my, want hulle is magtiger as ek. Miskien sal ek onder hulle 'n slag kan slaan en hulle uit die land verdrywe. Want ek weet, die een wat jy seën, is geseënd; en die een wat jy vervloek, is vervloek.

<sup>7</sup> Toe het die oudstes van Moab en die oudstes van Mídián gegaan met waarsêersloon by hulle en by Bileam gekom en hom die woorde van Balak meegedeel.

<sup>8</sup> Daarop antwoord hy hulle: Bly vannag hier oor; dan sal ek julle berig bring soos die HERE aan my sal sê. Toe het die vorste van Moab by Bileam gebly.

<sup>9</sup> En God het na Bileam gekom en gesê: Wie is die manne daar by jou?

<sup>10</sup> En Bileam het God geantwoord: Balak, die seun van Sippor, die koning van Moab, laat my weet:

<sup>11</sup> Kyk, daar het 'n volk uit Egipte getrek en hulle het die oppervlakte van die land oordek. Kom nou, vervloek hulle vir my; miskien sal ek hulle kan beveg en hulle

verdrywe.

<sup>12</sup> Toe sê God vir Bileam: Jy mag nie saam met hulle trek nie, jy mag die volk nie vloek nie, want hulle is geseënd.

<sup>13</sup> Toe staan Bileam die môre op, en hy sê aan die vorste van Balak: Gaan na julle land, want die HERE het geweier om my saam met julle te laat gaan.

<sup>14</sup> En die vorste van Moab het klaargemaak en by Balak gekom en gesê: Bileam het geweier om saam met ons te gaan.

<sup>15</sup> Daarop stuur Balak nog weer vorste wat meer en aansienliker was as die ander;

<sup>16</sup> en hulle het by Bileam gekom en aan hom gesê: So spreek Balak, die seun van Sippor: Laat jou tog nie terughou om na my te kom nie.

<sup>17</sup> Want ek sal jou baie hoog vereer en alles wat jy my sê, sal ek doen; daarom kom tog, vervloek hierdie volk vir my.

<sup>18</sup> Toe antwoord Bileam en sê aan die dienaars van Balak: Al gee Balak my sy huis vol silwer en goud, ek kan die bevel van die HERE my God nie oortree om klein of groot te doen nie.

<sup>19</sup> Nou dan, bly julle tog ook vannag hier, dat ek mag weet wat die HERE verder aan my sal sê.

<sup>20</sup> En God het in die nag na Bileam gekom en aan hom gesê: As die manne gekom het om jou te roep, staan dan op, gaan met hulle saam; maar net wat Ek jou sê, dit moet jy doen.

<sup>21</sup> Toe maak Bileam die môre klaar en saal sy eselin op, en hy het weggetrek saam met die vorste van Moab.

<sup>22</sup> Maar die toorn van God het ontvlam,

## Númeri 22

---

omdat hy weggetrek het; en die Engel van die HERE het gaan staan in die pad as sy teëparty, terwyl hy op sy esel ry en sy twee dienaars by hom was.

<sup>23</sup> En die esel het die Engel van die HERE in die pad sien staan, met sy ontblote swaard in sy hand; daarom het die esel uit die pad uitgedraai en die veld ingeloop. Maar Bileam het die esel geslaan om haar na die pad te stuur.

<sup>24</sup> Daarom gaan die Engel van die HERE in 'n hol pad tussen die wingerde staan—'n muur duskant en 'n muur anderkant.

<sup>25</sup> En toe die esel die Engel van die HERE sien, druk sy haarself teen die muur en druk ook Bileam se voet teen die muur; daarom het hy haar weer geslaan.

<sup>26</sup> En die Engel van die HERE het weer verder gegaan en bly staan op 'n nou plek waar geen pad was om regs of links uit te draai nie.

<sup>27</sup> Toe die esel die Engel van die HERE sien, gaan sy onder Bileam lê. Daarop het Bileam baie kwaad geword en die esel met 'n stok geslaan.

<sup>28</sup> Maar die HERE het die bek van die esel geopen, en sy sê vir Bileam: Wat het ek jou gedoen, dat jy my nou al drie maal geslaan het?

<sup>29</sup> Daarop antwoord Bileam die esel: Omdat jy die spot met my drywe. Was daar net 'n swaard in my hand—dan het ek jou sekerlik doodgeslaan.

<sup>30</sup> En die esel sê vir Bileam: Is ek nie jou esel waar jy jou lewe lank op gery het tot vandag toe nie? Was dit ooit my gewoonte om so met jou te doen? En hy antwoord:

Nee.

<sup>31</sup> Toe open die HERE die oë van Bileam, sodat hy die Engel van die HERE in die pad sien staan met sy ontblote swaard in sy hand, en hy het gebuig en op sy aangesig neergeval.

<sup>32</sup> En die Engel van die HERE vra hom: Waarom het jy jou esel nou al drie maal geslaan? Kyk, Ek self het uitgegaan as 'n teëparty, want jou weg loop gevaarlik steil in my oog!

<sup>33</sup> Maar die esel het My gesien en nou al drie maal voor My uitgedraai. As sy nie voor My uitgedraai het nie—dan het Ek jou alte seker gedood en haar laat lewe.

<sup>34</sup> Toe antwoord Bileam die Engel van die HERE: Ek het gesondig, want ek het nie geweet dat U teenoor my in die pad gestaan het nie. Maar nou, as dit verkeerd is in u oë, sal ek teruggaan.

<sup>35</sup> En die Engel van die HERE sê vir Bileam: Gaan saam met die manne, maar net die woord wat Ek jou sê, dit moet jy spreek. So het Bileam dan met die vorste van Balak saamgegaan.

<sup>36</sup> Toe Balak hoor dat Bileam kom, het hy uitgetrek hom tegemoet na Ir-Moab wat by die grens van die Arnon lê, by die uiteinde van die grondgebied.

<sup>37</sup> En Balak sê vir Bileam: Het ek nie herhaaldelik na jou gestuur om jou te laat roep nie? Waarom het jy nie na my gekom nie? Is ek werklik nie in staat om jou te vereer nie?

<sup>38</sup> En Bileam het Balak geantwoord: Hier het ek na jou gekom. Is ek nou wel in staat om iets te spreek? Die woord wat God in

## Númeri 23

my mond lê, dit sal ek spreek.

<sup>39</sup> Bileam het toe saam met Balak gegaan, en hulle het by Kirjat-Husot gekom.

<sup>40</sup> En Balak het beeste en kleinvee geoffer en daarvan aan Bileam gestuur en aan die vorste wat by hom was.

<sup>41</sup> En in die môre het Balak Bileam geneem en hom op die hoogtes van Baäl laat opklim vanwaar hy die kant van die volk kon sien.

**23** TOE sê Bileam vir Balak: Bou vir my hier sewe altare en berei vir my hier sewe bulle en sewe ramme.

<sup>2</sup> En Balak het gedoen soos Bileam verlang het; en Balak en Bileam het 'n bul en 'n ram op elke altaar geoffer.

<sup>3</sup> Daarop sê Bileam vir Balak: Bly by jou brandoffer staan, en ek sal heengaan; miskien sal die HERE my tegemoetkom, en wat Hy my ook al laat sien, sal ek jou bekend maak. En hy het na 'n kaal heuwel gegaan.

<sup>4</sup> En God het Bileam tegemoetgekom, en hy het vir Hom gesê: Sewe altare het ek reggemaak en 'n bul en 'n ram op elke altaar geoffer.

<sup>5</sup> Toe lê die HERE 'n woord in Bileam se mond en sê: Gaan terug na Balak, en so moet jy spreek.

<sup>6</sup> En hy het na hom teruggegaan terwyl hy daar staan by sy brandoffer, hy en al die vorste van Moab.

<sup>7</sup> En hy het sy spreuk aangehef en gesê: Uit Aram laat Balak my haal, die koning van Moab—uit die berge van die Ooste: Kom vervloek Jakob vir my, en kom, verwens Israel.

<sup>8</sup> Hoe sal ek vloek wie Gód nie vloek nie? En hoe sal ek verwens vir wie die HERE nie verwens nie?

<sup>9</sup> Want van die top van die rotse af sien ek hom, en van die heuwels af aanskou ek hom. Kyk, 'n volk wat afgesonderd woon en hom nie tot die nasies reken nie.

<sup>10</sup> Wie het die stof van Jakob getel? En wie, volgens getal, die vierde deel van Israel? Laat my sterwe die dood van die opregtes, en laat my einde soos syne wees!

<sup>11</sup> Toe sê Balak vir Bileam: Wat het jy my aangedoen? Ek het jou laat haal om my vyande te vloek, en kyk, jy het net geseën!

<sup>12</sup> En hy antwoord daarop dít: Moet ek dan nie sorgvuldig alles spreek wat die HERE in my mond lê nie?

<sup>13</sup> Daarop sê Balak vir hom: Kom tog saam met my na 'n ander plek vanwaar jy hom kan sien—net sy kant sal jy sien, maar heeltemal kan jy hom nie sien nie—en vervloek hom daarvandaan vir my.

<sup>14</sup> En hy het hom saamgeneem na die Veld van die Wagte, op die top van Pisga, en sewe altare gebou en 'n bul en 'n ram op elke altaar geoffer.

<sup>15</sup> Toe sê hy vir Balak: Bly hier staan by jou brandoffer, en ek sal daar op 'n ontmoeting wag.

<sup>16</sup> En die HERE het Bileam ontmoet en 'n woord in sy mond gelê en gesê: Gaan terug na Balak, en so moet jy spreek.

<sup>17</sup> En hy het by hom gekom terwyl hy daar staan by sy brandoffer, en die vorste van Moab by hom. En Balak sê vir hom: Wat het die HERE gespreek?

<sup>18</sup> Toe hef hy sy spreuk aan en sê: Staen op,

## Númeri 24

Balak, en hoor! Luister na my, seun van Sippor!

<sup>19</sup> God is geen man dat Hy sou lieg nie; of 'n mensekind dat dit Hom sou berou nie. Sou Hý iets sê en dit nie doen nie, of spreek en dit nie waar maak nie?

<sup>20</sup> Kyk, ek het ontvang om te seën; en het Hy geseën, dan kan ek dit nie keer nie.

<sup>21</sup> 'n Mens aanskou geen ongeregtheid in Jakob en sien geen onheil in Israel nie. Die HERE sy God is met hom, en die gejubel tot eer van die Koning is by hom.

<sup>22</sup> God wat hulle uit Egipte uitgelei het, is vir hulle soos die horings van 'n buffel.

<sup>23</sup> Want daar is geen towery teen Jakob of waarsêery teen Israel nie. Nou sal van Jakob en van Israel gesê word wat God gedoen het.

<sup>24</sup> Kyk, 'n volk wat opstaan soos 'n leeuin, en soos 'n leeu verhef hy hom. Hy gaan nie lê voordat hy roof eet en die bloed van die wat verslaan is, drink nie.

<sup>25</sup> Toe sê Balak vir Bileam: Jy moet hulle glad nie vloek nie, en jy moet hulle glad nie seën nie.

<sup>26</sup> Maar Bileam antwoord en sê vir Balak: Het ek nie dit met jou gespreek nie: Alles wat die HERE spreek, dit sal ek doen?

<sup>27</sup> Verder sê Balak vir Bileam: Kom tog, ek sal jou na 'n ander plek saamneem; miskien sal dit reg wees in die oë van God dat jy hulle vir my daarvandaan vervloek.

<sup>28</sup> Toe neem Balak Bileam saam na die top van Peor wat oor die wildernis afkyk.

<sup>29</sup> Daarop sê Bileam vir Balak: Bou vir my hier sewe altare, en berei vir my hier sewe bulle en sewe ramme.

<sup>30</sup> En Balak het gedoen soos Bileam verlang het en 'n bul en 'n ram op elke altaar geoffer.

**24** TOE Bileam sien dat dit goed was in die oë van die HERE om Israel te seën, het hy hom nie soos die vorige kere tot towery gewend nie, maar sy gesig na die woestyn gedraai.

<sup>2</sup> Toe Bileam sy oë opslaan en Israel sien soos hy volgens sy stamme in die laer staan, het die Gees van God op hom gekom.

<sup>3</sup> En hy het sy spreuk aangehef en gesê: Bileam, die seun van Beor, spreek, en die man met geopende oog spreek.

<sup>4</sup> Die hoorder van die woorde van God spreek, hy wat die gesigte van die Almagtige sien, wat neerval en geopende oë het.

<sup>5</sup> Hoe mooi is jou tente, o Jakob, jou wonings, o Israel!

<sup>6</sup> Soos dale met waterlope wat hulle ver uitstrek, soos tuine by 'n rivier, soos alewees wat die HERE geplant het, soos seders by die water.

<sup>7</sup> Water vloei uit sy emmers, en sy saad is by baie waters. En laat sy koning hoër wees as Agag, en sy koninkryk hom verhef!

<sup>8</sup> God wat hom uit Egipte uitgelei het, is vir hom soos die horings van 'n buffel; hy sal nasies, sy vyande, verteer en hulle gebeente stukkend breek en met sy pyle verbrysel.

<sup>9</sup> Hy buig hom, hy gaan lê soos 'n leeu en soos 'n leeuin: wie sal hom opjaag? Geseënd is hulle wat jou seën, en vervloek is hulle wat jou vervloek!

## Númeri 25

<sup>10</sup> Toe het Balak baie kwaad geword vir Bileam en sy hande saamgeslaan, en Balak het aan Bileam gesê: Ek het jou laat roep om my vyande te vloek, en kyk, jy het nou al drie maal net geseën!

<sup>11</sup> Trek dan nou gou na jou woonplek! Ek het gesê dat ek jou hoog sal vereer; maar kyk, die HERE het jou van verering teruggehou.

<sup>12</sup> Toe het Bileam vir Balak gesê: Het ek nie alreeds met jou boodskappers wat jy na my gestuur het, gespreek en gesê nie:

<sup>13</sup> Al gee Balak my sy huis vol silwer en goud, ek kan die bevel van die HERE nie oortree om goed of kwaad uit my eie hart te doen nie; wat die HERE spreek, dit sal ek spreek.

<sup>14</sup> En nou, kyk, ek gaan na my volk toe. Kom, ek sal jou inligting gee, wat hierdie volk jou volk sal aandoen aan die einde van die dae.

<sup>15</sup> Toe het hy sy spreuk aangehef en gesê: Bileam, die seun van Beor, spreek, en die man met geopende oog spreek.

<sup>16</sup> Die hoorder van die woorde van God spreek, en hy wat die wetenskap van die Allerhoogste ken, wat die gesigte van die Almagtige sien, wat neerval en geopende oë het.

<sup>17</sup> Ek sien hom, maar nie nou nie, ek aanskou hom, maar nie naby nie; 'n ster kom te voorskyn uit Jakob, en 'n septer kom uit Israel op, en hy verbrysel die slape van die hoof van Moab en werp al die oorlogsugtiges omver.

<sup>18</sup> Ook sal Edom 'n besitting wees; en Seir, sy vyande, sal 'n besitting wees, maar

Israel neem toe in krag.

<sup>19</sup> En laat daar een uit Jakob heers en die vrygeraaktes uit die stede vernietig.

<sup>20</sup> Toe hy Ámalek sien, het hy sy spreuk aangehef en gesê: Ámalek is die eersteling van die heidene, maar sy einde is ondergang.

<sup>21</sup> Toe hy die Keniete sien, het hy sy spreuk aangehef en gesê: Jou woonplek is vas, en jou nes is gebou op die rots.

<sup>22</sup> Ewenwel sal Kain tot verwoesting wees. Hoe lank nog? Assur sal jou as gevangene wegvoer.

<sup>23</sup> Verder het hy sy spreuk aangehef en gesê: Wee, wie sal lewe as God dít beskik?

<sup>24</sup> En skepe kom van die kant van die Kittiers af, en hulle verneder Assur en hulle verneder Heber; en hy is ook tot ondergang bestem.

<sup>25</sup> Toe het Bileam hom klaargemaak en weggetrek en na sy woonplek teruggekeer. En Balak het ook sy koers gegaan.

**25** TOE Israel in Sittim gebly het, het die volk begin hoereer met die dogters van die Moabiete —

<sup>2</sup> dié het die volk na die offers van hulle gode uitgenooi; en die volk het geëet en hulle neergebuig voor hulle gode.

<sup>3</sup> So het Israel hom dan gekoppel aan Baäl-Peor, en die toorn van die HERE het teen Israel ontvlam.

<sup>4</sup> Toe sê die HERE vir Moses: Neem al die hoofde van die volk en hang die oortreders op in die volle son vir die HERE, sodat die toornvloed van die HERE van Israel afgewend kan word.

<sup>5</sup> Daarop het Moses aan die rigters in Israel



## Númeri 26

gesê: Slaan elkeen sy manne dood wat hulle aan Baäl-Peor gekoppel het.

<sup>6</sup> En daar het 'n man gekom, een uit die kinders van Israel, en 'n Midianitiese vrou na sy volksgenote gebring, voor die oë van Moses en voor die oë van die hele vergadering van die kinders van Israel, terwyl hulle ween by die ingang van die tent van samekoms.

<sup>7</sup> Toe Pínehas, die seun van Eleásar, die seun van die priester Aäron, dit sien, het hy uit die vergadering uit opgestaan en 'n spies in sy hand geneem

<sup>8</sup> en agter die Israelitiese man aan gegaan in die tent en hulle twee deurboor, die Israelitiese man en die vrou, in haar onderlyf. Daarna het die plaag onder die kinders van Israel opgehou.

<sup>9</sup> En die wat deur die plaag gesterf het, was vier-en-twintigduisend.

<sup>10</sup> Toe het die HERE met Moses gespreek en gesê:

<sup>11</sup> Pínehas, die seun van Eleásar, die seun van die priester Aäron, het my grimmigheid van die kinders van Israel afgewend deurdat hy my ywer onder hulle geywer het, sodat Ek die kinders van Israel in my ywer nie verteer het nie.

<sup>12</sup> Daarom spreek: Kyk, Ek sluit met hom my vredeverbond,

<sup>13</sup> en dit sal vir hom en sy nageslag ná hom die verbond van ewige priesterskap wees, omdat hy vir sy God geywer en versoening vir die kinders van Israel gedoen het.

<sup>14</sup> En die naam van die Israelitiese man wat verslaan is, wat saam met die Midianitiese vrou verslaan is, was Simri,

die seun van Salu, owerste van 'n familie van die Simeoniete.

<sup>15</sup> En die naam van die Midianitiese vrou wat verslaan is, was Kosbi, die dogter van Sur. Hy was stamhoof van 'n familie in Mídián.

<sup>16</sup> Verder het die HERE met Moses gespreek en gesê:

<sup>17</sup> Behandel die Midianiete as vyand en verslaan hulle,

<sup>18</sup> want hulle het julle as vyand behandel deur hulle liste wat hulle teen julle bedink het in die saak van Peor en in die saak van Kosbi, die dogter van die vors van Mídián, hulle landgenoot, wat op die dag van die plaag weens Peor verslaan is.

**26** EN ná die plaag het die HERE met Moses en met Eleásar, die seun van die priester Aäron, gespreek en gesê:

<sup>2</sup> Neem julle die volle getal van die hele vergadering van die kinders van Israel op, van twintig jaar oud en daarbo, volgens hulle families, almal wat op kommando moet uittrek in Israel.

<sup>3</sup> En Moses en die priester Eleásar het hulle toegesprek in die vlaktes van Moab, by die Jordaán van Jérigo, en gesê:

<sup>4</sup> Laat hulle opneem van twintig jaar oud en daarbo, soos die HERE Moses beveel het. En die kinders van Israel wat uit Egipteland uitgetrek het, was:

<sup>5</sup> Ruben, die eersgeborene van Israel; die seuns van Ruben was: van Henog die geslag van die Henogiete; van Pallu die geslag van die Palluïete;

<sup>6</sup> van Hesron die geslag van die Hesroniete; van Karmi die geslag van die

## Númeri 26

---

Karmiete.

<sup>7</sup> Dit is die geslagte van die Rubeniete; en hulle geteldes was drieen-veertigduisend-sewehonderd-endertig.

<sup>8</sup> En die seuns van Pallu was: Elíab;

<sup>9</sup> en die seuns van Elíab was: Némuel en Datan en Abíram. Dit is Datan en Abíram wat na die vergadering opgeroep was, wat getwis het teen Moses en Aäron in die bende van Korag toe daar teen die HERE getwis is.

<sup>10</sup> En die aarde het sy mond oopgemaak en hulle verslind, saam met Korag, toe die bende gesterf het deurdat die vuur die tweehonderd-en-vyftig man verteer het; en hulle het tot 'n teken geword.

<sup>11</sup> Maar die seuns van Korag het nie gesterf nie.

<sup>12</sup> Die seuns van Símeon volgens hulle geslagte: van Némuel die geslag van die Nemueliete; van Jamin die geslag van die Jaminiete; van Jagin die geslag van die Jaginiete;

<sup>13</sup> van Serag die geslag van die Sargiete; van Saul die geslag van die Sauliete.

<sup>14</sup> Dit is die geslagte van die Simeoniete, twee-en-twintigduisend-tweehonderd.

<sup>15</sup> Die seuns van Gad volgens hulle geslagte: van Sefon die geslag van die Sefoniete; van Haggi die geslag van die Haggiete; van Suni die geslag van die Suniete;

<sup>16</sup> van Osni die geslag van die Osniete; van Eri die geslag van die Eriete;

<sup>17</sup> van Arod die geslag van die Arodiete; van Areëli die geslag van die Areëliete.

<sup>18</sup> Dit is die geslagte van die seuns van

Gad volgens hulle geteldes, veertigduisend-vyfhonderd.

<sup>19</sup> Die seuns van Juda was: Er en Onan; maar Er en Onan het gesterwe in die land Kanaän.

<sup>20</sup> En die seuns van Juda volgens hulle geslagte: van Sela die geslag van die Selaniete; van Peres die geslag van die Parsiete; van Serag die geslag van die Sargiete.

<sup>21</sup> En die seuns van Peres: van Hesron die geslag van die Hesroniete; van Hamul die geslag van die Hamuliete.

<sup>22</sup> Dit is die geslagte van Juda volgens hulle geteldes, ses-en-sewentigduisend-vyfhonderd.

<sup>23</sup> Die seuns van Íssaskar volgens hulle geslagte: van Tola die geslag van die Tolaïete; van Puwa die geslag van die Puniete;

<sup>24</sup> van Jasub die geslag van die Jasubiete; van Simron die geslag van die Simroniete.

<sup>25</sup> Dit is die geslagte van Íssaskar volgens hulle geteldes, vier-en-sestigduisend-driehonderd.

<sup>26</sup> Die seuns van Sébulon volgens hulle geslagte: van Sered die geslag van die Sardiete; van Elon die geslag van die Eloniete; van Jágleël die geslag van die Jagleëliete.

<sup>27</sup> Dit is die geslagte van die Sebuloniete volgens hulle geteldes, sestigduisend-vyfhonderd.

<sup>28</sup> Die seuns van Josef volgens hulle geslagte was: Manasse en Efraim.

<sup>29</sup> Die seuns van Manasse: van Magir die geslag van die Magiriete. En Magir was die

## Númeri 26

---

vader van Gílead; van Gílead die geslag van die Gileadiete.

<sup>30</sup> Dit is die seuns van Gílead: van Jeser die geslag van die Jesriete; van Helek die geslag van die Helkiete;

<sup>31</sup> en van Ásriël die geslag van die Asriëliete; en van Segem die geslag van die Sigmiete;

<sup>32</sup> en van Semída die geslag van die Semidaïete; en van Hefer die geslag van die Hefriete.

<sup>33</sup> Maar Selófhad, die seun van Hefer, het geen seuns gehad nie, maar net dogters. En die name van die dogters van Selófhad was: Magla en Noa, Hogla, Milka en Tirsa.

<sup>34</sup> Dit is die geslagte van Manasse; en hulle geteldes was twee-en-vyftigduisend-sewehonderd.

<sup>35</sup> Dit is die seuns van Efraim volgens hulle geslagte: van Sutélag die geslag van die Sutalgiete; van Beger die geslag van die Bagriete; van Tahan die geslag van die Tahaniete.

<sup>36</sup> En dit is die seuns van Sutélag: van Eran die geslag van die Eraniete.

<sup>37</sup> Dit is die geslagte van die seuns van Efraim volgens hulle geteldes, twee-en-dertigduisend-vyfhonderd. Dit is die seuns van Josef volgens hulle geslagte.

<sup>38</sup> Die seuns van Benjamin volgens hulle geslagte: van Bela die geslag van die Baliete; van Asbel die geslag van die Asbeliete; van Ahíram die geslag van die Ahiramiete;

<sup>39</sup> van Sefúfam die geslag van die Sufamiete; van Hufam die geslag van die Hufamiete.

<sup>40</sup> En die seuns van Bela was: Ard en Naäman; van Ard die geslag van die Ardiete; van Naäman die geslag van die Naämiete.

<sup>41</sup> Dit is die seuns van Benjamin volgens hulle geslagte; en hulle geteldes was vyf-en-veertigduisend-seshonderd.

<sup>42</sup> Dit is die seuns van Dan volgens hulle geslagte: van Suham die geslag van die Suhamiete. Dit is die geslagte van Dan volgens hulle geslagte.

<sup>43</sup> Al die geslagte van die Suhamiete volgens hulle geteldes was vier-en-sestigduisend-vierhonderd.

<sup>44</sup> Die seuns van Aser volgens hulle geslagte: van Jimna die geslag van die Jimnaïete; van Jiswi die geslag van die Jiswiete; van Bería die geslag van die Beriïete;

<sup>45</sup> van die seuns van Bería: van Heber die geslag van die Hebriete; van Máلكiël die geslag van die Malkiëliete.

<sup>46</sup> En die naam van die dogter van Aser was Serag.

<sup>47</sup> Dit is die geslagte van die seuns van Aser volgens hulle geteldes, drie-en-vyftigduisend-vierhonderd.

<sup>48</sup> Die seuns van Náftali volgens hulle geslagte: van Jágseël die geslag van die Jagseëliete; van Guni die geslag van die Guniete;

<sup>49</sup> van Jeser die geslag van die Jisriete; van Sillem die geslag van die Sillemiete.

<sup>50</sup> Dit is die geslagte van Náftali volgens hulle geslagte; en hulle geteldes was vyf-en-veertigduisend-vierhonderd.

<sup>51</sup> Dit is die geteldes van die kinders van

## Númeri 27

Israel: seshonderd-en-eenduisend-sewehonderd-en-dertig.

<sup>52</sup> En die HERE het met Moses gespreek en gesê:

<sup>53</sup> Vir hierdie mense moet die land as erfenis verdeel word volgens die getal name.

<sup>54</sup> Vir die wat baie is, moet jy hulle erfdeel groot maak; en vir die wat min is, moet jy hulle erfdeel klein maak; aan elke stam moet sy erfdeel volgens sy geteldes gegee word.

<sup>55</sup> Nogtans moet die land deur die lot verdeel word; volgens die name van hulle voorvaderlike stamme moet hulle erwe.

<sup>56</sup> Volgens die lot moet hulle erfenis verdeel word tussen die wat baie en die wat min is.

<sup>57</sup> En dit is die geteldes van Levi volgens hulle geslagte: van Gerson die geslag van die Gersoniete; van Kehat die geslag van die Kehatiete; van Merári die geslag van die Merariete.

<sup>58</sup> Dit is die geslagte van Levi: die geslag van die Libniete, die geslag van die Hebroniete, die geslag van die Magliete, die geslag van die Musiete, die geslag van die Koragiete. En Kehat was die vader van Amram.

<sup>59</sup> En die naam van Amram se vrou was Jogébed, die dogter van Levi wat vir Levi in Egipte gebore is; en vir Amram het sy gebaar: Aäron en Moses en Mirjam, hulle suster.

<sup>60</sup> En vir Aäron is gebore: Nadab en Abihu, Eleásar en Ítamar.

<sup>61</sup> En Nadab en Abihu het gesterwe toe

hulle vreemde vuur voor die aangesig van die HERE gebring het.

<sup>62</sup> En hulle geteldes was drie-en-twintigduisend, almal wat manlik was van 'n maand oud en daarbo. Want hulle is nie getel onder die kinders van Israel nie, omdat aan hulle geen erfdeel onder die kinders van Israel gegee is nie.

<sup>63</sup> Dit is hulle wat deur Moses en die priester Eleásar getel is, wat die kinders van Israel in die vlaktes van Moab getel het, by die Jordaan van Jérigo.

<sup>64</sup> En onder hulle was daar niemand van die wat deur Moses en die priester Aäron getel is nie, toe hulle die kinders van Israel in die woestyn Sinai getel het.

<sup>65</sup> Want die HERE het van hulle gesê: Sterwe sal hulle in die woestyn! En van hulle het niemand oorgebly nie buiten Kaleb, die seun van Jefúnne, en Josua, die seun van Nun.

**27** DAARNA het nader gekom die dogters van Selófhad, die seun van Hefer, die seun van Gílead, die seun van Magir, die seun van Manasse, van die geslagte van Manasse, die seun van Josef—dit is die name van sy dogters: Magla, Noa en Hogla en Milka en Tirsa —  
<sup>2</sup> en hulle het gaan staan voor Moses en die priester Eleásar en voor die owerstes en die hele vergadering, by die ingang van die tent van samekoms, en gesê:

<sup>3</sup> Ons vader het in die woestyn gesterwe, en hy het nie behoort by die bende van die wat teen die HERE vergader het in die bende van Korag nie, maar hy het om sy sonde ontwil gesterwe en geen seuns

## Númeri 28

---

gehad nie.

<sup>4</sup> Waarom sou die naam van ons vader uit sy geslag weggeneem word, omdat hy geen seun gehad het nie? Gee ons 'n besitting onder die broers van ons vader.

<sup>5</sup> Toe bring Moses hulle regsak voor die aangesig van die HERE.

<sup>6</sup> En die HERE het met Moses gespreek en gesê:

<sup>7</sup> Die dogters van Selófhad praat reg. Jy moet hulle sekerlik 'n erflike besitting onder die broers van hulle vader gee en die erfdeel van hulle vader op hulle laat oorgaan.

<sup>8</sup> En met die kinders van Israel moet jy spreek en sê: As iemand sterwe en geen seun het nie, moet julle sy erfdeel op sy dogter laat oorgaan.

<sup>9</sup> En as hy geen dogter het nie, moet julle sy erfdeel aan sy broers gee.

<sup>10</sup> En as hy geen broers het nie, moet julle sy erfdeel aan die broers van sy vader gee.

<sup>11</sup> En as sy vader geen broers het nie, moet julle sy erfdeel aan sy bloedverwant gee wat naaste aan hom is uit sy geslag, en dié moet dit in besit neem. En dit moet vir die kinders van Israel 'n regsinsetting wees, soos die HERE Moses beveel het.

<sup>12</sup> DAARNA het die HERE aan Moses gesê: Klim op hierdie gebergte Abárim, en bekijk die land wat Ek aan die kinders van Israel gegee het.

<sup>13</sup> En as jy dit gesien het, sal jy ook by jou volksgenote versamel word soos jou broer Aäron versamel is;

<sup>14</sup> omdat julle in die woestyn Sin, toe die vergadering getwis het, teen my bevel

wederstrewig gewees het om My by die water voor hulle oë te heilig. Dit is die water van Mériba by Kades, in die woestyn Sin.

<sup>15</sup> Toe het Moses met die HERE gespreek en gesê:

<sup>16</sup> Laat die HERE, die God van die geeste van alle vlees, 'n man oor die vergadering aanstel

<sup>17</sup> wat voor hulle uittrek en wat voor hulle intrek, en wat hulle uitlei en wat hulle inlei; sodat die vergadering van die HERE nie mag wees soos skape wat geen wagter het nie.

<sup>18</sup> Toe sê die HERE aan Moses: Neem vir jou Josua, die seun van Nun, 'n man in wie die Gees is; en lê hom die hand op,

<sup>19</sup> en stel hom voor die priester Eleásar en voor die hele vergadering, en gee hom 'n opdrag voor hulle oë;

<sup>20</sup> en lê op hom van jou hoogheid, sodat die hele vergadering van die kinders van Israel na hom kan luister.

<sup>21</sup> En hy moet voor die priester Eleásar staan, dat dié vir hom die beslissing van die Urim kan vra voor die aangesig van die HERE; volgens sy uitspraak moet hulle uittrek en volgens sy uitspraak moet hulle intrek, hy en al die kinders van Israel saam met hom en die hele vergadering.

<sup>22</sup> En Moses het gedoen soos die HERE hom beveel het: hy het Josua geneem en hom voor die priester Eleásar en voor die hele vergadering gestel,

<sup>23</sup> en hy het hom die hande opgelê en hom 'n opdrag gegee soos die HERE deur die diens van Moses gespreek het.

**28** VERDER het die  
HERE met Moses gespreek en gesê:

<sup>2</sup> Gee bevel aan die kinders van Israel en sê vir hulle: Julle moet daarvoor sorg om my offer, my spys vir my vuuroffers as lieflike geur vir My, op die bepaalde tyd aan My te bring.

<sup>3</sup> En jy moet vir hulle sê: Dit is die vuuroffer wat julle aan die HERE moet bring: twee jaaroud lammers sonder gebrek elke dag as 'n voortdurende brandoffer.

<sup>4</sup> Die een lam moet jy in die môre berei, en die ander lam moet jy teen die aand berei;

<sup>5</sup> met 'n tiende van 'n efa fynmeel as spysoffer, gemeng met 'n kwart-hin uitgestampde olie.

<sup>6</sup> Dit is die voortdurende brandoffer wat by die berg Sinai ingestel is as lieflike geur, 'n vuuroffer aan die HERE.

<sup>7</sup> En die drankoffer wat daarby behoort, moet wees 'n kwart-hin vir elke lam. In die heiligdom moet jy die drankoffer van sterk drank aan die HERE uitgiet.

<sup>8</sup> En die ander lam moet jy teen die aand berei; met dieselfde spysoffer as in die môre en met die drankoffer wat daarby behoort, moet jy dit berei—'n vuuroffer van lieflike geur aan die HERE.

<sup>9</sup> MAAR op die sabbatdag twee jaaroud lammers sonder gebrek en twee-tiendes van 'n efa fynmeel as spysoffer, met olie gemeng, en die drankoffer wat daarby behoort.

<sup>10</sup> Dit is die brandoffer van die sabbat op elke sabbat, behalwe die voortdurende brandoffer en die drankoffer wat daarby

behoort.

<sup>11</sup> En by die begin van julle maande moet julle 'n brandoffer aan die HERE bring: twee jong bulle en een ram, sewe jaaroud lammers sonder gebrek;

<sup>12</sup> en drie-tiendes van 'n efa fynmeel as spysoffer, met olie gemeng, vir elke bul, en twee-tiendes fynmeel as spysoffer, met olie gemeng, vir die een ram;

<sup>13</sup> en een-tiende fynmeel as spysoffer, met olie gemeng, vir elke lam. Dit is 'n brandoffer, 'n lieflike geur, 'n vuuroffer aan die HERE.

<sup>14</sup> En hulle drankoffers moet wees 'n half-hin wyn vir 'n bul en 'n derde van 'n hin vir 'n ram en 'n kwart-hin vir 'n lam. Dit is die brandoffer by elke nuwemaan, vir die maande van die jaar.

<sup>15</sup> Ook moet een bokram as sondoffer aan die HERE berei word, behalwe die voortdurende brandoffer en die drankoffer wat daarby behoort.

<sup>16</sup> EN in die eerste maand, op die veertiende dag van die maand, is die pasga van die HERE.

<sup>17</sup> En op die vyftiende dag van hierdie maand is dit fees; sewe dae lank moet ongesuurde brode geëet word.

<sup>18</sup> Op die eerste dag moet daar 'n heilige samekoms wees; géén beroepswerk mag julle doen nie.

<sup>19</sup> Maar julle moet as vuuroffer, as brandoffer aan die HERE bring: twee jong bulle en een ram en sewe jaaroud lammers; sonder gebrek moet hulle vir julle wees.

<sup>20</sup> En hulle spysoffer fynmeel met olie gemeng: drie-tiendes van 'n efa vir 'n bul

## Númeri 29

en twee-tiendes vir 'n ram moet julle berei.

<sup>21</sup> Een-tiende moet jy vir elke lam van die sewe lammers berei.

<sup>22</sup> Daarby een bokram as sondoffer om vir julle versoening te doen.

<sup>23</sup> Behalwe die môrebrandoffer, wat as voortdurende brandoffer dien, moet julle dit berei.

<sup>24</sup> Op dié manier moet julle elke dag, sewe dae lank, die vuurofferspys van lieflike geur vir die HERE berei; by die voortdurende brandoffer moet dit berei word—en die drankoffer wat daarby behoort.

<sup>25</sup> En op die sewende dag moet daar vir julle 'n heilige samekoms wees; géén beroepswerk mag julle doen nie.

<sup>26</sup> En op die dag van die eersteling, as julle 'n nuwe spysoffer by julle fees van die weke aan die HERE bring, moet daar vir julle 'n heilige samekoms wees; géén beroepswerk mag julle doen nie.

<sup>27</sup> Dan moet julle 'n brandoffer as lieflike geur aan die HERE bring: twee jong bulle, een ram, sewe jaaroud lammers;

<sup>28</sup> en hulle spysoffer: fynmeel met olie gemeng, drie-tiendes vir elke bul, twee-tiendes vir die een ram,

<sup>29</sup> een-tiende vir elke lam van die sewe lammers;

<sup>30</sup> een bokram om vir julle versoening te doen.

<sup>31</sup> Behalwe die voortdurende brandoffer en die spysoffer wat daarby behoort, moet julle dit berei—hulle moet vir julle sonder gebrek wees—en hulle drankoffers.

eerste van die maand, moet daar vir julle 'n heilige samekoms wees; géén beroepswerk mag julle doen nie; dit moet vir julle 'n dag van trompetgeklank wees.

<sup>2</sup> Dan moet julle 'n brandoffer as lieflike geur vir die HERE berei: een jong bul, een ram, sewe jaaroud lammers sonder gebrek;

<sup>3</sup> en hulle spysoffer: fynmeel met olie gemeng, drie-tiendes van 'n efa vir die bul, twee-tiendes vir die ram,

<sup>4</sup> en een-tiende vir elke lam van die sewe lammers;

<sup>5</sup> en een bokram as sondoffer om vir julle versoening te doen;

<sup>6</sup> behalwe die brandoffer van die nuwemaan en die spysoffer wat daarby behoort, en die voortdurende brandoffer en die spysoffer wat daarby behoort, en hulle drankoffers volgens die daarvoor geldende voorskrif—tot 'n lieflike geur, 'n vuuroffer aan die HERE.

<sup>7</sup> En op die tiende van hierdie sewende maand moet daar vir julle 'n heilige samekoms wees, en julle moet julle verootmoedig; géén werk mag julle doen nie.

<sup>8</sup> Dan moet julle 'n brandoffer as lieflike geur aan die HERE bring: een jong bul, een ram, sewe jaaroud lammers; sonder gebrek moet hulle vir julle wees;

<sup>9</sup> en hulle spysoffer: fynmeel met olie gemeng, drie-tiendes vir die bul, twee-tiendes vir die een ram,

<sup>10</sup> een-tiende vir elke lam van die sewe lammers;

<sup>11</sup> een bokram as sondoffer, behalwe die sondoffer van versoening en die

**29** EN in die sewende maand, op die

## Númeri 29

---

voortdurende brandoffer en die spysoffer wat daarby behoort—en hulle drankoffers.

<sup>12</sup> En op die vyftiende dag van die sewende maand moet daar vir julle 'n heilige samekoms wees; géén beroepswerk mag julle doen nie, maar julle moet sewe dae lank vir die HERE 'n fees vier.

<sup>13</sup> En julle moet as brandoffer, as vuuroffer van lieflike geur aan die HERE bring: dertien jong bulle, twee ramme, veertien jaaroud lammers; sonder gebrek moet hulle wees;

<sup>14</sup> en hulle spysoffer: fynmeel met olie gemeng, drie-tiendes vir elke bul van die dertien bulle, twee-tiendes vir elke ram van die twee ramme,

<sup>15</sup> en een-tiende vir elke lam van die veertien lammers;

<sup>16</sup> en een bokram as sondoffer, behalwe die voortdurende brandoffer, die spysoffer en die drankoffer wat daarby behoort.

<sup>17</sup> Daarna op die tweede dag: twaalf jong bulle, twee ramme, veertien jaaroud lammers sonder gebrek;

<sup>18</sup> en hulle spysoffer en hulle drankoffers vir die bulle, die ramme en die lammers, na hulle getal, volgens die voorskrif;

<sup>19</sup> en een bokram as sondoffer, behalwe die voortdurende brandoffers, en die spysoffer en drankoffers wat daarby behoort.

<sup>20</sup> En op die derde dag: elf bulle, twee ramme, veertien jaaroud lammers sonder gebrek;

<sup>21</sup> en hulle spysoffer en hulle drankoffers vir die bulle, die ramme en die lammers, na hulle getal, volgens die voorskrif;

<sup>22</sup> en een bokram as sondoffer, behalwe die

voortdurende brandoffer, en die spysoffer en die drankoffer wat daarby behoort.

<sup>23</sup> Verder op die vierde dag: tien bulle, twee ramme, veertien jaaroud lammers sonder gebrek;

<sup>24</sup> hulle spysoffer en hulle drankoffers vir die bulle, die ramme en die lammers, na hulle getal, volgens die voorskrif;

<sup>25</sup> en een bokram as sondoffer, behalwe die voortdurende brandoffer, die spysoffer en die drankoffer wat daarby behoort.

<sup>26</sup> En op die vyfde dag: nege bulle, twee ramme en veertien jaaroud lammers sonder gebrek;

<sup>27</sup> en hulle spysoffer en hulle drankoffers vir die bulle, die ramme en die lammers, na hulle getal, volgens die voorskrif;

<sup>28</sup> en een bokram as sondoffer, behalwe die voortdurende brandoffer, en die spysoffer en die drankoffer wat daarby behoort.

<sup>29</sup> Daarna op die sesde dag: agt bulle, twee ramme, veertien jaaroud lammers sonder gebrek;

<sup>30</sup> en hulle spysoffer en hulle drankoffers vir die bulle, die ramme en die lammers, na hulle getal, volgens die voorskrif;

<sup>31</sup> en een bokram as sondoffer, behalwe die voortdurende brandoffer, die spysoffer en die drankoffer wat daarby behoort.

<sup>32</sup> En op die sewende dag: sewe bulle, twee ramme, veertien jaaroud lammers sonder gebrek;

<sup>33</sup> en hulle spysoffer en hulle drankoffers vir die bulle, die ramme en die lammers, na hulle getal, volgens die daarvoor geldende voorskrif;

<sup>34</sup> en een bokram as sondoffer, behalwe die



## Númeri 30

---

voortdurende brandoffer, die spysoffer en die drankoffer wat daarby behoort.

<sup>35</sup> Op die agtste dag moet daar vir julle 'n feestyd wees; géén beroepswerk mag julle doen nie.

<sup>36</sup> En julle moet as brandoffer, as vuuroffer van lieflike geur aan die HERE bring: een bul, een ram, sewe jaaroud lammers sonder gebrek;

<sup>37</sup> hulle spysoffer en hulle drankoffers vir die bul, die ram en die lammers, na hulle getal, volgens die voorskrif;

<sup>38</sup> en een bokram as sondoffer, behalwe die voortdurende brandoffer, en die spysoffer en die drankoffer wat daarby behoort.

<sup>39</sup> Dit moet julle tot eer van die HERE op jul feestye berei, behalwe julle geloftes en julle vrywillige gawes, of dit al brandoffers is of spysoffers of drankoffers of dankoffers.

<sup>40</sup> En Moses het aan die kinders van Israel alles gesê net soos die HERE Moses beveel het.

**30** EN Moses het met die stamhoofde van die kinders van Israel gespreek en gesê: Dit is die saak wat die HERE beveel het:

<sup>2</sup> As iemand aan die HERE 'n gelofte doen of 'n eed sweer waardeur hy homself verbind om hom van iets te onthou, moet hy sy woord nie breek nie; hy moet handel volgens alles wat uit sy mond uitgaan.

<sup>3</sup> Maar as 'n vrou aan die HERE 'n gelofte doen of haarself verbind om haar te onthou, terwyl sy in haar vader se huis is in haar jeug,

<sup>4</sup> en haar vader van haar gelofte hoor of

van die onthouding waartoe sy haarself verbind het, en haar vader swyg teenoor haar, dan sal al haar geloftes van krag wees, en elke onthouding waartoe sy haarself verbind het, sal van krag wees.

<sup>5</sup> Maar as haar vader haar terughou op die dag dat hy daarvan hoor, sal al haar geloftes en elke onthouding waartoe sy haarself verbind het, nie van krag wees nie; en die HERE sal haar dit vergewe, omdat haar vader haar teruggehou het.

<sup>6</sup> Maar as sy trou terwyl haar geloftes op haar rus of iets wat onverskillig uitgespreek is, waardeur sy haarself verbind het,

<sup>7</sup> en haar man daarvan hoor, op watter dag ook al, en teenoor haar swyg, dan sal haar geloftes van krag wees, en elke onthouding waartoe sy haarself verbind het, sal van krag wees.

<sup>8</sup> Maar as haar man op die dag dat hy daarvan hoor, haar terughou, dan maak hy haar gelofte tot niet wat op haar rus, en ook wat onverskillig uitgespreek is, waardeur sy haarself verbind het; en die HERE sal haar dit vergewe.

<sup>9</sup> Maar die gelofte van 'n weduwee of van 'n vrou wat verstoot is—alles waardeur sy haarself verbind het, sal vir haar van krag wees.

<sup>10</sup> En as sy in die huis van haar man 'n gelofte doen of haarself met 'n eed verbind om haar te onthou,

<sup>11</sup> en haar man daarvan hoor en teenoor haar swyg, haar nie terughou nie, dan sal al haar geloftes van krag wees, en elke onthouding waartoe sy haarself verbind

## Númeri 31

het, sal van krag wees.

<sup>12</sup> Maar as haar man die dinge uitdruklik tot niet maak op die dag dat hy daarvan hoor, sal niks van alles wat uit haar lippe uitgegaan het, van haar geloftes of van die verbintenis tot onthouding, van krag wees nie; haar man het dit tot niet gemaak, en die HERE sal haar dit vergewe.

<sup>13</sup> Elke gelofte en elke eed van onthouding om die siel te verootmoedig—haar man kan dit van krag maak, en haar man kan dit tot niet maak.

<sup>14</sup> Maar as haar man van dag tot dag geheel en al teenoor haar swyg, dan maak hy al haar geloftes of elke onthouding waartoe sy verbind is, van krag; hy het dit van krag gemaak, want hy het teenoor haar geswyg op die dag dat hy daarvan gehoor het.

<sup>15</sup> Maar as hy dit uitdruklik tot niet maak nadat hy al daarvan gehoor het, dan dra hy haar ongeregtigheid.

<sup>16</sup> Dit is die insettinge wat die HERE Moses beveel het tussen 'n man en sy vrou, tussen 'n vader en sy dogter terwyl sy in haar jeug in haar vader se huis is.

**31** EN die HERE het met Moses gespreek en gesê:

<sup>2</sup> Neem wraak vir die kinders van Israel op die Midianiete; daarna sal jy by jou volksgenote versamel word.

<sup>3</sup> Daarop het Moses met die volk gespreek en gesê: Laat manne uit julle midde hul vir die oorlog wapen, dat hulle teen Mídián kan trek om die wraakgerig van die HERE aan Mídián te voltrek.

<sup>4</sup> Duisend vir elke stam van al die stamme

van Israel moet julle na die oorlog stuur.

<sup>5</sup> Toe is daar uit die duisende van Israel duisend vir elke stam gelewer, twaalfduisend wat vir die oorlog gewapen was.

<sup>6</sup> En Moses het hulle na die oorlog gestuur, duisend vir elke stam, hulle en Pínehas, die seun van die priester Eleásar, na die oorlog, met die heilige voorwerpe en die trompette by hom om alarm te blaas.

<sup>7</sup> En hulle het oorlog toe getrek teen Mídián, soos die HERE Moses beveel het, en al die manlike persone gedood.

<sup>8</sup> Ook het hulle die konings van Mídián gedood by die wat hulle verslaan het: Ewi en Rekem en Sur en Hur en Reba, die vyf konings van Mídián; ook het hulle Bíleam, die seun van Beor, met die swaard gedood.

<sup>9</sup> Maar die kinders van Israel het die vroue van die Midianiete en hulle kinders as gevangenes weggevoer, en al hulle lasdiere en al hulle vee en al hulle rykdom geroof.

<sup>10</sup> Verder, al hulle stede in hulle woonplekke en al hulle laers het hulle met vuur verbrand

<sup>11</sup> en al die roof geneem en al die buit, mense en diere.

<sup>12</sup> Daarna het hulle die gevangenes en die buit en die roof na Moses en die priester Eleásar en na die vergadering van die kinders van Israel gebring in die laer, in die vlaktes van Moab wat by die Jordaan van Jérido is.

<sup>13</sup> En toe Moses en die priester Eleásar en al die owerstes van die vergadering hulle buitekant die laer tegemoetgaan,

<sup>14</sup> het Moses kwaad geword vir die

## Númeri 31

---

aanvoerders van die leër, die owerstes oor duisend en die owerstes oor honderd wat van die veldtog af gekom het.

<sup>15</sup> En Moses het vir hulle gesê: Het julle al die vroue laat lewe?

<sup>16</sup> Kyk, hulle was, deur die raad van Bileam, vir die kinders van Israel 'n oorsaak van troubreuk teenoor die HERE in die saak van Peor, sodat die plaag in die vergadering van die HERE was.

<sup>17</sup> Maak dan nou dood almal wat van die manlike geslag onder die kinders is; en maak dood elke vrou wat gemeenskap met 'n man gehad het.

<sup>18</sup> Maar laat al die kinders onder die vroulike persone wat geen gemeenskap met 'n man gehad het nie, vir julle in die lewe bly.

<sup>19</sup> En julle, slaan sewe dae lank 'n kamp op buitekant die laer; elkeen wat 'n mens gedood en elkeen wat aan 'n gesneuwelde geraak het—julle moet jul op die derde dag en op die sewende dag ontsondig, julle en jul gevangenes.

<sup>20</sup> Ook moet julle al die klere en elke ding van leer en alles wat van bokhaar gemaak is, en elke ding van hout ontsondig.

<sup>21</sup> En die priester Eleásar het aan die krygsmanne wat na die oorlog getrek het, gesê: Dit is die wetsinsetting wat die HERE Moses beveel het.

<sup>22</sup> Net die goud en die silwer, die koper, die yster, die tin en die lood —

<sup>23</sup> elke ding wat in die vuur kan kom—moet julle deur die vuur laat deurgaen, en dit sal rein wees; ewenwel moet dit deur reinigingswater ontsondig

word; maar alles wat nie in die vuur kan kom nie, moet julle deur die water laat deurgaen.

<sup>24</sup> Julle moet ook jul klere op die sewende dag was; dan sal julle rein wees; en daarna mag julle in die laer kom.

<sup>25</sup> Verder het die HERE met Moses gespreek en gesê:

<sup>26</sup> Neem die volle getal op van wat as buit weggevoer is, van mense en van diere, jy en die priester Eleásar en die familiehoofde van die vergadering;

<sup>27</sup> en verdeel die buit tussen die wat met die oorlog te doen gehad het, wat op kommando uitgetrek het, én die hele vergadering.

<sup>28</sup> En hef 'n bydrae vir die HERE van die krygsmanne wat na die oorlog uitgetrek het—een uit elke vyfhonderd—van die mense en van die beeste en van die esels en van die kleinvee.

<sup>29</sup> Van hulle helfte moet julle dit neem, en gee dit aan die priester Eleásar as 'n offergawe aan die HERE.

<sup>30</sup> Maar uit die helfte van die kinders van Israel moet jy een neem, uitgehaal uit elke vyftig, uit die mense, uit die beeste, uit die esels en die kleinvee, uit al die diere; en jy moet dit aan die Leviete gee wat die diens by die tabernakel van die HERE waarneem.

<sup>31</sup> En Moses en die priester Eleásar het gedoen soos die HERE Moses beveel het.

<sup>32</sup> En die buit, die oorskot van die roof wat die krygsmanne geneem het, was seshonderd-vyf-en-sewentigduisend stuks kleinvee;

<sup>33</sup> en twee-en-sewentigduisend beeste;

## Númeri 32

<sup>34</sup> en een-en-sestigduisend esels;  
<sup>35</sup> en mensesiele, uit die vroulike persone wat geen gemeenskap met 'n man gehad het nie, al die siele was twee-en-dertigduisend.  
<sup>36</sup> En die helfte, die deel van hulle wat na die oorlog uitgetrek het, was in getal driehonderd-sewen-en-dertigduisend-vyfhonderd stuks kleinvee.  
<sup>37</sup> En die bydrae aan die HERE uit die kleinvee was seshonderd-vyf-en-sewentig.  
<sup>38</sup> En die beeste was ses-en-dertigduisend, en die bydrae daarvan aan die HERE twee-en-sewentig.  
<sup>39</sup> En die esels was dertigduisend-vyfhonderd, en die bydrae daarvan aan die HERE een-en-sestig.  
<sup>40</sup> En mensesiele was sestienduisend, en die bydrae daarvan aan die HERE twee-en-dertig siele.  
<sup>41</sup> En Moses het aan die priester Eleásar die bydrae gegee wat as offergawe aan die HERE bestem was, soos die HERE Moses beveel het.  
<sup>42</sup> En uit die helfte van die kinders van Israel wat Moses van die vegsmanne afgedeel het —  
<sup>43</sup> die helfte van die vergadering uit die kleinvee was driehonderd-sewen-en-dertigduisend-vyfhonderd;  
<sup>44</sup> en die beeste was ses-en-dertigduisend;  
<sup>45</sup> en die esels dertigduisend-vyfhonderd;  
<sup>46</sup> en mensesiele sestienduisend —  
<sup>47</sup> uit die helfte van die kinders van Israel het Moses geneem—van wat uitgehaal was, een uit elke vyftig, van mense en van diere—en hy het dit aan die Leviëte gegee

wat die diens by die tabernakel van die HERE waarneem, soos die HERE Moses beveel het.

<sup>48</sup> Toe het die aanvoerders oor die duisende van die leër, die owerstes oor duisend en die owerstes oor honderd, nader gekom na Moses

<sup>49</sup> en aan Moses gesê: U dienaars het die volle getal van die krygs-manne opgeneem wat onder ons bevel was, en daarvan word nie een vermis nie.

<sup>50</sup> Daarom bring elkeen van ons as offer aan die HERE wat hy aan goue goed gevind het: armkettings en armbande, vingerringe, oorringe en halssierade, om versoening te doen vir ons siele voor die aangesig van die HERE.

<sup>51</sup> Toe het Moses en die priester Eleásar die goud, allerhande kunsvoorwerpe, van hulle aangeneem.

<sup>52</sup> En al die goud van die offergawe wat hulle aan die HERE afgegee het, was sestienduisend-sewehonderd-en-vyftig sikkels, afkomstig van die owerstes oor duisend en die owerstes oor honderd.

<sup>53</sup> Die krygsmanne het elkeen na welgevalle buitgemaak.

<sup>54</sup> So het Moses en die priester Eleásar dan die goud van die owerstes oor duisend en oor honderd aangeneem en dit in die tent van samekoms gebring om die kinders van Israel voor die aangesig van die HERE in gedagtenis te bring.

**32** EN die kinders van Ruben en die kinders van Gad het baie vee gehad, 'n groot menigte. En toe hulle die land van Jaéser en die land Gílead bekyk

## Númeri 32

---

het, vind hulle uit dat die plek 'n plek vir vee was.

<sup>2</sup> Daarop het die kinders van Gad en die kinders van Ruben gekom en met Moses en die priester Eleásar en met die owerstes van die vergadering gespreek en gesê:

<sup>3</sup> Átarot en Dibon en Jaéser en Nimra en Hesbon en Eleále en Sebam en Nebo en Behon —

<sup>4</sup> die land wat die HERE voor die vergadering van Israel uit verower het—is 'n land vir vee, en u dienaars het vee.

<sup>5</sup> Verder het hulle gesê: As ons genade in u oë gevind het, laat hierdie land aan u dienaars as 'n besitting gegee word; bring ons nie oor die Jordaan nie.

<sup>6</sup> Maar Moses het die kinders van Gad en die kinders van Ruben geantwoord: Sal julle broers oorlog toe trek, en wil julle hier bly?

<sup>7</sup> Waarom tog wil julle die hart van die kinders van Israel daarvan afkerig maak om deur te trek in die land wat die HERE aan hulle gegee het?

<sup>8</sup> So het julle vaders gedoen toe ek hulle van Kades-Barnéa af gestuur het om die land te bekyk.

<sup>9</sup> Toe hulle tot by die dal Eskol opgetrek en die land bekyk het, het hulle die hart van die kinders van Israel afkerig gemaak om in die land in te trek wat die HERE aan hulle gegee het.

<sup>10</sup> Daarom het die toorn van die HERE dieselfde dag ontvlam, en Hy het gesweer en gesê:

<sup>11</sup> Waarlik, geeneen van die manne wat uit Egipte opgetrek het, van twintig jaar oud

en daarbo, sal die land sien wat Ek aan Abraham, Isak en Jakob met 'n eed beloof het nie; want hulle het nie volhard om My te volg nie —

<sup>12</sup> behalwe Kaleb, die seun van Jefúnne, die Kenissiet, en Josua, die seun van Nun; want hulle het volhard om die HERE te volg.

<sup>13</sup> En die toorn van die HERE het teen Israel ontvlam, en Hy het hulle veertig jaar lank in die woestyn laat rondswerwe, totdat die hele geslag verteer was wat kwaad gedoen het in die oë van die HERE.

<sup>14</sup> En kyk, julle het opgestaan in die plek van julle vaders, 'n egte kroos van sondige mense, om die toornloed van die HERE teen Israel nog te vermeerder.

<sup>15</sup> As julle van Hom afvallig word, sal Hy hulle nog langer in die woestyn laat bly, en julle sal hierdie hele volk te gronde laat gaan.

<sup>16</sup> Toe kom hulle na hom toe aan en sê: Ons sal hier skaapkrale bou vir ons vee en stede vir ons kinders.

<sup>17</sup> Maar ons self sal ons haastig wapen voor die oë van die kinders van Israel, totdat ons hulle op hul woonplek bring; en ons kinders sal in die versterkte stede bly vanweë die bewoners van die land.

<sup>18</sup> Ons sal nie na ons huise teruggaan voordat die kinders van Israel elkeen in besit van sy erfdeel gekom het nie.

<sup>19</sup> Want ons sal nie saam met hulle wes van die Jordaan en verder weg erwe nie, omdat ons erfdeel duskant die Jordaan, teen sonop, ons s'n geword het.

<sup>20</sup> Toe sê Moses vir hulle: As julle dit doen,

## Númeri 32

---

as julle jul voor die aangesig van die HERE vir die oorlog wapen

<sup>21</sup> en elke gewapende man van julle voor die aangesig van die HERE deur die Jordaan trek, totdat Hy sy vyande voor sy aangesig uit verdrywe het

<sup>22</sup> en die land voor die aangesig van die HERE onderwerp is, en julle daarna teruggaan, dan sal julle vrygestel wees voor die HERE en voor Israel, en hierdie land sal vir julle 'n besitting word voor die aangesig van die HERE.

<sup>23</sup> Maar as julle nie so doen nie, kyk, dan sondig julle teen die HERE, en weet dan dat julle sonde julle sal uitvind.

<sup>24</sup> Bou vir julle stede vir jul kinders en krale vir jul kleinvee, en doen wat uit julle mond uitgegaan het.

<sup>25</sup> Toe het die kinders van Gad en die kinders van Ruben met Moses gespreek en gesê: U dienaars sal doen soos my heer beveel het.

<sup>26</sup> Ons kinders, ons vroue, ons vee en al ons lasdiere sal daar in die stede van Gílead bly;

<sup>27</sup> maar u dienaars, almal wat vir die oorlog gewapen is, sal voor die aangesig van die HERE na die oorlog oortrek soos my heer gespreek het.

<sup>28</sup> Toe het Moses aangaande hulle aan die priester Eleásar en aan Josua, die seun van Nun, en aan die familiehoofde uit die stamme van die kinders van Israel bevel gegee,

<sup>29</sup> en Moses het aan hulle gesê: As die kinders van Gad en die kinders van Ruben saam met julle deur die Jordaan trek, almal

wat vir die oorlog gewapen is, voor die aangesig van die HERE, en die land voor julle uit onderwerp is, gee dan aan hulle die land Gílead as 'n besitting.

<sup>30</sup> Maar as hulle nie gewapend saam met julle oortrek nie, moet hulle onder julle in die land Kanaän besittings verkry.

<sup>31</sup> En die kinders van Gad en die kinders van Ruben het geantwoord en gesê: Wat die HERE aan u dienaars gesê het, so sal ons doen.

<sup>32</sup> Ons sal gewapend oortrek voor die aangesig van die HERE na die land Kanaän, en ons erflike besitting oos van die Jordaan sal ons s'n wees.

<sup>33</sup> So het Moses dan aan hulle gegee, aan die kinders van Gad en die kinders van Ruben en die halwe stam van Manasse, die seun van Josef, die koninkryk van Sihon, koning van die Amoriete, en die koninkryk van Og, koning van Basan, die land volgens sy stede met die grondgebied wat daarby behoort, die stede van die land rondom.

<sup>34</sup> En die kinders van Gad het Dibon gebou en Átarot en Ároër

<sup>35</sup> en Áterot-Sofan en Jaéser en Jógbeha

<sup>36</sup> en Bet-Nimra en Bet-Haran, versterkte stede en skaapkrale.

<sup>37</sup> En die kinders van Ruben het Hesbon gebou en Eleále en Kirjataim

<sup>38</sup> en Nebo en Baäl-Meon—met verandering van die name—en Sibma; en hulle het die stede wat hulle gebou het, name gegee.

<sup>39</sup> En die seuns van Magir, die seun van Manasse, het na Gílead gegaan en dit

## Númeri 33

---

verower en die Amoriëte verdrywe wat daarin was.

<sup>40</sup> En Moses het Gílead aan Magir, die seun van Manasse, gegee; en hy het daarin gewoon.

<sup>41</sup> En Jaïr, die seun van Manasse, het gegaan en hulle tentdorpe ingeneem en dit tentdorpe van Jaïr genoem.

<sup>42</sup> En Nobag het gegaan en Kenat en die onderhorige plekke ingeneem en dit sy naam Nobag gegee.

**33** DIT is die trekke van die kinders van Israel wat uit Egipteland uitgetrek het volgens hulle leërafdelings, onder leiding van Moses en Aäron.

<sup>2</sup> Volgens die bevel van die HERE het Moses die plekke opgeskrywe vanwaar hulle van plek tot plek verder getrek het; en dit is hulle plekke vanwaar hulle al verder getrek het.

<sup>3</sup> Hulle het van Raämses af opgebreek in die eerste maand, op die vyftiende dag van die eerste maand; op die dag ná die pasga het die kinders van Israel deur 'n hoë hand voor die oë van al die Egiptenaars uitgetrek,

<sup>4</sup> terwyl die Egiptenaars besig was om dié te begrawe wat die HERE onder hulle verslaan het, al die eersgeborenes; ook het die HERE aan hulle gode strafgerigte voltrek.

<sup>5</sup> Toe die kinders van Israel van Raämses af opgebreek het, het hulle laer opgeslaan in Sukkot.

<sup>6</sup> En hulle het van Sukkot af opgebreek en laer opgeslaan in Etam wat aan die kant van die woestyn lê.

<sup>7</sup> En hulle het van Etam af opgebreek en weggedraai na Pi-Hágirot wat oos van Baäl-Sefon lê; en hulle het laer opgeslaan voor Migdol.

<sup>8</sup> En hulle het van Pi-Hágirot af opgebreek en dwarsdeur die see gegaan na die woestyn toe; en hulle het drie dagreise ver die woestyn van Etam ingetrek en laer opgeslaan in Mara.

<sup>9</sup> En hulle het van Mara af opgebreek en by Elim gekom; en in Elim was twaalf waterfonteine en sewentig palmbome, en hulle het daar laer opgeslaan.

<sup>10</sup> En hulle het van Elim af opgebreek en laer opgeslaan by die Skelfsee.

<sup>11</sup> En hulle het van die Skelfsee af opgebreek en laer opgeslaan in die woestyn Sin.

<sup>12</sup> En hulle het uit die woestyn Sin opgebreek en laer opgeslaan in Dofka.

<sup>13</sup> En hulle het van Dofka af opgebreek en laer opgeslaan in Alus.

<sup>14</sup> En hulle het van Alus af opgebreek en laer opgeslaan in Ráfidim; maar daar was geen water vir die volk om te drink nie.

<sup>15</sup> En hulle het van Ráfidim af opgebreek en laer opgeslaan in die woestyn Sinai.

<sup>16</sup> En hulle het uit die woestyn Sinai opgebreek en laer opgeslaan in Kibrot-Hattáäwa.

<sup>17</sup> En hulle het van Kibrot-Hat-táäwa af opgebreek en laer opgeslaan in Háserot.

<sup>18</sup> En hulle het van Háserot af opgebreek en laer opgeslaan in Ritma.

<sup>19</sup> En hulle het van Ritma af opgebreek en laer opgeslaan in Rimmon-Peres.

<sup>20</sup> En hulle het van Rimmon-Peres af

## Númeri 33

---

opgebreek en laer opgeslaan in Libna.

<sup>21</sup> En hulle het van Libna af opgebreek en laer opgeslaan in Rissa.

<sup>22</sup> En hulle het van Rissa af opgebreek en laer opgeslaan in Keheláta.

<sup>23</sup> En hulle het van Keheláta af opgebreek en laer opgeslaan by die berg Sefer.

<sup>24</sup> En hulle het van die berg Sefer af opgebreek en laer opgeslaan in Hárada.

<sup>25</sup> En hulle het van Hárada af opgebreek en laer opgeslaan in Mákhelot.

<sup>26</sup> En hulle het van Mákhelot af opgebreek en laer opgeslaan in Tahat.

<sup>27</sup> En hulle het van Tahat af opgebreek en laer opgeslaan in Terag.

<sup>28</sup> En hulle het van Terag af opgebreek en laer opgeslaan in Mitka.

<sup>29</sup> En hulle het van Mitka af opgebreek en laer opgeslaan in Hasmóna.

<sup>30</sup> En hulle het van Hasmóna af opgebreek en laer opgeslaan in Móserot.

<sup>31</sup> En hulle het van Móserot af opgebreek en laer opgeslaan in Bene-Jáákan.

<sup>32</sup> En hulle het van Bene-Jáákan af opgebreek en laer opgeslaan in Hor-Hággidgad.

<sup>33</sup> En hulle het van Hor-Hággidgad af opgebreek en laer opgeslaan in Jotbáta.

<sup>34</sup> En hulle het van Jotbáta af opgebreek en laer opgeslaan in Abróna.

<sup>35</sup> En hulle het van Abróna af opgebreek en laer opgeslaan in Éseon-Geber.

<sup>36</sup> En hulle het van Éseon-Geber af opgebreek en laer opgeslaan in die woestyn Sin, dit is Kades.

<sup>37</sup> En hulle het van Kades af opgebreek en laer opgeslaan by die berg Hor, aan die

kant van die land Edom.

<sup>38</sup> Toe het die priester Aäron volgens die bevel van die HERE op die berg Hor geklim en daar gesterwe, in die veertigste jaar ná die uittoeg van die kinders van Israel uit Egipteland, in die vyfde maand, op die eerste van die maand.

<sup>39</sup> En Aäron was honderd-drie-en-twintig jaar oud toe hy op die berg Hor gesterf het.

<sup>40</sup> En die Kanaäniet, die koning van Arad, wat in die Suidland in die land Kanaän gewoon het, het gehoor dat die kinders van Israel aankom.

<sup>41</sup> En hulle het van die berg Hor af opgebreek en laer opgeslaan in Sálmona.

<sup>42</sup> En hulle het van Sálmona af opgebreek en laer opgeslaan in Punon.

<sup>43</sup> En hulle het van Punon af opgebreek en laer opgeslaan in Obot.

<sup>44</sup> En hulle het van Obot af opgebreek en laer opgeslaan in Ijje-Haäbarim, by die grens van Moab.

<sup>45</sup> En hulle het van Ijje-Haäbarim af opgebreek en laer opgeslaan in Dibon-Gad.

<sup>46</sup> En hulle het van Dibon-Gad af opgebreek en laer opgeslaan in Almon-Diblataim.

<sup>47</sup> En hulle het van Almon-Diblataim af opgebreek en laer opgeslaan in die gebergte Abárim, voor Nebo.

<sup>48</sup> En hulle het van die gebergte Abárim af opgebreek en laer opgeslaan in die vlaktes van Moab, by die Jordaan van Jérijo.

<sup>49</sup> En hulle het laer opgeslaan by die Jordaan van Bet-Hajésimot af tot by Abel-Hassittim, in die vlaktes van Moab.

<sup>50</sup> En die HERE het met Moses gespreek in



## Númeri 34

die vlaktes van Moab, by die Jordaan van Jérigo, en gesê:

<sup>51</sup> Spreek met die kinders van Israel en sê vir hulle: As julle deur die Jordaan in die land Kanaän intrek,

<sup>52</sup> moet julle al die bewoners van die land voor julle uit verdrywe en hulle beeldhouwerk verniel; ook moet julle al hulle gegote beelde verniel en al hulle hoogtes verwoes.

<sup>53</sup> En julle moet die land in besit neem en daarin woon; want Ek het die land aan julle gegee om dit te besit.

<sup>54</sup> En julle moet die land deur die lot as erfdeel verwerwe, volgens julle geslagte; vir die wat baie is, moet julle hulle erfdeel groot maak, en vir die wat min is, moet jy hulle erfdeel klein maak. Waar die lot vir iemand val, moet dit sy deel wees; volgens julle vaderlike stamme moet julle dit as erfdeel verwerwe.

<sup>55</sup> Maar as julle die bewoners van die land nie voor julle uit verdrywe nie, sal die wat julle van hulle laat oorbly, soos dorings in julle oë wees en soos angels in julle sye, en hulle sal julle beveg in die land waar julle in woon.

<sup>56</sup> En soos Ek gedink het om aan hulle te doen, sal Ek aan julle doen.

**34** VERDER het die HERE met Moses gespreek en gesê:

<sup>2</sup> Gee bevel aan die kinders van Israel en sê vir hulle: As julle in die land Kanaän kom, sal dit die land wees wat aan julle as erfdeel sal val; die land Kanaän volgens sy grense.

<sup>3</sup> Julle suidekant dan moet van die

woestyn Sin af langs Edom wees; en julle suidelike grens moet aan die oostekant van die einde van die Soutsee af wees;

<sup>4</sup> en julle grens moet suid van Skerpioennek swaai en oorloop na Sin toe, totdat dit doodloop suid van Kades-Barnéa; dan moet dit aanloop na Hasar-Addar en oor na Asmon toe.

<sup>5</sup> Verder moet die grens swaai van Asmon af na die spruit van Egipte toe, sodat dit by die see doodloop.

<sup>6</sup> Aangaande die westelike grens, dit moet vir julle die Groot See saam met sy gebied wees; dit moet julle westelike grens wees.

<sup>7</sup> En dit moet julle noordelike grens wees: van die Groot See af moet julle jul grenslyn trek na die berg Hor.

<sup>8</sup> Van die berg Hor af moet julle die grenslyn trek tot by die ingang na Hamat; en die grens moet doodloop by Sedad.

<sup>9</sup> Dan moet die grens aanloop na Sifron toe, en dit moet doodloop by Hasar-Enan. Dit moet julle noordelike grens wees.

<sup>10</sup> Verder moet julle as jul oostelike grens die lyn trek van Hasar-Enan af na Sefam toe.

<sup>11</sup> En die grens moet afloop van Sefam af na Haribla toe, oos van Ajin; dan moet die grens afloop en skrams oor die hange van die meer Kinnéret gaan, aan die oostekant.

<sup>12</sup> Verder moet die grens afloop na die Jordaan totdat dit doodloop by die Soutsee. Dit moet vir julle die land wees volgens sy grense rondom.

<sup>13</sup> En Moses het aan die kinders van Israel bevel gegee en gesê: Dit is die land wat julle deur die lot as erfdeel sal verwerwe,

## Númeri 35

wat die HERE beveel het om aan die nege stamme en aan die halwe stam te gee.

<sup>14</sup> Want die stam van die kinders van die Rubeniete volgens hulle families en die stam van die kinders van die Gadiete volgens hulle families en die halwe stam van Manasse het al ontvang—hulle het hul erfdeel ontvang.

<sup>15</sup> Die twee stamme en die halwe stam het hulle erfdeel aan die oostekant van die Jordaan van Jérigo, teen sonop, ontvang.

<sup>16</sup> Verder het die HERE met Moses gespreek en gesê:

<sup>17</sup> Dit is die name van die manne wat vir julle die land as erfenis moet verdeel: die priester Eleásar en Josua, die seun van Nun.

<sup>18</sup> Daarby moet julle uit elke stam een owerste neem om die land as erfenis te verdeel.

<sup>19</sup> En dit is die name van die manne: van die stam van Juda—Kaleb, die seun van Jefúnne;

<sup>20</sup> en van die stam van Símeon se kinders—Sémuel, die seun van Ámmihud;

<sup>21</sup> van die stam van Benjamin—Elídad, die seun van Kislón;

<sup>22</sup> en van die stam van Dan se kinders as owerste—Bukki, die seun van Jogli;

<sup>23</sup> van die kinders van Josef: van die stam van Manasse se kinders as

owerste—Hánniël, die seun van Efod;

<sup>24</sup> en van die stam van Efraim se kinders as owerste—Kémuel, die seun van Siftan;

<sup>25</sup> en van die stam van Sébulon se kinders as owerste—Elísafan, die seun van Parnag;

<sup>26</sup> en van die stam van Íssaskar se kinders

as owerste—Páltiël, die seun van Assan;

<sup>27</sup> en van die stam van Aser se kinders as owerste—Ahíhud, die seun van Selómi;

<sup>28</sup> en van die stam van Náftali se kinders as owerste—Pedáel, die seun van Ámmihud.

<sup>29</sup> Dit is hulle aan wie die HERE bevel gegee het om die erfenis vir die kinders van Israel in die land Kanaän te verdeel.

**35** EN die HERE het met Moses gespreek in die vlaktes van Moab, by die Jordaan van Jérigo, en gesê:

<sup>2</sup> Gee bevel aan die kinders van Israel dat hulle aan die Leviëte van hulle erflike besitting stede gee om te bewoon; ook moet julle weiveld rondom die stede aan die Leviëte gee.

<sup>3</sup> En die stede moet vir hulle dien om te bewoon; maar die weiveld wat daarby behoort, moet vir hulle diere en hulle besitting en al hulle lewende hawe wees.

<sup>4</sup> En die weiveld van die stede wat julle aan die Leviëte gee, moet van die stadsmuur af buitentoe duisend el rondom wees.

<sup>5</sup> En julle moet buitekant die stad meet: aan die oostekant tweeduisend el en aan die suidekant tweeduisend el en aan die westekant tweeduisend el en aan die noordekant tweeduisend el, en die stad in die middel. Dit moet vir hulle as weiveld van die stede dien.

<sup>6</sup> En die stede wat julle aan die Leviëte gee, moet die ses vrystede wees wat julle moet gee, dat die een wat 'n doodslag begaan het, daarheen kan vlug; en daarby moet julle twee-en-veertig stede gee.

<sup>7</sup> Al die stede wat julle aan die Leviëte gee,

## Númeri 35

---

moet wees agt-en-veertig stede, hulle saam met hul weiveld.

<sup>8</sup> En wat die stede betref wat julle uit die besitting van die kinders van Israel gee—julle moet van die wat baie is, baie neem, en van die wat min is, min neem; elke stam moet van sy stede aan die Leviete gee volgens die erfdeel wat elkeen gaan kry.

<sup>9</sup> Verder het die HERE met Moses gespreek en gesê:

<sup>10</sup> Spreek met die kinders van Israel en sê vir hulle: As julle deur die Jordaan na die land Kanaän trek,

<sup>11</sup> moet julle gunstig geleë stede vir julle uitsoek; as vrystede moet hulle vir julle dien, dat die een wat 'n doodslag begaan het, een wat per ongeluk 'n mens doodgeslaan het, daarheen kan vlug.

<sup>12</sup> En die stede moet vir julle as toevlug dien vanweë die bloedwreker, sodat hy wat 'n doodslag begaan het, nie sterwe voordat hy voor die vergadering gestaan het om geoordeel te word nie.

<sup>13</sup> En die stede wat julle gee, moet vir julle, ses in getal, as vrystede dien.

<sup>14</sup> Drie van die stede moet julle oos van die Jordaan gee, en drie daarvan moet julle in die land Kanaän gee; vrystede moet hulle wees.

<sup>15</sup> Vir die kinders van Israel en die vreemdeling en die bywoner onder hulle moet hierdie ses stede as toevlug dien, sodat elkeen daarheen kan vlug wat per ongeluk 'n mens doodgeslaan het.

<sup>16</sup> Maar as hy hom slaan met 'n ystervoorwerp, sodat hy sterwe, dan is hy

'n moordenaar; die moordenaar moet sekerlik gedood word.

<sup>17</sup> En as hy hom slaan met 'n klip in die hand—waardeur iemand kan sterwe—en hy sterwe, dan is hy 'n moordenaar; die moordenaar moet sekerlik gedood word.

<sup>18</sup> Of as hy hom slaan met 'n houtvoorwerp in die hand—waardeur iemand kan sterwe—en hy sterwe, dan is hy 'n moordenaar; die moordenaar moet sekerlik gedood word.

<sup>19</sup> Die bloedwreker, hy moet die moordenaar doodmaak; as hy hom kry, moet hy hom doodmaak.

<sup>20</sup> En as hy hom uit haat stamp of met opset na hom gooi, sodat hy sterwe,

<sup>21</sup> of hom uit vyandskap met sy hand slaan, sodat hy sterwe, dan moet hy wat geslaan het, sekerlik gedood word; hy is 'n moordenaar; die bloedwreker moet die moordenaar doodmaak as hy hom kry.

<sup>22</sup> Maar as hy hom onvoorsiens, sonder vyandskap, stamp of enigiets sonder opset na hom gooi;

<sup>23</sup> of as hy enige klip waardeur iemand kan sterwe—as hy, sonder om dit te sien, dit op hom laat val, sodat hy sterwe, terwyl hy geen vyand van hom was en sy onheil nie gesoek het nie,

<sup>24</sup> dan moet die vergadering tussen hom wat doodgeslaan het, en die bloedwreker oordeel volgens hierdie voorskrifte.

<sup>25</sup> En die vergadering moet hom wat 'n doodslag begaan het, red uit die hand van die bloedwreker, en die vergadering moet hom laat teruggaan na sy vrystad waarheen hy gevlug het; en hy moet daarin

## Númeri 35

---

bly tot die dood van die hoëpriester wat met die heilige olie gesalf is.

<sup>26</sup> Maar as hy wat 'n doodslag begaan het, ooit buitekant die grens van sy vrystad gaan waarheen hy moes vlug,

<sup>27</sup> en die bloedwreker hom buitekant die grens van sy vrystad kry, en die bloedwreker hom doodslaen wat 'n doodslag begaan het, dan sal daar vir hom geen bloedskuld wees nie.

<sup>28</sup> Want hy moet in sy vrystad bly tot die dood van die hoëpriester; maar ná die dood van die hoëpriester mag die een wat 'n doodslag begaan het, teruggaan na die land waar sy besitting lê.

<sup>29</sup> En dit moet vir julle 'n regsinsetting wees in julle geslagte, in al julle woonplekke.

<sup>30</sup> As iemand 'n mens doodslaen, moet die moordenaar op verklaring van getuies gedood word; maar een getuie is nie genoegsaam om iemand tot die dood te veroordeel nie.

<sup>31</sup> Maar julle mag geen losgeld aanneem vir die lewe van 'n moordenaar wat skuldig is om te sterwe nie, want hy moet sekerlik gedood word.

<sup>32</sup> Ook mag julle geen geld aanneem om iemand vry te stel van die vlug na sy vrystad—sodat hy kan teruggaan om in die land te woon—tot op die dood van die hoëpriester nie.

<sup>33</sup> En julle mag die land nie ontheilig waar julle in is nie; want die bloed ontheilig die land, en vir die land word geen versoening gedoen vir die bloed wat daarin vergiet is nie, as net deur die bloed van hom wat dit

vergiet het.

<sup>34</sup> En jy mag die land waar julle in woon, nie verontreinig nie, omdat Ek daarin woon; want Ek, die HERE, woon in die midde van die kinders van Israel.

**36** EN die familiehoofde van die geslag van die kinders van Gilead, die seun van Magir, die seun van Manasse, uit die geslagte van Josef se kinders, het nader gekom en voor Moses en die owerstes, die familiehoofde van die kinders van Israel, gespreek

<sup>2</sup> en gesê: Die HERE het aan my heer bevel gegee om die land deur die lot as erfenis aan die kinders van Israel te gee; ook het my heer van die HERE bevel ontvang om die erfdeel van ons broer Selófhad aan sy dogters te gee.

<sup>3</sup> As hulle nou die vroue word van een van die seuns uit die ander stamme van die kinders van Israel, dan word hulle erfdeel van ons vaders se erfdeel weggeneem en gevoeg by die erfdeel van die stam waarby hulle sal behoort; so sal dan die erfdeel wat ons deur die lot aangewys is, ingekort word.

<sup>4</sup> En as die jubeljaar vir die kinders van Israel aanbreek, dan word hulle erfdeel gevoeg by die erfdeel van die stam waarby hulle sal behoort; so sal dan hulle erfdeel van die erfdeel van ons vaders se stam weggeneem word.

<sup>5</sup> Toe het Moses die kinders van Israel volgens die bevel van die HERE gelas en gesê: Die stam van die kinders van Josef praat reg.

<sup>6</sup> Dit is die saak wat die HERE aangaande

---

die dogters van Selóf-had beveel het deur te sê: Laat hulle die vroue word van hom wat goed is in hulle oë; hulle moet net trou in 'n geslag van die stam van hulle vader, <sup>7</sup> sodat die erfdeel van die kinders van Israel nie van stam tot stam oorgaan nie; want die kinders van Israel moet elkeen die erfdeel van die stam van sy vaders vashou. <sup>8</sup> En elke dogter wat 'n erfdeel kry, uit die stamme van die kinders van Israel, moet die vrou word van een uit die geslag van die stam van haar vader, sodat die kinders van Israel elkeen die erfdeel van sy vaders kan erwe. <sup>9</sup> So sal dan 'n erfdeel nie van een stam na 'n ander stam oorgaan nie; want die stamme van die kinders van Israel moet

elkeen sy erfdeel vashou.

<sup>10</sup> Soos die HERE Moses beveel het, so het die dogters van Selófhad gedoen:

<sup>11</sup> Magla, Tirsa en Hogla en Milka en Noa, die dogters van Selófhad, het die vroue geword van die seuns van hulle ooms;

<sup>12</sup> hulle het die vroue geword van manne uit die geslagte van die kinders van Manasse, die seun van Josef. So het dan hulle erfdeel gebly in die stam van die geslag van hulle vader.

<sup>13</sup> Dit is die gebooie en die verordeninge wat die HERE deur die diens van Moses die kinders van Israel beveel het, in die vlaktes van Moab by die Jordaan van Jérigo.